

浆地



元 脱 脱 等撰

中 華 書 局

卷三〇一至卷三一五(傳) 九

第

册

## 宋史卷三百一

### 列傳第六十

章 邊 覿 頻 肅 袁抗 梅 陳 琰 詢 徐 李 馬 宥 起 元方 張旨 張 秉 薛 田 張 齊 擇行 廓 寇 瑊 鄭驤 鄭 楊 向 日嚴 郭 李行簡 稹 趙 賀

帳 使 魏 司,以會財用之數,命肅主之。 羽薦爲戶部判官, 邊肅字安國,應天府楚丘人。 祀南郊, 超薦尙書度支員外郎。 帳成,遷工部郞中。 進士及第,除大理評事、知於潛縣,累遷太常博士。 帝以三司鈎取無法,至道初,置

是地 詔 不 屢震, 發, 真宗幸大名府,命肅經度行在糧草。 督 城堞摧圮, 丁壯 乘城 而 無守備, 闢諸門, 帝在 悉所部兵陣以代之。 澶州,密韶 改判開拆司,出知曹州,徙邢州。 肅 「若州 騎傅城下,肅與戰小勝,契丹莫測也, 不可守,聽便宜 南保他城。」肅匿 會契丹大入,先

九九八三

列

傳

第

六

+

邊

肅

榳

眴

居三 日, 引 時鎭 、魏、深、趙、磁、洛六州閉壁不出,老幼趨城者,肅 悉開門 納之。

正以章示之, 貿易規利 府 使,起知 、累遷給 擢 樞密直 造 光州,以泰寧軍節度副 事 更彊 1 肅引伏。 學士,徙宣州。 以王 市民羊,買女口 嗣宗代肅。 以守城功,止奪三官,貶岳州 車駕朝陵、徙河南府。 1自入。 使徙泗州,又徙泰州 嗣宗與肅有舊隙, 嗣宗上其事,帝以肅 還, 團 諷 練副使。 通判東方慶訟肅 勾當三班院。 近 臣,不欲屬吏,遣劉綜 久之,徙武昌、安遠軍節 出知 前 天雄軍 在 州, 私 徙真· 以 公 任 錢 中

子調 ,終尙書兵部員外郎、福建路轉運使。 副

著作佐郎、御史臺推勘官,預考進士於崇政殿,眞宗過殿廬,奇其占對詳敏,召試中書, 梅詢字昌言,宣州宣城人。少好學,有辭辨。 進士及第, 爲利豐監判官。 後以秘書省

集賢院

以爲遇主知, 羅支,使自攻取。 遷攻靈州急,吳淑上書請遣使諭溱、隴以西諸戎,使攻繼遷。 屢上書陳論西北事。 帝問誰可使羅支者,詢請行,未至而 時契丹數侵河北,詢請遣大臣臨邊督戰,募遊手擊敗。 靈州陷。 還,爲三司戶部 詢亦請以朔方授潘 判官。 詢自

义 論曹瑋、馬知節才可用, 傅潛、楊瓊敗當誅, 川紹斌、 王榮等可責其效以贖過, 凡數十

事,其言甚壯

昭 貶 瞱 就 文館 犪 子省 司] 徙 州 兩 帝欲 判流內銓,爲翰林侍讀學士、羣牧使。 浙 親 惠 知荆南, 一練副 轉運 命知 疾 而 、制誥,李沆力言其險薄望輕,不可用。 使。 副使,判三司開拆司。坐議天書,出知濠州。爲湖北轉運使, 馬死,奪官一級,降通判襄州。知鄂州 擢龍 又以善寇準,徙池州。 圖閣待制,糾察在京刑獄。 起 累遷 知廣德軍,歷楚、壽、陝州。 給事中、 歷龍 ,徙蘇州 後斷田訟失實,降通判杭州,知蘇州 圖閣直學士、樞密直學士,知通 知審官院。 ,爲陝西轉運使。 復直集賢院,改直 擅假 坐薦舉朱能, 驛馬與邵 進銀

之數 何? 出 炳 外者。 然 ,蓋倍於前矣。」因詔 在目,作鑒後王。 」詢對曰:「先帝所作,蓋述前代帝王恭儉有 仁宗 御邇英閣, 天禧中,張 知白罷參 讀(正 自五代之季,生齒彫耗,太祖 三司 說養民篇, 知 及編修院檢閱以聞。 政 事,領此職,始出知大名府。非歷 覽歷代戶口登耗之數, 節, 病足,出知許州,卒。 受命,而太宗、眞宗休養百 則戶口充羨; 顧謂侍臣曰:「今天下民籍幾 賦斂無藝,則版圖衰減 二府而 故事 出者自 了,侍讀 姓,天下戶 詢 學士 始 <del>1</del>111:

至 矣。」旣而 詢 性 十急 呂 1夷簡 好進, 通 而 判州 侈於奉養, 事,故待之甚厚。 至 老不 衰。然數爲朝廷言兵。在濠州 其後,援詢於廢斥中,以至貴顯,夷簡力也。 ,夢, 人告曰:「呂丞相

列

傳

第

六

+

榳

詢

馬

元

方

馬元方字景山,濮州鄄城人。 父應圖,嘗知頓丘縣,太宗攻幽州,應圖部芻糧,沒虜中。

元方去髮爲浮屠,間行求父尸,不得,訴於朝。 上哀之,爲官其兄元吉

| 翻軸 丞。 戶部使陳恕奏爲判官,元方言:「方春民貧,請預貸庫錢,至夏秋,令以絹輸官。」行之, 轉餉踰瀚海,多失亡,獨元方所部全十九。以勞,遷本寺丞,爲御史臺推勘官,遷殿中 元方,淳化三年進士及第,爲韋城縣主簿,改大理寺評事、知萬年縣。 諸將討李繼

府。以樞密直學士知幷州,留再任,賜白金五百兩,詔中書諭以委屬之意。 使,知應天府,累遷太常少卿。 遷 公私果便,因下其法諸路。 言詆之,所以賈怨。」帝曰:「僚屬顧不有賢俊邪!」 歲餘,以煩苛罷。 曰:「元方在三司,何多謗也?」王旦曰:「元方盡心營職,然其性卞急,且不納僚屬議, |轉運使。按部至||濮州,被酒毆知州||蔣信,降知||宿州,下詔切責之。徙||渭州,爲||京西轉運 知徐州,改太常博士、梓州路轉運使。 **擢右諫議大夫、權三司使公事,衆論不以爲允。 眞宗謂宰臣** 後知鄆州,量括牧地數千頃。爲京東轉運副 進給事中、權知開封 官至兵部侍郎, 而醜

延州 ,辟爲從事, 薛田字希稷,河中河東人。 向敏中至,亦薦其材。改著作佐郎、知中江縣。 少師事种放,與魏野友善。進士,起家丹州推官。李允正知 眞宗祀汾陰,田時居父喪,

起通 私爲券以便交易,謂之「交子」,而富家專之,數致爭訟。 經度制置使陳堯叟奏起通判陝州。 判亳州。遷殿中侍御史、權三司度支判官,改侍御史、益州路轉運使。民間以鐵錢重, 還,拜監察御史,以母憂去。 田請置交子務,以權其出入,未報。 會祀太清宮,又用丁謂奏,

及寇瑊守益州,卒奏用其議,蜀人便之。

知天雄軍 、內寇,特遷右諫議大夫、知延州。 就除陝西轉運使,進直昭文館、知河南府,復入度支爲副使。使契丹還,擢龍圖閣待制、 未幾,擢知開封府,以樞密直學士知益州,累遷左司郎中。 久之,以疾徙同州,又徙永興軍,辭不行,卒。 代還,知審刑院。 羌

田性頗和厚,初以幹敏數爲大臣所稱,後屢更任使,所治無赫赫名。

寇城字次公,汝州臨汝人。 列 僔 第六十 嶭 田 寇 瑊 初,母夢神人授珠,吞之而娠, 生而眉目美秀。 九九八七 擢進士,授

蓬州 軍 事 推 官 李 順 餘黨謝才盛等復起爲盜,喊設方略, 擒送京師

募 爲 高 <del>入</del>入 州 徙 官族 米, 開 封 償 推 以 未幾 鹽, 會施 ,溪南蠻復 軍 食遂足, 州 蠻 叛, 內寇,城 而民 轉運 力

行

力

行

。 使移城權 率衆擒其 復 招 領 **酋領戮之,以白艻子弟** 論高 施 州 州 刺 先是,戍兵 史 田 彥 伊 子 仰 承寶 他 數百 州 飽糧 入朝 (築棚, 得 城 守其 給 至 印 險 紙 請

要。

試, 常 中 侍 博 其爲脫鎭撫之。」命爲 御 士 就 史, 除 通 大理寺 判 爲開 井州 封 丞、 改 府 監 知開州,遷 判 察 官。 梓 御 州 史。 嘗 路 奏 一殿中丞、 眞宗 轉 事 運 , 帝 使。 祀 詢 汾 通 施 判 陰 州 河南府。 主 備禦之 一嗣宗. 知永 術 坐解送諸料失實,降監晉州 , 興 因 諭 之日: 辟 權 通 東川 圳 控 專 蠻 領 夷 祠 事 阚 功 遷 以 殿 太

其上, 及 |移 北 酒 趨 悦等 食、針 戎州 晏州 老 夷 州 多剛 梳 人 刺 盡 執刀 史及 取 縣 衣服等,付以大榜,約大軍至,揭榜以別逆順,「不殺汝老少,不燒汝欄 公 酋 劍 八 私 「斗望級 姓 舟 謂之 鳥 載 蠻首 糧 瀘 打 甲, 州 誓, 領 燒清 具音 使斷 呼 井監 樂, 賊 合兩 誓與漢家同心擊賊。 徑。 殺官 路兵至 用夷法 吏。 植植 江 瑊 安, 趨 竹爲 富 誘 順監 納溪、 誓門,橫 卽 刺 , 命部 藍 牲 的繁猫 血 兵 順 和 多張 史箇 酒 犬、 而 旗 松 飮 幟, 鷄 栅。 各 踰 瑊 給 一於 南 Ш 夷 圞 廣 匹

赦 陣,破之。 貸其罪,復來寇邊,聲言朝廷且招安,得酒食衣服矣。 夷競起爲邊害矣。」韶發陝西兵,益以白芳子弟合六千三百人, 帝遣內殿崇班王懷信議攻討招輯之宜,城奏三人嘗於二年春燒済井監,殺吏民。 夷人相率來附,納牛羊、銅鼓、器械甚衆,而斗望獨旅拒不從。 若不討除,則戎、瀘、資、榮、富順監 緣消井溪轉門, 城命懷信分兵拔 凡十

其棚, 悍千人,分五都以隸禁軍,爲寧遠指揮,使守淯井監。 史,召爲三司鹽鐵判官,逾月,出爲河北轉運使。 師,懷信等格戰,城乘其後,大破之。 與都巡檢使符承順進戰思晏江口,斗望等始驚遽,勢稍却。 斗望衆萬餘,囂不能軍,溺死者衆,遂降。 更建砦栅,濬三壕以環之。 明日,復分三道來 因籍 就加侍御 軍 一之勇 拒王

以右諫議大夫、集賢院學士知益州 去,衆頗異之。 三分之一,而塞下軍儲不給。 天禧中, 河決澶淵。 遷工部郎中,上言:「契丹約和以來,河北滅戍卒之半,而復刺士兵, 請行入中、鑿頭、便糴三說之法。」入爲三司度支副使。 須臾, 其實益 水爲 折

役,藏言:「病民者特健芻耳,幸調率已集,若積之經年,則朽腐爲棄物,後復興工斂之,是重 仁宗卽位,遷給事中。 降少府監、 知金州,復右諫議大夫。會河決,徙知滑州,總領修河。 城與丁謂厚善,帝謂輔臣曰:「城有吏幹,毋深譴也。」徙鄧州 旣而以歲飢罷

列傳

第

六

+-

窓城

楊

日殿

困也。」乃再詔塞河。 河平,擢樞密直學士。

不敢亂天下法。」卒冤死。 更赦事發者。 商旅不行,而邊民困於餽運,茶法豈可以數更?」帝然之。 者,帝訪以利害,赋曰:「議者未知其要爾。 明 (年,復給事中、知秦州, 又坐失舉奪一官。 召權三司使,復其官如故。 太后怒曰:「夫婦齊體,奈何毆致死邪?」」減對曰:「傷居限外,事在赦前,有司 天聖末,再使契丹,未行而卒。 河北入中兵食,皆仰給於商旅。 權知開封府,戚里有毆妻至死, 若官盡其利,則 時有議茶法

刺之。 財,通音律,知術數。 |瑊 少孤, 鞠於祖母王氏,及登朝,以妻封邑回授之, 初附丁謂,故少達,及謂敗左遷,鬱鬱不自得,秘書丞彭齊賦喪家狗以 朝臣得回封祖母自城 始。 性頗. 疎

理寺丞,又爲本寺檢法官, 楊 日 嚴字垂訓,河南人。 監都進奏院,通判屠、陳二州,判吏部南曹兼登聞鼓院。 進士及第,試秘書省校書郎、知安丘縣。 三司辟爲檢法官,遷 出

襄州,徙廬、鄲二州曰,入爲開封府判官。

使契丹還,爲兩浙轉運副使。 未行,會情、徐饑,改京東轉運使。 因請江、淮、陝西轉粟

轉運使,又徙江、准制置發運使。 五 十萬,以脈貧民,又開淸河八十里抵暖水河,並堤起倉廩,以便漕運。 還,歷三司戶部、度支、鹽鐵副使。 累遷太常少卿,以右諫 加直史館,徙益州

議大夫、集賢院學士知河中府,加樞密直學士、知益州。

馬也。 權 對,猶從容言:「遠方所宜撫安之,無容變法以生事。」遷給事中,以龍圖閣學士知澶州。 高其估,募輸錢就市爲己業,人苦其擾。又陝西奏收市益、梓、利路溪洞馬,而不知其實無 知開 時用兵伐元昊,三司急財用,有詔析戶版爲十等,第賦役;民以歲租占佃官田廬者, 日 嚴 封府,吏械囚不謹,囚自殺,坐是罷府事。 日嚴皆奏罷之。 初爲益州轉運使,無他治能,及知益州,頗爲閩人所信愛。 遷勾當三班院、知通進銀臺司。 判太常、司農寺,同知審官院,卒。 聞後爲守者,其政不便蜀人,因 兄日華,歷官至太常少 進 召

卿 三司副使。

學書,筆法道 李行簡 字易從,同州 勁。 與里 中 富 馮翊人。 人楊士元同學,旣而同時中進士第,士元資遺行簡,謝不取。 家貧,刻志於學,讀六經每至夜分,寒暑不易。 又聚木葉 起

列 傳 第 六 十 李 行 簡 章 頫

家隴州司

理參軍

,徙彭州軍事推官。

改 秘 書省 陵 州 著作 富 民 . 郎 陳子美父死, 再遷太常博士、知坊州。 繼母詐爲父書逐出之,累訴不得直, 御 史中丞王嗣宗薦爲 監察御史,王旦數稱 轉運使檄 行簡 劾正 工其獄。 其才,

眞宗雅亦知之,再遷侍御史。

爲 徙魏州,卒。 刑 長 部 者。 鄓 陜 中。 西 早蝗, 久之,拜右諫議大夫、集賢院學士。 帝數幸龍圖 命往安撫,發倉粟救乏絕, 閣, 命講周易,間 訪 又蠲 大臣: 乾興初,改給事中,以足疾請外,得知河 耀州積年逋租。 能 否, 行簡 所對 無怨 還,擢龍圖閣待制,歷尚書 昵, 各道 其所長 `中府, 人以

弟,棄去。 章頻字簡之,建州浦城人。 後六年,乃擢第。 自試秘書省校書郎、知南昌縣,改大理寺丞、知九隴縣,遷 與弟順皆以進士試禮部預選,會詔兄弟 毋並舉, 頻即 推 其

按, 必先盜印然後書。」旣引伏,獄未上,而其家人復訴于轉運使, 眉 無所異。 州 大姓孫延世僞爲券奪族人田,久不能辨,轉運使使按治之。 夢松用此入爲監察御史,頻坐不時具獄,降監慶州酒,徙知長洲縣 更命知華陽縣黃夢松覆 頻視券墨浮朱上,日:

按治 起 幼皆 土瑤 杒, 奔, 伏 誅。 增置諫官、 命安撫京西。 叉詔 **鞫**邓州 御史十二人, 還,爲三司 牙 校 訟鹽井事 頻 以 度 選得召對,稱旨 支 分判官。 皇城 使劉美 青州 麻 依倚 士: 擢監察御 盛殺從 后 家受財, 史。 子 温 裕, 陳、 使人市 亳間民訛 井 其財, 遣 言 兵 往

州 秘 可 書省 王氏 徙 頻 校 知 雅 含書郎, 潭州 時 善丁 賦民官田 謂 頻 改 |謂 坐謫 廣 貶, 西 轉 知 , 左遷尙書比 饒 歲輸租 運使,擿宜州 州 復 稅而已。 Ź 部 為度支判官 守貪暴不法,旣罷 員 外 至是, 郎、 監饒州 或謂鬻之可 累遷 刑 酒。 去, 部 郞 起 反 得緡錢二 知信州 中。 訟 頻子許嘗 +-進 餘 刑 被 萬 部 刑 員 頻 外郎、 而 疏 以 爲 知 腷

請捕

繫,眞宗以后

故

不問

忤旨,出知宣州,改

殿

一件

御

史, 遷侍

御史。

駝 柩 以歸 載 至 使 中京 契丹,至 訪官三班奉職,即 ~,斂以 紫濛館 銀 飭 棺 卒。 許 又具鼓吹羽葆, 契丹遣 也。 內 . ( 就 館 東士持甲兵衞送至白溝 命接 作 副 使吳克荷 韶遣其子訪 護其 喪, 以 乘 錦 、傅扈其 車 駕 槖

稅, 知金堂 陳琰字 澶州 臨河 再遷 太常博士 進 士及第, 轉運使盧士倫,曹利用壻也 歷 溧陽、 灓城 一簿,遷 怙勢聽獄 大 理 寺 丞、 不以直, 監 真定府

列

傳

第

六

+

陳

琰

李

宥

理。 者不已,付 憂除, 遷殿中侍御史。 琰 評 決, 琰直之。 御 史知雜韓億聞其事,奏爲監察御史。 丁父喪,哀毁, 墳木連

權,假 原赦。」帝然之。 術,厭魅 殺 無 赦。 天聖五. 息遐荒,冀移善地。 宮聞 丁謂 年祀南郊,中外以爲丁謂復還,琰上疏曰:「亂常肆逆,將而 因緣險佞,據竊公台。 易神寢龍岡,冀消王氣。 李德裕 止因朋黨,不獲生還; 賄賂 今裡柴展禮, 包苴,盈於私 渙汗推思, 室; 盧多遜曲事 威權 請謁,行彼 必慮 王藩,卒無牽復。 調潛 必誅, 輸琛貨, 公朝。 陰懷姦惡, 引 私 巫 結 請 師 杉 妖

使。 ·定計斗面」。積遷至尙書工部郞中,卒。 |汴倉納粮綱, 概量 爲三司度支判官, 遷侍御 不實, 操舟者坐亡失所載, ... 史。 歷京西、 河東、 河北轉河 或杖背徒重役。 運副使, 三司戶部、 |琰始奏選官監視,謂之 度支、 飅 鐵

副

山 水 ,至得意處,疑非筆墨所成。 李宥字仲嚴,唐之後裔,自吳徙凊,遂爲凊人。 人欲求者,先爲置酒,酒酣落筆,烟景萬狀, 祖成,五代末,以詩酒遊公卿間,善摹寫 世傳以爲寶。

父覺,

見儒林傳。

集賢校理,遂直院。 知蘄州,歲凶 人散,委嬰孩 而去者,相屬于道。 舉進士,調火山軍判官。 **宥令吏收取,**計 入館校勘書籍, П 給穀, 遷

常寺。 疑,召問,卒伸其枉。 夫知江寧府。 俾營婦均養之,每旬閱視,所活甚衆。 必不死。」宥得其情,論如法。 舊宗廟 五變, 民有告人殺其子者, 輔臣攝事, 府舍火,宥畏兵亂,闔門不救,降秘書監致仕。 中廢且久,止差從官。 曰:「吾子去家時, 或殺人,以米十石給傭者,使就獄,曰:「我重賄吏,爾 巾若巾,今巾是矣。」民自 **宥因對力言,遂復故事。** 起分司南京,改太子賓 誣 以諫議 服。

財,官賜錢十萬。 **|**宥性清介,然與物無忤,好獎拔士人。 外族甚貧,宥有別業,以劵畀之。 旣死, 家無餘 客,判留司御史臺,卒。

許昌裔叶議 張秉字孟節,歙州新安人。父諤,字昌言,南唐秘書丞、通判鄂州。 列 傳 第 歸款,太祖召見,勞賜良厚,授右贊善大夫。 六 + 張 秉 蜀平,選知閬州 九九九五 宋師南伐,與州將 太平興國中,即

議 除 置 西 Ш 威 櫂 轉 運 軍 分 副 隸管勾, 使。 先是, 自 是無覆舟之患。 土 人罕習舟楫, 累遷荆湖 取峽江中競渡者給漕運役, 覆溺常 江 浙 等道 制 置 茶 鹽 副 使, + 四 諤

俄換 文舘 前 多 州 退 知 遷監 爲 鹽 制 秉 遷右 誥 行 鐵 舉 判官、 察 內 進 諸 司 士,儀 御 諫。 曹 史, 度支 郎。 深爲宰相趙普所器,以弟之子妻之。 會以 狀 豐 員 至是, 外郎、 麗 趙昌言爲制置 屬屬 用此 詞 知 制 敏速,善書翰,太宗喜之, 制, 誥、 其後 判 一茶鹽 吏部銓 進改, 使, 秉與薛映副之。 多優遷首曹 知審官院。 會有薦 擢 寘 唐朝 遂 甲 入爲右 其才 · 隳舊制: 科 故 事 得 解 南 矣。 計 知 裼 省首 鄭 將 司 遷工 作監 河 州 曹罕 南 部 召 丞 西 郞 一、 通 兼 道 還 中, 掌 剉 直 判 依 宣

以 車 上 駕 母 覽之日:「若此 老貧 眞宗 將 幸 嗣 河 窶,詔給 Ě, 位 , 又 進 徙 裝錢,未行 秩 則 兵 知 是 滑州 部 先 郞 朝 中、 失 ,改江陵。 道 刑 判昭 出 矣。」遂除 章城 文館。 J 秉 母 秉 迎謁 時草 憂, 左 諫議 一般用 起 境上,俾預 復, 大 官 知河 夫, 制, 從官侍 南 有 連 府。 汀頃因 知願 景德 食; 微 襄 三州 累, 遣 初,徙 與齊州 謫 徙 於 河 陽 遐荒」之語 鳳 馬 換 翔 應昌 府, 澶 州 訴

周 起 同試 召 歸 東封路服勤辭學、經明行修舉人。 阙 復 判 吏部 銓(三) 拜工 部 侍 郎、 同 出知永興軍府,會祀汾陰,爲東京留守判官 知 審 官院、 通 進 銀 臺 司 糾 在 京 刑 復 轉 與

州

張

晟往

來

河

部

T

夫鑿凌,

以防

契丹

南

渡

禮部侍郎,加樞密直學士,復知幷州。 將行、怨求御詩爲餞,上爲作五言賜之。 徙相州 九

年四一,復糾察在京刑獄,暴疾卒。

甚貧,常質衣以給費焉。 好諧戲,人不以宿素稱之。 、東東藩府、無顯赫譽,及再至太原、臨事少斷,多與賓佐博弈。 好飭衣服,潔饌具,每公宴及朋友家集會,多自挈肴膳而往。 雖久踐中外,然無儀檢,

丞。 初,石亭縣掾檄將陵塞決河(m),衆欲登舟以濟,擇行獨以爲不可,皆笑其怯。 張擇行字行先,青州盆都人。 進士起家,歷北海、臨沂主簿,自宣州觀察推官爲大理寺 旣而 品舟果

覆,擇行坐堤上董役,埽卒不潰。

擇行以爲主命妾答婢,於律不當坐,御史固迫之,因中風不能語。 徽於兩使不當,語甚切。又論河北兵多、財不足,願分兵就食內地, 事,擢天章閣待制、知諫院,累遷吏部員外郎。 除監察御史、殿中侍御史,改言事御史、右司諫。 御史皆言宰相陳執中嬖妾笞小婢,死外舍。 與唐介、包拯共論張堯佐除節度、宣 除戶部郎中、 不報。 遷侍御史知雜

撰,提舉兗州仙源縣景靈宮,踰年而卒。

頹

鐵 郎、 誥、同勾當三班院。 判官。 知豪州 鄭向字公明,開封陳留人。 出 ,徙蔡州 為兩浙 轉運副使, 使契丹,再遷兵部郎中、提點諸司庫務,以龍 召試集賢院、未幾、除三司戶部判官、修起居注。 疏潤州蒜山 舉進士中甲科,爲大理評事、通判蔡州,累遷尚書屯田員外 漕河抵于江,人以爲便。 圖 閣直 復爲鹽鐵 遷度支員 學士知杭州,卒。 判官, 外郎, 擢 知制 爲 鹽

判,徙 薦櫃與買昌朝赴中書試講說,而櫃 居二歲,陳堯咨知大名,辟簽書府判官事,改大理寺丞。 者以其資淺, 郭碩 五代亂亡,史册多漏失,向著開皇紀三十卷,摭拾遺事,頗有補 通 判 字仲微,開封祥符 河南府。 罷還 入爲三司 河 南 時孫奭、馮元判監事, 度支、戶部 世寓鄭州,舉進士中甲科,爲河南縣 固辭。 判官,累遷尙書刑 召 試 學士院, 因 奏旗 爲集賢校理。 爽等復薦爲 學問通博, 部員 (外郎) 焉。 主簿。 直 他選莫能 同 馮元 講。 修 起 知 除國子監直講, 磢 居注 河 出 及, 陽, 知 兗州 乃得留。 辟爲 了; 又

議

康定元年使契丹,告用兵西鄙。 契丹厚禮之,與同出觀獵, 延旗 射。 |種 發中 走冤,

皆愕視,契丹主遺以所乘馬及他物甚厚。 既還,轉兵部, 知制誥,判吏部流內銓,擢龍圖閣

直學士、權知開封府。暴感風眩卒。

言櫃服喪爲過禮,詔下有司博議,用馮元等奏,聽解官申心喪,語在禮志。 婦張悍嫉,無子。 旗性和易,文思敏膽,尤刻意於賦,好用經語對,頗近於諧。 初,櫃幼孤,母邊更嫁王氏,旣而母亡,櫃解官服喪。 聚古書畫,不計其貲購求 知禮院宋祁年

論執盧杞正 顯; 日嚴、 命,其宜民可知。 城 論曰: 潚之守Ѭ,以羸兵却勍敵,開門納避難之民,功在王府。 行簡臨政, 視秉、 擇行、 、頻坐善丁謂,並遭斥謫,固無足議者。 相類,識者韙之。 |宥在蘄,則活饑氓; 在江寧,則直寃獄。吏之良者歟,然皆不能無小累也。 |琰言|||姦邪,不當用南郊恩牽復,與唐袁高 詢以厚呂夷簡, 元方爲幷州,有勤留之 復致貴

趙賀字餘慶,開封封丘人。 列 傳 第 六 + 趙 賀 少時,嘗喪明,久之,遇異醫輒愈。 喜飲酒,至終日不亂。事 九九九九

也。

改大

理評

事。

鹽池

一更欺緡錢,選賀往解州鈎校出入,賀悉得其姦

澶州 繼 母 至孝。 決河,衆多逸去,獨賀全所部而歸。 舉毛詩及第,補臨朐縣主簿。 臨朐父老張樂迎賀,準 賀有幹力,知州寇準且知賀。 使由譙門過,日:「旌賀之能 淳化中, 調丁 ,壯寨

爲 判 明州 「趙家關」,謂 契丹入寇,真宗決策澶淵,遣使八人省州縣,賀以太子中舍安撫京東。 ?、宿州 徙知漢州 如關梁不 可越也。 ,蜀吏喜弄法,而賀精明,吏不敢欺, 事更 賀所, 多被究詰, 改殿中丞 歷通

盗 堪 尋 司 二常數一 其役。 糾察 軍 ·將, 召權三司 在京 分部漕紅 百七 賀乃籍 刑獄,累遷尙書工部郞 + 戶部判官,眞補度支判官,出爲京東轉運副使,徙京西。 諸州物產厚薄,分劇易爲三等,視其功過自裁定,由是東巧不得施,歲漕米 ,舊皆由主東白遣云,受財不平,或數得詣富饒郡,因以商 中、提舉諸 司 庫務,爲江、准制置發運使。 又徙益州路轉運使, 販,貧者 發運 司 占隸 至 不能

議 伐 中,歷三司戶部、度支、 大夫知永興軍,徙鄧州。 石築堤, 蘇州 太湖 浚積潦, 塘岸壞, 自 鹽鐵 吳江 及並海 副使, 東赴海。 歲餘,判宗正寺,出知越州。 支渠 知延同秦三州、江陵府,累遷光祿卿,入判大理寺,以右 《多湮 流民歸占者二萬六千戶,歲出苗租三十萬 廢, 水侵民 田 坐失舉,降知濠州,改廬州。 韶賀與兩浙 轉運使徐奭 兼領 遷 刑 其 遷給 部 諫 鄓

事中,復判宗正寺,知鄭、櫒、壽三州,卒。

子宗道,終集賢校理。 在 臨朐時,用轉運使李中庸薦改官。 中庸沒,無子,質爲主葬, 圖其象, 歲時祠于家。

部, 兵部 償失。」奏罷之。 宦者挾富 召爲三司戶部判官,安撫河北。 嘉州守張約受財,貶通判杭州,徙知福州。 遷尙書屯田 進給事· 郎中,復入戶部、鹽鐵爲副使,遷右諫議大夫、河東都轉運使,加集賢院學士,判尙書刑 高觀字會之,宿州廝人。進士起家,爲嘉興縣主簿。後以孫奭薦,改秘書省著作佐郎,累 人請置場,募人夫採取之。 中、知單州,卒。 員外郎、通 王蒙正恃章獻太后親, 判泗州 燙, 韶定淮南場茶法,覿陳說利害,不報。 爲京西轉運使。 覿 日:「聚衆山谷間,與夷獠雜處,非遠方所宜, 多占田嘉州 入爲三司 , 徙益州。 鹽鐵判官, 詔勿收賦, 彭州廣晴、 歷陝西、河北轉運使, 覿又極論其不可。 **擢提點** 麗水二 利 州 峽地出金, 路 坐 月得不 刑 累遷 失察

子秉常,爲梓州路轉運使。

列

鄰於占城 廣州兵逆戰海中。 軍 ,累遷國子博士、知南安軍,擢提 撫 袁 石門 抗 水蠻寇融州, 字立之,洪州 兩 险建水栅二,據其衝,賊 值大風,有告鄰溺死者, 轉運使俞獻 南昌 人。 可機抗權 舉進 點廣南東路刑獄。 不得入,後因置成不廢。 <del>]</del>; 融州推官, 得同學究出 抗獨曰:「是日風勢趣占城,鄰未必死。」後 督兵糧 身, 浙東叛卒鄂鄰鈔閩、越,轉南海 調 陽朔縣 興謀 事 平,特遷 軍 主簿, 事 蠻治 衡州推官,改 薦 補 舟且至, 桂州 司 法 扰 與 理 刨

祿 數之半。 綾錦、鹿胎萬二千匹,抗言:「蜀民困憊,願少紓其力,以備|秦中他日之用。」是年郊祀, 如 山 少卿, 前 舊 制。 後五 還爲度支三司判官,以尙書金部員外郎爲梓州路轉運使,徙益州路。 部落仰此爲衣食,一旦失利侵侮,不 除江、准發運使,召爲三司 黎州歲售蠻馬,詔擇不任戰者卻之。 南京。 明堂覃恩,改 少 鹽鐵 府 監,卒。 副 i使。 抗奏:「朝廷與蠻夷互市,非所以 知費直幾馬 時抗老矣,爲御 也。 史所劾,器知宣州 臣念圖久安,不敢奉詔。」尋 時三司歲市上 取 利 也。 御

抗喜藏書,至萬卷,江西士大夫家鮮及也。 **航子陟,少刻厲好學,善爲詩,終殿中丞。** 

邑爲之空。」乃下約束禁止之。 度支判官。 知 楚州 徐起字豫之,濮州鄄城人。 樞密直學士張宗象薦之,擢提點廣南西路刑獄。 館伴契丹使,還奏:「所過州縣,使者旣去,官吏將校皆出郊旅賀,燕飲久之,城 出爲刑湖北路轉運使、部有戍卒殺人繫獄、其徒欲級之。 舉進士,試祕書省校書郞、知隰川縣, 入判三司開拆司, 積官尚書都官員外、 歷開封、三司

聞,亟往按誅之,分其徒隸他州。

洪州 福開諭之,衆感泣聽命。 凡三百萬。 , 徙兗州。 徙江西,知徐州,就爲轉運使。 有都巡檢虐所部,而部兵百餘人,持兵至庭下。州人大恐,起不爲動,以禍 與安撫使劉夔不相能,徙京西。 因按致其首,奏罷都巡檢。 募富室得米十七萬斛,振餓殍,又移粟以贍河北、京西 又徙江東,起請開長淮舊浦,以便漕運。 復爲度支判官,累遷秘書監、知湖州

卒。

保定 軍 張旨字仲微,懷州 司 法 一多軍 - ,上書轉運 河內人。 使鍾離 父延嘉,頗讀書,不願仕,州上其行,賜號嵩山 瑾 一,願補一 縣尉,捕劇賊以自效。 **瑾壯其請,爲奏徙安平** 虚土。 旨進

知

遂城

縣,

遷

著

作

佐

郎。

尉 前 後捕 盗 三百百 餘 人。 嘗與賊鬥,流矢中臂,不顧, 猶手殺數十人。 擢試祕書省校書郞、

後渒河 明 道 十里,疏 中, 准 南 泄 饑,自 支流注芍陂,爲 「
詣宰相
陳
救禦
之策。 斗門, 漑 田 命知安豐縣,大募富民輸粟,以給餓者。 數萬頃, 外築堤以備水患。 再遷太常博士、 旣而

知尉氏縣,徙通判忻州。

井,民 渠泥 日 據 二人心 險,敵必不來。」旨不聽。 覆積草, 兀昊反, 取 河 震恐。庫 水以飲 賊望見,以爲 特遷尙 有雜綵數千段,旨矯詔賜守 了; 賊 書也 斷其 田 水有 路。 城 員外郎、通判府州。 垂 餘。 就、寇大至, 旨夜開門, 督居民乘城力戰,賊死 率兵擊賊 乃聯 城卒, 州依 巨 木 卒皆東望 少 補 山無外城, 卻, 其罅, 以官軍 傷者衆, 呼萬 守以強 旨將築之, 歲, 壁 隨 兩 賊疑 弩。 解去。 旁, 使 中 以 以 民 州 外 救 將 功 不 出 至 相 遷 曰:「吾州 汲。 也 聞 都 復以 州 者 無

判 有 倘 謀 **熟清** 略 書刑部, ·,除閣 臣舉材 門 累遷光祿卿, 使, 堪 固 將 辭。 帥 進 召 知路、晉二州。 [對,改 部 郎 知 中、 邢 州 知 擢 鳳翔 以老疾,權判西京御 提點 府, 加 河 東路 直 史 館、 刑 獄。 知 史臺, 梓 范仲· 州 以 淹、歐陽脩 直 龍 圖閣 復言其驚武 知荆南。

外郎,徙

知萊

州

泰州 齊鄭 提 字公闢, 點 荆 湖 越州會稽人。 南路 刑 獄。潭州鞫繫囚七人爲強盜,當論 舉 進 土第, 自梧州推官累遷太常博士、 死。廓訊得其狀非強,付州使 知審刑詳議官, 劾 知

奏蠲 IF, 乃悉 除之。 冤 死。 歷三司度支、開 平陽縣自 馬氏 封 府 時稅民丁錢,歲輸銀二萬八 判官, 出爲 江 西、淮南轉迎使。 千兩,民生子,至壯 時 初 兼 《按察, 不敢束髮, 同時 奉使者, 原

競爲 明 舒 岢 湖三 刻邀聲 州 名 積官光 ,獨廓奉 禄 法 卿 如平 直 祕閣 時,人以爲長厚。 ,以疾分司 南京, 入判 改 鹽 祕 書監,卒。 鐵 勾院,加 史館 [(元)、 知 荆 南府,徙

歸侍 養。 越州 鄭 寬 將堂 柔恭 鄭方使湖南,雖 謹, 奏 鄭 人犯之不校。 及 唐父母垂 置 一不問,然士論薄之。 老,窮居鄉 弟唐 ,爲吉州 里,二子 口 理參 委而 軍. 之官,唐復久不歸省。 博覽 彊 記, 嘗 舉賢良方正,對策 於是罷唐, 合

康 繼 知乾州 英辟簽書 鄭 驤字 , 土龍 提 點 衞 州 益 河南 判官 州 路 事 刑 , 獄,爲三司 劉 登 從 進 德代繼英, 士第,更慶、汝、鄭、 度支判官。 叉表 驤 建言:「蜀人引江水 有 秦州推官 善狀, 進 改祕 官。 書省著作 漑 尋監· 田 , 左 率有禁, 藏 郎、 庫 遷 知 垣 歲旱利 人太常 曲 縣。 博

列

僔

铂

六

+

齊

鄭

鄭

骝

校

勘

記

一000六

不均,宜弛其禁。」又言:「京西旱,舊禁粟無出國門,可且勿禁。」

河北都轉運使,累遷尙書工部郎中,以疾知華州,卒。 泌、夏安期皆爲轉運使,泌先謫去,安期後至,不及賞,驤因辭不受,願命推功與二人。 已而州果無患。 河北轉運使,入爲度支副使。 慶曆中,與魚周詢刺陝西民兵十餘萬。 又爲河北轉運使。 河決德州,入王紀口,議欲徙州,詔驤往視之,還言州不當徙, 王則反,討平之。除天章閣待制、知鳳翔府。 除陝西轉運、按察使兼三門發運使,加直史館、 先是,皇甫 復爲

以徇榮,用心何其不同哉! 金,抗論 論 曰:歷觀數子,風跡雖不同,其爲政愛民,謙己利物,有古道焉。 互市,起振窮戢暴, **驤推功與人,皆無所愧矣。** 趙賀不忘李中庸,而齊廓兄弟棄親 若旨浚渒河,觀罷採

#### 校勤記

納溪藍 七同長編,但「个」作「介」。補「納」字。 順 史箇 松 納 」字原脫。按長編卷八一作「納溪、藍順州刺史史个松」,宋會要養夷五之

- 復判吏部銓 以上充掌。」上文已說張秉「判吏部銓」,此句亦當作「復判吏部銓」。「拜」是「判」字之訛,據改。 「判」原作「拜」。 按本書卷一六三職官志「吏部」條:「判流內銓二人,以御史知雜
- (日) 九年 承上文此當是景德九年,但景德只有四年。上文祀汾陰係大中祥符四年事,見本書卷八
- 眞宗紀,此「九年」當是大中祥符九年,此處失書紀元。
- 至 石亭縣掾檄將陵塞決河 按宋縣無「石亭」,此句疑有誤。
- <del>중</del> 宣徽 原作「宣撫」,據本書卷四六三張堯佐傳、長編卷一六九、綱目備要卷一

四改。

- 元 (主) 宋祁 原作「宋郊」,據本書卷一二五禮志、宋會要禮三六之一〇改。
- (4) 加史館 據本卷張旨、鄭驟傳例,「加」下當脫一「直」字。(4) 舊皆由主吏白遣 「白遣」,長編卷一〇一作「自遣」。

列傳第六十 校勘記

# 宋史卷三百二

### 列傳第六十一

范師道 王臻 魚周詢 李絢 何中立 賈黯 李京 沈邈 吳鼎 臣附 呂景初 馬遵附 吳及

除、炭二州,以殿中丞知克州,特遷監察御史。 見, 致堯覽之,數日:「潁、汝固多奇士。」舉進士中第,爲大理評事,歷知舒城、會昌縣,通判 王臻字及之,潁州汝陰人。始就學,能文辭。 曾致堯知壽州,有時名,臻以文數十篇往

也。 ii] 建議濬淮南漕渠,廢諸堰,臻言:「揚州召伯堰,實謝安爲之,人思其功,以比召伯,不可廢 知睦州。 濬渠亦無所益。」召爲三司度支判官,而發運司卒濬渠以通漕, 躁坐前異議, 降監察御 中使就營景靈宮、太極觀,臻佐助工費有勞,遷殿中侍御史,擢淮南轉運副使。 道復官,徙福州。 閩人欲報仇,或先食野葛,而後趨仇家求門,即死其處,以誣 時發運

列

第

六十

王臻

魚

周詢

仇人。 之,流海上,民乃定。 **臻辨察格鬥狀,被誣者往往釋去,俗爲之少變。** 又民間數以火訛 相驚 悉捕首惡杖

游 累遷 都 ,請如長定格,歸司三年。」皆可其奏。 子弟,驕惰不習事。 1 ·
肅然。 尚書工部 仁宗卽位,遷提舉在京諸司庫務,歷三司戶部、度支副使,撰龍圖閣待制、 以右諫議大夫權御史中丞,建言:「三司、開封府諸曹參軍及赤縣丞尉, 郎中。 姦人僞爲皇城司刺事卒,嚇民以取賕,糜購得其主名,黥竄三十餘人, 請易以孤寒登第、更仕宦書考無過者爲之。」又言:「在京百司吏人入 未幾,卒。隱剛嚴善決事,所至有風迹。 權知開 率用貴 封 府,

使陝 靜 侍 州 火 ,御史知雜事,爲三司鹽鐵副使。 11: 海 召爲 ,民無所失亡。以尙書屯 凸 三縣,遷太常博士、 魚周 刺 侍御 民 詢字裕之,開封雍丘人。 兵,判三司 史。 陝西用兵、科 理 通判漢州。 欠、 憑由 田員 愈煩數, 司。 外郎知真州,徙提點荆 時潤州城水洛,尹洙、鄭戩爭未決,詔周詢與都轉 早孤,好學。舉進士中第,爲大理評事,歷知南華、分宜、 城中 進起居舍人、知諫院, 命安撫京西路, 夜 有 火, 部衆救之, 還賜緋 湖 南 固 植 路 一 解, 衣 刑 劍于前日:「攘 銀 獄 乃以 。求便郡,知 魚。 公尚書戶 爲開 封 、部員 物者 安州 府判官,又 運使程 外 ,徙蔡 斬 郎 兼

戲相利害。 周詢是戩議,遂城之。 遷吏部員外郎,擢天章閣待制、知成德軍,徙河北都轉運

使,拜右諫議大夫、權御史中丞。

慶曆八年,手詔近臣訪天下之務。周詢對曰:

以謂唐季及五代,彊臣專地,中國所制,疆域非廣。及祖宗有天下,俘吳、楚、閩、晉,北 空虛之弊,縣官無煩費之勞,蓋賞信罰必,將選兵精之效也。 <u>捍濕粥,西服</u>完戎,所用甲兵,所入租賦,比之于今,其數尙寡。 然而摧堅震敵,軍府無 陛下患西陲禦備,天下繹騷,趣募兵士,急調軍食,雖常賦有增,而經用不足。臣

壞國法。而又官立鹽禁,驅民齎輦,蕩析恆產,怨咨盈路。去秋水旱繼作,今春饑饉相 舉卽大敗,小戰輒小奔。徒日費千金,度支不給,賣官鬻爵,淆雜仕流,以鐵爲錢,隳 丼,則公有羨財,私有餘力矣。 廩假貧民, 屬,生靈重困,於茲爲劇。今元昊幼子新立,逎朝廷寬財用、惜民力之時也,速宜經度, 以紓匱乏。 |商之利,改錢幣之法,宣布德澤,與民休息。 然後勸勉農桑,隱括稅籍,收遺利,抑兼 近元昊背惠,西方宿師。朝廷用空疏關茸者爲偏裨,以游惰怯懦者備行伍,故大 去武臣之庸懦,出守宰之貪殘。仍冀特發宸衷,出內帑錢助關陝費,使通 願委安撫使與本路守邊、掌計臣僚同議,裁滅冗兵,節抑浮費,禁止橫斂,

列傳

第

六 十

魚周詢

調、守選格者,居多困乏之嘆,行寡廉恥之風。官冗之弊,一至於此!願陛下特詔,進士 家於制舉、進士、明經之外,復有任子、流外之補, 負瑕釁、服興臺者, 亦寘班列。 七年,自然名器不濫,奔競轰息矣。 先取策論,諸科兼通經義,中第解褟,無令過多。其文武班奏薦并流外出官者,權停五 限,凡守一闕,動踰再期。 旣久,紛猥塞路,求人任事,適用者鮮,而又亟更數易,交錯道塗,額置有常,詔除無 陛下患承平寖久,仕進多門,人汚政濫,員多剔少,滋長奔競,靡費廩祿。臣以謂國 預閪籍、服武弁者,坐費水衡之給,虛計歲考之期;赴銓 歷年

之。而班行寖冗、序遷者衆。迺有地處藩宣、秩爲卿監,而未歷省府提轉,則爲沈抑。 內重外輕,何以求治?改絃易轍,正在此時。 知州者,一切停罷,則進擢得人,牧守重矣。 如兩任通判可充知州軍京朝官,依次除補。 **爵至關內侯,公卿缺,則以次用之,故良吏爲盛。 國家鑒諸侯專地之患,一切用郡守治** 陛下患牧守之職,罕聞奏最。臣聞漢宣帝勉厲二千石,其有治效者,增秩賜金,或 若治狀尤異,卽升省府提轉。 願詔兩府大臣, 選委兩制、臺諫官參舉,

知將帥之材,非文武兼備,則不可爲。我朝自二邊款附,久不用兵。近歲有西北之警, 陛下患將帥之任,艱於稱職。臣聞晏子薦司馬穰苴曰:「文能附衆,武能威敵。」是

博有謀、知兵練武之士,不限資級,試以邊任,臨軒敦遣,假以威權, 李漢超輩,闧外之事,俾得專之,無以謗讒輕有遷徙,使其足以取重,則安有不稱職之 奔北,進 補授帥臣,出於遽猝,非自卒伍,卽恩澤侯。 則 被擒,虧損 ,威靈,取侮 夷狄,命將之失,未有若今之甚也。 無信義以結士心,無莊嚴以正師律,退 願擇名臣,選舉深 如祖宗朝任郭進、 則

憂乎?

先物。 備,因循姑息,爲敵所窺,致元昊悖逆,耶律張皇。 未免屈己爲**民**,息兵講好,皆用苟安 宜講求其法。 帥,擇偏裨,使戢肅驕兵,飭利戎器,識山川形勝,用兵奇正。 姓以奉寇讎」者也。願陛下特議減三路兵馬之駑冗者,以紓經費,以息科斂。然後選將 之謀,而無經遠之策。此班固所謂「不選武略之臣,恃吾所以待寇而行貨賂,割剝 陛下患西北多故,邊情叵測,獻奇譎空言者多,陳悠久實效者少,備豫不處,理當 臣聞國家和約北戎,臂命西夏,偃革止戈,踰四十載。而守邊多任庸人,不嚴武 雖二邊異時侵軼,恃吾有以待之,庶幾無患矣。 河朔曠平,可施車陣,亦

軍: 數日,改知成德軍,未行,卒。帝嗟悼之,特贈尚書工部侍郎。 時執政及近臣所對多疏闊,仁宗頗嘉周詢詳敏。 知恩州張得一誅,坐失舉,出知永興

居 列 B 性和 傳 第 六 易,聞見該治,明吏事。 **十** 魚 周 詢 買 謡 在安州時,園吏見大蛇垂闌楯,即視之,乃周詢醉而 00 | 11

假寐,世傳其異。

**黯字直儒,鄧州穰人。** 擢進士第一, 起家將作監丞、通判襄州。 還爲祕書省著作佐

郎、直集賢院,遷左正言、判三司開拆司。

戒勵 恐自 方獄 泪. 論以為: 辱隨之, 窮詰。 執政又患言事官旅進、論議上前不肯止。 此貴幸近 將駁正,忤執政意,執政以他罪絀樞。 「今得進見言事者,獨諫官、 非所以開廣言路。 醫奏:「諫官、御史,迹旣疏遠,未嘗預聞時政,不免採於傳聞,一有失言,而詰難 習、言一得入、則將陰肆讒毁、害及善良、不可不察。」時言者或論事亡狀、輒 少遭遇,備位諫官,果於言事。 請如唐太宗用王珪、魏徵故事,每執政奏事,聽諫官一人隨 御史,若然,言路將壅,陛下不得聞外事 首論韓琦、富弼、范仲淹可大用。 乃詔 醫言:「<u>樞無罪,且旨從中出,不因臣下彈奏</u>。 :「凡欲合班上殿者,皆禀中書俟旨。」黯 杜樞覆張彦 矣。 請 如故

蹤不一,則下將無所適從。 儂 智高反,余靖知桂州,楊畋安撫廣南東、西路,皆許便宜行事。 又憐專節制西路,若賊東嚮,則非憐所統,無以使衆,不若丼付 |黯| 二人臨 事,指 便。」皆弗許。

以詔令從事,毋用例。 <u></u>媾經制兩路。」從之。 皇祐四年,同修起居注,徙判鹽鐵勾院,遷左司諫。 扶建大業,平定列國,有忠勳者,不可勝數。 下其說諸路,而論者不一, 鱷亦反復辨析, 卒不果行。 論者以爲非便,黯奏罷之。狄靑除樞密副使,黯言:「國初武臣宿將, 然未有以卒伍登帷幄者。」不報。 宰相劉沆請中外薦舉陳乞,一切 建言天下復置義 會靈觀災,又

是,乃罷焉。 政體,而史臣不得預聞,請丼召侍經筵。」許之。 目還中書,命遂寢。 初,仁宗視事退,御邇英閣,召侍臣講讀,而修起居注官獨先出。黯言:「君臣訪對,動關 直龍圖閣錢延年擢天章閣待制,黯當命辭,即詆延年不才,不宜汚侍從,封詞 。一初,邇英、延義二閣,講讀官自有記注。

言:「天意所欲廢,當罷營繕,赦守衞者罪,以示儆懼修省之意。」擢知制誥。

而去。 判吏部流內銓。 歸奏劾,廢終身。<br/>
福州推官劉抃挾數術,言人禍福,多遊公卿門,歸奏以爲靈臺郎。 益州推官桑澤(1)父留鄉里,死三年矣。澤爲弗知者而調京師,旣覺

非人主推赤 官候謁宰相,並於政事堂;樞密使亦須聚坐接見,以防請託。令下,左正言謝泌上書,以謂 知許州,乃言:「他官皆得見執政,而侍從近臣,反疏斥疑間如此。 時詔兩制、兩省官惟公事許至中書、樞密院見執政,羣臣心知其非,而嫌於自言。後黯 心待大臣,大臣展四體報人主之誼。」卽時追寢前詔。 **嘗聞先朝用王禹偁請,百** 

未行,疾愈,復以爲翰林學士、知審官院。 坐言陳升之不當柄用,皆外補。 輒委州印,撓朝廷法,絀知郢州。 他 日,疾且亟,黯內懷不自安,請徙郡及解官就養。 徙襄州, 迎父之官,而父有故人在部中,遣直廳卒致問。 | 黯奏/介等敢言,請寬之。以疾請郡,改侍讀學士、知鄧州。 未及行,父死。 服除, 勾當三班院, 爲翰林學士。 不報,乃棄官去。 | 顯輒答卒,父恚,一夕歸 而御史吳中復等劾黯 唐介等 鄉

詔書,自某品而上,以禮律從事。」詔非嫌名及二名,不以品秩高下皆聽避。 詔:『除官犯私諱者,三省御史臺五品、文班四品以上,許用式奏改,餘不在此制。』請約雍熙 者,不坐。』今官吏許避嫌名,則或有如此而不自言者,可坐以冒榮之律乎?國朝雍熙中,嘗 官稱犯祖父名而冒榮居之,又上書若奏事犯祖廟諱,罪皆有差。』又曰:『若嫌名及二名偏犯 時官吏有以祖父嫌名,援律爲請授他官。 **黯言:「禮不諱嫌名,二名不偏諱,律:『府號、** 

者,皆數外補之,黯請敍者須有闕乃補。 怠於視囚, 累遷尙書左司郎中、權知開封府。 陳經、呂誨、傅堯俞,諫官司馬光、龔鼎臣、王陶,皆言歸剛愎自任,赦書下府,罪應釋 飢渴疾病,因以致死,請歲計死者多少而賞罰之。」府吏額七百人,以罪廢復敍 兩軍獄囚歲瘐死者衆,而吏不任其責。 然所斷治,或出已見,人不以爲允。 御史中丞王疇 黯言:「吏或

者反重行之。罷爲同提舉在京諸司庫務。

制議,請如黯奏。 世因循弗思之過。請自今皇子及宗室屬卑者,皆毋兼師傅官,隨其遷序,改授三公。」下兩 檢校太傅。黯言:「太師、太傅、太保,是爲三師,天子之所師法。 英宗卽位,遷中書舍人。受詔撰仁宗實錄,權知審刑院,爲羣牧使。 而中書亦謂:「自唐以來,親王無兼師傳者。國朝以三師、三公皆虛名,故 。子爲父師,於義不可,蓋前 時封拜皇子,並除

御 因而授之,宜正其失。」詔可。 史,知其方正謹厚,一時公言,非有嫌怨,願終與共事,誨乃就職。 遷給事中、權御史中丞。 未幾,以呂誨知雜事,海嘗彈治黯,逡巡引避。 **黯言嘗薦海爲** 

時帝初卽位,王廣淵、周孟陽以藩邸之舊,數召對。歸言:「俊乂滿朝,未有一被召者,

謂黯曰:「朕欲用人,少可任者。」黯對:「天下未嘗乏人,顧所用如何爾。」退而上五事:一、知 獨親近一二舊人,示天下以不廣。請如太宗故事,召侍從館閣之臣,以備顧問。」帝嘗從容 人之明,二、養育以漸,三、材不求備,四、以類薦舉,五、擇取自代。

背經義,建兩統貳父之說,故七廟神靈震怒,天降雨水,流殺人民。」旣病,求出,以翰林侍讀 疏言:「簡宗廟(三),逆天時,則水不潤下。今二三執政,知陛下爲先帝後,乃阿諛容說,違 學士知陳州。 後與兩制合議,請以濮王爲皇伯,執政弗從,數詣中書爭論。 未行,卒,年四十四。 口占遺奏數百言,循以濮王議爲請。 會大雨水,時點已被疾, 贈尙書禮部侍郎。

列

一〇〇 一 八

朝數言事 初 ,或從或否,人稱其介直。 母陳歸宗,繼母史在堂,後迎陳歸,二母不相善,黯能安以事之。 然卞急,初通判襄州,疑優人戲已,以人菌噉之。在開 黯修潔自喜,在

財,為罪人所詈,又噉以人菌,言者亦以是詆之。

也。 常膳,故精意感格,日當食而陰雲蔽虧。雖宋景公之熒惑退舍,商大戊之桑穀並枯,無以異 法嚴正,更不便,欲以苛中<u>京,遂相率遁去。 監司果議以苛刻斥京,知府任布曰:「如此,適</u> 墮吏計中。」京賴以免。徙永昌縣,通判趙州。王拱辰薦爲監察御史裏行,遷監察御史。 皆悅豫也。 十年,震動不已,豈非西、北二邊,有窺中國之意乎。二月雷發聲,在易爲豫,言萬物出地, 然臣區區竊有所疑者,自實元初,定襄地震,壞城郭,覆廬舍,壓死者以數萬人。 殆今 時,太史言日當食不食,羣臣皆賀。 京上疏曰:「陛下因天之戒,恐懼修省,避正殿,滅 李京字伯升,趙州人。進士中第,歷平定軍判官、冀州推官,改大理寺丞、知魏縣。 八月收聲,在易爲歸妹,言雷聲入地,避羣陰之害也。今孟夏雷未發聲,豈非號

聞復召入, 臣慮假媚道以爲蠱惑, 宜亟絕之。<u>苗繼宗嬪</u>御子弟, 乃緣恩私, 爲府界提點。

令不信乎?願陛下飭邊臣備夷狄,戒輔臣愼出命,以厭禍于未形。又尙美人棄外館多年,比

宜 一割帷薄之愛, 重名器之分,庶幾不累聖政。」仁宗嘉納,授右正言、直集賢院、同管勾國子

監,加史館修撰。

歸。 險包藏,甘爲鷹犬,惟陛下察之。」未幾,卒官。 **寔僚友,**鼎臣 臣與寔爲朋黨。 以告中丞高若訥。 言:「臣 向者 會推直官李寔歲將滿,因簡鼎臣宜留寔補御史,鼎臣亦謂議協公望,不意逾兩月,乃誣 數上 .為御史諫官,首尾五年,凡六上章、四親對,自陳疾故,懇求外補。 在臺,見入閣圖,三院御史立班各異。 書論事, 鄉曲之舊,鼎臣爲御史,臣延譽推引,實有力焉。 臣初被黜,閱諸橐中,鼎臣所遺私書別紙故 宰相賈昌朝不悅。 若訥 爲鼎臣上京簡,謫京太常博士、監鄂州稅。 京嘗屬侍御史吳鼎臣薦推直官李寔,鼎臣希昌朝意 詔錄諶爲郊社齋郎。 聞元日將入閣,而御史王贄、 在, 待之不疑,因以誠告,豈謂傾 臣令男諶亟悉焚毁。 既至,引令狐 臣之出處,粗有 何郯皆謁 峘 錢徽事 臣 雎

|北體量安撫,令經度塘水利害,而|||臣更顧望,依違不能決。 復與諫官、御史言媡論議與陳執中異,不可共事 朝廷方與契丹保誓約,而楊懷敏增廣塘水,輒生事,民或怨叛,雖斬懷敏,無及矣。」遂爲河 鼎 棣州人。既逐京,會昌朝罷,夏竦自北京召爲相。 。陳旣罷,遂以刑部員外郞 鼎臣先論陝在抖州杖殺私僕, 昌朝與都轉運使施昌言議河 知諫院。 上言:

列傳

第

六

+

李

京

呂景初

事不合,鼎臣自度支副使拜天章閣待制,代昌言,數月卒。

郎、 知夏陽縣,僉書河南府判官,通判抖州。 呂景初字沖之,開封酸棗人。以父蔭試秘書省校書郎,舉進士,歷汝州推官,改著作佐 高若訥薦爲殿 中侍御史。

張貴妃薨,有司請依荆王故事, 輟視朝五日, 或欲更增日, 聽上裁, 乃增至七日。

言:「妃一品當輟朝三日,禮官希旨,使恩禮過|荆王,不可以示天下。」 妃旣追册爲皇后,又詔言:「妃一品當輟朝三日,禮官希旨,使恩禮過|荆王,不可以示天下。」 妃旣追册爲皇后,又詔

立忌,景初力爭,乃罷。

何時而息。 不在衆也。 度充足者,兵少故也,而所征皆克。 奔,致勇者亦相牽以敗。 勇健,能捍寇敵,竭民膏血以啗之,猶爲不可,况羸疾老怯者,又常過半,徒費粟帛,戰則先 虛竭,利源已盡,惟有減用度爾。 時兵冗,用度乏,景初奏疏曰:「聖人在上,不能無災,而有救災之術。今百姓困窮,國用 望韶中書、樞密院,議罷招補,而汰冗濫。」 議者屢以爲言,陛下不卽更者,由大臣媮安避怨,論事之臣,又復緘默, 當祖宗時,四方割據,中國纔百餘州,民力未完,耕植 用度之廣,無如養兵。 自數十年來,用數倍之兵,所嚮必敗。 比年招置太多,未加揀汰。 以此,知兵在精, 一未廣, 若兵皆 則此弊 然用

道。 之列,擇其忠信通治道者,屢詔而數訪之,幸甚!」又與言事御史馬遵、吳中復奏彈梁適與 劉宗孟連因,而宗孟與冀州富人共商販。 雖願治如堯、舜,得賢如稷、契,而未至於治者,抑由此也。 又言:「坐而論道者,三公也。今輔臣奏事,非留身求罷免,未嘗從容獨見,以評講治 下開封府劾治,所言不實,皆坐謫,景初通判江寧 願陛下於輔臣、侍從、臺諫

府。徙知衡州,復召還臺。

蓋以未立皇子,社稷有此大憂。惟陛下蚤爲之計,則人心不搖,國本固矣。」數詣中書白執 萌,或尹京典郡,爲夾輔之勢。」時狄青爲樞密使,得士卒心,議者憂其爲變。景初奏疏曰: 漢皇子,多封大國;有唐宗室,出爲刺史;國朝二宗,相繼尹京。是欲本支盛強,有磐石之 安,則姦雄不敢內窺,而天下有所倚望矣。 力,卒出青知陳州。 何,蓋爲小人無識,則或以致變。大臣宜爲朝廷慮,毋牽閭里恩也。」知制誥劉敞亦論之甚 政,請出青。 文彦博以青忠謹有素,外言皆小人爲之,不足置意。 景初曰:「靑雖忠,如衆心 「天象謫見,妖人訛言,權臣有虛聲,爲兵衆所附,中外爲之恟恟。此機會之際,間不容髮, 嘉站 ·初,大雨水,景初曰:「此陰盛陽微之誠也。」乃上疏稱:「庮、周之盛,並建同姓; 兩 願擇宗子之賢者,使得問安侍膳於宮中,以消奸

李仲昌以河事敗,內遣中人置獄。 列 傳 第 六 十 一 呂 景 初 及 景初意賈昌朝爲之,卽言:「事無根原,不出政府,恐 0011

籍眞定,有田七百餘頃,因請均其徭役,著限田令。 陰邪用此,以中傷善良。」乃更遣御史同訊。 ,改度支副使,遷吏部員外郎,擢天章閣待制、知諫院,以病,未入謝而卒。 遷右司諫,安撫河北。還,奏比部員外郞鄭平占 以戶部員外郎兼侍御史知雜事,判都水

使。 龍圖閣,卒。 入爲言事御史, 謫知宣州, 後復爲右司諫, 以禮部員外郎兼侍御史知雜事, 改 馬遵者字仲塗,饒州樂平人。嘗以監察御史爲江、准發運判官,就遷殿中侍御史爲副 性樂易,善議論,其言事不爲激計,故多見推行,杜衍、范仲淹皆稱道之。 東部 ¨, 直

官 司莫能辨,及悉爲讞正,前後活五十三人,提點刑獄移其法於一路。 刑院詳議,累遷太常博士。 吳及字幾道,通州靜海人。年十七,以進士起家,爲候官尉。 閩俗多自毒死以誣仇家, 辟大理寺檢法官,徙

是時,仁宗春秋旣高,無子,及因推言閹寺,以及繼嗣事。 臣聞「官師相規,工執藝事以諫。」臣幸得待罪法吏,輒原刑法之本,以効愚 至和 元年,上 一疏日: 忠。

審

惟前世肉刑之設,斷支體,刻肌膚,使終身不息。 漢文感緹縈之言, 易之鞭箠, 然已死

切

朝之平恕,宜乎天降之祥。而方當隆盛之時,未享繼嗣之慶,臣竊惑焉。 天下耳目, 茲蓋曠古聖賢, 思所未至。 陛下深惻民隱, 親覽庶獄。 而 符未止,外有輕刑之意,其實殺人。祖宗鑒既往之弊,蠲除煩苛,始用折杖之法,新 歷世用刑,無如本

近 臣 者,未易悉數。夫有疾而夭,治世所羞,况無疾乎?有罪而宫,前王不忍,况無罪乎? 世。 宮童幼,寘以重法。 而 繼嗣未育也。 . 聞漢永平之際,中常侍四員,小黃門十人爾。 事較之,祖宗時宦官凡幾何人,今凡幾何人?臣愚以謂胎卵傷而鳳凰不至,宦官多 今則宦官之家,競求他子,勦絕人理,希求爵命。童幼何罪,陷於刀鋸,因而夭死 或者宦官太多,而陛下未悟也。 伏望順陽春生育之令,濬發德音,詳爲條禁。 若然,則天心必應,聖嗣必廣,召福祥、安宗廟之策,無先於此。 何則?肉刑之五,一曰宮,古人除之,重絕人之 唐太宗定制,無得踰百員。 進獻宦官,一切權罷,擅 且以祖宗

書奏,帝異其言,欲用為諫官,而及以父憂去。

根本。 以至 宜發自聖斷,擇宗室子以備儲副。以服屬議之,則莫如親,以人望言之,則莫如賢。 嘉祐 親夾輔 陛下以海宇之廣,宗廟之重,而根本未立,四方無所係心, 三年,始擢秘閣校理,踰月,改右正言。復上疏曰:「帝王之治,必敦骨肉之愛,而 王室。 詩曰:『懷德惟寧,宗子惟城。』故同姓者,國家之屛翰,儲副者,天下之 上下之憂,無大於此。 旣兼

列

傳

之人悚然膽望、曰:『宮中有子矣。』陛下他日有嫡嗣,則異其恩禮,復令歸邸 親賢, 然後優封爵以寵異之, 選重厚樸茂之臣以教導之,聽入侍禁中,示欲爲後,使中外 於 理 無嫌 於

義爲順,弭覬覦之心,屬天下之望,宗廟長久之策也。」旣而又言:「開寶詔書:『內侍 十無養父者,聽養一子爲嗣,并以名上宣徽院,違者抵死。』 比年此禁盆弛,天絕人理,陰累 臣 年 三

聖嗣。願詔大臣明示舊制,上順天意,以綏福祐。」明年,遂權罷內臣進養子。

冗兵,省冗官,然後除民之疾苦。」因條上十餘事,多施用之。建請擇館職,分校館閣書,并 管勾登閊檢院。又上書論政事,謂:「倉廩空虚,內外匱乏,其弊在於官多兵冗。 請汰

求遺書於天下,語在藝文志。

帥非其 之家,非所謂妻乘夫,失在左右親倖,驕縱亡節也。 輒 今大臣無姑息之政,非所謂臣陵君,失在陛下淵默臨朝,使陰邪未盡屛也。后妃無權橫 明 興 (年,日食三朝,及言:「日食者,陰侵陽之戒。在人事,則臣陵君,妻乘夫,四夷侵中 人,爲敵所輕也。」因言孫沔在抖州,苛暴不法,燕飮無度,龐籍前在抖州, 、堡砦,屈野之屻,爲國深恥。 沔繇此坐廢。 疆場無虞, 非所謂四夷侵中國, 失在將

路饑,則鄰路爲之閉糴; 又言:「春秋 有告糴,陛下恩施動植,視 郡饑,則隣郡爲之閉糴。 人如傷。 然州郡官司各專其民,擅造閉糴之令, 夫二千石以上,所宜同國休戚,而坐

視流離,豈聖朝子育兆民之意哉!」遂詔:「隣州、隣路災傷而輒閉糴,論如違制律。」

政大臣因循苟簡,畏避怨謗,宜用唐李吉甫故事,選拔賢俊,約杜預遺法,旌擢守令; 將作監官屬,專領營造;論入內都知任守忠陵轢駙馬都尉李瑋及干求內降。 上尊號,出後宮私 久之,遷右司諫、管勾國子監。 身及非執事人,毋以御寶白箚子賜近倖家人冠帔及比丘尼紫衣; 在職數年,以勁正稱,遇事 無小大輒言。 嘗請毋納羣臣 <del>打</del>責執 復置

也。 及出爲工部員外郎、知廬州,進戶部、直昭文館、知桂州。 議罷之。旣定稿,及與御史沈起輒增注興國軍磁湖鐵冶如舊制。 翰林學士胡宿等即劾及與起職在臺諫,而爲程氏經營占錮恩例, 及當官有守, 會諫官陳升之建請裁節班行補授,下兩制、臺諫官集議。主鐵冶者,舊得補班行。至是, 初爲檢法官,三司請重鑄鐵錢法至死。 卒,錄其弟齊爲太廟齋郎 下有司議,及爭不可,主者恚曰: 主磁湖冶者,大姓程叔良 請詔問狀, 皆引伏。

「立天下法,當由一檢法邪?」及曰:「義理爲先,安有高下?」卒不爲訓。

祠 神, 范師道字貫之,蘇州長洲人。進士及第,爲撫州判官,後知廣德縣。縣有張王廟,民歲 殺牛數千,師道禁絕之。通判許州,累遷都官員外郎,吳育舉爲御史。 奏請罷內降推

儜

第六

+

范師道

思, 擇宰相久其任,選宗室賢者養宮中備儲貳。

去,不報。徙廣南東路轉運使。舊補攝官皆委吏胥,無先後遠近之差,師道爲置籍次第之。 非典制,數以爭,沉惡之,引著令「臺官滿二年當補外」,出知常州。 者謂宦官謀廣親事親從兵,欲取京畿財賦贍之,因以收事柄。 又以四年貢舉,士苦淹久,請易爲三年。 皇祐 中,賈昌朝上議置五輔郡,設京畿轉運使、 宰相劉沆護葬温成皇后,禮官議稱「陵」,師道以爲 提點刑獄, 師道力奏非便, 號爲「拱輔京師」,而論 臺諫官共言師道不當 遂復舊制

若使 治亂之大,而未以留意,臣敢爲陛下言之。竊聞諸閤女御,以周、董育公主,御寶白箚並爲 所難,惟聰明睿哲之主然後能之。近以宮人數多而出之,此盛德事也。 秩旣高, 才人,不自中書出誥。而掖庭覬覦遷拜者甚多,周、董之遷可矣,女御何名而遷乎?才人品 召爲鹽鐵判官,道改兩浙轉運使,遷起居舍人、同知諫院,管勾國子監 可不以其道也。 諸閤皆遷, 人女子,與 後宮周氏、董氏生公主,諸閣女御多遷擢。師道上疏曰:「禮以制情,義以奪愛,常人之 古有定員,唐制止七人而已。 、小人之性同,寵幸太過,則凟慢之心生,恩澤不節,則無厭之怨起,御之不 則不復更有員數矣。 且用度太煩,須索太贖,一才人之奉,月直中戶百家之賦,歲時賜予不在 外人不能詳知,止謂陛下於寵幸太過,恩澤不節耳。 祖宗朝宮闈給侍不過二三百,居五品之列者無幾, 然而事有係風化

况誥命之出,不自有司,豈盛時之事耶? 恐斜封、墨勅,復見於今日矣。」

不老 龍圖 拔將帥, 血 用,升之罷,師道亦出 。』,廿氏圖:『天狗移,大賊起。』今朝廷非無爲之時也,而備邊防盜,未見其至。 閣、 則愚,士卒雖多,勁勇者少。小人思亂,伺隙乃作,必有包藏險心,投隙而動者。 遷兵部員外郎,兼侍御史知雜事、判都水監。 時大星隕東南,有聲如雷。 訓練卒伍,韶天下預爲備禦。」仁宗晚年尤恭儉,而四方無事,師道 知明州,卒。 知 福州。 頃之,以工部郎中入爲三司鹽鐵副使。 又上疏曰:「漢、晉天文志:『天狗所下,爲破軍殺將,伏尸流 與諫官、御史數奏樞密副使陳升之不當 感風眩, 遷戶部, 直 言雖過,每優容 雖有將 官揀

奪王 奏數其罪焉 拱辰宣徽使、李淑翰林學士, 師 道 厲 風 (操,前後在言責,有聞卽言,或獨爭, 及王德用、程戡領樞密,宦官石全彬、 或列奏。 如陳執中家人殺婢,卒坐免; 閻士良升進,皆嘗

胸歸,胸徐取書視之,一 李絢 字公素,邛州 依政人。 過輒誦數千言,綯奇之。 少放蕩亡檢,兄綯敎之書,嚴其課業而出,綯邀自若, 稍長,能屬文,尤工歌詩。 嘗以事被繫,旣 比暮

而逸去。

正知許 子中允、直集賢院,歷開封府推官、三司 即發民治城,僚吏皆謂當言上遠報 進 州,任中 士第, 師 再授大理評事、通判邠州。 知 陳州 ,任布知河陽,並二府舊臣,絢皆以不才奏之。 度支判官,爲京西轉運使。 **約不聽。** 元昊犯延州, 帝聞之喜, 並邊皆恐。 因詔 是時 他州悉治守備。 邠城陴不完, 范雅 知河 南 **約方攝** 還 爲 太

城邠州 溪蠻 黨。 動,使人渝蠻以 胸嘗舉陸經,經坐贓貶; 寇 未幾 者, 湖南 召修 其人才可用。」輔臣 ,擇轉運使,帝曰:「有館 禍 起居注, 福,蠻罷兵受約 糾察在京刑獄。 而任布又言胸在京西苛察,出 以絢對, 東。 職善飲酒者爲誰, 遂除湖南轉運 時宰相杜衍各拔 使。 今安在 絢 知潤州。 知名士寘臺省,惡衍者指絢 乘驛至邵州 ? 」輔臣未渝, 改太常丞, 徙洪州 , 戒諸部按兵毋得 帝曰:「是往 時 爲 嵗 其 五

日:「開 亡章 審官 獻 院 復修起居注, 封府 太后 遷 龍 神 事 圖閣直學士、起居舍人、權 劇, 御 物, 豈 權判三司鹽鐵勾院, 盜 印 得,而 沉湎 於酒邪? 一改提 復糾祭在京刑 知開 知蘇州, 舉 封 在京 府, 未行 諸 治 司 有能 獄。 '',卒。 声務, 以右 名。 權判吏部流內銓。 絢 IF. 夜醉, 言、 知制 晨奏 事 誥 奉 酒 初,慈孝寺 使 未解, 製丹, 知 帝

쎼 疏 明樂易,少周遊四方,頗練世務。 數上書言便宜。 仁宗春秋高,未有繼嗣,絢因祀

高禖還獻賦,大指言宜遠嬖寵,近賢良,則神降之福,子孫繁衍,帝嘉納之。 性嗜酒,終以疾

妻之。進士及第,授大理評事,歷僉書鎭安、武勝二鎭節度判官,遷殿中丞,召試學士院,爲 集賢校理。改太常博士、修起居注,遷祠部員外郎、知制誥,權發遣開封府事 何中立字公南,許州長社人。幼警邁,與狄遵度遊,遵度曰:「美才也!」其父棐遂以女

中風卒。 獄。 中立至,人復執以來,中立曰:「此眞盜也。」窮治之,卒伏罪。遷兵部員外郎,糾察在京刑 郎中,進樞密直學士、知許州,改陳州。 曰:「貸姦可乎?」中立曰:「部曲得持短長以制其上,則人不自安矣。」還判太常寺,遷刑部 於慶矣,願守汝。」不報。戍卒有告大校受贓者,中立曰:「是必挾他怨也。」鞭卒竄之。或 除龍圖閣直學士、知秦州。言者以爲非治邊才,改慶州。奏曰:「臣不堪於秦,則不堪 初,有盜慈孝寺章獻皇太后神御服器者,旣就縶,李絢以屬吏,考掠不得其情,輒釋去。 訛言大水至,居人皆恐,中立捕誅之。又徙杭州,暴

中立頗以文詞自喜,然嗜酒無行。 第 何 中 立 沈 邈 慶曆中,集賢校理蘇舜欽監進奏院,爲賽神會,預者

皆一時知名士 ,中立亦在召中。 已而辭不往,後舜欽等得罪,中立有力焉

沈邈字子山,信州弋陽人。進士及第,起家補大理評事、知候官縣,通判廣州,

官員外郎,歷知眞州、福州。慶曆初,爲侍御史。

歲餘, 中,加刑部郎中、知延州,卒。 劉從愿。使從愿內濟狡譎,竦外專機務,姦黨得計,人主之權去矣。」其言甚切。權鹽鐵判官, 轉兵部員外郎。時選諸路轉運加按察使,邈與張昷之、王素首被選。邈加直史館,使京東。 未聞廟堂之謀有以折外侮,無名進秩,臣下何勸焉。」又論:「夏竦除樞密使,而竦陰交內侍 時呂夷簡罷相,輔臣皆進官,邈言:「爵祿所以勸臣下,非功而授則爲濫。 入爲侍御史知雜事。未幾,擢天章閣待制、知澶州,徙河北都轉運使,又徙陝西, 今邊鄙屢警,

邈 疏 爽有治才,然性少檢。 在廣州時,歲遊劉王山,會賓友縱酒,而與閭里婦女,笑言

然皆以酒失自累,故不能無貶焉。 所陳,蓋不虛得。及之論閹宦,眞仁人之言,其最優乎!絢、中立、邈亦有美才,致位通顯, 論曰:慶曆以來,任諫官、御史,名有風采,見推於時者,繇臻、原之輩,凡數十人,觀其

校勘記

- (一) 桑澤 原作「乘澤」,據長編卷一七六、劉攽彭城集卷三四賈黯行狀改。
- (三) 簡宗廟 原作「簡宗室」,據長編卷二〇六、王珪華陽集卷三八賈黯墓誌銘改。

## 宋史卷三百三

## 列傳第六十二

張昷之 張述 黄震 魏瓘 弟琰 胡順之 滕宗諒 陳貫 劉越 子安石 附 李防 范祥 子育 趙 湘 田京 唐肅 子詢

書籍,遷集賢校理,通判常州,知温州 張昷之字景山。 父秘,自有傳。 **温之進士及第**, 補樂清尉,潤州觀察推官, 校勘館閣

罪,械送獄。且之廉得寃狀,乃出申,配姦吏若干人。 戒斬伐毋得深入北地,卒亦不敢逃。 邊諸州發卒斬西山木,卒逃入契丹者歲數百人,敵旣利其所開地,又得亡卒,故不爭。 長得自治而多慘酷,請一以漢法從事。權度支判官,爲京西轉運使, 蔡齊薦其材可用,擢提點准南路刑獄。 楊崇勳知亳州,恃恩爲不法, 徙廣南東路轉運使。 加直史館, 誣蒙城 夷人有犯, 徙 河北。 知縣王申 且之 其

列

傳第六

+=

張

昷

之

魏

瓘

接隣道 城開 巡,部卒偏得廩賜,軍 頟 以 石 卽 軍 待 別 兵 萬 法 舉,遂殺之以作亂。 給 還,爲鹽 田況潛殺降兵數百人,且之預知其謀。 則反貝州,有言温之在 .從事。」旣至,又以 錢 人,號緣 糧, 太祖嘗用之有 鐵 餘悉 邊都巡檢司,亦曰策先鋒,以 副 使,擢天章閣待制、河北都轉運按察使。 罷, 中以爲不均。 仍請以武 功,詔每出巡別給糧 兵自 温之 自 河北捕 衞,且之曰:「諸將方集,獨敢以兵隨,將欲反邪 魏 臣代內侍。 通判 馳至城下,召諸將部分攻城,使人請懷敏曰:「不 得妖人李教 保州 錢以 時楊懷敏方任邊事,尤不悅巡檢司 石待舉言於且之,請合三部兵 知 除戶 州 優之。 不殺,使得逸去,今乃爲 、軍爲使,置副二人,分所 ,部副 使,旣而 其後州 。保州、 廣信、 坐前 將不復出, 事 安肅 奪職,知號 則主謀, 軍自五代以來 更出 內 領卒爲三部, į 侍 」叱去 爲 州 雲翼卒 事 副 卽 季 平, 衞 來,當 數 者。 出 無 惡 出 使 別

徙揚 共 乃下御史按劾,雖不得書,猶奪三官,監鄂 人。會冀州 州 以光祿卿致仕,卒。 人段得政詣闕, 自言「嘗爲 且之喜吏事,所至有聲。退居築家廟,率子弟歲時 叔 州 父 屯田 稅。 知 郎中曇賕冤緣坐」,且言 漢 以陽軍 一,稍遷 刑 部 郎 中, 「曇以 復 待 ?奉祠 書 制 屬鼠之」 知湖州

魏瓘字用之。 父羽奏補秘書省校書郎、監廣積倉,知開封府倉曹參軍。持法精審,明吏

上元起綵山,闕前張燈,與宦者護作,宦者挾氣,視瓘年少,輒誅索侵擾。 瓘密以聞,詔

杖宦者遣之。

卿, 臨江 梓州路轉運使,還知蔡州、潭州 廉、高州猶未除, 瓘爲除之。 衡 千餘 Ш 知廣州。 軍 瓘 判官。 , 通 門人魏綱上疏詆天書,流海島,瓘亦坐是停官。復監鄧州稅、鄂州茶,以大理寺丞知 人,悉奏還其家。 判壽州,歷知循、隨、安州,提點廣南西路刑獄。 築州城環五里,疏東江門,鑿東西澳爲水閘,以時啓閉焉。拜右諫議大夫,再任 就除轉運使。 減柳州無名役四百人。 ,爲京西轉運使,江、准制置發運使,自主客郞中遷太常少 劉鋹 時計 口以稅,雖舟居皆不免,至是而雷、化、飲、 召權度支判官。 邕州獠戶緣逋負沒婦女爲傭者 **尋以罪降知洪州,徙** 

珍貨, 以 上,內降釋罪。 給 事 史沆性險設,嘗爲瓘所劾免。會廣州封送貢餘椰子煎等餉京師,輒邀留之,飛奏指以爲 詔遣內侍發驗無有,流坐不實廢,瓘亦降知鄂州。 中知開 封府,政事嚴明,吏民憚之。內東門索命婦車,得賂遺掖 諫官吳奎言法當執奏,而瓘不卽奏行,請以廢法論,降 未踰年,復爲陝西轉運使,徙河北。 知越州 庭物 ,付府驗治, 獄未

復 知廣州? **農智高** 兼廣東經略安撫使,給禁卒五千,聽以便宜從事。 寇廣東、 西,獨廣州城堅守不能下。 於是論築城 功, 屬狄青已破賊, 遷工部侍 郎、 召還, 集賢院學士, 糾察在

列傳第六十二 魏瓘

〇〇三六

貪功 京刑 如瓘 蠻彭士義叛,將發兵討除。 議 獄 生事,於國家何所利?」因條上三策,以招徠爲上,守禦爲下, 議 徙澶州、 者請開六塔河,塞商胡北流,宰相主其說,命瓘按視,還奏以爲不可塞。 滑州。又徙鄧州,不行,請老,以吏部侍郎致仕,卒。 進龍 圖閣直學士、知荆南。 瓘以爲「五溪之險, 功取爲失。 師 行鳥 不報。 道 下 溪州 後卒 諸 將

專任機數,不稱循吏。 權所至整辦,與人置對未嘗屈。 弟 |琰。 史沆、王逵以善訟名天下,瓘旣廢沆, 又嘗奏抵逵罪,

<u>州。</u>壽州盜殺寺童子,有司執僧笞服,琰廉其非罪,命脫械縱去,一府爭以爲不可,後數日得 率強取人栗,坐死者甚衆,琰曰:「此迫於窮餓,豈得已者。」坐其首黥之。歷知壽、潤、滁、安 江寧府。 其吏受賕而爲之謀乎?」後有告者如|琰所料。 | 琰字子浩, 以父恩授秘書省正字, 為吏強敏, 名齊于瓘。 富人犯法當死而死獄中,琰曰:「是嘗欺匿 晚昏眊,縱私人亂法,日笞扑無罪吏卒。 累官司農卿、知福州,徙廣州。以疾告,得知 . 異籍孤弱者財,所以自斃,覬不可窮治爾, 監司劾奏,召判刑部,乃致仕,進衞尉卿, 嘗通判陳州,適歲饑,百姓相

宮好 願修 帝嘗 后 爲 靇 書 還政,而越亦上疏。 ·政以禳之,思患以防之。凡逮繫者特從原免,庶災變可銷而福祥來格也。」疏奏,仁宗 索其類寘之法矣,若防患以刑而止,豈復有今日之虞哉。况變警之來,近在禁掖,誠 生之德。 與秘書丞劉越皆上疏諫。 詔 亟下,引咎滌瑕,中外莫不感動。然而詔獄未釋,鞫訊尙嚴,恐違上天垂戒之意,累兩 學士院。 滕宗諒字子京,河南人。與范仲淹同年舉進士,其後仲淹稱其才,乃以泰州軍事推官 獄。 時章獻太后猶臨朝,宗諒言國家以火德王,天下火失其性由政失其本,因請太 改大理寺丞,知當塗、邵武二縣,遷殿中丞,代還。 且婦人柔弱,箠楚之下,何求不可,萬一 太后崩,擢嘗言還政者,越已卒,贈右司諫,而除宗諒左正言。 宗諒曰:「伏見掖庭遺燼,延熾宮闥,雖沿人事,實繫天時。 懷寃,足累和氣。祥符中,宮掖火,先 會禁中火, 詔劾火所從起,

能 名。 劉 越者字子長,大名人。 旣贈官,又官其一子,賜其家錢十萬 少孤貧,有學行,亦宗諒同年進士。 嘗知襄城、固始二縣,有

涇州 貶,宗諒降監池州 宗諒後遷左司諫,坐言宮禁事 葛懷敏軍敗於定川行了,諸郡震恐,宗諒顧城中兵少,乃集農民數千戎服乘城,又募 酒。 久之,通 判江寧府,徙知湖州。 不實,降尙書祠部 員外郎、知信州。 元昊反,除刑部 員外郎、直集賢院、知 與范諷 雅相 善,及諷

列傳

第

六 十

\_

滕宗諒

李

防

使各得所,於是邊民稍安。

勇敢 十餘 日 諜 知寇遠近及其形勢,檄報旁郡使爲備。 情 憂沮,宗諒乃大設牛酒 迎犒 土卒; 會范仲淹自環慶引蕃漢兵來援, 又籍定川戰沒者於佛寺祭酹之,厚撫其孥, 時天陰晦

|涇||州 總管 士故 人。 費公錢十六萬貫,及遣中使檢視, 、經略安撫招討使, 御史中丞王拱辰論奏不已,復徙岳州 仲淹薦以自代,擢天章閣待制, 宗諒恐連逮者衆,因焚其籍以滅姓名。 而諸路亦帶招討稱號, 徙慶州。上言:「朝廷旣授范仲淹、韓琦四路馬步軍都 乃始至 稍遷蘇州, 部日, 非所宜。 仲淹時參 卒。 以 」詔罷之。 故事犒賚諸部屬羌,又間 知政事,力救之,止降一官,知 御史梁堅 | 劾奏宗諒前 以饋遺 遊 在

州。 宗諒 有諫疏二十餘篇 於尙氣,倜儻自任,好施與,及卒,無餘財。所蒞州喜建學,而湖州最盛,學者傾江、 准

間

降下考,百戶殿三選,二百戶停所居官,能招攜者旌賞之。 推官 李防字智周, 括磁、相二 州逃戶田 大名內黃人。 , 增租賦· 舉進士,爲莫州軍事 十餘萬 因 請 均定田 推官。 稅, 改秘書省著作佐郎、通判潞州, 隨曹彬入契丹,授忠武 又請縣 有破逃五 十戶者令佐 軍節 度

悉以城卒代之。 遷秘書丞。體量二浙民饑,建言逃戶田宜卽召人耕種,使人不敢輕去甽畝, 卽 又請京師置折中倉,聽人入粟,以江、浙、荆湖物償之。 府 司 軍巡院察寃獄。 會分川、峽爲四路,徙防梓州路轉運使,累遷尙書工部員外郎,爲三司戶部 出爲峽路轉運副使。 先是沿江水遞,歲役民丁甚衆, **擢開封府推官,請與判官間三五日** 頗廢農作, 而官賦常在。 防

爲三司鹽鐵判官,失舉冤官。後起通判河南府,徙知宿、延、亳三州,爲利州路轉運使,累遷 酤之利。遂爲江南轉運。 錢,民頗煩擾。 兵部郎中、糾察刑獄,擢右諫議大夫、知永興軍,進給事中,復知延州,更耀、潞二州,卒。 多漂失之患。|防請令商人入錢帛京師,或輸芻糧西北邊,而給以鹽,則公私皆利,後采用 徙知應天府,鑿府西障口爲斗門,洩下水,淤旁田數百畝,民甚利之。又徙興元府,入 景德初,江南旱,韶與張知白分東、西路安撫。 江南以歲饑權罷,而淮南、荆湖未被德音。」詔悉罷之,仍詔藏等毋得復增權 淮南舊不禁鹽, 制置司請禁鹽而官自鬻之,使兵夫輦載江上,且 上言:「秦義嘗增江、淮、兩浙、荆湖権酤

謁見,防命賦詩,使還薦之,後至宰相。 防好建明利害,所至必有論奏,朝廷頗施行之。其精力過人。防在江南,晏殊以童子

宗正 郎、 知新繁縣。以吏最,命知商州,徙隴州、興元府,再遷太常博士。 | 寺,賜白金二百兩。久之,上書言:「元德李太后母育聖躬,請祔太宗廟室。」後用其說。 趙 湘字互源, 華州人。 進士甲科,歷彰武、永興、昭武三軍節度推官, 上補政忠言十篇, 遷秘書省著作佐 召判

册趙德明,假尚書禮部員外郎,爲官告副

使。

使劉炤弛職不按部,知洪州馬景病不任事,皆罷黜之。 矣,然慮繫囚益淹久,吏或因緣爲姦爾。」湘又上書請封禪。 封泰山,爲東京留守推官,禮成,遷侍御史。昇州火,命湘往致祠,兼問民疾苦。 司, 鞫 『獄斷刑之政,遂定令毋以十一月、十二月報囚。 今季冬誕聖之月而决大辟不廢。 自仲多留大辟弗决,俟孟春臨軒閱視,情可矜惻者貸之,他論如法。」眞宗曰:「此固 擢殿中侍御史,權判三司勾院,上言:「漢章帝以[5]令多至之後有順陽助生之文,而無 未幾,命管勾南宮北宅事 還言轉運 願詔有 善 東

本,宜有以訓厲,願特製銘以賜南北邸。」帝悅,爲製宗室座右銘,賜寧王元偓以下丼及湘, 至,以懲其慢。 赴待漏院俟禁門闢,今則辰漏上始放外朝,故朝者多後時乃入。 糾察刑獄,改尚書刑部員外郎兼侍御史知雜事。 若風 雨寒暑託病不朝者罪之。」時帝親製五箴以自儆,湘因言:「宗室風化所 湘又言:「舊制文武常參官日趨朝, 望敕正衙門主者察晚

且渝之曰:「卿宗姓也,故賜卿。」

宗 中、直昭文館,出知河南府,徙 正寺。 祀 汾陰,爲考制度 又知應天府,進右諫議大夫,復知河南,爲集賢院學士,以疾徙虢州,卒。 歷三司戶部、度支副使。 副使,請如周官置土訓,錄所過州縣山川與俗好惡,日上奏御。 河中府,爲京西 祀太清宮, 轉運使。 管勾留司三司事。 又徙鳳翔 府、延州, 爲鹽 一鐵副 使, 遷太常少卿、 再遷工 部 兼 郞 判 知

判陝州。 謂、曹商游,學者慕之。 數日得殺人者。後守雷有終就辟爲觀察推官。 人亡去,商人夜聞人聲,往視之,血沾商人衣,爲捕吏所執,州趣獄具。肅探知其寬,持之,後 n] 遷 一般 中侍御史,入爲三司戶部判官,出知舒州。 再遷 唐肅字叔元,杭州錢塘人。當錢俶時,始七歲, 工. 召拜監察御史。 部郎中、知洪州。 舉進士,調郿縣主簿,徙泰州 或薦肅爲羣牧判官,眞宗曰:「朕欲別用肅。」遂提點梓州路刑獄。 尋爲江南東路轉運使,擢三司度支副使。 遷秘書省著作佐郎,歷知聞喜、福昌縣,通 遷侍御史,爲福建路轉運使,判三司開拆 一司理參軍。有商人寓逆族,而同宿者殺 能誦五經,名聞其國中。 奉使契丹,還,遷刑 後與孫何、丁

部。

爲龍

圖

閣

待

1制、登開檢院,知審刑院,卒。

子詢。

列

傳

第

六

+ =

唐

肅

100四二

詢字彥猷, 以父任爲將作監主簿。 天聖中,詔許天下士獻文章,應詔者百數,

其善者,詢數人而已,詔賜進士及第、知長興縣。

育而 出,或稱年所無,則此舉奚設?或頻歲而有,則於事太煩。令禮部進士數年一舉,因以制科隨 擢,宜如漢故事親策當世要務,罷秘閣之試。」育亦奏言:「三代以來,取士之盛,莫如漢、唐。 凡官外徙者皆放朝辭,而詢獨不用,比入見,中丞張方平乃奏留詢,育爭不能得,詢由是怨 相賈昌朝與詢有親嫌,育數與昌朝言,詢用故事當罷御史,昌朝欲留詢,不得已,以知廬州。 今制科隨進士貢舉,其著爲令。」時官由制科進,帝以爲得人,故詢力肆排詆,意在官不在制 之,則事與時宜。 漢詔舉賢良文學直言極諫之士,非有災異而舉。 不常置。 附昌朝。昌朝雅不善育,詢希其旨上奏曰:「賢良方正、直言極諫、茂才異等科,漢、唐皆 後以太常博士知歸州, 若天見災異,政有關失,則詔在位薦之,不可與進士同時設科。若因災異非時舉 又從而更張之,使遺材絕望,非所以廣賢路也。」仁宗是育言,詔禮部:「自 用翰林學士吳育薦爲御史,未至,喪母。 唐制科之盛,固不專於災異也。况災異之 服除,育方參政事,宰

育弟婦故駙馬都尉李遵勖妹,有六子而寡。 詢又奏育弟婦久寡不使更嫁,欲用此附字

也。

氏自進。 後詢終以故事罷御史,除尚書工部員外郎、直史館、知湖州,徙江西轉運使。

還,爲三司戶部判官,又判磨勘司,出爲江東轉運使。上言:「執政純取科名顯者修起居注,非 青二州,進翰林侍讀學士,累遷右諫議大夫。召還,勾當三班院,判太常寺,進給事中,卒, 故事。」未幾,起居注關人,帝特用詢,遂知制誥。 會詔淮南、江、浙、荆湖六路轉運司移文發運使如所屬, 以參知政事曾公亮親嫌,出知蘇州,徙杭、 **詢爭以爲不可,** 乃移福建路。

贈禮部侍郎。有集三十卷。

之,有硯錄三卷。子炯,附王安石爲監察御史裏行,自有傳。 詢少刻勵自修,已而不固所守,及知湖州,悅官妓取以爲妾。 好畜硯,客至輒出而玩

| 離明於獄 后還政。 |琰吏事不下於瓘,脫械縱囚,審知姦弊,何其明且决也。 諭 日:宋承平日久, 吏多以嚴刻爲治。 訟:皆不多見也。 越年不逮用, 聲名與宗諒同矣。 然且之以殺降而奪官,瓘以能置對而興謗,詢傅會喜進,竊非其 防請罷権酤,與水利,湘廉問疾苦,按不稱職者, 显之辨冤獄,配姦吏, 權奏還婦女爲傭者若干 宗諒、劉越以孤生立朝、請太

據,雖列侍從,君子所不與也。

列

傳

第

六 十

唐肅

張逃

中,仁宗未有嗣,述上書曰:「生民之命,繫於宗廟社稷,而繼嗣爲之本。匹夫有百金之產, 不爲計,此臣拳拳爲陛下言也。」述前後七上疏,最後語尤激,仁宗終不以爲罪。 謀起關寺,或姦臣首議,利幼主以專政,假後宮以盜權,安危之機發於頃刻。 御天下且三紀矣,是日之正中也,而未聞以繼照爲慮,臣竊疑之。 繼明照四方』。離爲日,君象也。二明相繼故能久照,東昇西沒,晝夜迭運,數之常也。 職務,俾內外知聖心有所屬,則天下大幸。」至和元年,復上疏曰:「臣聞『明兩作離,大人以 社稷未有託焉,此臣所以夙夜彷徨而爲陛下憂也。謂宜愼擇宗親才而賢者,異其禮秩,試以 **澬能定謀託後,事出于素,況有天下者哉。陛下承三聖之業,傳之千萬年,斯爲孝矣。** 張述字紹明,遂州小溪人。 舉進士,調咸陽縣主簿,改大理寺丞,遷太常博士。 歷觀前世或令出宮闈,或 朝議恬然,曾 宗廟

望,廣南路提點坑冶鐵錢事(三),行至萬州,道病卒。

|述慷慨喜論事,歷通判延州,知泗州,皆有政跡。後以尙書職方員外郞爲江、浙、荆湖、

詔至 即開 一州帑給錢如西川,衆乃定,明日詔至。累遷尙書都官員外郎、提點湖北路刑獄,還,判三 西川,而東川獨不及,軍士謀爲變。 震白主者曰:「朝廷豈忘東川邪? 殆詔書稽留爾。 **黄震字伯起,建州浦城人。進士及第,累遷著作佐郎、通判遂州。** 嘗給兩川軍七緡錢,

一層勘司,擢江、准發運使。

罷,畏謂權,不敢自直,及謂貶,乃復官,知饒州,徙廣東轉運使。 都下枯死者十八九,道路苦其煩擾,慶奏罷之。慶在眞宗朝數論事,旣卒,詔進其官一等。 負陛下任使者,臣不敢與之和。」旣至,發溥姦贓數十事,溥坐廢;而慶亦爲溥訟,奪一官。 自 先是,李溥自三司小吏爲發運使十餘年,姦贓狼籍,丁謂黨之,無敢言者。震將行,上書 廣南歲進異花數千本,至 職也。

横、縣不能制,歲租賦常不入,適以訟逮捕,不肯出。順之曰:「令不行何以爲政。」命積薪環 貴人挾以爲重,使州官旅拜於郊。順之曰:「青,大鎭也。 而焚之,豪大駭,少長趨出,叩頭伏辜,推其長械送州,致之法。爲靑州從事。 <u></u> 切順之字孝先,原州臨涇人。登進士第,試秘書省校書郎、知休寧縣。民有汪姓者豪 在唐押新羅 、渤海,奈何卑屈如 高麗入貢,中

列傳第六

+ =

黄霞

胡順之

陳貫

〇〇四五

得其黨。 敢 此 發 共姦。 獨 有詔鞫問,士瑤論死,其子弟坐流放者百餘人。改著作佐郎、知常熟縣, 拜 會 士瑤殺兄子 大 姓 麻 士瑤陰結 温裕,其母 貴侍, 匿兵械 訴于州, 衆相 服用擬尙方,親黨僕使 視 日:「孰敢往捕者? 甚 」順之持 多, 州 縣 被 檄 逕 陵茂, 秘 徑 去,

朝廷事,仲淹愛其才,然挾術尙權,喜縱橫捭闔 后 崩 ,順之附疾置自言,求其書,出宰相家。 仁宗卽位, 遷太常博士。 天聖、明道間,再上宰相書,乞太后還政, 仁宗嘉其忠,特遷尚書屯田員外 以目失明廢,州里皆憚焉 宰相匿不以聞。 郎 其後數論 太 分司南京。

覈。 爲 出 司 士,眞宗識貫名, 鹽 審 職 嘗 刑 鐵 田 陳 判官 院 貫 謂 粟 字仲通,其先相州 詳議官, 賑 僚 屬 飢 目: 者 領 河北轉運使,請疏徐、鮑、曹、易四水, 又帥富民令計 歷 視 知衛州 高第。 縣官物 安陽人,後葬其父河陽,因家焉。 涇州 爲臨安縣主簿,以秘 如己物, 口 占 督 粟,悉發其餘。 察盜 容有 姦 賊,禁戢不肖子弟,簿書筦庫,賦租出 乎?」州人憚其嚴。 書省著作佐郎爲刑 徙陝西,累遷尚書度 興屯田 少倜儻,數上疏 徙河東, 擢 利 部詳覆官,改 州 文員 歷三司 路 轉 『言邊事 運使。 外 卢 郎, 入,皆自檢 部 秘 嵗 誯 鹽鐵

副使,以刑部郎中直昭文館,知相州。 還朝卒。

輩畏死不畏法,請自今合戰而奔者,主校皆斬; 大將戰死,裨校無傷而還,與奔軍同。軍衂城 貫喜言兵,咸平中,大將楊瓊、王榮喪師而歸,貫上書曰:「前日不斬傅潛、張昭允,使瓊

圍,別部力足救而不至者,以逗留論。」」眞宗嘉納之。又嘗上形勢、選將、練兵論三篇,大略言:

設地造,非敵所能輕入。 地有六害。今北邊旣失古北之險,然自威虜城東距海三百里,沮澤磽确,所謂 由威虜西極狼山不百里,地廣平,利馳突,此必爭之地。 凡爭

天

地之利,先居則佚,後起則勞,宜有以待之。

卒與敵遇,方略何從而出邪?故敵勢益張,兵折於外者二十年。 昔李漢超守瀛州,契丹不敢視關南尺寸地。 今將帥大抵用恩澤進, 雖謹重可信,

師,不可以戍邊境。請募土人隸本軍,籍丁民爲府兵,使北捍契丹,西捍夏人。 敵之情 方國家收天下材勇以備禁旅,賴廩給賜予而已,恬于休息,久不識戰,可以衞京

後以疾卒。 著兵略,世頗稱之。子安石。

僞,地勢之險易,彼皆素知,可不戰而屈人之兵矣。

安石字子堅,以蔭鎖廳及第。 嘉祐中,爲變、峽轉運判官。 民蓄蠱毒殺人,捕誅其魁幷

邠州 東都 得良 貿易,鬻畢而歸券,私販爲減。 民 (薬圖 一戒 轉運使,議始定。 河中府。 嚴,旣 由 而 是 遇 數萬騎奄至,無所獲而 戶部副使韓絳鎭太原,議行鹽法,與監司多不合,加安石集賢殿修撰,爲河 毒者得不死。 謂其僚曰:「興事當有漸,急 進 提點陝西 天章閣待 去,璽書嘉之。 刑獄 制 7,攝帥 則擾。」乃出鹽付民而俾之券, :鄜延,能用諜者,敵動靜 歷使京西、河東、淮南、京東,知蘇州 輒 先聞。 使隨所得 嘗敕

我。」 衆潰,日:「事 而 師 繼 駐 卽 官 白 擅 神宗 一發民 草平彌月。 西征時,遣縣令佐督餉,安石 察其 不豫警,俟其犯而誅之,是罔民也。」王中正帥東師而 一再餉, 無罪赦之。 乃以 安石深念曰:「吾頓兵益久,而湊甲未至,倘不足於食,將以乏軍 聞。 李舜 舉劾其專,詔置獄於潞,安石 謂文吏畏怯,武人邀功,乃但取敢行者。 自麟 西,報 州 會逮,俄 安石 持四 中約 而 他 <u>-</u> 路 東以防 日 飽 興罪

肯 安石 吏部 保 李定 則 侍 尙 書省 罷 剆 持 再 問 選 服 初 建,召员 者 人將改 以絕囊弊,遂爲後法。 乎? 爲 京官, 對 戶 二.日 部 侍 須 次久, 詔 鄓。 問臣 嘗與右曹李定同奏事 臨當 ,臣不敢不以實奏。」 出 引 知永興軍 對, 率困 於刑 鄧襄陳鄭州、河陽, ,,帝目留之曰:「卿豈 寺審問, 帝 白:「以 或沮以 實 事 至龍 微文,則 君,朕所 非在 圖閣直學士。 一跌不 與 淮 也。」進 南 日 復。

紹聖

元年,卒,年八十一。

冶鑄 驚擾, 青唐族羌攻破廣吳嶺堡, 圍啞兒峽砦, 官軍戰死者千餘人, 坐削一官, 知唐州。 峽,邊城數請城之,朝廷以餽餉之艱不許。 本路刑獄,制置解鹽、累遷度支員外郎,權轉運副使。 城急,祥帥將士拒退之。 錢。 字晉公,邠州三水人。 請築劉璠堡、定川砦,從之。 進士及第, **祥權領州事,驟請修築,未報,輒自興役。** 自乾州推官稍遷殿中丞、通判鎭戎 歷知慶、汝、華三州,提舉陝西 古渭砦(三)距秦州三百里,道經 人輒不便,語在食貨志。 軍。 銀銅坑 元昊 提點 後復 蕃部 園

中, 使天下知祥死 消 西 沮 轉 轉運使鮮因熟羌數被寇掠,其部族願輸土置城以爲守禦,乃卽 運副 孫景郊社齋郎。熙寧中,平洮、岷、疊、宕、河州數千里,置郡縣,以古渭爲通遠軍。 嘉祐 邊 隙 [使]張詵奏:「朝廷復洮、隴故地,自將帥至裨佐悉有**功賞**。 中,包拯言:「祥通陝西鹽法,行之十年,歲減権貨務使緡錢數百萬,其勞可錄。」官 可謂 猶 知攻守之利矣。 被恩,且舒祥忠義之氣。」詔贈秘書,錄一子未官者。 兵出 少挫,身黜謀廢,臣竊悲之。 冀推原舊功, 古渭爲砦。 臣見洮、渭父老言,皇祐 子育。 祥此舉足以 少賜褒卹 權版

官,提舉陝西緣邊青、白鹽,改制置解鹽使,卒。

列

不至境。 而 夏 IF. 驟 <u>، [</u> ر 察御史裏行。神宗喩之曰:「訔稱『塱讒說殄行』,此朕任御史之意也。」 盲請用大學誠意、 |人三大戰而三北,今再舉亦然。 以治 用之爾。昨荔原之役,夏人聲言:『我自修壘,不與漢爭。』三犯之,然後掩殺,雖追奔亦 育字巽之,舉進士,爲涇陽令。以養親謁歸,從張載學。 天下國家,因薦載等數人。 由是觀之,其情大可見矣。」 豈中國之大,不足以支夏人數郡乎?由不察彼己,妄舉 西夏入環慶,詔南行邊,還言:「實元、康定間,王師與 有薦之者,召見,授崇文校書、

不失期 蒙德澤。」神宗皆從之。 獝 司 不 上戶配 先告期,轉運使臨時督辦,致民皆破產,上下莫敢言。 又使 ,顧以訴其實, 夫四百三十四,僦直計三千緡,下者十六人,其直十萬。 河東,論韓絳樂囉兀二砦:「始調外郡稍遠邊城前後三十萬夫,遼州最爲窮僻, 翻今鞫罪。 坐劾李定親喪匿服,罷御史,檢正中書戶房,固辭,乃知韓城縣。 願貸被劾官吏,其獨糧在道者隨所至受之,使已困之民咸 獨遼守李宏能約民力所勝,而餽 **輦運所經二十二驛,宣撫** 

烟夕舉,是持約不足恃也。 敗 兵拏 詔 往鄉 ,鬥者跌 延議畫地界,育言:「保疆不如持約, 於前,耕者侵於後,是封溝 今我見利而加兵,當講好之後,復自立界,不亦愧乎!」安南行 不足恃 持約 也。 不如敦信。 使人左去 而兵革右興,金繒朝 前 日疆場嘗嚴矣, 委而 一旦約 烽

營郭達、趙卨以兵十萬伐交阯,行及長沙,病死相屬,達、卨又不輯睦, 育疏其不便,不從

久之,知河中府,加直集賢院,徙鳳翔,以直龍圖閣鎭秦州

|州危, | 蘭州危則||熙河有腰膂之憂矣。 | 又請城|李諾平、| 汝遮川, 曰:「此趙充國屯田古榆塞之 地也。」不報。入爲給事中、戶部侍郎,卒。高宗紹興中,採其抗論棄地及進築之策,贈寶文閣 又議棄質孤、勝如兩堡,育爭之曰:「熙河以蘭州爲要塞,此兩堡者蘭州之蔽也。 元祐初,召爲太常少卿,改光祿卿、樞密都承旨。 劉安世暴其閨門不肅,出知熙州 棄之則蘭 時

改秘書省著作佐郎,爲大理寺詳斷官。 趙元昊反,侍讀學士李仲容薦京知兵法,召試中書,擢通判鎭戎軍。夏守蠻爲陝西經 田 京字簡之,世居滄州,其後徙亳州鹿邑。 舉進士,調蜀州司法參軍,自秦州觀察推官

略應運籌决勝科,及試秘閣,與他科偕試六論,京自以記誦非所長,引去。 略使,奏兼管勾隨軍糧料。 入對,陳方略,賜五品服。尋爲經略安撫判官。 守竇既罷,以武

又參夏竦 軍 事 會遣翰林學士晁宗感卽軍中問攻守孰便,衆欲大舉入討,京曰「夏人

列傳第

烽燧,用奇正法訓兵,徙戰馬內地以息邊 獄 奇 或曰::「不 兵 事 出 道 乃上言:「請擇要官守熗、衞,鑿西山 如講 、渭,敗大將任福 未易 和 。」京曰:「敵兵 破 也。 今欲 驅不智之師,深 夏竦素不 未 ·嘗挫,安肯降 悦京,坐是改通 一費。」凡十餘事,仁宗頗嘉納之。 石臼廢道以 入敵境, 我 哉 ? 與之角勝負, 判廬州 」未幾,元昊使黃 限戎馬,義勇聚教, , 徙 知邵 此 兵 武 延 家所忌,師出 軍 德 , 復給 吅 提 延 點 糧, 州 河 乞降,以 北路刑 「必敗。」 置卒守

迫使呼曰:「毋亟攻,城中將屠我輩矣。」」京叱諸軍益進攻,注矢仰射,殺其家四人。 不敢叛。州之南關,民眾多如城中,得不陷賊,京有功焉。京督士攻城甚力,賊係京妻子 賊遣其黨崔象僞出降,京以其持妖言惑衆,又斬以徇,由是營兵二十六指揮在外者皆懾 則 無 據恩州 所 顧,乃牽妻子去,恩州平。以不能預察賊,降監鄆州稅 入爲開封府判官, 反,京縋城趣南關,入驍健營撫士卒。 坐械囚送獄道死, 出知 蔡州 保州 ,徙相、邢二州,復提點 振武兵焚民居欲應賊 ~,京捕 河北 刑 斬之乃定。 獄 賊知京 事。 乘城 王

丽 京 京能招 獨 先是,駐泊都監田斌亦以賊發不能捕,待罪兵間,及城破,從諸將入,以功遷宮苑副 知 被 密州 輯流民,爲之給田除稅租,凡增戶萬七千,特遷工部郞中。 歷提點准 御 史言失察賊過輕,忘家爲國義獨 南刑 、獄事、 京西轉 運使,累遷兵部員 重,不宜左遷,乃徙通 、外郎、直史館、知滄州轉運使。 判兗州 然傳者謂流民之數 又徙知江

不償,鞭笞督責,至累年不能平,公私皆患之。 多不實, 又強爲人田非其所樂,侵民稅地,做古屯田法,其後法不成,所給種錢牛價,民多 擢天章閣待制、陝西都轉運使,改兵部郎中,

復知滄州,拜右諫議大夫,卒。

汾陰郭京相友善,俱以倜儻聞。 京喜論議,然語繁而迂,頗通兵戰、曆算、雜家之術。 著天人流術、通儒子十數書,又有奏議十卷。 爲人尙氣節,少時與常山董

論兵 勇蓋 事,范祥畫邊計,皆一時雋士。 可壯也。 如張述者其亦忠且果矣。 論曰:人臣之職,當奮不顧身,而庸人怯夫於國事則噎喑而不言, 黃震指李溥忤權臣,胡順之擊強宗,爲衆人所不敢爲 妖盜竊發,原出孤力保城南,置妻孥之憂,先登示賊,其 若胡越肥瘠之不相 陳貨

#### 校勘記

(1) 定川 原作「定州」, 據本書卷二八九葛懷敏傳、 范仲淹范文正公集卷一 三滕宗諒墓誌銘改。

下同

列傳第六十二 校勘記

一〇〇五四

(三) 提點坑冶鐵錢事 至元祐元年以坑冶、鑄錢通爲一司。」同上書職官四三之一二〇、崇寧時有「江、潍、荆、浙、福建、 據宋會要職官四三之一一九「舊坑冶、鑄錢隸轉運司,元豐初間以他官兼領,

度南路提點坑冶鑄錢司,疑「鐵 r爲「鑄」之誤。

岩。原作「古渭州」,據下文及本書卷八七地理志改。四世黑古光鏡金子。 景 金二年 金三六言

(三) 古洞砦

# 天义卷三百四

### 列傳第六十三

劉元瑜 周渭 梁鼎 楊告 范正辭 趙 及 子諷 劉湜 劉 師道 王彬 王濟 仲簡 方偕 曹穎叔

城,則廬舍煨燼,遂奔道州。 也, 政繁賦重,民不聊生。 周渭字得臣,昭州恭城人。 渭率鄉人六百踰嶺,將避地零陵。未至,賊起,斷道絕糧,復還恭 爲盜所襲,渭脫身北 幼孤,養于諸父。力學,工爲詩。 ۴ 劉鋹據五嶺,昭州皆其地

幹者莅其屬邑,以渭知永濟縣。 縣大吏犯法, 傷人而逸,潤捕獲,丼暴廀匿者按誅之,不以送府。 建隆初, **渭卽斬之。** 至京師,爲薛居正所禮。 上奇其才,擢右贊善大夫。 **彦卿郊迎,渭揖于馬上,就館始與相見,略不降屈。** 上書言時務, 召試,賜同進士出身,解褐白馬主簿。 時魏帥符彥卿專恣,朝廷選常參官強 縣有盜

列傳第

六

十 三

周

渭

丹,爲部下所告,潤擒之以聞, 以 官 民遮道泣留,俄詔賜錢百萬。 銀,擇潤往 禍 乾德 福 斬其 中 代 軍 通 校,衆皆 判 周歲,羨課數倍, |興州 [攝服 州領 置 命械至關下,鞫得實,斬於西市 詔 口 書嘉獎,命棄 **砦多戍兵**,監軍 賜緋魚, 又遷知棣州 本砦鈴轄。 ·傲狠,縱其下爲暴, 開 殿直傅延翰爲監軍 寶 元 渭在郡以簡肅稱,及還,吏 年, 鳳州七房冶 居人苦之。 ·,謀作亂走 渭 主 一吏盜 馳 往 契 隱

以其子 不 再舉。 市,奪 兩 南 浙 俄換 詔昭州 重 東 太平興國二年,爲廣南諸州 定 民錢,渭捕斬之。 建中為 黎桓 眞宗 宋州 西路 田 赋, 訪求,賜錢米存卹之。 懼,卽遣使 聞 丰 乘氏 興學校。 運使, 其清節,召 加 職 主 方員 海 入為鹽: 入貢。 後至者悉令解甲以入,訖無敢犯。 遷殿 外 還,將復用,詔 郞 外中丞。 鐵判官。 爲 就 加監察御史,在嶺 轉運副使。 益州 及是,渭始還故里,鄉人以爲榮。 屬有事交阯,主將逗撓無功。 轉運使。 遷侍御 下 而卒, 年七十七。 初,渭之入中原,妻子留恭城。 史, 坐 從 歷 南 子 凡六年。 判 違 戸部、 詔 移書交阯, 市馬,黜爲彰信 度支二勾院, 上 徙 閔其貧不 知揚州, 渭奏去劉張時稅算之繁 有二敗卒擐甲先至邕 諭 朝廷威信,將 進殿 克葬, 出 軍 開寶三年,平廣 節 中侍 知 亳州 賻錢 度 副 御 史, 賜 刻 咸 |州 金 改 日

渭 妻莫荃,賢婦人也。 渭北走時,不暇與荃訣,二子孩幼, 荃尙少, 父母欲嫁之。 荃泣

誓曰:「潤非久困者,今違難遠適,必能自奮。」於是親蠶績碓春,以給朝夕,二子皆畢婚娶。 凡二十六年,復見渭,時人異之。朱昂著莫節婦傳紀其事。

犀帶賜之,記其名於御屏。 共凶狀,杖脊黥面徙遠郡。 年進士甲科,解褐大理評事、知秭歸縣,再遷著作佐郎。 文,遷殿中丞、通判歙州,以能聲聞,有詔嘉獎。 徙知吉州,民有蕭甲者,豪猾爲民患,鼎暴 梁鼎字凝正,益州華陽人。祖鉞,仕蜀爲劍門關使。父文獻,乘氏令。鼎,太平興國八 太宗尤賞其強幹,代還,賜緋魚,舊例當給銀寶瓶帶,太宗特以 端拱初,獻聖德徽號頌萬餘言,試

刺史,治狀顯著者,朝廷不知;方略蔑聞者,任用如故。 繼,禮法陵夷,顧惟考課之文,祗拘州縣之輩,黜陟旣異,名存實亡。 也。 致水旱薦臻, 獄訟填溢, 欲望天下承平, 豈可得也。 伏惟陛下繼二聖之丕圖, 爲億兆之司 之令,下自簿尉,上至宰臣,皆歲計功過,較定優劣,故人思激厲,績劾著聞。 三代而下,典章尙存,兩漢以還,沿革可見。至於唐室,此道尤精,有考功之司,明考課 淳化中,上言曰:「書云:『三載考績,三考黜陟幽明。』此乃堯、舜氏所以得賢人治天下 大失勸懲之理,寖成苟且之風。是 。 且夫今之知州,即古**之** 五代兵革相

列

牧,念百官之未乂,思四海之未康,特詔有司,申明考績之法,庶幾官得其人,民受其賜矣。」 俄爲開 封府判官,遷太常博士、三司右計判官,又爲總計判官,會復三部,換度支判官。

求郡,歷知徐、密二州。 遷,李繼隆擅出赤檉路無功,還奏軍儲失期,鼎坐削三任。復爲殿中丞,領職如 食貨志。 至道初, 三司督逋負嚴急,有久被留繫者,命鼎與醉映按籍詳定,多所蠲免。 鼎洎陳堯叟建議興三白渠,及陳、許、鄧、穎、蔡、宿、亳數州用水利 遷都官員外郎、江南轉運副使,就改起居舍人,徙陝西。 眞宗踐位,復舊官。 咸平四年,遷兵部員外郎、 二年, 踰月,拜右諫議大夫、 知制誥,賜金紫。 五將分道擊李繼 故。 墾田, 以母 事具

度支使。

貨鬻。 運使,鼎奏罷之。 泪禁青鹽以困賊,<br />
令商賈入栗,運解鹽於緣邊,價直與蕃鹽不相遠,故<br />
蕃部齎鹽至者,不能 使,張賀副之,又以內殿崇班杜承睿同制置鹽事。 '西鄙未寧, 今若禁解池鹽,與內地同價,則民必冒禁復市青鹽,乃資盜粮也。」時劉綜爲陝西轉 綜歸朝,亦密陳共非便。 建議陝西禁解池鹽,所在官醫, 鼎旣行,卽移文禁止鹽商,所在約束乖當,延州 議者多言:「邊民舊食靑鹽,其價甚賤。 韶從之。以鼎爲制置使, 楊覃爲轉運

劉 一、慶州 鄭惟吉皆不從規

又鼎奏運咸陽倉栗以實邊,栗已陳腐,鼎即與民,俟秋收易新栗,朝廷聞而止之,上封

院、通進銀臺司兼門下封駮事,出知鳳翔府。以居憂哭泣傷目,表求判西京留司御史臺。 章密陳其煩擾者甚衆,鼎始謀多沮,遂令林特乘傳與永興張詠會鼎等同議可否,於是依舊 通 鹽 商 鼎坐首議改作非是,詔罷度支使,守本官。未幾,丁內艱,起復。 景德初,知三班

三卷,史論二十篇,學古詩五十篇。 **鼎偉姿貌,磊落尙氣,有介節,居官峻厲,名稱甚茂。** 子申甫、吉甫。 好學,工篆、籀、八分。 嘗著隱書

三年,卒,年五十二,賜二子出身。

能,轉左贊善大夫,就知淄州。 簿。 開寶 范正辭字直道,齊州人。父勞謙,獲嘉令。 中,判入等,遷國子監丞、知戎州,改著作佐郎。 太宗征河東,諸州部糧多不及期,正辭所部長山縣吏張秀督 正辭治春秋公羊、穀梁,登第,調補安陽主 代還,治逋欠於淄州,轉運使稱其

民輸,受錢二千,卽杖殺之,郡中畏服。

韶令料州兵送京師,有王興者,懷土憚行,以刃故傷其足,正辭斬之。 有言饒州多滯訟, 太平興國中,改殿中丞,通判棣、深二州,遷國子博士。御史中丞劉保勳奏充臺直, 選正辭知州事,至則宿繫皆決遣之,胥吏坐淹獄停職者六十三人。 興妻詣登聞上訴,太 會

則臣 宗召見正 無待罪之地矣。」上壯其敢斷,特遷膳部員外郎,充江南轉運副使,賜錢五 廷 辨其事。 正辭曰:「東南諸郡,饒實繁盛,人心易動。 興敢扇搖, 荷失控馭, 十萬

之。愿未至,盗遁去,正辭卽單騎出郭二十里,追及之。 擊之,中賊雙目,執之。賊自刃不殊,餘賊渡江散走,追之不獲,旁得所棄贓。 之,囚皆泣下,察其非實,命徙他所訊鞫。 正辭卽載歸,令醫傅藥,創旣愈,按其姦狀伏法,而前十四人皆得釋。 饒州民甘紹者,積財鉅萬,爲羣盜所掠,州捕繫十四人,獄具,當死。 旣而民有告羣盜所在者,正辭潛召監軍王愿掩捕 賊控弦持矟來逼, 正辭大呼,以鞭 正辭按部至, 財尚有餘息, 引問

知幕 年,以本官兼侍御史知雜事 真宗卽位,遷膳部郎中,召判三司勾院,俄復爲鹽鐵判官。 咸平二年,出爲河東轉運使。 輸米豆而以茶鹽酬其直,謂之「折中」,復有言其弊,罷之,至是復置焉。 府州縣官考課,改判刑部,歷戶部、鹽鐵二判官,遷考功員外郎,通判定、揚、杭三州。 端拱二年,代歸,與洛苑副使綦仁澤、西京作坊副使尹宗諤同監折中倉。 遷倉部員 先是,令商人 外郎,同

之官,牧宰爲急。」舉吳奮等五人堪任大郡,復請令奮等各舉知縣、縣令,從之。坐鞫任懿獄, 正辭上言:「昌齡輩貪墨著聞,願陛下罷其民政。」詔追還儼敕,餘悉代之。又言:「治民 時,李昌齡自忠武行軍起知梓州,董儼知壽州,王德裔、楊緘皆任轉運使,後失官宰畿

貶滁 求監兗州商稅。 州 團練副使。 大中祥符三年四月,卒,年七十五。子識、諷,並進士及第 會赦,復爲倉部考功員外郎、通判鄆州,知准陽軍,復膳部郎中,以年老,

出 家,峻法治之。 去不復爭。 知平陰縣。 諷辨數激昂,喜爲名聲,然亦操持在己,更不敢欺。 會河決王陵埽,水去而土肥,失阡陌,田 訟不能決,諷分別疆畔,著爲券,民持 爲縣存視貧弱,至豪猾大 又獻所爲文,召試入等,

此有司 相 邑與農戶等, 比秋,民皆先期而輸。 無種,諷行縣至劉平,發官廩貸民。縣令爭不可,諷曰:「有責,令無預也。」 丁謂戒使者持詔書促上道,諷輒留迪數日,爲治裝祖行。 徙 舉進士第,遷大理評事、通判淄州。 知廣濟軍,民避水堤居,凡給徭於官者,諷悉縱使護其家,奏除其租賦。 慢也。」<br />
即改符,使富人輸三之二,因請下諸州以<br />
脚為率,朝廷從其言。 |諷曰:「貧富不同而輕重相若,農民必大困。 徙知梁山軍,以母老不行,得通判鄆州。 歲旱蝗,他穀皆不立,民以蝗不食菽,猶可藝,而患 且韶書使度民力, 今則均取之, 韶塞決河,州募民入芻揵,而城 時知州李迪貶衡州副使,宰 即出貸三萬斛 累遷太常博

以疾監舒州 靈 仙 觀 尚御藥張懷德至觀齋祠,諷頗要結之,懷德薦于章獻太后,遂召

51

禮部 成。 分判官 陛下 貝 臣 問 所以應天也。」獄由是得解。 極 知 所 外 朝 欲 郎 言者。」 百 廷亦 官 兼 言,對曰:「今權臣驕悍,將不可制。」蓋指曹利用也。 侍 轉對,敕近臣閱視其可行者,類次以聞。 御 不爲此,其如疑天下何。 玉清昭應宮災,下有司治火所起, 史知 雑事 議者疑復修, 諷上書諫:「山木已盡, 入力已竭, 宜 韶示四方,使明知之。」於是下韶罷修。 |諷日: 諷奏曰:「非上親覽決可否, 「此天之戒告,乃復置獄以窮治 利用貶,拜右司諫、 改尚書 則誰 三司 宮必不

||懿二太后 地,不亦信 私 Ш 東饑 固 不聽 願 錢 權 不 納 惟 宰相 御 可 此 演 宜祔眞宗 哉。」遼· 史 復用。」遂以惟演守河 諷 ,不敢復爲御 自 个中丞。 王 袖告 許州 曾 ,青人,家積粟 人相目不敢對。 身以對 源室, 來朝,圖相位,諷奏:「惟演嘗爲樞密使,以皇太后姻屬罷之,示天下以不 叉請 史中丞矣。」帝不得已可 益 曰:「陛下 諷彈奏之; 漕江、淮 多, 南。 擢天章閣待制、 不 米 諷 聽 使 及言其在 發取數千 百 臣言, (契丹, 道過幽州北, 見原野平曠, 慨然曰:「此爲戰 萬 自 臣今奉使 太后時 河陽、 觓 之,諷 濟饑民,因請遣使安撫京東。 知審刑院,出知青州 操龍 河陰東下 乃趨出,遂貶惟演 山 陵, 甚 盛 而 以賑 惟演守 且. 一與后 貸之。 再 河南, 族 隨 .]遷戶 錢惟 州 連 姻 臣 部 入爲右 演倡 郎 早暮憂刺 請 中。 絀 ī諫議 獻、

陳堯佐罷參知政事,有王文吉者,告堯佐謀反,仁宗遣中官訊問,復以屬諷

夜中被旨

非之。 士遜 直學士權三司使。 **究詰,旦得其誣狀奏之。** 與崇勵,俱罷。諷嘗侍對,帝語及郭后亡子。 转轉閣學士,以疾免三司使,改翰林侍讀學士、管勾祥源觀。 時狄棐爲直學士已久,諷盛氣凌棐,宰相李迪右之,遂特詔 時上章懿皇后諡,宰相張士遜、樞密使楊崇勳日中不赴慰班,諷 諷言亡子大義當廢, 陰合帝旨, 徙會靈觀,復改閣學 班柴上,論 以龍 圖 彈 者 閣

士、給事中、知兗州

之,諷 兗州 爲左藏監庫吳守則奏課遷官。 ,乃給言貧,假翰林白金器數千兩自隨,而增產於齊州,市官田虧平估。」置獄于南京劾 旣至郡, 坐方聽旨擅馳驛還兗州,當贖。 而龐籍 為廣南東路轉運使,未行,上言:「嚮爲侍御史,嘗奏彈諷以三司使曲 尚美人同父弟娶守則女, 籍所奏有不實,當免官。 由是宰相李迪等坐親善諷皆斥。 宰相呂夷簡嫉諷詭激,特貶 旣 出

少監 侵掠,久當自服。 歲中徙保信軍,聽居舒州持母喪,又許歸齊州。 知准陽軍,遷光祿卿、知陝州,道改潞州。入見帝言、「元昊不可擊,獨以兵守要害,捍 倘內修百度,躬節儉,如祖宗故事,則疆事不足憂。」復給事中,卒。 日飲酒自縱,爲時所譏。 服除,改將作

事王隨于帝前,因奏一外人謂臣逐隨將取其位,願先出臣,爲陛下引姦邪去,而朝廷淸矣。」 諷 管建議朝廷當差擇能臣, 留以代大臣之不稱職者。 大臣聞而惡之。又數短參知政

列傳第

六

十 三

狐

正辭

劉師道

又嘗與張士遜 議事不合,諷曰:「世謂大事未易可議,小事不足爲,所爲終何事邪?」及爲龐

籍訟,人謂大臣陰諷籍焉。

額 太 初作逸黨詩刺之,而姜潛者又嘗貽書以疏其過云 諷 類曠達, 然捭闔圖進,不守名檢,所與游者輒慕其所爲,時號「東州逸黨」。 山東人

子寬之,終尚書刑部郞中、知濠州。

和州防禦推官,歷保寧、鎭海二鎭從事,凡十年。 郎,纔一月,會考課,又遷殿中丞,出知彭州,就加監察御史。 劉師道字損之,一字宗聖,開封東明人。父澤,右補闕。 會浦洛之敗,奉詔劾白守榮輩,獄成,太宗獎其勤,面賜緋 王化基、呂祐之、 師道, 轉運使劉錫、馬襄上其治跡, 魚 樂史薦于朝, 雅熙二年舉進士,初命 擢著作佐

佃客承之。時有言李順之亂,皆旁戶鳩集, 卒罷之。 師道使兩川議其事。 Ш |峽豪民多旁戶,以小民役屬者爲佃客,使之如奴隸,家或數十戶, 改祠部員外郎,出爲京東轉運使。 師道以爲迭使主領則爭忿滋多,署以名級又重增擾害,廷奏非便, 請擇旁戶爲三耆長迭主之,疇歲勞則授以官, 眞宗嗣位,進秩度支。 咸平初,范正辭薦其材 凡租 一調庸斂,

堪長民,徙知潤州。 奏,特遷 司 封、俄爲正使、改工部郎中、代查道爲三司度支副 三年,改准南轉運副使兼淮南、江、浙、 使。 荆湖發運使。 七月,擢樞密直學士,掌三 四年, 以漕事入

俄擢權三司使(1),從幸澶淵,判隨駕三司,充都轉運使。

閻承翰詣御史府推治之。 卷中密爲識 師道弟幾道,舉進士禮部奏名,將廷試,近制悉糊名較等,陳堯咨當爲考官,敎幾道於 號。 幾道旣擢第,事泄,詔落其籍,永不預舉。 坐論奏誣罔,責為忠武軍行軍司 馬, 師道固求辨理,詔曹利用 堯咨免所居官,為鄆州團練

副使臼。 二年(三)以郊祀恩,起爲工部郎中、知復州,換秀州

年,李應機代還。 長 |沙當湖、| 嶺都會,剖煩析滯,案無留事。 師道性慷慨尙氣,善談世務,與人交敦篤。 大中祥符二年,以兵部郎中知潭州,遷太常少卿。師道敏於吏事,所至有聲,吏民畏愛。 應機未至郡,六月,師道暴病卒,年五十四,錄幾道爲試秘書省校書郎。 歲滿,復加樞密直學士,換左司郎中,留一任。 工爲詩,多與楊億輩酬唱,當時稱之。

州饒陽,遂爲縣人。父恕,後唐時童子及第, 王濟字巨川。 其先眞定人,祖卿,有詞辨,趙王鎔召置幕府。 開寶中,知秀州。 會盜起,城陷,爲盜所殺,將 鎔政衰,卿懼禍,避地深

列

傳

第六十

 $\equiv$ 

Ŧ

濟

嘉之,遺以

束帛,奏假驛置

遺歸

一〇〇六六

賊義之, **丼害濟。** 、拾去。 濟 伏 柩 濟攜父骨匿 號 慟 ,謂賊曰:「吾父已死,吾安用生爲, 山谷間。 旣而官軍大集,濟脫身謁其帥朱乙,陳討賊之計。 但恨力不能殺汝,以 報 父讎爾 Z

其倘 就遷太子中舍,詔書獎勞。 其事,太宗大悅。 民 驛 翎為 或焚民舍爲盜。 丞 奏其 田 改刑部詳覆官、通 豁 少,且 先是, 再 汀州 調 事 羽 , 胙城尉,徙臨河 俾就 濟母 因韶旁郡悉如 以銀冶構 鶴非常 學。 終於岳陽、權窆佛舍。 都校孫進 夕,報有火,濟部壯士數十潛往偵 有物, 雍熙中,上書自陳 訟, 判鎭州。牧守多勳舊武臣,倨貴陵下,濟未嘗撓屈。 濟所 .'主簿。 + 有 使 年 召判登聞鼓院, 司督責急,一 酒 陳。縣有 不 轉運使王嗣宗 決,逮繫數百人,轉運使使濟鞫之,纔七日情得,止 無賴,毆折人齒, 陂塘數百頃,為鄉 死事之孤,得試學士院,補 至是,乃倂護二喪還饒陽。 羽至 拜監察御 直 被詔舉法官,以濟名聞。 數百錢,民甚苦之。 濟不俟奏, 同,果得數輩丼所 史。 豪斡其利, 上疏陳統天下之術、節 杖脊送 龍溪主簿。 州將以聞, 會歲旱,濟悉 濟渝民取 闕 盜 遷光祿 戍卒頗 下, 物, 繇是軍 時 卽 鵝翎 太祖 态暴不 寺丞、權大理 · 斯之。 調 導之,分漑 民 漏 物之道, 城 坐數人。 代 召見,以 建輸 · 法,夜 、畏肅 輸 馬山 仍 鶴

大者

其言切於時, 詞多不載

有十:擇左右,別賢愚,正名器,去冗食,加奉祿,謹政敎,選良將,分兵戍,修民事,開什

畏,沉緩其死乎? 仗行劫,不以 咸平 刻, ) 贓有 濟以刑網份繁,建議請删定制敕,乃命張齊賢領其事,濟預焉。 因 無 與齊賢廷爭數四 悉抵死。 齊賢議貸不得財者, 濟詞氣甚厲,目齊賢爲腐儒。 濟曰:「刑,期於無刑。 然卒從齊賢議,人以 以死懼之,尚不 刑統舊條:持

衆, 得其人,可以馴致,今則未也。」上動容,獨留濟問 今非太平邪?」濟曰::「北有契丹, 陽災診,宰相苟能和陰陽,弭災診,爲國家致太平,河之不決,臣亦可保。」齊賢曰:「若 齊賢 濟爲刻。 此誠怠賢之秋;不然,臣懼敵人將飮馬於河渚矣。」又著備邊策 (時爲相 **螽茲隗虜**, ijį 一駕巡師大名,調丁夫十五萬修黃、汴河,濟以爲勞民,詔濟馳往經度,還奏省十六七。 改鹽鐵判官 ,以河決爲憂。 敢爾憑 歲, 蓋謀謨當國之人未有如昔之比。 因對, 西有繼遷,兩河、關右歲被侵擾。 丼召濟見, 齊賢請令濟署狀保河不決, 邊事。 濟日:「陛下承二聖之基,擁百 臣謂 十五條以獻。 國家所恃,獨一 以陛下神武英略。 濟日:「河決亦陰 洪河耳 是,則 萬 茍 爪

賢,乃奏堂當以德音原釋。 杖一伶官致死, 濟近數言事,似有操持,可試之。」遂令濟權判大理寺事。 濟論以大辟,遇赦從流。 齊賢、王欽若議濟坐故入,停官。 時王欽若 知審刑,與濟素不相得, 福津尉劉瑩集僧舍,屠狗 逾年,復爲監察御史、通判河 又以濟嘗忤齊 之。

三年,選官判大理寺,上曰:「法寺宜擇當官不回者,苟非其人,或有寃濫

,即感傷

和

列

南府。

濟曰:「陝西有關防隔閡,舳艫遠屬,軍儲數萬,一旦沉之,可惜; 景 德初,徙知河中府。 契丹南侵,上幸澶淵,詔緣河斷橋梁,毀船舫,稽緩者論以軍法。 又動搖民心。」因密奏寢其

事,上深嘉歎,遣使褒論。

茶法,頗易舊制,由是忤丁謂、林特、劉承規輩,因與飲若迭詆訾之。 昔唐太宗以豐年爲上瑞。 未幾,召拜工部員外郎兼侍御史知雜事。 臣願陛下日愼一日,居安慮危,則天下幸甚。」受韶與劉綜改定 三年,判司農寺。 時周伯星見,濟乘間言曰:

諛佞、罷土木不急之費爲言。 爲糜粥,日親嘗而給之; 斬之,上嘉其能斷。 郡城西有錢塘湖,溉田千餘頃,歲久湮塞。濟命工濬治,增置斗門,以備漬溢之患,仍以白 居易舊記刻石湖側,民頗利之。陸州有狂僧突入州廨,出妖言, 四年,拜本曹郎中,出知杭州。 大中祥符三年,徙知洪州,兼江南西路安撫使。 錄饑民爲州兵,全活甚衆。是歲卒,年五十九,遺奏大旨以進賢退 上面加慰諭,仍戒以朝廷闞失許密上言。 與轉運使陳堯佐按其實, 屬歲旱民饑,躬督官吏 遷刑部郎中。

後於濟。 濟頗涉經史,好讀左氏春秋,性剛直,無所畏避。 金鎖沒,濟撫其孤,援寘祿仕。 素與內臣裴愈有隙,愈坐事,上怒甚,命憲府鞫 少時,深州刺史念金鎖一見器之,且

之,濟適知雜事,力爲辨理,遂獲輕典。 子孝傑,國子博士。

議論挺特,無所畏避。 論 曰:渭有淸節,臨事多從便文。鼎好規畫。 五臣者, 仕不過監司、郡守, 而名稱甚茂, 可尙哉。 師道喜論世務。 正辭按貪吏,辨冤獄。

從之,籍爲軍者七千人。後遷汀州判官,權知建安縣。縣產茶,每歲先社日,調民數千鼓譟 食,州不敢擅募。偕乃詣提點刑獄呂夷簡曰:「民迫流亡,不早募之,將聚而爲盜矣。」夷簡 山旁,以達陽氣。偕以爲害農,奏罷之。 方偕字齊古,興化莆田人。年二十,及進士第,爲温州軍事推官。 歲饑,民欲隸軍就廩

御史裏行,再遷侍御史。 州 逃卒傭民家自給,一日,誣告民事摩駝神,歲殺十二人以祭。州逮其族三百人繫獄,久不 偕被詔就劾,令卒疏所殺主名,按驗皆亡狀,事遂辨,卒以誣告論死。 遷秘書省著作佐郎,歷知福淸、資陽縣。 南京鴻慶宮災,偕引漢罷原廟故事,請勿復修。 累遷尚書屯田員外郎,爲御史臺推直官。 知雜事龐籍薦爲

100六九

列傳第

六十三

方

偕

曹穎叔

得差權親民官。」判大理寺,改度支副使, 出 郡 以 配 民,偕奏罷之。 餌賊,無益 元昊 /寇塞 門,鄜延 也。」振 更鹽 出是得一 副總管趙振逗撓不出救,詔偕往按之,法當斬。 鐵 判官,遷兵部員 **不死。** 爲開 擢天章閣待制、江淮制置發運使、 封府判官、江南安撫。 外郎無御史知雜 事,言:「以罪謫監當 三司歲出乳香、 偕奏:「兵寡不敵,苟 知 杭 州 者,監 綿綺下州 選刑 司 勿

遷光祿卿,卒。 偕以 更事 進,治杭州有能聲。 喜飲酒,至酣宴無節。 數月,暴中風,以太常少卿分司西 郎

中。

歷威勝 侍省,禧不能辨,及獄具,內侍使禧自爲牒,穎叔言禧爲制使辱命,請寘之法。 部副使夏安期、轉運使柳灝減戍卒吏員之冗者。 **僉書節度判官事**, 有疾,不事醫而專事神,題叔悉禁絕之,乃敎以醫藥。 曹穎叔字秀之,亳州譙人。 軍判官、渭州 通判儀州。 軍事推官。 韓琦、文彥博薦其才,徙夔州路轉運判官。 御史中丞察齊薦爲臺主簿, 初名熙, 嘗夢之官府, 見穎 爲開封府判官,時御史宋禧鞫衛上獄 提點陝西路刑獄,夏人納款, 改大理寺丞。 叔名,遂更名穎叔。 夔、峽 韓億 元昊死,爲夏 於尙淫祠 知亳州, 進 一士及 計四日 1.與戶 于內

國祭奠使。 除直 一史館、知鳳翔府,徙益州路轉運使,權度支副使。

給陝西兵, 都 無擾焉。 重,不可久行,況官自權鐵乎? 轉運使。 傻智高寇嶺南,朝議以閩中久弛兵備,擢天章閣待制、 進龍 而蜀人苦於煩斂,穎叔爲歲出本路緡錢五 自慶曆鑄大鐵錢行 圖閣直學士、知永興軍,然年老,漸昏耄,事頗壅積,人或嘲誚之,卒于官。 陝西,民盜鑄不已,三司上權鐵之議。 請罷鑄諸郡鐵錢,以三鐵錢當銅錢之一。」從之。兩川 十萬,以易軍衣之餘者, 知福州。 累遷右 題叔曰:「鐵錢 司郎中, 兩川 爲陜西 和買 輕 之民始 ĪĪŪ 絹 貨

隰 卿,須淸望官五人保任始得遷,故浮 井二州,知野州。 劉 元瑜字君玉,河南人。進士及第,補舞陽縣主簿,改祕書省著作佐郎、 以太常博士爲監察御史,上言:「考課之法,自朝廷至 薄輩 日趨權門,非所以養康 『心也。」韶麗 員 知雍丘 之。 外郎、 郎中、 一縣,通 剉

經謫官在河南日,杖死爭田寡婦,且貸民鑩,監司列薦其才,投託權要,遂復館職,請重寘於 法,并坐保薦者。」詔屬吏,遂竄經袁州 元瑜馳至,斬爲首者,其餘皆釋去不問。 提舉河北便糴。 會永寧雲翼軍士謀爲變,吏窮捕,黨與謀劫囚以反,百 歷京西、河東轉運使,遷右司 諫。 劾奏「集賢 姓竊 知 多逃避 校 理 陸

|靖等 獨黨 天章 也 大臣 相 因 爲己任,激訐陰私 閣 人以進用不出於已, 又 論 待 疏 失,反言:「前除 制, 李 靖 宜 用 知 在 和 制語 左右; 、曹琮、 不 夏竦爲 爲 宜 忠直, 尹洙、 李昭亮不可 議論 兼 領 樞密使, 紛然, 薦延 余靖、歐陽脩皆以朋黨斥逐。此 諫 職, 輕薄,列之館 典軍 臣 且奉 諫臣 恐復被疏罷 使契丹, 數人摭其舊過, 梁適 閣 不當除翰林學上; 矣。 以以 剉 契丹主傚六國 唱 前 和 日 爲朋 召 孫甫 小人 至 比 都 **薦葉清臣**, 門而 、惡直 語, 范仲淹以非罪貶,旣 近 醜 除 辱國 鼅 之。 正者 邴 府, 毁 命,請加 也。」 自 丁度, 出 此 自 以 旣 聖斷, 效此 進 而 復 退 與

脩、靖深惡之,繇是論者以元瑜爲奸邪。

明。 氏,銳莫敢辨。 同 州 酋 擅補 里 長 車 四 歷河中府, 後 氏 畫 除 百 餘 規取 三司 工易元 人 其財, 出 鹽鐵 以 旣 活為 聽 左 同 副 命, **| 諫議** 居 乃取 畫助教,降知 使,以天章閣 逾 因厚犒之,籍以爲民,凡千二百戶。 年,車即導令求析居。 大夫知青州 銳父棄妾他姓子養之。 待 隨 制 州 卒。 知 潭州 又失保任,改信州 元瑜察知, 徭 比長, 人數爲寇, 使自 窮治得姦狀,黥車竄之,人伏其 徙 ,徙襄州 訴, 桂 元瑜使州人楊謂入梅 州 陰城 固辭 吏爲 富 降鄧 入子 助, 張銳 州 州 斷 少孤 坐在 使 111 歸 張 靗

元瑜性貪,至竊販禁物,親與小人爭權,時論鄙之。

究出 生以之。」景卒免。改豐城主簿,邑有賊殺人,投屍于江,人知主名,而畏不敢言。 一擒賊。 身, 楊告字道之,其先漢州綿竹人。父允恭,西京左藏庫使,數任事有功。 調廬江尉。時張景笞吏死而吏捕急,逃歸告,懼告不見納,告曰:「君勿憂也,吾死 有言賊欲報怨者,告不爲動。旣而果乘夜欲刺告,告又捕得,致於法,境內肅然。 既死,賜告同學 告聞,親

三司憑· 鹽 桑易栗,不能售,告命高其估以給酒,官民獲濟者甚衆。 即賓位,莫之屈也。 遷尚書司封員外郎、開封府推官、開拆司。爲趙元昊旌節官告使,元昊專席自尊大,告徙坐 寧府、壽州 鐵 鑿舟沉屍江中。 副使。 再調 山、 南劍州判官, 理欠司,爲淮南 歷 |祠部、度支、司封郎中,以少府監復爲制置發運使。拜右諫議大夫、知鄭州,徙 除京西轉運副使。 有被誣告者笞服,獄具,告疑其無狀,後數日,果得眞盜。 知南安、六合、錢塘、寧國縣,改大理寺丞、通判江寧州(四)。 盜殺商 轉運使,徙制置發運使,除三司戶部副使,更度支,安撫河東,改 屬部歲饑,所至發公廩,又募富室出栗賑之。民伐 以疾,權管勾西京留臺。頃之,判 徙知池州,累

爲近臣薦,召試,賜同進士出身,未幾卒。 告曉法令,頗知財利,而不務苛刻,時號能吏,然喜事權貴以要進。 告悲傷之,尋卒。 一子,力學有文、 
図

江

授偃師令,因家焉。 被舉爲殿中侍御史、權宗正丞。 縣,徙九隴,以母老監葉縣稅,歷黃河、御河催綱,通判青州、大名府,累遷尚書屯田員 趙及字希之,其先幽州良鄉人。《的,事契丹爲蔚州靈丘令,確熙中,王師北征,乃歸, 及舉進士,爲慈州軍事推官,徙廣信軍判官,改秘書省著作佐郎、知魏 詔劾夏守恩獄, 內侍岑守中用賄撓法,及劾正其罪。 (外郎, 遷侍

御史,夏守經經略四鄙還,及言其無功,不可復樞府。

又疏罷郭承祐團

一練使

郎中、直昭文館、知衞州,召爲鹽鐵副使。 銓吏匿員闕,與選人爲市,及奏闕至卽牓之,吏部牓闕自及始。 州張周物貧暴,及劾奏,貶周物嶺外。擢兼侍御史知雜事,數論時政,權判吏部流內銓。 知徐州,疾甚,求解近職,還州事,乃以本官管勾南京留司御史臺,未赴,卒。 知河中府,特拜天章閣待制、右司郎中。 未幾,請知懷州,徙徐州,還爲三司戶部判官,遷兵部員外郎、京東轉運按察使。 及和厚謙退,內行尤篤,所治有聲,民吏愛之。 祀明堂, 遷右諫議大夫。 又以疾,請知汝州,歲餘, 遷戶部副使,以疾, 還判大理寺、流內銓。 復召爲副使,不赴。 改刑部 知家 従

出

閉 守者以報,是 撫 其材,宜 陜 封 佐 西 府推官、三司鹽鐵判官,遷殿中侍御史。 郎 劉 提字子正,徐州彭城人。 |稍寬假,不爲改者繩治之。| 薦之,擢 知益都縣,徙陰平。 趣焚其屍。 知耀州 拜監察御史,王德用自隨州詔還,近臣言其有反相,提保方之。 富平有盜掠入子女者,旣就擒,陽死,伺間逸去;捕得,復陽死, 再遷太常博士、通判劍州。 舉進士,爲澶州觀察推官,再調湖南節度推官,改秘書省著 韶詣渭州 劾尹洙私用公使錢, 上言:「轉運使掎摭郡縣,苛束官吏, 審閬州 獄,活死囚七人。 頗傅致重法, 以故洙 人不得騁 王堯臣安 坐 歷

又 《坐沂州 明年,宴紫宸殿,副使當坐殿東廡,湜不即坐,趣出。 誤出囚死罪,降知海州。 起為 河東轉運使, 遷戶部員外郎, 閤門奏之,坐謫知沂州,徙<u>克州</u> 復爲鹽鐵副使棄領 河

相意

,深致洗罪,故得優擢

焉

廢。

還,

爲尙書禮部員外郎兼侍御史知雜事,同判吏部流內銓,除鹽鐵副使。議者謂湜採

宰

渠事。汴水絕,鑿河陰新渠,通漕運 如故。

提 知 廣州 知並山民資之食, 會 江南饑,擢天章閣待制、 **儂智高初平,混練土兵,葺械器,作鐵鎖斷江** 卽徙民絕餉, 盜困蹙乞降, 民安之。 知江寧府, 奏與蘇州米五 一路。 十萬斛,以貸饑民。 居二年,母老求內徙,遂徙徐州。 有盜據 山,敕貸罪招之,不肯降。 除戶 部 郎 中、

列

傳

第

一〇〇七六

湜喜 日:「昔布衣隨計, 今以侍從官三品復典鄉郡,過始望矣。」又以左司郎中知鄆州,遷龍

圖閣直學上、知慶州。

湜少賤, 母更嫁營卒,既登第,具袍笏趨卒舍迎母,里人觀歎。 然嗜酒,持法少恕,改知

密州、以病卒。

王彬,光州固始人。 祖彥英,父仁偘,從其族人潮入閩。 潮有閩土,彥英頗用事, |潮

其逼,陰欲圖之。彥英覺之,挈家浮海奔新羅。 新羅長愛其材,用之,父子相繼執國 政

城 史,多厲民,令佐至與爲賓主。 易右班殿直,辭不受。後以秘書省著作佐郎通判筠州,歷知撫州 彬年十八,以賓貢入太學。 |彬至,捕鞫之,得所受路,致之法,自是詔親事官毋得出都 淳化三年,進士及第,歷雍丘尉。 皇城司陰遣 人下畿縣刺

治之,索其家得所藏兵械,又得服器有龍鳳飾,甲坐大逆棄市。 撫州民李甲、饒英恃财武斷鄉曲,縣莫能制。 甲從子詈縣令, 丼按|英嘗強取人孥, 人告甲語斥乘與。 配嶺 彬按

南,州里肅然。

擢提點 | 湖南路刑獄,徙知潭州,入判三司戶部勾院,出為京西轉運使,徙河北。 部吏

馬崇 復爲三司鹽鐵判官,判都理欠、憑由司,累遷太常少卿,卒。 正倚章獻太后姻家豪橫不法,彬發其姦贓,下吏。 忤太后意,徙京東,又徙河東、陝西。

陝州 州 少、安撫京東,遷知眞州,入爲三司度支判官。 河南府推官。 仲 徙江 簡字畏之,揚州江都人。以貧, .東轉運使,除侍御史知雜事,爲三司鹽鐵副使、工部 改秘書省著作佐郎、知蕪湖縣,通判楚州,累遷尚書都官員外郎。 щ, 仁宗面詰之,不能對,出爲 傭書楊億門下, 億教以詩賦, 經制陝西糧草、就遷兵部員外郎、直史館、 河東轉運使。 郎中。 遂舉進士。 奉使陝西,多任喜 歷通判鄭 改侍 御 知

守城 城, 怒,以馬箍擊軍士流 告急,簡 民爭 ′′′;徙 逾年,復爲鹽鐵 知荆南。 輒囚之,仍牓于道,敢妄言惑衆者斬,以是 道, 競以金帛遺閣者,相蹂踐至 既而言者論之,遂落職,又降刑部郎中、知筠州 副使,再 遷兵部,擢天章閣待制、知廣州。 死者甚多,其不得入者,皆附贼。 人不復爲避賊計。 **農智高犯邕州**,沿江而下,人 復爲兵部郎中,徙洪州 比 智高 賊旣去, 以其能 至,始令民 入

卒。

數人,然而<u>元</u>瑜譏詆余靖,提文致尹洙,公議所不與也。 趙及、王彬之流皆文吏,能推恩行利,剗煩去蠹,其治不下古人。 論曰:上抱一藝者,思奮勵以功名自效,況其設施見於政事者乎?方偕、曹穎叔、楊告、 仲簡小才,所謂斗筲之器也,何足 劉元瑜、劉是輩亦不減此

#### 校勘記

道哉!

(1) 權三司使 「權」字原脫,據長編卷五七、宋史全文卷五補。

 $\exists$ 鄆州團練副使 隆平集卷五陳堯咨傳同;本書二八四陳堯咨傳、長編卷五九都作「單州團練副

疑此處「鄆州」爲「單州」之誤。又本書卷七眞宗紀作「單州團練使」,「使」前當脫「副」字。

使」。

二年 一二〇有景德二年南郊赦天下制。此上失書「景德」紀元。 按長編卷五九、六一,陳堯咨貶單州事在景德二年四月,十一月舉行郊祀,宋大詔令集卷

[E] 江寧州 按宋無此州,疑當作「江寧府」。

# 宋史卷三百五

### 列傳第六十四

楊億 弟偉 從子紘 晁迥 子宗慤 劉筠 薛映

外艱,服除,會從祖徽之知許州,億往依焉。 藝, 送闕下。連三日得對, 試詩賦五篇, 下筆立成。 太宗深加賞異, 命內侍都知王仁睿送 在汝矣。」 神助,文字生知。 至中書,又賦詩一章,宰相驚其俊異,削章爲賀。 能屬文,對客談論,有老成風。 人來謁。未幾,億生,有毛被體,長尺餘,經月乃落。 楊億字大年,建州浦城人。 越景絕塵,一日千里,予有望於汝也。」即授祕書省正字,特賜袍笏。 雍熙初,年十一,太宗聞其名,詔江南轉運使張去華就試詞 祖文逸,南唐玉山令。 務學,晝夜不息,徽之間與語,歎曰:「興吾門者 翌日,下制曰:「汝方髫齓,不由師訓,精爽 能言,母以小經口授,隨即成誦。 憶將生,文逸夢一道士,自稱懷玉山 七歲, 俄

列傳第六十四 楊億

奏颈 辰使。 預。 遷光 相。 卽 者衆,獨稱憶爲優,賜緋魚。 明 禄 淳 以億直集賢院。 化 寺 年三月,苑中曲 時 丞 中,詣 公卿表疏,多假文於憶,名稱 屬後苑賞花曲宴,太宗召命 剧獻文,改太常寺奉禮郎,仍令讀書祕閣。 宴, 表 求歸鄉里,賜錢 億復以詩獻。 二年春,遷著作佐 益 著 十五 太宗訝有司不時召,宰相言:「舊制,未貼職者不 賦詩于坐側; 萬。 郎,帝知其貧,屢有霑賚,嘗命爲越王生 至道初,太宗親製九絃琴、五絃阮,文士 又上金明池頌,太宗誦其警句于宰 獻二京賦,命試翰林,賜進士第,

宗實 才長 知 制誥,賜金紫。 人。 於 眞宗 史學,留不遣,固請,乃許之任。 奏億參預,凡八十卷, 在京府、徽之爲首僚、邸 而億獨草五十六卷。 中書疏,悉億 郡人周啓明篤學有文、深加禮待。 草定。 書成,乞外補就養,知處 即位 一初,超拜左正言。 召還,拜左司諫 州 韶錢若水修太 真宗稱其

咸平中, 西鄙 未寧,詔近臣議靈州棄守之事。 億上疏

臣之舌,蓋所以將順人君之意 之。上使辯士朱買臣等發十策以難平津,平津不能對。臣以爲平津爲賢相 軍衞青奮兵掠地,列置郡縣。 臣嘗讀 (史,見漢武北築朔方之郡,平津侯諫,以爲 今靈州蓋朔方之故墟,僻介西鄙,數百里間無有水草,烽 爾。 舊稱朔方,地在要荒之外,聲敎不及。 罷 敝 中 國, 以奉 無用之地, ,非不能 元朔中,大將 折買 願

倍;孤壞築城,邊民繹騷,國帑匱乏,不能制邊人之命,及濟靈武之急。數年之間,兇 榮之敗,資糧屝屢,所失至多,將士丁夫,相枕而死。 文, 苟 度 朝 夕 , 未 嘗 出 一 兵 馳 一 騎 , 敢 與 之 角 。 此 靈 武 之 存 無 益 , 明 矣 。 平 津 所 言 罷 黨逾盛。 邊境屢驚,兇黨猖熾,爵賞之而不恭,討罰之而無獲。 火亭障不相望。 靈武危堞,巋然僅存,河外五城,繼聞陷沒。但堅壁清野,坐食糗糧,閉壘枕 當其道路不壅,饟饋無處,猶足以張大國之威聲,爲中原之扞蔽。 以至募商人輸帛入穀, 自曹光實、白守榮、馬紹忠及王 ,償價數

敝中國以奉無用之地,正今日謂也。

崖,當時公卿,亦有異論,元帝力排衆說,奮乎獨見,下詔廢之,人頌其德。故其詔曰: 然地東不過江、黃,西不過氐、羌,南不過蠻荆,北不過太原,而頌聲並作,號爲至治。 禹,聖之盛者也,地不過數千里,而明德格天,四門穆穆。武丁、成王,商、周之明主也, 及秦、漢窮兵拓土,肝腦塗地,校其功德,豈可同年而語哉!昔西漢賈捐之建議棄朱 **丘郡,所失多矣,何必此爲?** 年不備,况乎避 「議者以棄朱崖羞威不行,夫通于時變,卽憂萬民之飢餓,危孰大焉。且宗廟之祭,凶 臣以爲存有大害,棄有大利,國家輓粟之勞,士卒流離之苦,悉皆免焉。善、舜、 不嫌之辱哉?」臣以爲類于靈武也。 必以失地爲言,卽燕薊八州,河湟

列

虞矣。 卒効命, 以策略,許以便宜 將數人, 彼 財 ? 猶豐, 則奔潰衆叛, 臣 竊惟太祖命姚內斌領慶州,董遵誨領環州,統兵裁五六千,悉付以閩外之事,士 疆埸晏然,朝廷無旰食之憂,疆埸無羽書之警。 提銳兵一二萬,給數縣賦以資所用,令分守邊城,則寇可就擒,而朝廷得以無 未可 以歲月破也。 安能與大邦爲敵哉?若欲謀成廟堂, 而行。 爣寇擾內屬,撓之以勁兵,示之以大信,懷荒振遠,論以賞格, 直 「須棄靈州,保環慶,然後以計困之爾。 功在 臣乞選將臨邊,賜給廩賦,資 漏 刻, 臣以爲彼衆方點,積 如臣之策,得聽

憶竄定方用之。三年,召爲翰林學士,又同修國史,凡變例多出憶手。 宜黃簿王太沖爲大理評事,億以丞吏之賤,不宜任清秩,卽封詔還。 史館,會修冊府元龜,億與王欽若同總其事。 景德初,以家貧,乞典郡江左,詔令知通進、銀臺司兼門下封駁事。 其序次體制,皆億所定, 未幾,太沖補 **羣僚分撰篇序**, 大中祥符初,加兵部 時以吏部銓主 事前 詔 俄 經. 判

刀衎、陳越、劉筠輩厚善。 五年,以疾在告,遣中使致太醫視之,億拜章謝,上作詩批紙尾,有「副予前席待名賢」 以久疾,求解近職,優詔不許,但權冤朝直。 當時文士,咸賴其題品,或被貶議者,退多怨誹。 億剛介寡合,在書局,唯與李維、路振 王欽若驟貴,億

員外郎、戶部郎中。

素薄其人,欽若銜之,屢抉其失,陳彭年方以文史售進,忌憶名出其右,相與毀訾。 ,皆不惑其說 加 金 帛以賜。 [億素體羸,至是,以病聞,請解官。 億有別墅在陽翟,億母往視之,因得疾,請歸省,不待報而行。 有嗾憲官劾億不俟命而去,授太常少 册府元龜成,進秩祕書監 上親 上素 緘

卿

分司

西京,許就所居養療。

管作君可思賦,以抒忠憤。

書監。 儀院, 子紘爲太常寺奉禮郎 七年,病愈, 受詔注釋御集,又兼 判祕閣、太常寺。 T 內 .艱,屬行郊禮,以億典司 起知汝州。 天禧二年多,拜工部侍 史館修撰、判館事,權景靈宮副使。 會加上玉皇聖號,表求陪預,即代還,以爲參詳儀制副使, 禮樂,未卒哭,起復工部侍 郎 明年,權同 郎,令視 十二月,卒,年四十七。 知貢舉,坐考較差謬 事 几 年,復爲翰林 一、降授 錄其 知禮 祕

當世之述作,爲筆苑時文錄數十篇。 輟。 典章 留 精密 百九十四卷。 億 天性 心 釋典禪觀之學, 制度,時 有規裁,善細字起草,一幅數千言,不加點竄,當時學者,翕然宗之。 「穎悟」 多取 自幼及終,不離翰墨。 弟倚,景德中舉進士,得第三等及第,以憶故,升爲第二等。 ĪF. 所著括蒼武夷潁陰韓城退居汝陽蓬山冠鼇等集、 喜誨誘後進, 重交游,性 文格雄健,才思敏捷,略不凝滯,對客談笑,揮翰不 以成名者甚衆。 一耿介,尙名節。 人有片辭可紀,必爲 多周給親友,故廩祿 內外制、 而博覽強記 諷 憶無子,以 亦隨 手集 而

列

-00

從子紘爲後。弟偉。

提點開 寧軍 父母妻子,以 州 知 衢 岩岩 會巡 節 偉 州 龍 封 屬 度 字子奇,幼學于億。 府界諸縣鎭公事,權開封府判官,又判三司開拆司,累遷尚書兵部員外郎、同修起 何爲 判官事。 游縣,再補蘄州錄事參軍 檢部卒李素合州卒二百餘人,謀殺巡檢使,入鼓角門,州將不敢出。 一朝忿而欲魚肉之乎? 而 反?」俱曰:「將有訴于州,非反也。」偉曰:「持兵來,非反而何? 遷大理寺丞、知河間縣,再遷太常博士。 天禧元年獻頌,召試學士院,賜進士及第。 」悉令投兵,坐籍首惡得十餘人,斬之。徙知祥符縣、 國子監薦爲直講。 駙馬都尉李遵島守澶州,辟簽書鎮 用近臣薦,爲集賢校理、通判 以試 秘書省校 偉挺身往 若屬皆有 書郎 軍 問

者邪 刑 部 ? 偉 郎 」遂命 清愼, 中, 寫 翰 知制誥, 無治 林 學 以影才, 土 權 諫院。 常秉 祀明堂,遷右司郞中、判太常寺, 小笏以 嘗 曰:「諫臣宜陳列 朝。 知制誥缺,中書以偉名進。 大事 細 爲羣牧使兼侍讀學士, 故 何足論 仁宗曰:「此非秉小笏 然當時譏其亡補 進 中書舍 遷

卒, 赠尚書禮部侍郞。

居注

獻,賜進士出身。 不能禁。 紘字望之,以蔭歷官知鄭縣。鄭濱海,惡少販魚鹽者,羣居洲島,或掠商人財物入海,吏 |紅至,設方略,使識者質惡少船,及歸,始給還,且戒論之,由是不敢爲盜。以億文 通判越州,知筠州,提點江東刑獄,除轉運、按察使。 江東饑,紘開義倉振

之, 更持不可。 |紘御下急,常日:「不法之人不可貸。去之,止不利一家爾,豈可使郡邑千萬家,俱受害 紘曰:「義倉,爲民也,稍稽,人將殍矣。」

州 雖家居,兒女不敢妄言笑。聚書數萬卷,手抄事實,名窺豹篇。 爲荆南轉運使,徙福建,不赴,知湖州,復爲江東轉運使。官至太常少卿,卒。紘性嚴, 」聞者望風解去,或過期不敢之官。與王鼎、王綽號「江東三虎」。坐降知衡州,徙越

州稅 压 州 錄事參軍, 改將作監丞, 稍遷殿中丞。坐失入囚死罪, 奪二官。 ,遷太常丞。 晁迥字明遠,世爲澶州淸豐人,自其父佺,始徙家彭門。 眞宗卽位, 用宰相呂端、參知政事李沆薦, 擢右正言、直史館。 迥舉進士,爲大理評事,歷知 復將作丞,監徐、婺一 獻咸平新

**!書** 五 十篇,又獻 理樞一篇。 召試,除右司諫、知制誥,判尚書刑部

帝 北 征 了雍王元份留守京師,加右諫議大夫**,**爲判官,進翰林學士。 未幾,知審官院,爲

儀注 明德 ,累遷尙書工部侍郞。 章穆二園 「陵禮儀使,同修國史。 使契丹,還,奏北庭記,加史館修撰、知 知大中祥符元年貢舉。 封泰山,祀汾陰,同太常詳定 通 進銀臺司 獻玉清昭

應宮頌,其子宗操繼上景靈宮慶成歌。 帝曰:「迥父子同獻歌頭,搢紳間美事

兵部侍郎,請分司西京,特拜工部尚書、集賢院學士、判西京留司御史臺。賜一子官河南, 侍持燭送歸院。 史成,擢刑部侍郎,進承旨。 方盛暑, 爲蠲宿直, 令三五日一至院; 迥辭以非故事, 乃聽俟秋還直。 。時朝廷方修禮文之事,詔令多出 迴手。 嘗夜召對,帝令內

以就養

疾、絕人事,屛醫藥,具冠服而卒,年八十四。 以當天心,庶幾轉亂而爲祥也。」旣而獻斧展、愼刑箴,大順、審刑、無盡燈頌,凡五篇。及感 和殿,帝訪以洪範雨暘之應。對曰:「比年災變荐臻,此天所以警陛下。願陛下修飭王事 史中丞之南,與宰臣同賜御飛白大字。旣罷,所以寵賚者甚厚,進太子少傅。後復召對延 仁宗卽位,遷禮部尙書。居臺六年,累章請老,以太子少保致仕,給全奉,歲時賜賚如 天聖中,迥年八十一,召宴太淸樓,冤舞蹈。子宗慤爲知制誥,侍從同預宴。 罷朝一日,贈太子太保,諡文元。 迥坐御 ,

貴勢無所屈,歷官臨事,未嘗挾情害物。 迥 善吐納養生之術,通釋老書,以經傳傅致,爲一家之說。性樂易寬簡,服道履正,雖 眞宗數稱其好學長者。 楊億嘗謂迥所作書命無過

樂天不憂,知命也。 褒,得代言之體。 五卷,法藏碎金錄十卷,耆智餘書、隨因紀述、昭德新編各三卷。子宗慤。 喜質正經史疑義,摽括字類。 推理安常、委命也。 何必逆計未然乎?」所著翰林集三十卷,道院集十 有以術命語迥, 迥曰:「自然之分, 天命也。

書命,今始有晁氏焉。」父憂,奪喪,管勾會靈觀,入翰林爲學士。母亡,又起復,兼龍圖閣學 位,遷殿中丞、同修起居注。 士、權發遣開封府事,辨雪疑獄有能名。 三遷大理寺丞、集賢校理兼注釋御集檢閱官。 宗慤字世良,以父蔭爲祕書省校書郎。 累遷尙書祠部員外郎、知制誥。 天聖中,百官轉對,宗慤請減上供,墾閒田,擇獄官,令監司舉 宋綬嘗謂:「自唐以來,唯楊於陵身見其子嗣復繼 屢獻歌頌,召試,賜進士及第。 迥領西臺,宗**慰求便養,通判**許州。 又除館閣校勘, 仁宗卽 掌

禮,不若加賜金帛。」後從帝郊祠感疾,數求罷,除資政殿學士、給事中。數日,卒。贈工部 『不如多與之邑。』繁纓,諸侯之馬飾,猶不可與陪臣,况以乘輿之器賜外臣乎。必欲優其 知政事。 元昊反,關中久宿師,以宗慰安撫陝西,與夏竦議攻守策。未還,道拜右諫議大夫、參 會朝廷以金飾胡牀及金汲器賜唃廝羅,宗慤曰:「仲叔于奚辭邑請繁纓,孔子曰

尚書, 諡文 莊。

褒揚訓戒 宗 慤性 人得所宜 敦厚, 事 父 八母孝, 嘗密詔訪邊策,陳七事 **篤於故舊**, 凡任 , , 頗施用之。 子恩皆先其族人。 在翰林,一夕草將相五制,

握筠 巡,又命筠纂土訓。 敏。 家閒暇, 左正言、直史館、修起居注。 眞宗將祀汾雕, 屢得嘉雪, 召筠及監察御史陳從易崇和殿賦歌詩, 帝數稱善。 第一,以大理評事爲祕閣校理 劉筠字子儀,大名人。 帝垂意篇籍,始集諸儒考論文章,爲一代之典。 是時四方獻符瑞,天子方興禮文之事,筠數上賦頌。及册府元龜成 舉進士,爲館陶縣尉。 嘗屬疾,予告滿,輒再予,積三百日,每詔續其奉。 真宗北巡,命知大名府觀察判官 還, 會韶知制誥楊億試選人校太清 筠預修圖經及册府元龜 事。 自 邊 鄙罷 推爲精 車駕 兵、國 樓 /, 進 西

書兵部員外郎 蓋 留,令別草制 内 有 遷 左 所 旭 司諫、知制誥,加史館修撰,出知鄧州, 也 筠 不奉 復請 帝 久疾,謂浸擅權,筠曰:「姦人用事,安可 鄧州, ·詔,乃 更召晏殊。 未行, 進翰林學士。 筠自院出, 遇殊 徙陳州。 初,筠嘗草丁謂與李迪罷 樞密院南門, 還,糾察在京刑獄, 一日居此。」請補外,以右諫議大 殊側 面 相制, 而 知 温,不 貢 旣而 舉, 敢揖, 遷尙 間 復

夫

知

廬

州

從之。筠素愛廬江,遂築室城中,構閣藏前後所賜書,帝飛白書曰「眞宗聖文祕奉之閣」。再 尚書都省。祀南郊,爲禮儀使,請宿齊太廟日,罷朝饗玉清昭應宮,俟禮成,備鑾駕恭謝。 先白中丞。 郎、樞密直學士、知潁州。 仁宗即位,遷給事中,復召爲翰林學士。 , 營冢墓,作棺,自爲銘刻之。 旣病,徙于書閣,卒。 筠牓臺中,御史自言事,毋白丞雜。 召還,復知貢舉,進翰林學士承旨兼龍圖閣直學士、同修國史、判 踰月,拜御史中丞。 知天聖二年貢舉,數以疾告,進尚書禮部侍 先是,三院御史言事,皆

{/// 而其治尙簡嚴。 時號「楊劉」。凡三入禁林,又三典貢部,以策論升降天下士,自筠始。 性不苟合,臨事明達, 奏其族子爲後,又請還所沒田廬云。 、中司、汝陰、三入玉堂凡七集。一子早卒,田廬沒官。包拯少時,頗爲筠所知。及拯顯, 筠,景德以來,居文翰之選,其文辭善對偶,尤工爲詩。 然晚爲陽翟同姓富人奏求恩澤,淸議少之。著册府應言、榮遇、禁林、肥 初爲楊億所識拔,後遂與齊名,

知慮州

書都官郎中。 薛映字景陽,唐中書令元超八世孫,後家於蜀。父允中,事孟氏爲給事中。 映進士及第,授大理評事,歷通判綿、宋、昇州,累遷太常丞。 王化基薦爲監 歸朝,爲尙

祭 部 置 副 郎 御 Ц1 使。 史、 知開 擢 改京東 知制誥,權 封縣 轉 太宗召對,爲江南轉運使, 運使, 徙河 剉 更部 流 東, 內鈴 兼河 棄制置羣牧使。 西 隨 軍 改左正言、直昭文館, 求便親, 同梁顥安撫 知相州 ó 河北江,還,權判 再領漕京東, 爲江、淮 積遷 兩浙 度 尚 茶 支。 書禮 嘲 制

實,貶連州文學。 納部內女口及鬻釦器抑取其直, 詔 輒 天下,凡徒流罪於長吏前對辨,無所異,聽遣決之。」朝廷施用其言。與鉉旣不協,遂發鉉 斷 徒以 映 以 右 上罪。」映卽奏:「徒、流、笞、杖,自有科條,苟情狀明白, 諫議 大夫知杭 映坐嘗召人取告眩狀,當贖金,帝特貰之。 州 映 又廣 臨 決緣銳 市 綾羅不輸稅。 , 庭 紅照留事 C 眞宗遣御史臺推勘官儲拱劾鉉, 轉運 使姚鉉移屬 何必繫獄,以累和 州 「當直 Fi] 氣 仍得

當三班院,出知河南府。 杭 五年,入知通進、銀臺司兼門下封駁事。 祀汾陰還,駐蹕西京,以映有治狀,賜御書嘉獎。 封泰山,為東京留守判官, 遷給事中、

御史中丞。 民出租,牛死,租不 糾察在 遷尙書工 仁宗卽位,遷禮部,再爲集賢院學士、判院事、知曹州 京刑獄, 一部侍郎、集賢院學士、判尙書都省,進樞密直學士、知昇州。 得蠲。」帝覽章矍然,曰:「此朝廷豈知邪?」因令諸州條奏,悉蠲 再判都省。 歷尙書左丞、知揚州。 徙并州,又徙永興 ( 分司 南京。 (軍,拜 建言:「州以牛 工部 卒, 贈 尙 之。 書兼 右 頃 賦

射,謚文恭。

冠帶,黎明據案決事,雖寒暑,無一日異也。 映好學有文,該覽彊記,善筆札,章奏尺牘,下筆立成。 子耀卿秘閣校理,孫紳直龍圖 爲治嚴明, 吏不能欺。 閣 每五鼓

使然,遑暇議是哉。 優,而挾忿以抉人之私,君子病之。 施、悉發於言,宜乎雄偉而浩博也。 振。」<br />
宋一海內,<br />
文治日起。 論曰:自唐末詞氣浸敝,迄于五季甚矣。 晁迥寬易,與物無忤,父子先後典書命,稱爲名臣。 楊億首以辭章擅天下,爲時所宗,蓋其淸忠鯁亮之氣,未卒大 劉筠後出,能與齊名,氣象似爾,至於文體之今占,時習 先民有言:「政厖土裂,大音不完,必混一而後 薛映學藝、吏術俱

#### 校勘記

[1] 兼制置羣牧使同梁顥安撫河北 書卷二九六粱顥傳、長編卷五○。 「同」原作「司」。按薛映於咸平四年代陳堯叟爲制置羣牧使,見 「司」字顯係「同」字之訛。據改。

## 宋史卷三百六

### 列傳第六十五

謝 泌 孫何 弟僅 朱台符 戚綸 張去華 子師德 樂黄目

柴成務

沈佺期、武平 情,得以上達。」復言:「國家圖書,多失次序。 非涉僥望乃許受之。繇是言路稍壅。 殿中丞,獻所著文十編、古今類要三十卷,召試中書,以直史館賜緋。 之言,聖人擇焉。 見奇之。太平興國五年進士,解褐大理評事、知淸川縣,徙彰明,遷著作佐郎。端拱 謝 泌字宗源,歙州歙人。 一、馬懷素分掌, 苟詰而拒之,四聰之明,將有所蔽。 自言晉太保安二十七世孫。少好學,有志操。 望遵復故事。」遂令直館分典四部,以泌知集庫。 泌抗疏陳其不可,且言:「邊鄙 唐景龍中,嘗分經、史、子、集爲四庫,命薛稷、 願采其可者, 拒其不可者, 庶顒顒之 有事,民政未义, 時言事者衆,韶閤門, 賈黃中知宣州, 改左正言, 初,爲 狂夫

列

傳

第

六

+

五

謝泌

使嶺南採訪

豪,朝廷無巧言之士,方面無姑息之臣,奈何疑執政,爲衰世之事乎。 以悉知外事?若令都堂候見,則庶官請見咨事,略無解衣之暇。今陛下囊括宇宙,總攬英 有陳述。」太宗覽奏,即追還前詔,仍以必所上表送史館。 內則謹以事君。此眞大臣之體。』今天下至廣,萬幾至繁,陛下以聰明寄於輔臣,自非接下,何 政事堂,樞密使預坐接見,將以杜私請。」詔從之。 |泌上言曰:「伏覩明詔,不許宰相、樞密使 見賓客,是疑大臣以私也。書曰:『任賢勿貳,去邪勿疑。』張說謂姚元崇曰:『外則疎而 淳化二年,久旱,復上言時政得失。時王禹偁上言:「請自今庶官候謁宰相,並須朝罷於 王禹偁昧於大體,妄 接物,

事者,既可其奏,得專達于有司,頗容巧妄。泌請自今凡政事送中書,機事送樞密,金穀送 昔唐季孟昌圖者,朝疏諫而夕去位,鑒於前代,取亂宜矣。」太宗動色久之。時,羣臣升殿言 三十萬。一日,得對便殿,太宗稱其任直敢言,泌奏曰:「陛下從諫如流,故臣得以竭誠。 三司,覆奏而行,從之。 會修正殿,頗施采繪,泌復上疏。 亟命代以丹堊,且嘉其忠藎。 拜左司諫,賜金紫、錢

潛由他塗入史館,數宿不敢出,請對自陳。 俄判三司鹽鐵勾院。 奉韶解送國學舉人,黜落旣多,羣聚喧詬,懷甓以伺巡出。 太宗問:「何官騶導嚴肅,都人畏避?」有以 泌知

虢州。 京朝官。 之禍,皆賞軍不豐所致。今陛下薄於躬御,賞賜特優,實歷代之所難也。」俄與王沔同磨勘 今長春罷政,旣膳後御便坐。」不報。 員外郎,充鹽鐵副使。頃之,魏羽爲使,即泌之外舅,以親嫌,改度支副使。 臺雜對者,即授巡虞部員外郎兼侍御史知雜事。 士賞給之數。 太宗孜孜爲治,每御長春殿視事罷,復即崇政殿臨決,日旰未進御膳。泌言:「請自 太宗曰:「朕惜金帛,止備賞賜爾。」泌因曰:「唐德宗朱泚之亂,後唐莊宗馬 俄知三班、通進銀臺司,出知湖州。 上元觀燈,泌特預召,自是爲例。 再遷主客郎中、知 因郊祀,條上 轉金部 射 軍

眞宗初,邊人屢寇,泌上疏曰:

不加兵,西北肅然,民安歲登,則太平之象,復何遠哉。至於省不急之務,削煩苛之政, 抑奔競,來直言,斯皆致太平之術,又豈讓唐開元之治也。 寧,繼遷請命,則可行於今日矣。 未幾,普復相,時稱致治之策,無出於此。 臣竊惟聖心所切者,欲天下朝夕太平爾。 臣以爲先朝未盡行者,俟陛下爾。 尋普病,又遼騎擾邊,因循未行。 今北邊謐 雍熙末, 趙普錄唐姚崇太平十事以獻。 陛下自臨大寶,邊

然。 此皆屈己以寧天下,豈以輕大國而競小忿乎。 議者或謂方今用兵,異於開元,且開元邊戎孔熾,明皇卒與之和。至如漢高祖亦 請以近事言,往歲討交阯,王師一

列

其情古猶今也、漢祖、明皇所用之計,正可以餌其心矣。 無他智計。 末,恥講和契丹,遂致天下橫流,豈得爲強?或者有言,敵所嗜者禽色,所貪者財利,餘 南方幾搖 。先朝平晉之後,若不舉兵臨之,但與財帛,則幽薊不日納土矣。察此,乃知 先皇以爲得之無用,棄之實便,及授官爲蕃屛,則至今鼠伏。 石晉之

者,蓋慮視聽之蔽,故採此以達物情,亦罕行其事也。先朝有侯莫陳利用、陳廷山、鄭 昌嗣、趙贊之徒,喋喋利口,賴先帝聖聰,尋翦除之,然爲惠已深矣。 臣伏覩近韶,以不逞之徒所陳述,皆閭閻事。臣聞古先哲王詢于芻蕘,祭於邇言

忠竭力,以輔成太平之治矣。 未聞市非之胥,走塵之吏,可當其任也。惟陛下察往古用賢致治之道,則賢者亦必盡 由 任周、召;文、景淸靜,不易蕭、曹,明皇太平,亦資姚、宋。夫精練國政,斟酌王度, 臣又聞輔時佐主,建萬世之基,立不拔之策者,必倚老成之人。至如成、康刑措,

民懷其愛,刻石以紀去思。 司,加刑部,出爲兩浙轉運使。近制,文武官告老,皆遷秩,令錄授朝官,丼給半奉。 請自今七十以上求退者,許致仕;因疾及歷任犯贓者,聽從便。」詔可。徙知 咸平二年,徙知同州。代還,知鼓司、登聞院。 五年,與陳恕同知貢舉,復知通進、銀臺 轉兵部郎中,復知審官院,直昭文館。知荆南府,改襄州,遷太常 福州,代還, 巡言:

少卿、右諫議大夫、判吏部銓。 大中祥符五年,卒,年六十三。

其子術爲太常寺奉禮郎,衡將作監主簿。 術爲太子中舍。 泌 性端直,然好方外之學,疾革,服道士服,端坐死。 帝聞而嗟異, 遣使臨問恤賜,錄

家,以講授爲業。 得對,言曰:「武不可黷,斂不可厚,奢不可放,欲不可極。」世宗奇其言,命中書試,補開封兵 丞、知龍州而卒。 孫何字漢公,蔡州汝陽人。祖鎰, 建隆初,爲河南簿。 父庸,字鼎臣,顯德中,獻贊聖策九篇,引唐貞觀所行事,以魏玄成自况。 太平興國六年,鴻臚少卿劉章薦其材,改左贊善大夫。 唐末秦宗權據州,強以賓佐起之。 鎰偽疾不應,還 歷殿中

議,聞於時。淳化三年舉進士,開封府、禮部俱首薦,及第又得甲科,解褟將作監丞、通判陝 友善,時輩號爲「孫丁」。王禹偁尤推重之。當作兩晉名臣贊、宋詩二十篇、春秋意、尊儒 召入直史館,賜緋,遷祕書丞、京西轉運副使。歷右正言,改右司諫。 何十歲證音韻,十五能屬文,篤學嗜古,爲文必本經義,在貢籍中甚有聲。 與丁謂齊名 |教

真宗初,何獻五議:其一,請擇儒臣有方略者統兵;其二,請世祿之家肄業太學,寒雋

第

六十

五

孫何

官,勿以恩慶例遷 **州郡** 推 薦 ,而禁投贄自媒者; 上覽而善之。 其三,請復制舉; 咸平二年,舉入閣故事 其四 清行 ,何次當 鄉 待制 飮 酒 , 獻疏曰: 其五 ,請以能授

室而 之綱紀。 令史承 部 修隄防,六職舉而天下之事備矣。 正版圖而阜貨財,有刑部謹紀律而誅暴強,有禮部祀神示而選賢俊,有工部繕宮 六卿分職,邦家之大柄也。 京其事。 令、僕率其屬,丞、郎分其行,二十四司粲焉星拱,郎中、員外判其曹,主事 四海九州之大,若網在綱。 有吏部辨考績而育人材, 有兵部簡車徒而 故周之會府,漢之尚書,立庶政之根本,提百司 冶 戎備,有

禍階。 租 費不充,迫於軍 調 不充,於是蕭景、楊釗始以地官判度支,而宇文融爲租調地稅使,始開利孔,以構 唐之盛時,亦不聞別分利權,創使額,而軍須取足。及玄宗侈心旣萌,召發旣廣, 至于潚、代,則 ·期,切於國計,用救當時之急,率以權宜裁之。 有司之職盡廢,而言利之臣,攘臂於其間矣。 五代 於是叛亂相

也。 之六卿,愼擇戶部尙書一人,專掌鹽鐵使事 二人,分掌度支、戶部使事,各以本曹郎中、員外郎分判之,則三使洎 仍命左右司郎中、員外總知帳目,分勾稽違。 今國家三聖相承,五兵不試,太平之業,垂統 ,俾金部郎中、員外郎判之。 立制,在此時 職守有常,規程既定,則進無掊克之 也。 所宜 判官,雖省猶 又擇本行侍 三部 使額 不省 郎 選

慮,退有詳練之名,周官唐式,可以復矣。 茲事非艱,在陛下行之爾。」

是多,從幸大名,詔訪邊事。何疏曰:

|定道路已通,而||德、||棣烽塵未息,此殆將帥或未得人,邊奏或有壅閼,鄰境不相救援,糗 陛下攄人神之憤怒,憫河朔之生靈,爰御六師,親幸澶、魏,天聲一振,敵騎四逃,雖鎭、 堅壁自全,手握強兵,坐違成算,遂使腥羶得計,她豕肆行,焚劫我郡縣,係累我黎庶。 王,精兵倍於前代。 須俟轉輸之所致也。 陛下嗣位以來,訓師擇將,可謂至多,以高祖之大度,兼蕭王之赤心,神武冠於百 分閪仗鉞者,固當以身先士卒爲心,賊遺君父爲恥。 而列城相望,

輸者何?敵騎往還,姦馳鳥逝,嬴糧景從,萬兩方行,迨乎我來,寇已遁去。 合救援,則莫若督以軍令,聽其便宜,運糗糧,則莫若輕齎疾驅,角彼趫捷。 今急務。 壘參錯,如輔車脣齒之相依,若頭目手足之相衞,託稱兵少不出,或待奏可乃行。 臣,固祿守位,城池焚劫,不以實聞,老幼殺傷,託言他盜。不救援者何?緣邊州縣,城 將帥者何?或恃勇無謀,或忌功玩寇,但全城堡,不恤人民。邊奏者何?護塞之 擇將帥,則莫若文武之內,參用謀臣;防壅閼,則莫若凡奏邊防,陛見庭問; 此四者,當 。俟辇

今大駕旣駐鄴下, 契丹終不敢萌心南牧, 所慮荐食者, 惟東北無備之城, 繕完周

一〇〇九九

列傳

第六

十五

孫

间

則

清和之使,不日可待。

防,不 可輕,餘孽尙或稽誅,奔突亦宜預備。 可不慎。 且蜂蠆有毒,豺狼無厭。 大河津濟,處處有之,亦望量屯禁兵,扼其要害, 今契丹西畏大兵,北無歸路,獸窮則搏,物不

释之。 使,又獻疏請擇州縣守宰,省三司冗員,遴選法官,增秩益奉。 先已被疾,勉強親職,一日,奏事上前,墜奏牘於地,俯而取之,復墜笏。 眞宗覽而嘉之。及傅潛逗撓無功,何又請斬潛以徇。 「死生有命。」卒不聽。 景德初,代還,判太常禮院。 何慙,上章求改少卿監,分司西京養疾,上不許,第賜告,遣醫診視。 是多,卒,年四十四。 俄與晁迥、陳堯咨並命知制誥, 賜金紫, 掌三班院。 上在澶淵,聞之憫惜,錄其子言爲大理評 俄權戶部判官,出為京東轉運副 未幾,從兩浙轉運使,加起 有司劾以失儀,詔 醫勉其然艾,何 何

峻 刻 州 何樂名教,勤接士類,後進之有 郡病焉。 好學,著駁史通十餘篇,有集四十卷。 詞藝者,必爲稱揚。 弟僅。 然性卞急,不能容物。 在浙右專務

僅 解褐舒州團練推官,會詔舉賢良方正之士,趙安仁以僅名聞。 字鄰幾。 少勤學, 與何 俱有名于時。 咸平元年, 進士 一甲科, 策入第四等,擢光禄寺 兄弟連 冠 頁 籍, 咭

歸朝 命知永 聘,僅 孫全照求代,眞宗思擇循良任之,御書邊肅洎僅二名示宰相。 丞、 衞 知審 尉 直集賢院,俄知浚儀縣。 寺丞 刑院。 首爲國 復領 興軍府。 審刑院。 頃之,拜右諫議大夫、集賢院學士、權知開封府。 母 生辰使。 僅純厚長 久次, 進給事中。 改本府判官,遷右正言、知制誥,賜金紫,同知審官院。 (者,爲政頗寬,嘗詔戒焉。 景德初,拜太子中允、開封府推官,賜緋。 天禧元年正月,卒,年四十九。錄其子大理評事和爲 大中祥符元年, 改左諫議大夫,出 或言僅嘗倅京府、諳民政,乃 :pp 比部員 北邊請盟,遣使交 外郎。 是多,永興 知河中府。 代還,

至殿中丞。 僅 性端慤,中立無競,篤於儒學, 士大夫推其履尚,有集五十卷。 僅弟侑亦登進士第,

符與同輩課試,以尺晷成一賦。 十歲能屬辭,嘗作黃山樓記,士友稱之。 朱台符字拱正,眉州眉山人。父賦,舉拔萃,歷度支判官,卒于殿中丞。 淳化三年,進士登甲科,解褐將作監丞、通判青州。 及長,善詞賦。 時太宗廷試貢 士,多擢敏速者, 台符 少聰穎? 召入直

列

史館、賜緋魚、再遷秘書丞、知浚儀縣。

10 0 0

咸 平 元 年,與楊礪、李若拙、梁顥同知貢舉,俄以京府舊僚,擢太常博士,出爲京西轉運

副使。時北邊爲梗,台符上言曰:

得制禦之道也。 來。二十年間,罕聞入寇,大省戍邊之卒,不興出塞之兵。關防謐寧,府庫充溢,信深 商鑒不遠也。頃者,晉氏失御,中原亂離,太祖深鑒往古,酌取中道,與民休息,遣使往 營,斯爲良策。 臣聞蠻夷猾夏,帝典所載,商、周而下,數爲邊害。或振族薄伐,或和親修好,歷代經 至於秦築長城而黔首叛,漢絕大漠而海內虛,逞志一時,貽笑萬代,此

**委翰,赡給賞賜,不可勝數。** 魏之間,幾非國家所有。 後,大肆兇鋒,殺略軍民,攻拔城砦,長驅深入,莫可禁止。當是時也,以河爲塞 雖協謀,天未猒亂,螗斧拒轍,用稽靈誅。 |幽薊之地,實維我疆,尙隔混同,所宜開拓。 |太宗平||晉之後,因其兵勢,將遂取之。 旣阻歡盟,乃爲備禦,屯士馬,益將帥, 獨粟之飛輓, 繇是國家之食貨,匱於河朔矣。 重興弔伐之師,又作遷延之役。 一,而趙、 金帛之 自茲厥

以爲宜於此時赦契丹罪,擇文武才略習知邊境辨說之士,爲一介使,以嗣位服除,修 未 加渥澤,非所以柔遠能 陛下自天受命,與物更始, 邇,昭王道之無偏也。今祥禪將終, 繼遷授節, 黎桓 加爵,威命使者鎭撫其邦。 中外引頸觀聽德音。臣愚 惟彼契丹,

其間· 好鄰國,往告諭之。彼十年以來,不復犯塞,以臣計之,力有不足,志欲歸嚮,而未得 尋舊盟,利以貨財,許以關市,如太祖故事,使之懷恩畏威**。** 也。 今若垂天覆之仁,假來王之便,必歡悅慕義,遣使朝貢。 則兩國旣和,無北顧之憂, 因與之盡捐 前 惡,復

台符又自請往使,時論韙之。

可以專力西鄙,繼遷自當革心而束手矣,是一舉而兩得也。

之,仍賜金紫。 院,拜工部員外郎,換度支判官。 輕傜節用,均賦愼刑,責任大臣,與圖治道。 咸平二年春,旱,韶求直言。 景德初,鄭文寶爲陝西轉運,或言其張皇生事,徙台符代 台符上疏,請重農積穀,任將選兵, 愼擇守令, 考課黜陟, 奏入,優韶褒答。 入爲鹽鐵判官, 改判 F 部 勾

召還,會執政有不喜者,復出知洪州,卒於舟次,年四十二。賜其子公佐同學究出身,赗錢 議事違戾,交相掎奏,以不協聞, 命御史視其狀。 九月,徙台符知郢州,覃知隨州。

台符俊爽好謀,然頗以刻碎爲舉職。

與楊覃聯事,覃頗欲因仍舊貫,台符則更革煩擾,

二十萬。

進士,廷試並得第五人。 台符好學,敏於屬辭,喜延譽後進,有集三十卷。公佐及台符弟昌符,大中祥符中,舉 第 六 + 五 朱 初,昌符登科,宰相言昌符即台符弟,上因言台符有文學及著述可 습 符 戚 綸

採,甚嗟悼之。 公佐卒,又以次子壽隆試將作監主簿。 昌符爲屯田 員外 郎

囚約 若水、王禹 險悍多構訟,爲渝民詩五十篇,因時俗耳目之事,以申規誨,老幼多傳誦之。 復爲光祿寺丞,轉運使又上其政績,連詔褒之。 徙 知太和縣。 喜談名敎。 戚綸字仲言,應天楚丘人。父同文,字文約,自有傳、 遣 歸祀其先,皆如期而還。 **一解深所賞重。** 同文卒於隨州,編徒步奔計千里餘。 太平興國八年舉進士,解褐沂水主簿。 久之,復授大理評事、知永嘉縣。 遷光祿丞,坐 一輪獄 俄韶起復涖職、就加大理評事。 陳州失實,免官。 按版籍, 論少與兄維以文行知名, 篤於古 境有陂塘之利, 浚治以備水旱。 得逋戶脫口漏租者甚衆。 著理道評十二篇, 每歲時必與獄 江外民 錢

特改太常 爲 秘 閣 眞宗 校 丞, 理。 即位,轉著作佐郎、通判 俄 受詔考校司 剕 鼓 司、登聞 天臺職官, 院。 泰州 出 內府緡帛市 定州縣職田 將行,祕書監楊徽之薦其文學純謹, 邊 條制 糧 門紹倫工 詔館 乘 傳往均市 閣官以 舊文獻, 之。 上嘉綸 官在館閣, 所著, 命

百、 龍圖閣待制, 景德 元年,判三 賜金紫。 司 開拆, 時初建是職, 賜緋魚, 改 、鹽鐵 與杜鎬並命,人皆榮之。 判官。 上 疏 言 邊 事, 甚 綸久次州縣, 被嘉獎。 + 户, 留意吏事 拜 右正

奏議 體其至愚,不罪觸犯,安敢循嘿不言。 毎 等封建,三日 益 便殿請對,語必移晷,或夜中召見,多所敷啓。 厢 ,諫者之職。 軍、減禁兵,十日修六典令式。」詞頗深切,上爲嘉獎。 ·復制科,四曰崇國學,五曰闢曠土,六曰修貢舉,七曰任大臣,八曰置平糴, 九 臣屢蒙召對,皆延數刻,屈萬乘之尊,接一介之士,聖德淵深,包納荒穢 。謹摭十事該治本者附于章左:一日王畿關輔,二日五 俄上奏曰: 「夫出納獻替,王臣之任,章疏

)典令式, 封及非次升 度,遂遵行之。 先是,羣臣詔葬,公私所費無定式。 預修删府元龜,會置官總在京諸司之務,凡百三十司,命編與劉承珪同領其事。 比類沿革,著爲大典,時論稱之。進秩右司諫、兵部員 與趙安仁、晁迥、陳充、朱巽同知貢舉,綸上言取七之法,多所規制,並納用焉。 殿奏事 倫以三公、尚書、九列之任,唐末以來,有司漸繁,綱目不一,謂宜采通禮、六 , 倫謂「忠讜之入,當開獎言路,若疎遠之士,尤艱請對」,上頗嘉之。 綸言其事,詔同晁迥、朱巽、劉承珪校品秩之差,定爲制 外郎。 時詔禁羣臣匿名上 判鴻臚寺。

諜昭錫,聿示臨民之戒,用恢奕葉之祥。 玉,藏之太廟,別以副本秘於中禁,傳示萬葉,無敢怠荒。 一样,顧天人之相接。 陛下紹二聖丕業,啓萬世鴻基,勤行企道,恭默思玄,上天降鑒,瑞 乞韶 有司,速修大祀,載命侍從,摹寫祥符 然臣恐流俗幻惑狂謀,以人鬼之 ,勒於嘉

大

中祥符元年,掌吏部選事。

上初受靈文,編上疏曰:「臣遐稽載籍,歷考秘文,驗靈應

妖辭, 亂天書之眞旨。 伏望端守玄符,凝神正道,以答天貺,以惠烝黎。

倉, 編 東封祥瑞封禪記。 隸司農寺,以平民糴,皆從之。 是多,封泰山,命論同計度發運事 會峻待制之秩,又兼集賢殿修撰。 嘗宴餞种放于龍圖閣, 禮 一成,遷戶部郞中、直昭文館,待制如故。 建議修釋奠儀,頒于天下; 韶近臣爲序,上覽綸所作,稱其 被 立常 詔 平 同

2史才

發運, 僻 報 郡 則 司 郎中。 三年, 徙徐州 嘗居杭州,肆縱不檢,厚結李溥,綸素惡之。 則 時爲當 擢樞密直學士,上作詩寵之。 屬江潮爲患,乃立埽岸,以易柱石之制,雖觅水患,而衆頗非其變法。 塗者所呢,因共捃摭論過,徒知揚州。 祀汾陰, 復領發運之職。 通判吳耀卿, 惟揚亦溥、則巡內,持之益急,求改 則之黨也,何編動靜,密以 居無何, 出知杭州,就加 胡則時領

平之。 天禧四年, 改保靜 安甚衆。 八年, 綸 徙鄭州 因戲謔語及準,瓊誨 與劉綜並罷學士,授左諫議大夫。 ,王遵誨 軍 副使。 爲勸農副使,嘗任 是多,以疾求歸故里,改太常少卿,分司 恚怒,以爲汙己,遂 西 邊,寓家永興,閨門不肅, 代還, 奏綸 復知青州。 謗訕 · 坐 左 遷 歲饑,發公廩以救餓殍, 南京。 岳 州 事將發,知府寇準爲 團 練 五年,卒,年六十 副 使,易和州 全

時知府事,輟奉以助其喪。家人於几閤間,得遺滅一篇,大率皆誘勸爲學。 議,與陳彭年並職,屢召對,多建條式,恩寵甚盛。樂於薦士,每一奏十數人,皆當時知名士。 者數日。 又前後奏議,有機務利害、備邊均田之策,別爲論思集十卷,分上下篇。 晚節爲權倖所排,遂不復振。 云:「歸老後,得十年在鄕閭講習,亦可以恢道濟世。」大中祥符中,繼修禮文之事,綸悉參其 綸篤於古學,善談名理,喜言民政,頗近迂闊。 與交遊故舊,以信義著稱。士子謁見者,必詢其所業,訪其志尙,隨才誘誨之。 善訓子弟,雖至清顯,不改其純儉。 事兄維友愛甚厚,維卒,計聞,哀慟不食 旣沒,家無餘貲。 天聖中,其子舜賓 有集二十卷。 張知白

張去華字信臣,開封襄邑人。

獻之,詔贈左諫議大夫。舜賓,官太子中舍。

院,與宗人沆、鸞、湜結友,故名聞都下。長興中, 怒其不親穡事, 詬辱之。 置謂其兄曰:「若不就學於外, 素志無成矣。」遂潛詣洛陽龍門書 父誼,字希賈。 好學,不事產業。 旣孤,諸父使督耕隴上,他日往視之,見閱書于樹下, 和凝掌貢舉,誼舉進士,調補耀州團練

列傳第六十五 張去華

推官。

禮部員 涉辭 自安計 以爲 又言契丹有援立之助,所宜敦信謹備,不可自逸,以啓釁端。 藝,可備諫職。」未幾,超拜左拾遺。 哥日 「切近之職,實當顧問,四方利害,所宜詢訪,若不接賓客,聾瞽耳目,坐 天 外郎、侍御史。 ,其可得乎?」凝大奇之,他日,薦于宰相桑維翰曰:「凝門生中有張誼者,性介直,頗 福 初, 代 還。 改倉部、知制誥,加禮部郞中。 會凝由內署拜端明殿學士,署門不接賓客, **誼以晉室新造,典禮未完,數上章請復有唐** 改右補闕,充集賢殿修撰,歷 誼聞之,卽 虧 日 職業,雖爲 致書于凝, 故

必列步騎以自誇詫,誼與承翰竊笑之。 不爲屈,故共嫉之。 乾祐 又夜集,與承翰使酒,語相侵,坐貶均州司戶,改房州司馬,歲餘卒。 初,眞拜中書舍人。時蘇逢吉、楊邠、王章輩攀附漢祖,驟得大用,搢紳多附之,誼 遣誼爲吳越宣諭使, 與兵部郎中馬承翰同往賜官告。 又乘酒,言詞有輕發者,錢俶甚恥之,乃奏置擅箠防 浙 人每迓朝使,

「兵戰未息,民事不修,非馭國持久之術。」因著病征賦、治民論,獻于行在。 去華幼勵學,敏於屬辭,以蔭補太廟齋郎。 屬三院議事,不得預坐,謂所親曰:「簿領之職,非壯夫所爲。」即棄官歸鄭州,杜門不 周世宗平淮南, 去華時年十八, 慨然歎曰: 召試,授御史臺

建隆初,始攜文遊京師,大爲李昉所稱。明年,舉進士甲科,即拜秘書郎、直史館。 以

歳満 旭立 賜襲 賴之爲扞蔽,若大軍先克其城,以趣番禺,如踐無人之境。」且言桂州可取之狀,有詔嘉獎。 權,此朕所親見也。」荆湖平,命通判道州。 訴父始忤權貴,因罹重貶。 、衣、銀帶、鞍勒馬。 召澹輩與去華臨 不遷、上章自訴,因言制誥張澹盧多遜、殿中侍御史師頌文學膚淺,願得校其優劣。 軒策試,命陶穀等考之。 朝議薄其躁進,以是不遷秩者十六年。 宰相薛居正亦爲言之,太祖爲之動容,且曰:「漢室不道,姦臣擅 去華上言:「桂管爲五嶺衝要,今劉鋹保境固守, 濟以所對不應問,降秩,即擢去華爲右補 **嘗得對便殿,詢及家世,** 太

**運事**。 興 國 七年,爲江南轉運使。 從太宗征太原,監隨駕左藏庫,就命爲京東轉運使。 三年,知陝州,未行,著大政要錄三十篇以獻,上覽而嘉之,詔書褒美,賜綵五十匹, 雅熙中,王師討幽州,去華督宋州饋運至拒馬河,就命掌河北轉 歷左司員外郎、禮部郎中。 太平

因留不遣。

代還,知磁、乾二州,選爲益州通判,遷起居舍人、知鳳翔府。

旨, 諭以輔成之意。 之端士,特加選用,其善佐吾子。」各賜錢百萬。 妻之甥。 會許王尹京,命爲開封府判官,殿中侍御史陳載爲推官,並賜金紫。 道安伐登聞鼓,言鉉以尺牘求請,去華故不爲治。 未幾,有廬州尼道安訟弟婦不實,府不爲治,械繫送本州。 踰歲,就拜左諫議大夫,又令樞密使王顯 上怒,去華坐削一 謂曰:「卿等皆朝 任, 貶安州 弟婦 即徐 司 鉉 倳

列

第六十五

張

去

蓝

馬。 歲餘,召授將作少監、知興元府,未行,改晉州。 遷秘書少監、知許州

不免 眞宗嗣位,復拜左諫議大夫。 在洛葺園廬,作中隱亭以見志。 未幾,遷給 景德元年,改工部侍郎致仕。三年,卒,年六十 固執不許。 事中、知杭州。 咸平二年,徙蘇州。 兩浙自錢氏賦民丁錢,有死而 頃之,以疾求

用。 命以縑素寫其論爲十八軸,列置龍圖閣之四壁。然不飾邊幅,頗爲淸議所貶,以是不登顯 代,攜之京師,慰薦館穀,並登仕籍。 去 有集十五卷。 華美姿貌,善談論,有蘊藉,頗尙氣節。 子師古至國子博士,師錫殿中丞,師顏國子博士。 嘗獻元元論,大旨以養民務穡爲急,眞宗深所嘉賞, 在營道得父同門生何氏二子,教其學問。

奏事殿中, 時人榮之。 祀汾陰, l師i 「有逋負官物而被繫, 德,字尚賢。去華十子,最器師德。 帝訪以時事,而條對甚備。 除將作監丞、 知河南府薛映薦其學行, 通 判 本非侵盜, 耀州。 遷秘書省著作郞、集賢校理、判三司 帝喜曰:「朕藩邸知卿父名,今又知卿才。」其後每 又獻汾陰大禮頌于行在 若惸獨貧病無以自償, 嘗欲任以官,辭不就。 願特蠲之。」帝用其言。嘗 去華日:「此兒必繼吾志。」 是歲, 舉進士亦爲第一, 都 理欠憑 由 司。

改判司 爲羣牧使、景靈宮判官,再遷吏部郎中。 遣使,帝輒曰:「張師德可用。」契丹、高麗使來,多以師德主之。 天禧初,安撫淮南,苦風眩, 農寺。 **擢右正言、知制誥,判尚書刑部。** 以疾,知鄧州,徙汝州,拜左諫議大夫,罷知制誥。 頃之,出知潁州,遷刑部員外郎、判大理寺,

文集十卷。 師德孝謹有家法,不交權貴,時相頗不悅之。然亦多病,在西掖九年不遷,卒于官。有 子景憲,爲太中大夫。

樂黃目字公禮,撫州宜黃人。世仕江左李氏。

得佐武成軍,旣而復賜及第。 五 年,與顏明遠、劉昌言、張觀並以見任官舉進士。太宗惜科第不與,但授諸道掌書記。 **父**史,字子正。 齊王景達鎭臨川,召掌牋奏,授秘書郎。入朝,爲平原主簿。太平興 上書言事,擢爲著作佐郎、知陵州。 獻金明池賦,召爲三館 國 史

部員 第一条 外郎。 二十卷,續卓異記三卷。太宗嘉其勤,遷著作郞、直史館。 雅熙三年,獻所著貢舉事二十卷,登科記三十卷,題解二十卷,唐登科文選五十卷,孝 淳化 四年春,與司封員外郎、直昭文館李裝同使兩浙巡撫,加都官、知黃州。 轉太常博士、知舒州,遷水

列傳第六十五 樂黃目

獻廣孝傳 五 十卷,總仙記一百四十一 卷。 韶秘閣寫本進內。 史好著述,然博而寡要,以五

帝、三王,皆云仙去,論者嗤其詭誕。

宋齊丘文傳十三卷,杏園集、李白別集、神仙宮殿窟宅記各十卷,掌上華夷圖一卷。又編己 出掌 卷,總記傳百三十卷,坐知天下記四十卷,商顏雜錄、廣卓異記各二十卷,諸仙傳二十五卷, 洛,因卜居,有亭榭竹樹之勝,優游自得。 以賄聞。 所著爲仙洞集百卷。 上見其矍鑠不衰,又知篤學,盡取所著書藏祕府,復授舊職,與黃目同在文館,人以爲榮。 西京磨勘司,黃目爲京西轉運。 咸平初,遷職方,復獻廣孝新書五十卷,上清文苑四十卷。 俄以老疾爲言,聽解職,分司西京。 改判留司御史臺。 未幾卒,年七十八。所撰又有太平寰宇記二百 五年,郊祀畢,奉留守司表入賀, 車駕幸洛,召對,賜金紫。史久在 出知商州。 |史前 後臨民,頗 因得召對。

於宣政殿,試理人策一道,惟鄄城令袁濟及格,擢授醴泉令,餘二百人,且令赴任,十餘人並 爲急;親民之任,牧宰居先。今朝官以數任除知州,簿尉以兩任入縣令,雖功過易見,而能 上章言邊事,召對,拜殿中丞。久之,直史館、知浚儀縣。俄上言曰:「伏以從政之原,州縣 |黄目淳化三年舉進士,補伊闕尉。 伏見唐開元二年選羣官,有宏才通識、堪致理化者,授刺史、都督。又引新授縣令 遷大理寺丞、知壽安縣。 咸平中,徙知壁州,未行,

鐵判官,遷太常博士、京西轉運使。 者,或黜之釐務,或退守舊資。 時務策 放令習學。 一道。 臣欲望自今審官院差知州,銓曹注縣令,候各及三二十人,一次引見於御前 察言觀行,取其才識明於吏治、達於敎化者充選;其有不分曲直、罔辨是非 如此, 丁內艱,時眞宗將幸洛,以供億務繁,起令涖職。 則官得其人,事無不治。」上頗嘉其好古。 歷度支、鹽 史尋

卒,上復詔權奪

兵部員 天禧 辭不拜,卽遷黃目右諫議大夫、權知開封府,度爲會靈觀判官,兩換其任。 者,詔黃目察之,得實以聞,堯咨坐罷龍圖閣職,徙知鄧州。 賜金紫。 一初,馬元方奏黃目職事不舉,遂分三勾院,以三人掌之。 大中祥符中,使契丹還,改工部員外郎、廣南西路轉運使。就拜起居郎,改陝西轉運使, 外郎、知制誥,充會靈觀判官。 陳堯咨知永興,好以氣凌黃目,因表求解職,不許。 黄目屬辭淹緩,朝議以爲不稱職。 黄目罷任, 奉朝請。 堯咨多縱恣不法,有密言其事 八年, 黄目入判三司三勾院。 時以盛度知京府, 踰月,拜

銀臺司兼門下封駁事。 之,又諭以兵賦繁綜寄任之意。 事敗,降左諫議大夫、知荆南府。 仁宗升儲,拜給事中兼左庶子。 數月,求外任,得知亳州。 五年,代還,知審官院。 明年,復爲給事中,徙潭州。 入內副都知張繼能,嘗以公事請託黃目,至是未申謝 俄而幼子死,聞計慟絕,所疾加甚,卒,年 黄目以風疾題品乖當,改知通進、 長沙月給,减於荆渚,特詔增

列傳

第

六十五

樂黃目

柴

成

務

五十六。錄其子理國爲衞尉寺丞,定國爲大理評事。

[志 黄 面 柔簡默,爲更處劇,亦無敗事 |黄目兄||黄裳,弟||黄庭,||黄裳孫滋,並進士及第。 有集五十卷,又撰學海搜奇錄四十卷,聖朝郡國 黄裳、黄庭皆至太常博士。

奉官葛彥恭使河南,案行遙隄。 拔解,太宗素知其名,首薦之,遂中進士甲科,解褐峽州 賜金紫。 理寺丞。太平興國五年,轉太常丞,充陝西轉運副使〔〕,賜緋,再遷殿中侍御史。八年,與供 柴成務字寶臣,曹州濟陰人也。父自牧,舉進士,能詩,至兵部員外郎。成務乾德中京府 入爲戶部判官,遷本曹郎中。 歷知果、蘇二州,就爲兩浙轉運使,改戶部員 太宗選郎官爲 少卿監,以成務爲光禄 軍事推官。 改曹、單觀察推官,遷大 少卿 外郎、直史館,

澱, 相, 信服, 嘗與之聯外姻,避嫌辭職,不許 願冤其租稅, 俄奉使高麗,遠俗尚拘忌,以月日未利拜恩,稽留朝使。 事具高麗傳。 勸民種藝。」從之。 淳化二年,爲京東轉運使。 召 俄與魏庠同知京朝官考課。 拜司 封 郞 中 會宋州河決, 成務上言:「河 知制誥,賜錢三十萬。 成務貽書, 四年,又與庠同知給事中 往反開 時呂蒙 水所經地肥 諭 大體, 正 爲宰 國

事,凡制敕有所不便者,許封駁以聞

駐千乘萬騎邪?」乃奏撤民廬以廣之。 辦集,得脫戶八百家以附籍。 蜀寇平,使峽路安撫,改左諫議大夫、知河中府。 府城街陌頗隘狹,成務曰:「國家承平已久,如車駕臨幸,何以 其後祀汾陰,果留蹕河中,衢路顯敞,咸以爲便。 時銀、夏木寧,蒲津當餽輓之衝,事 皆

之, 吏擊登聞鼓訴冤, 有詔問狀。 成務歎曰:「忝爲長官, 杖一胥而被劾, 何面目據堂決事 受詔與錢若水等同修太宗實錄,書成,知揚州。 」乃求解職。 眞宗卽位,遷給事中、知梓州。 景德初,卒,年七十一。 未幾代還,又遣知青州,表求俟永熙陵復土畢之任。 入判尚書刑部,本司小吏倨慢,成務怒而笞 旋

文集二十卷。成務年六十六始有子,比卒,裁六歲,授奉禮郎,名財範,後爲國子博士。 成務有詞學,博聞稽古,善談論,好諧笑,士人重其文雅。 然爲郡乏廉稱,時論惜之。

何建 頗尙氣節,而能 有足稱者焉。 五議,綸摭 論曰:巡述唐、漢之治,台符陳商、周之鑒,歷布腹心,奏議反覆論當世事,盡言無隱。 作成後進,黃目屬辭淹緩,而著述浩瀚;成務寡清白之操,而專對不 十事,皆切於輔治。 何勤接士類,倫樂於薦士,皆足以儀表當世者也。 辱。俱 去華

### 校勘記

(1) 陝西轉運副使

此處疑有誤。

「陝西」,楊億武夷新集卷一〇柴成務墓誌銘、卷一一柴成務行狀都作「峽路」。

# 宋史卷三百七

## 列傳第六十六

楊覃 喬 維岳 陳世卿 王陟附 張雍 李若拙子釋 董儼 魏廷式 陳知微 盧琰 宋摶 凌策

守,旣而轉運使楊克讓率福州兵破賊,圍遂解,詔褒之。 州留後,朝廷議擇能臣關掌郡事,即起維岳爲通判。 開寶中,右拾遺劉稹薦其才,擢爲太子中舍、知高郵軍,通判揚州,徙常州。 抗議,以爲:「朝廷寄以綏遠,今惠澤未布, 盜賊連結, 州,改殿中丞。 攻城,城中兵裁三千,勢甚危急。 喬維岳字伯周,陳州南頓人。治三傳。 太平興國初,徙襄州,俄丁內艱。三年,陳洪進表納疆土,以其子文顯爲泉 監軍何承矩、王文寶欲盡屠其民,燔府庫而遁。 周顯德初登第,授太湖主簿。 會盜起仙遊莆田縣、百丈鎭,衆十餘萬 反欲屠城,豈詔意哉。」承矩等因復堅 四年,遷平輿令。 金陵平,又移昇 |維 挺然

氲 朝 , 爲 准 南轉運副使,遷右補闕,進爲使。 准 河西流三十里日山陽灣, 水勢湍 悍, 運

維 五 **舟多罹覆溺** 岳 堰,運舟所 始 命創二斗門于西河第三堰,二門相距 至,十經上下,其重載者皆卸糧 維岳規度開故沙河,自末口 至准陰磨盤口,凡四十里。 踰 而過,舟時壞失糧, 五十步,覆以廈屋,設縣門積水,俟潮平乃泄 綱卒緣此爲姦,潛有侵盜。 又建安北至准澨, 總

建横 橋岸上,築土累石,以牢其址。 自是弊盡革,而運舟往 來無滯矣。

官, 餘, 如 其言,獲冤; 今獲罪, 本曹郎 按 部 至泗州 則 中, 母不能活矣。」維岳憫之,因謂曰:「他 維岳 出 慮 爲 坐贖金百二十斤,罷使職,權 兩浙 獄, 轉運使,歷 法掾誤斷囚 知 懐州 至死。 流滑州 維岳詰之,法掾俯伏, 知 楚州 日 朝制按問,第云 遷 戸 部員外郎。 且泣 轉運使令處茲罪。」卒 日:「有母 代還,爲度支判 年八八

准 南, 會考課京 決獄 不平允, (朝官, 召還。 左右 有 屬眞宗 知其事 以壽 者辨之, 王尹京, 太宗 精擇府僚, 特 加賞 ,異。 留為開封府 儲 闈 建, 兼 推官。 左渝 德 或言 轉 維岳 太常 小

卿。 安 權 京 府 知 開 事 封府 繁, 維 拜 141 給 評 事 處詳 中、 敏。 知 審官院 有 王 陟 爲 維 司 岳體肥年衰,艱於拜趨,陳乞外遷小州。 錄, 眞宗 亦 稱 其明幹。 及躞 祚, 卽 命 維 上 岳 興畢

靜退,特授海州刺史。

咸平初, 知蘇州 素病風,上以吳中多食魚蟹,乃徙壽州,仍命太醫馳療之。 四年,卒,

岳明習吏事 年七十六。 ,有治劇才。 贈兵部侍郎,官給其葬。 在懷州,王欽若始舉進士,維岳知其貴;又善待陳彭年,自刺郡連 大中祥符中,錄其孫世昌、獻之,並賜同學宪出身。

奏爲通判,皆稱薦之。

勞,遷晉州觀察推官。 度邊事,正其經界,又副崇貴使夏州賜告命。 被待遇。 錄參軍。 <u>咸</u>平初,遷太常博士,出爲河東轉運使,賜金紫。 王陟者, 即位,召賜緋魚袋,改著作郎、開封府推官,乘傳陝西,與轉運使督餽靈武芻糧 前司錄閻仲卿喜云爲,屢升殿奏事,眞宗尹京時頗不悅。 路州上黨人。 至道初,度支判官李擇言薦爲著作佐郎、同判大名府,留知開封府 淳化三年舉進士, 代歸,會温仲舒知貢舉,命陟與刑部員外郞董 補嵐州團練推官。 時趙保吉納款,屢遣與內侍張崇貴裁 及陟代之,以謹幹聞,尤 內侍羅懷嗣言其督運有

一同考試及封印卷首。俄改工部員外郎、知棣州。

其子岩拙爲奉禮郎,若谷爲太廟齋郎。 貢部,舉子有納賄成名者,恃恩寵,希顯要,僦大第以居,事遂寢。 五. 一年,召歸,判三司鹽鐵勾院。 初,上以京府之舊,頗隆眷遇,將加擢用。 後陟妻卒,又命給其子奉,使終喪制。 六年,卒。 上甚憫之,錄 若拙官國子 會有言其在

博士。

材者, 張雍 召歸,改將作監丞、知南雄州。 德州安德縣人。 治毛氏詩。 遷太子右贊善大夫、知開封府司錄參軍事, 開寶六年中第, 釋褐東關尉。 太平興國初, 俄為 有薦其 秘書

丞,充推官。

之跡。 婢訴 冤,徙左軍巡·雍戒吏止令鞫其毒母狀,致 大呼日 治,元吉自誣伏。 廷煦悉坐免所居官,保勳 爲中丞 擊登開 元吉寘堇食中以毒己,病將死。 京城民王元吉者,母劉早寡,有姦狀,爲姻族所知,憂悸成疾。 一「府中官更悉受我賂,反使我受刑乎?」府不敢決,元吉 熙初,雅復爲祕書丞、御史臺推直官,改鹽鐵推官,遷右補闕,充判官。 ,雅妻父也,韶供奉官蔚進 鼓訴之。上召張臨軒顧問,盡得其枉狀,立遣中使捕 且以逮捕者衆,又獄已累月未能決,府中懼其淹,列狀引見, 俄而劉死,府慮囚,元吉始以實對。 機凝 各奪 別鞫之。 事下右軍巡按之,未得實;移左軍巡,推吏受劉賂掠 季奉,左右軍巡使殿直龐則、王榮並降爲殿前承旨 吏訊掠慘暴。上怒,雍及左右軍巡判官韓昭裔、宋 雍坐與知府劉保勳、判官李繼 又移付司錄, 元推官吏,付御 歷陳所受路主名, 盡捕元推吏, 韶冤死決徒行。 又懼元吉告之,遂遣侍 凝 史鞫治。時滕中 初 慮問, 稍 又令妻張 元吉 見 元吉 誣 構 稱

雍

端拱初,轉工

部 餘 鄓 出 中、 爲 准 判度支勾院。 南轉 運 使。 淳化 未 幾 初,選爲太府少卿。 又為 鹽 |鐵判官兼判勾院。 加 逾 右 年, 諫議大夫, 以本 官 兼侍御史知雜事 徙 兩浙轉運使,入知 月

審 刑 三年,充戶 部 使,出知梓州 ()就命 爲 西川 轉運使,俄復知梓州

募 彊 勇 五 千 年,蜀州青城民王小波、 餘守城,虀 綿州 金帛以實帑藏。 李順 作亂, 衆至萬人。 推官 陳世卿治戎器,掌書記施謂、権鹽院判官謝 |雍 訓 練士卒, 得城中兵三千餘人, 又

濤

伐

Ш

木爲竿,銷

銅

鍾爲箭鏑,紐

布爲索,守械悉備。

遣推官盛梁請兵于朝

門。 賊 縱 焚其攻具, 斬 未 疲 將 定, 稍 憊 火, 以 + 賊 萬 退 徇 未 升 肸 無 急攻 衆寇劍門, 牛 鎧 爲 復治 賊 自 甲, 伏 益綿邛彭漢州 頭 北 大設 午達 (兵所突, 則墮 Ш 闁。 攻 斌 瞰 具 笑請 梯 申殆 城 相 城 维 衝 里貴 內,信然, 與盧斌等領兵據門, 西 開北 火 杰 北 車, 永 隅, 賊 門擊之, 其姦計, 畫 帥 以 康 伏精兵 雍 一夜鼓 爲 衆 軍 紿 神 悉 + 非良 日:二 誤, 雍 萬 陷 萬 于 区 日 圍 餘 軍 攻 策 梓潼 一一一不 賊。 黨 立矢石間, 城 Ш 土 也。」言未畢,果有卒依 數 一之東隅 一趣治 益急, 乘 可, 順 城 雍 入成都, 、裝,吾 賊 與監 進 城中大恐, 或或詐 以待 戰, 固守不動, 將開 軍盧斌 皆 僭 我 見老弱,設伏 號 不 東 利 雍 大蜀王, F 雍 登堞望之,賊所 卽 命發 賊爲之少却。 擊 敵 召 一贼。」 樓 蚁 日 機石 何 呼 勢甚盛, 死 陽遣 嘯 我。 北 士百 碎之, 與外 風 步 又城中吏民 書 出兵, 靟 騎 遣其黨楊廣 長 晦 火箭 縋 應 園 五 和 而 百臨 賊 皆 八十餘 -卜 维 維下 乘 老 心 東 귮 風

列

傳

日, 坊使、領 會王 繼 成 恩遣 州 刺 史旨, 石 知顒 來援, 世卿掌書記,謂節度 賊始潰去。 遣施謂入奏,上手詔褒美, 判官,濤觀察推 又以通判將作監丞趙賀爲 擢雍 給 事 中, 斌 西京:

太子中舍,監軍供奉官辛規爲內殿崇班

過,特拜戶部侍郎,復知審刑院,出知秦州,徙鳳翔府。 平四年, 至道二年,改工部侍郎。 遷鹽鐵使。 上以確齪齪小心,三司事重,宜有裁制,乃用王嗣宗代之。 明年召歸,復知永興軍,轉禮部侍郎, 改刑部, 充度 文使。 又以其無 咸

書省,出知鄧州。 韓國華同慮問,決遣之。三年,改兵部侍郎、同知審官院。 景德初,權知開封府事。 大中祥符元年,請老,以尙書右丞致仕,告命未至而卒,年七十。 上覽奏獄,京府囚二百餘人,以爲淹繫, 明年,車駕朝陵, 遣給事中董嚴、直 判留司尚 昭

壻,中正 籍,有「桉前急」、「馬前急」、「急中急」之目,頗爲時論所誚。 鎭宴犒,率皆裁節,聚公錢爲羨餘,以輸官帑,集會賓佐,糲食而已。 子錫、世寧咸笑之。 中正曰:「此人異日必顯達壽考,非汝曹所及。」錫兄弟雖有名, 雍姿貌魯朴,始登科,爲滕中正 在三司置簿

性鄙吝,蒞事勤恪,善爲米鹽苛察以肅下,恃其清幹,受遇於時,益矯厲以取名譽。

雍

然終不越鄓署,亦無耆年者。子太沖,官殿中丞。

郞 狂 躁 務進,不 董 五. 年 嚴字望之, -, 授 樂外郡,上書乞還京師 左拾遺、直 河南洛陽 上史館 人。 轉右 太平 補 興國三年 太宗怒,降爲祕書丞, 闕,充淮 南 進 **建**士, 西路轉運 解褐 大理評 副 削 使。 史館 會罷: 事 職,徙知忠州 通判饒州 使, 就命知 光州 加著作佐 復爲右 嚴

補 闕 俄復直 一史館。 會倂水陸發運爲 ,儼與王繼昇同領其事,就轉刑部員 外鄓。

以 充 右 戶 、部員 計使。 端 拱 《外郎知泉州,召爲京東轉運使。 初, 使罷,出知揚州,遷右諫議大夫。 進 ] 鄭中、三司度支副使。 坐 一翟馬周 時三司改易制度,置三計 徙潭州, 事 ,左授海州團練副使, 轉給 事中,歷 知廣岳洪三州、江陵府。 使,因留 移 知泰州。 **拜右諫議大夫**, 踰 年,

裁決 之。 景德 俄 中,歸朝。 判吏部銓,加工 會開 封府繫囚二百餘人, 部 侍郎。 時黃觀罷 朝議以其稽滯, 西川 轉運 一歸闕 命嚴 嚴 與知雜御史王濟姻家, 與韓國華、張雍 同慮 問? 因

陳二 託 可 下 許之。」眞宗 濟 乃謂之曰:「 察之。」 言 自 以 於 孤 觀 眞宗 直不 ,求薦己知 不欲 爾自 ·為權 不之詰。 、暴其 1告黃觀 要所容, 益州 事 , 數日, 乃出 求 未幾, 况 知益 黄觀 王濟得對, 嚴 州 知 觀復領 庸 青州。 復有何人排斥乎? 淺 無操持,恐爲 因述嚴嘗 陝西轉 嚴 復請 運,得對 對 有 執 私 言爲 託, 政 」嚴卽矍然, 便殿, )所使,妄有 權 旦言:「嚴 臣 所嬪 嚴調 性本 其必 論 且 言:「觀 上慰遣之, 薦,俾臣 (薦己。 矯 詐 臣 濟嘗議益 遠適,惟 他 久而 語 日 觀 ··, 面 不 不

列

傳

第

六

+

六

董

儼

魏

廷

定

以實對。 濟求薦之事,且言儼素待臣非厚。 之,儼方引伏,坐責授山南東道節度行軍司馬,不署州事。 聚食,親酌以勸觀,觀爲強飮之。 州須得臣往彈壓之。」上以其詞不類,因令條析以聞,復遣使陝西質問 翌日 ,儼與贊密奏觀嗜酒廢職,故觀因是及之。乃詔樞密直學士劉綜與御史雜治 有頃,都監趙贊召觀議 初,淳化中, 儼爲計使, 觀爲判官。 事 , 觀卽往。 黃觀 嚴知觀不飲酒, 贊曰:「飲酒耶?」 觀具述嚴託王 日日 觀

夫醜之。 及請其直,則呵責之,其鄙屑如此。 納貨路。 大中祥符初、會赦、起知郢州、病疽卒、年五十四。 嘗令引贊更改製朱衣,每夕納嚴第,而潛以輕帛製衣易之。 東封恩,復其官。 子仲容、仲宗,並爲太子中舍。 又廣畜姬媵,頗事豪侈。 嚴俊辯有才幹,不學無操行,所至厚 兄偉至殿中丞致仕。 用傾狡圖位,終以是敗,士大 在銓司,命胥吏市物,

之。 堂,素凶, 太平 魏 廷 威美 式 興 國 字君憲,大名宗城人。少明法學。 <sup>分</sup>知廷式 五. 二年中 · 第, '有膽氣,命居之,卒無恙。 釋褐朗州法曹掾。 轉運使李惟淸以其吏材奏,知桃源縣, 嘗客遊趙州,舍于監軍魏咸美之廨,廨有西 來京師,咸美弟咸信延置館舍,以同宗善待 遷將作

監水。

端拱初,改著作佐郎、通判潁州

辨者, 所規制。 辨,遷太子左贊善大夫。 卿同學究出身。 方略稱旨,賜錢五十萬,令還任。 曰:「臣三千七百里外乘驛而至,以機事上聞,願取斷宸衷,非爲宰相來也。」即不時召對,問 戶部員外郎、知利州。 大夫、知審刑院,出知涇州。 會王繼恩有罪下吏,命廷式 李順爲盜,就命充陝西至益州路轉運使。後入奏事,太宗謂曰:「有事當白中書。」廷式 淳化二年,始命李昌齡判審刑院,以廷式明練刑章,奏爲詳議官。 至道 廷式所至,以嚴明稱,剛果敢言,爲人主厚遇,然性傾險,喜中傷人,士君子憚其口而鄙 廷式立裁之,吏民咸服。 越王生日,令持禮物賜之,超拜主客員外郎、判三司都勾院,換河南東道判官,改 初,乘傳河朔决獄,復出知宋、潭二州。 時初較廷臣殿最,命廷式與樞密都承旨趙鎔、李著同勾當三班,多 一同按之,踰宿而獄具。 咸平二年卒,年四十九。 轉吏部員外郎、知桂州, 賊平,知寧州,未至,召入判大理寺。 湖南地土衍沃,民喜訟產,有根柢巧僞難 俄知審官院、通進銀臺封駮司,拜右諫議 錄其子攝太常寺太祝舜卿爲太祝,禹 歷工部郞中。 屢進對,太宗悅其明 眞宗卽位, 改刑部。

列

傳第六

簿。 見。」占謝日,特升殿,諭以天府事繁愼選之意,仍賜緡錢。 選爲開封府判官,與推官李防並命。眞宗謂宰相曰:「人之有材,難得盡知,但歷試而後可 歷大理評事、知安吉縣。三遷太常丞、通判幷州。 盧琰字錫圭,淄州淄川人。父浚,右諫議大夫。琰,太平興國八年進士舉,解褐歷城主 至道中,就加太常博士。 會獄空,有韶獎之。 遷工部員外 **咸平二年**,

郎,爲河北轉運副使。

關,許之。以使勞,優拜吏部員外郎、判三司三勾院。會宋摶使契丹,命權戶部副使。 對,勞問久之。其子士宗時爲隰州推官,特遷大理寺丞。 契丹請和,琰上言領職六年,求歸 東封,又權京東轉運使,往營頓置。加戶部郞中,復判三勾院。 會城祁州,命專董其役。契丹入邊,車駕幸澶州,琰自定州隨軍至大名,卽單騎赴行在。召 時北鄙未寧,調發軍儲,糧道不絕。以職務修舉,召入,遷秩刑部,賜金紫,復遣之任。

明年 中和 使。 ·被疾,詔遣中使將太醫診視。 琰勤於吏職,所至以幹集聞。 同判留守司三司,加吏部郎中,俄拜右諫議大夫、知永興軍府。 大中祥符二年,以本官兼侍御史知雜事。數月,授三司度支副使。 六年,卒,年五十九。 時)段日八十餘,無恙,上憫之,以上 頗知命,嘗語親舊曰:「官五品,服三品,天不與者壽爾。」 五年,再爲河北轉運 祀汾陰歲, 命與鮑

中、度支副使,土宗自有傳。 宗爲太常博士,特命知懷州 又以次子祕書丞士倫爲太常博士,給祿終喪。 士倫至工部郞

殿中丞、通判洪州 州 士、通判西京留守司,得對便坐,賜錢三十萬。 司 理參軍,改白龍令。 宋摶字鵬舉,萊州掖人。治毛氏詩。 復有薦者,召還,命提點河北西路刑獄,未行,改監左藏庫。 膳部員外郎鞠礪 薦其能,遷右贊善大夫、知利豐監,徙知藤州。 開寶八年,宋準典貢部,得第,調補遂寧尉。 久之,徙江南轉運使,就遷度支員外郎。 遷國子博 歷維 改

紫。 鼓鑄, 夏州界部發居民,數詣闕奏事稱旨。 境,時邊事未息,屯師甚廣,摶經制漕運,以幹治稱。 **顾權罷採以**於民。」 又請科諸州丁壯爲兵, 上以本置此職, 屢以秩滿請代, 止於視軍政、祭邊事, 以增戎備。 連他徙,州郡 朝議以摶善職, 在任凡十一 輒乞留,有詔褒飭。 摶不應保奏。 就加 年。 洞 部 河東接 鄓 中, 因詔諸 賜 西 兩 北 金 至

眞宗嗣位, 遷司

封員外郎、河東轉運使。

上言:「大通監冶鐵盈

積, 可備諸州軍數十

景德四年,入判三司勾院,踰月,爲戶部副使。 列 傳 第 六 + 六 宋 摶 凌 策 大中祥符初,進秩 川部 郎中,俄使契丹, 路,自今勿得舉承受使臣。

舜元自筠州判官改著作佐郎。

會疾, 契丹主以車迎之。二年,卒,年六十六。子可法至太子中舍, 舜元登進士第。

又賜其孫出身。

章、御書曆,給以實奉。李順之亂,川峽選官多憚行,策自陳三蒞蜀境,諳其民俗,卽命知 蜀州。 淳化三年,就命爲光禄寺丞,簽書兩使判官。代還,拜左贊善大夫、通判定州,賜朱衣、銀 江、與姚鉉同學於廬州。雅熙二年舉進士,起家廣安軍判官。改西川節度推官, 凌策字子奇,宣州涇人。 世給事州縣。 策幼孤,獨厲志好學,宗族初不加禮,因決意渡 又以巴西當益之餫道、徙綿州,加太常博士。 以彊 幹聞。

汎舟而 九。 郎、直以館、命代之,賜金紫。廣、英路自吉河趣板步二百里,當盛夏時瘴起,行旅死者十八郎、直以館、命代之,賜金紫。廣、英路自吉河趣板步二百里,當盛夏時瘴起,行旅死者十八 藥,以郵置卒萬人,分鋪二百,負檐抵京師,且以煩役爲患。詔策規制之,策請陸運至南安, 策請由 還朝,會命爲廣南西路轉運使,進屯田員外郞。入爲戶部判官,遷都官。先是,嶺南輸香 北,止役卒八百,大省轉送之費。盧之翰任廣州,無廉稱,以策有幹名,拜職方員外 英州大源洞伐山開道,直抵曲江,人以爲便。

代還,知靑州。東封,以供億之勤,超拜都官郎中,入判三司三勾院,出知揚州。屬江、淮

歲儉,頗有盜賊,以策領淮南東路安撫使。駕旋,使停,進秩司封。時洪州水,知州李玄病,上 也。 與宰相歷選朝士,將徙策代之。 諫議大夫、集賢殿學士、知益州。 金,嘗禁商市醫,或有論告,逮繫滿獄。 。」王旦言:「策蒞事和平, 可寄方面, 上曰:「南昌水潦艱殆, 初,策登第,夢人以六印加劍上遺之,其後往劍外凡六任, 望即以江南轉運使授之,仍詔諭差選之意。」饒州 策請縱民販市,官責其算,人甚便之。 長吏當便宜從事, 不必稟於外計 五年,召拜右

之。 獄。 同議經制,稍寬其舊 是秋,拜給事中、權御史中丞。 <u>眞宗嘗對王旦言:「策有才用,治</u>蜀敏而有斷。」<u>旦日:「策性淳質和,臨</u> 九年,自蜀代還,上頗有意擢用,會已病,命知通進、銀臺司兼門下封駮事,糾察在京刑 時權茶之法弊甚,詔與翰林學士李迪、知雜御史呂夷簡 事 **疆濟。」上深然** 

時以爲異。

策勤吏職,處事精審,所至有治迹。

請。 明 天禧二年三月,卒,年六十二。 (年疾甚,不能朝謁,累遣中使挾醫存問,賜名藥。 錄其子將作監主簿瓘、琬並爲奉禮郎,續給其奉。 復表求典益, **尋遷工部侍郎**, 策兄 從其

簡,官國子博士,分司南京。

密據淮 至工. 汝土 部 巖生郁,早卒。 居靖恭坊,時稱「三楊」,皆爲盛門,而靖恭尤著。汝士弟虞卿、漢公、魯士皆顯名。 楊覃字申錫 侍 甸,絕其歸路,因留浙中。 郎、京兆尹,生堪,爲太子少師。 ,漢太尉震之後。 承休生嚴,即覃祖也,署爲鎭海軍節度副使,奏領 唐有京兆尹憑居履道坊,僕射於陵居新昌坊, 堪生承休,昭宗朝,以兵部員外郎使吳越, 刑部尚書 春州 會楊 | 庭||卵

就命知州事。 是,太宗爲改焉。 第,授徐州觀察推官,改著作佐郎、知戎州。 **覃少獻書於嗣王俶,俶私署著作佐郎,從俶歸朝,爲禹城尉。** 時田重進爲永興節度,選覃與林特同判軍府事,賜覃緋魚,仍賜御書曆,給以實奉。 數月,召還,未上道,會丁內艱,州民列狀乞留,轉運使以聞,有詔 淳化中,轉屯田員外郎、同判壽州。 再遷太常博士,使陝西,蠲逋負。 巡撫使潘愼修上其政績, 太平興國 八年,舉進士擢 覃本名蟫、至 **泛奪情。** 有詔嘉獎, 重

進不 李繼遷,調發獨糧,覃、特皆以苛急促辦爲務。 法,覃事多抗執,重進頗不悅,形於辭色。 厚令鉗手, 特令即城頸, 雖衣冠舊族不免, 人 **覃表求徙任,不許,就轉都官員外郎。** 時計

用怨嗟。改職方員外郞。

欠司。四年春,旱,覃上言:「古之用刑,皆避三統之月,漢舊章斷獄報重,盡三冬之月。又唐 **咸平初,遷屯田郎中、三門發運使。** 呂蒙正在河南, 薦其材, 韶入判三司磨勘、憑由、 理

時務策 死罪未得 凡斷重刑日,勑減膳徹樂。 五. |篇:| 日禦戎,二日用兵,三日爲政,四日選賢,五日刑罰。 論 決,俟雨降,乃復常典。 今春物方盛,時雨尚愆, 輦轂之下, 獄係甚繁。 仍望自今凡決重刑日,依唐故事,以彰至仁之德。」嘗獻 文多不載。 望韶有司

離,則亡無日矣。」時西鄙屯兵,調役甚繁,副使朱台符務有爲,而覃務循舊,且言邊事不宜 徙知隨州。 更張。初,寇準知靑州,台符爲通判。至是,準作相,覃意台符憑恃僚舊,密以上聞。坐不協, 厚建議:「伐喪非禮, 明年,權同知貢舉,出爲陝西轉運使,賜金紫。 王超節制漢東,覃移唐州 且其子尙在,當爲之備。 請詔邊臣謹守疆候,毋得輕舉,俟其衆叛親 會邊臣言繼遷死, 願乘此時深入致討。

亮爲淮南、江、浙、荆湖制置發運使。月餘,改太常少卿、直昭文館、知廣州 州 ,王師討宜賊,軍須多出長沙,曹利用以聞,詔書褒勞,加刑部郎中。 景德二年,召歸。 屬河北兵革之後,命覃詣澶、濱、棣、德、博州巡撫振給之。 大中祥符二年,代馮 出知潭

殿官司封員外郎,侃後名大雅,自有 便之。 還其家,官給所費。 覃勤於吏事,所至以幹濟稱。 加右諫議大夫。四年,卒,年五 錄其次子文敏爲揚州司士參軍。 南海有蕃舶之利,前後牧守或致謗議,惟覃以廉著,遠人 十四。 遣其長子奉禮郎文友乘傳赴喪, 覃從弟蛻及從子侃、傅,並登進士第。 詔本州 護柩

耶 ? 李順 安縣。或薦其堪任臺 寇 外艱,雅 賊寖盛, 陳 兩 世 川 卿字光遠 白 表 雍曰:「此徒皆懦儒,存之適足惑衆,不若遣 知州張雍以州兵馬爲數部,使官分領。 同幕皆謀圖 (其材,詔追出視事 南劍人。 憲,卽 **雪全計**。 召歸,會張鑑出知 雍熙二年,登進士第,解褐衡州推官。 ,就改掌書記。 世卿 正 色曰:「食君祿, 廣州,表爲通判。將行,召見,賜緋, 凡七年,歸朝,爲祕書郎, 世 出求援。」雍從之。 卿素善射, 當委身報 國, 當城 再調東川節度推官。 奈何欲避難爲 画, 賊旣 遷太常丞、知新 加太常博士。 親 引去,世 射中數 他 會 卿 핆 百

述溪 增課 領, 里, 書少監代之,加賜金紫。 年,改度支員外郎,出爲荆湖 又令納所掠 朝命 羡, 詔獎之。 洞 景德初, 利 世 害, 卿 召 與閣 徙 對, 漢 知建州。 俄代姚鉉為兩浙路 口 門祗候 眞宗器其材, 千餘,復置澧川 郡有計口買鹽之制,人多不便, 、史方、 眞宗 北路轉運使。 知其材幹, 知澧州 復自 武 轉運使, 言願效用 口等砦以控制之, 劉 逾月,授 屬澧州慈利 霸 歷祠 同領兵討之,遂還所侵 於煩 福建轉運使, 部員 劇。 縣 外郎, 至, 即奏除之。 會 下溪等四州 自 邵 是平定, 曄 判三司三勾院。 規畫南劍州安仁等銀場,歲 知廣州 地, 蠻 有 人侵縣境地 詔 標正 九年,卒, 被疾, 嘉獎。 經界,取其 乃授 大中祥符 還朝 年六十 四 卿 百 要 餘 祕 屢 几

乃與若 詔使, 典貢 故事 焉。 遷太子左贊善大夫,以官稱與父名同,辭,不許。 拔 萃 見, ,授大名府戶曹參軍。 未幾, 舉,擢上第,授密州防禦推官。 李若拙字藏用,京兆萬年人。父光贊,貝、冀觀察判官。 几 賜緋 制策 事敗伏法。 愚 年,復舊官。 同宗,通家非親,不知其謀,獨坐削籍 魚,同勾當河東轉運兼雲、應等八州事。 御史中丞滕中正 中選者除拾遺、補闕。 太宗以若拙與飛雄父若愚連名, 以政聞, 時符彥卿在鎭,光贊居幕下,若拙得以就養。 薦之,召歸臺。 超授監察御史、通 **若拙以恩例不及,上書自陳,** 登賢良方正 頃之, 判泰州。 流海 。太平 直言極諫科, 改右 島。 **嘗詣闕言邊事,太宗嘉之。** 疑其昆弟, 興國二年,知乾州,會李飛雄詐乘驛稱 1補闕。 歲餘,起授衞尉寺丞、知隴州 同帥宋偓年老政弛,又徙渚拙通判 若拙初以蔭補太廟齋郎,復舉 時諸 太祖嘉其敏膽,改著作佐郎。 命殿直盧令珣 執政惡之,出監商州阬冶。 王出閣, 俄又舉進士,王祐 若拙獻頌稱旨 即捕繋州 又同掌水陸

雍 熙三年,假祕書監使交州。 先是,黎桓制度踰僭。 若拙旣入境,即遣左右戒以臣禮

列 傳 第 六 + 大 李 若 拙 發

運司

召

以歸,禮幣外,不受其私 繇是桓聽命 拜詔 盡 恭。 覿。 燕變白, 使還 ,上謂其不辱命。 以奇貨異物列于前,若拙一不留眄。 遷起居舍人,充鹽鐵 判官。 取 先陷蠻使鄧君辯

言,罷使知涇州。 昭文館,遷主客郞中、江南轉運使。 淳化二年,出爲兩浙轉運使。 至道二年,黎桓復侵南鄙,又詔若拙充使,至,則桓復稟命 契丹寇邊,改職方員外郎,徙河北路, 若拙質狀魁偉,尙氣有幹才,然臨事太緩。 賜金紫。 宰相以爲 五 年, 直

|搠按邊事,知昇、|貝二州。 四年,卒,年五十八。子繹。 知制誥。 使還,眞宗嗣位,召見慰問,進秩金部郎中。 咸平初,同知貢舉,被疾,改右諫議大夫。 召試學士院,改兵部郎中,充史館修撰,俄 車駕北巡,判留司御史臺。明年,使河

務,市民 餘萬,委積久,輒腐敗,繹奏罷之。 第,除將作監丞。 姪覺之, 「若有仇耶?」曰:「無有。」曰:「有失亡邪?」曰:「無有。」|繹揮|諡去, |釋字||縦之,幼謹願自修。 初,以父使||交||||有勞,補太廟齋郎,改太常寺太祝。 薪草溢常數, 懼事暴, 殺之以滅口。 累遷尚書屯田員外郎、知華州。 餓 者皆以樵採自給,得不死,官入亦數倍。 遂收蘊致法。 三遷本曹郎中,爲利州路轉運使。 擢提點河北 蒲城民李蘊訴人盜其從子亡去,釋問曰: 刑獄,權 邊 知具州 因密刺藴。 民歲輸防城火牛草十 歲旱, 藴 舉進士中 有陰罪, |釋爲酒

不宜 稱治,自以久宦在外,意不自得,作五知先生傳,謂知時、知難、知命、知退、知足也。 知延州,改兵部,爲江、准制置發運使。 重擾。」輒奏罷之。甫半年,漕課視常歲增五之一。 河 北經費不支,仁宗問誰可任者,參知政事薛奎薦繹,遂徙河北。 內出絹五十萬匹,責貿於東南。 遷太常少卿,再知延州。 進刑部郎中、直史 澤曰:「百姓飢, 繹所至 嘗兩 知 頗

|風翔府,至是,又徙鳳翔。

尋爲右諫議大夫,卒。

嵗減 川為 郎 直史館,俄充三司戶部判官。 京東轉運 夫役數萬 陳 知微字希顏,高郵人。 副 ·使,奏還東平監所侵民田六百八十家。 咸平五年,進士甲科,解褐將作監丞、通判歙州。 奉使契丹,遷太常博士、判三司都磨勘 又決古廣濟河通運路,罷夾黃河, 司,再爲戶部判官, 擢爲著作佐

所至 用。 年, 按 遷 視 右 日 加玉清昭應宮判官,俄以疾聞, 儲 司 進改羣官,除目紛委,適當知微 糧, 諫,徙荆湖南路 祭諸 官吏能否。 轉運使。 使還, 召還,拜比部員外郎、 剕 眞宗遣中貴挾太醫往視之。 更部 次直,思亦敏速。 銓, 兼 刑 部 又判 知制誥。 知微 司農寺, 詞藻雖無奇 淮南饑, 卒, 糾察 年五十。 采, 在 遣 京 知微巡撫, 而平雅 、刑獄。 錄其子 滴 天

列

傅

第

六

-|-

六

陳知

微

校

勘

記

舜卿爲太常寺奉禮郎,給奉終喪,又假官船載其柩還鄉里。

卷。 子堯卿,大中祥符五年,進士及第。 知微儀狀甚偉,沉厚有材幹,不務皦察,時人許其處劇,惜其母老不克終養。 有集三十

皆爲時論所許。 漕運有方,廣之處事精詳,治迹昭著,覃之律身廉潔,兼勤吏事,世卿之安遠,若拙之專對, 謹幹稱,而取士以謗致汙,惜哉! 恪清幹,觀其捍守,亦可見矣。 儼務進瀆貨, 廷式傾險忌刻, 自不容於淸議。 論曰:維岳明習吏事,才足以治劇,而能曲全法掾,其仁恕藹然。 繹以謹愿,克世其家,知微敦實有材幹,不辱其職,亦可尙也。 雅雖素稱鄙吝,而勤 若琰、摶經制 至若王陟以

#### 校勘記

- 詔 **免死決徒** 「徒」原作「徙」,據本書卷二〇〇刑法志、宋會要刑法五之二改。
- $\exists$ 相 :里貴 本書卷三〇八鷹斌傳同;長編卷三六、長編紀事本末卷一三都作「相貴」。
- 成州 刺史 「成州」原作「誠州」,據本書卷五太宗紀、長編卷三六改。

## 宋史卷三百八

## 列傳第六十七

#### 上官正 盧斌 周審玉 裴濟 李繼宣 張旦 張 煦

張佶

略, 劍州 疾愈,入對,上勞問久之,復遣還任所,賜以金丹、良藥、衣帶、白金千兩、馬三匹,授以方 擊,大破賊數千衆,斬馘殆盡。 劍門,時疲兵數百人,正奮勵士氣以禦之。 獄,遷供奉官、閤門祗侯、天雄監軍。 令招撫殘孽,慰勉遣之。 刺史、充劍門部署,翰自供奉官擢崇儀使、領昭州刺史。 上官正字常清,開封人。少舉三傳,後爲鄜州攝官。 奏至,太宗嘉之,詔書獎飭,並賜襲衣、金帶,超正爲六宅使、 淳化中,轉作坊副使、劍門都監。李順之亂,分其黨趨 會成都監軍宿翰領兵投劍門,與正兵合, 雍熙中, 召授殿前承旨, 屢遣鞫 數月,正被疾,請尋醫,至闕。 因迎

列傳第六十七

上官正

谷,恃險結集,剽級爲患。 驅 而 入。賊衆三百餘,敗歸成都,順怒其驚衆,盡斬之,然自此沮氣矣。 初 Шĺ 賊甚盛,朝議深以棧路爲憂,正以孤軍力戰挫賊鋒,自是閣 王繼恩百計召誘不至,正論以朝廷恩信,皆相率出降。 道無壅, 後賊 既誅,餘寇匿 王師得以長 未幾, Ш

**峯**州

團

「練使,與雷有終並爲西川招安使,代王繼恩。

君子之樞 於謙 衆 好 積 攻人之短,豈謂喜怒不形於色耶?當以和輯遠民爲念,斯盡善矣。」正 和 怨怒,多上章訴其不法者。 正 木 , 每謗書至,朕雖力與明辯,然衆怒難犯,恐其不能自全。」乃賜手札戒諭曰:「言者, ..機,樞機之發,榮辱之主,不可不愼也。 ·疆好凌人,自謂平賊有勞,受人主知,無所顧忌。 太宗謂近臣曰:「人臣可任用者,朕常欲保全。」正婞直而失 大遇 事輒發,悔不可及。儻自恃無瑕,而 數面攻兩川官吏之短而暴揚之,

使, 出 州 知 賜錦 懷安永 滄州 真宗卽位, 改莊宅使。 袍 、徙高 康軍 、金帶。 陽關副都 正 咸平初, 與鈴轄馬知節 部署, 是秋,廣武叛卒劉盱嘯聚數千輩,逐都巡檢使韓景祐,略漢蜀邛 召還, 眞 拜洛州 領兵趨新津,抵方井,擊敗之,斬旴,平其黨。 擢拜東上閤門使、勾當軍 團 練使。 車駕 北 巡,以 頭引 爲行營先鋒鈴轄。 見司,俄權戶部使。 遷 南

陽關部署。 郣 知 青州 以足疾,求知磁州,手韶慰勉。 ,未行,會王均叛蜀,命爲峽路都鈴轄,移 會邢州地震,民居不安,徙正典之。移路州。 知梓州。 又歷滄、瀛、鎭、貝 四州,高

年、授左龍武軍大將軍、平州防禦使,分司西京。 中,以河北新經兵革,慎擇守臣,以正知貝州,遷洺州防禦使,復知滄州,移同州。 尋以本官致仕,賜全奉,仍以見緡給之。 再表引

四

年,卒,年七十五。子燦至內殿崇班。

其利 伐, 州 軍夾河。 其嘗建議棄涿州,遂釋不問。 **援兵,內無資糧,丁籍殘失,守之無利。** 令以五千騎隨曹彬抵祁溝 百矣。」復慮遼人乘便剽襲,宜爲之備。 彬之旋也,無復行伍,果爲契丹所乘。 盧斌,開封人。以筆札事晉邸,太宗卽位,補殿直。 既克涿州,令斌以萬人戍守,會食盡,大兵將還,斌因懇言:「涿州深在 以爲霸州破虜軍緣邊巡檢 時契丹據河,王師乏水,斌請以千弩斫砦,契丹遁去,遂移 今若還師,必須結陣而去,以一陣之役,比於固守, 諸將皆以失律被譴,斌亦下樞密院問狀,太宗聞 彬以爲然,遂令斌擁城中老幼,並狼山南還易 雍熙中, 領兵屯霸州。 北境,外無 會大舉北

斌 召還,面加獎慰,授閤門祗候,又賜白金、緡錢、衣帶。 率兵掩襲,且追且門,薄南山, 瑞 拱 中, 又為永 興軍、華州巡檢。 渡渭水, 時大賊侯和尚、 抵鳳翔,復至耀州,擒斬並盡。 **尋爲**梓、途十二州都巡檢使,太宗諭 劉渥劫興平、傑陽, 以勞,改供奉官。

殺捕賊官二人。

第 六 + 七

虚 狱

騎

從數十人,遂斬誘等百餘級,賊衆悉

平

賊 任誘等寇昌、合州 . 川 峽 情易搖 設有寇攘,雖他境亦當襲逐, 斌率兵頓昌州南牛門山, 偵知賊在龍水鎭, 仍許 便宜 從事 (値大雨 ٠, 不須中覆。」淳化 ,斌馳馬四十里,

遁 追至地 頭鎭東南八十里,樹棚,招其酋甫羌 富順 、監蠻掠榮州,斌晨夜倍 道以赴, 得州兵千人, 阿奴綱,諭以朝旨,歃血刻石爲盟而遣之。 署隨 軍糧料以張其勢。 蠻沙

閬州 兵六 쬭 車 委以 俄 軍 兵 南 而榮戎資州 法倍兵 决 、來援, 監 ΪÏ 北門, 四 斌領千兵赴之,斬首五千,圍遂 西河水,注之以環城。 抵成都, 一護之任。 年,賊王盡復起榮、資,斌擊滅之,盡縛以獻。 儿 爲固守之計。 不戰,然狂醜 斌 面 出 鼓躁乘城,矢石 、富順監賊十五隊鈔鄉邑,斌擒三百人,部送闕下,餘悉臨敵斬戮。 Ħ 東門迎勞王 會江水汎溢,毁子城。 . 戰連月,殺數萬人。 烏合,非訓練之師,以吾仗天子威靈,必可殲蕩。」即 又突出 師 二月,賊渠相里貴衆二十一萬傅城下,城中兵裁三千。 亂 賊不 下,斌 與賊戰,擊刺三十餘合, 解。 戦 而 明年,成都不守,斌還梓州,集十州兵赴援,知州 與州 斌勸諭州民,翌日,畚锸大集,自城西大濠中掘 潰 又至蓬州 將隨機設備。 斌 乘 勝追 老鷗山,賊衆三千爲陣拒斌,斌擊敗之, 遷內殿崇班。 斬及納 賊稍却。 長 圍 八十日, 降二萬餘。 俄復 是多,李順爲亂,斌即率 大設 會王繼 五月, 感厲士伍 機石、連弩、 恩令石 賊 数萬 r, 負 上 斌 張 塹深 知 岸 顋 鍾

丞。

至城下,賊復大集、斬三千級。 逢州 平,斌傳詔安撫蓬、閬、渠、達四州,擢授西京作坊使,領

成州刺史(1)。

入利州 門使、檢校左僕射,加食邑三百戶,賜白金千兩、袍笏、金帶。 召汝。」旣而賊黨集梓、縣、漢三州境上,斌往平之。未幾,代還,太宗親加勞問。 斌在川峽六年,以孤軍禦寇,累立戰功,表求入奏。 若寇焚棧道,劍門之險不足固 也,請置砦栅。」從之。 太宗遣使諭之曰:「俟妖孽盡殄,當 上言:「葭萌路出師討賊,可直 拜東上 問

間, **芻糧**, 族,馬驕兵悍,往來無定,敗則走他境,疾戰沙漠,非天兵所利。不若堅保靈州,於內地多積 日三靈州 不見賊而還。 不從其議。 尋命爲銀、夏兵馬**鈐**轄,遣與李繼隆等五路出師討李繼遷。 以師援送。苟其至也,會兵首尾擊之,庶幾無枉費,而不失固圉之策矣。」時業已 抵烏、白池,月餘方至。岩自環州橐駝路,裁 俄徙屯寧州,以疾召歸,勾當軍頭引見司。 改授靈環路鈴轄,領兵二萬爲前鋒, 十月 令於鳥、 威平初,卒,年五十。 程。」卽不俟詔 白池與諸軍會。 斌求對,懇言日:「羌夷之 而往, 與諸將失期, 斌謂李繼隆 子文質殿中 出

顯德 候。 累遷 初 周 審 審玉 一崇儀、 ' , |開 一蔭補殿直,從世宗平瓦 洛 封 苑副使, 西京作坊使。 **父勳,以親校事唐明宗,** 橋關,甚見親信。 **雄熙中,契丹犯塞,潘美屯師定州,** 累立戰功, 太祖受禪,爲供奉官,未幾,加閤門祗 太平 興國中,至隰州團練使。 密玉 爲監軍 周

常 與敵 戰,而 先鋒劉緒陷敗,審玉 躍馬趣擊,拔緒而還,以勇敢 聞

|鳞, 爲首 晉天福中, 淳化 審 玉 中, 一覺之, 知貝 嘗誘契丹屠州 州 與轉運使王 有 聽捷卒戍州者三十七人, 城 嗣宗率兵悉擒其黨,斬十五級, 至是五十年,而其子戮於都市, 同謀殺審玉,級庫兵而叛,推虞候趙咸雅 磔咸雍於市。 舊老猶記其事, 先是, 咸異之。 咸雅父

審玉以 功領 順 州 刺 史。

留 意 朝請 使就第,賜白金慰恤之。 志矣。」乃拜章請老,得 審 玉 方 曰:「此有所 至道 俄 術。 Ţ 初 內 ",徙 并州 少長 . 艱 兵間, 倚而 旣 鈴轄。 而 爲也。 習 千 謂 子允迪,爲處部員外郎。 牛 親 知攻守之法。 」因按詰之,盡得其姦狀,杖其背,械送 衛大將 威平初, 友曰:「僕齒髮遲暮,而 軍 知鳳翔府。 ·致仕。 眞宗嘗召 三年,卒,年七十 有桑門乘傳而 至 未能辭祿 便坐,示以攻戰器。 仕者, 四 西, 審 闞 良以慰母 以市木爲名, 玉 下。 一晚年, 方奏對,疾作、詔遣 以 好讀 心 目 爾, 疾, 威 神農本草, 今 代 動 可行其 燙, 所縣。 李

直,爲 濟屢糾 裴濟字仲溥,絳州聞喜人。 天威 軍兵馬監押。 其過失, 被踏,出補太康 及平太原,征 唐相耀卿八世孫, 鎮將。 幽薊, 未幾、譖 濟迎謁陪扈,令監軍易州, 濟者坐法。 後徙家河中。 太宗知濟 濟少事晉即, 可 契丹攻城不能下。 任, 會 同輩有忮悍 即位 一,補殿

以勞,遷

西頭供奉官

定州 塗次鎭州,夜有賊騎扣城門,大呼曰:「官軍至矣。」州將然之,促守吏開關,濟遽止之曰:「此 必妄也。」及旦,果有敵兵遯去。 太平 契丹三萬騎來攻,濟逆擊於徐河,斬數千級,獲牛馬、鎧仗甚衆。 興國末,江表盜起, 命爲巡檢, 太宗嘉之,遷西上閤門使、定州都監,就加行營鈴轄, 遷崇儀副使。 召還,遷崇儀使。 監戍兵於威虜軍, 尋 知

方館使,復知定州,徙天雄軍鈴轄。 陷陣,賊大敗走,優韶褒美。 淳化 初,與周瑩同判四方館,未幾,爲鎭州行營鈴轄。 初,繼隆以濟性剛,不悅之; 遷客省使,復知定州 及是役、撫濟恨相知之晚。 又與李繼隆擊賊於唐河,濟短兵 改四

其舉 濟在鎭、定凡十五年,威積甚著。 ΙĹ-至道二年,改內客省使、知鎭州。 知欲爲變,亟命擒之,果有竊發者數十人,已級鄽閈矣,悉蒐捕腰斬之,軍民肅然 召還,知天雄軍 立春日,出土牛以祭, 酌奠始畢, 有卒挾牛去。 濟察

0 20

喪。 望,及沒,夏人皆惜之。 急,兵不至,城陷,死之。 田之利,民甚賴之。 咸 平 刻, 李繼遷 其年,清遠軍陷, 数,以濟領順州團練使、知靈 景德中,濟妻永泰郡君景氏卒, 上聞嗟悼,特贈鎭江軍 夏人大集,斷饟道, 節度。 州兼都部署。 三子並優進秩。 特詔追封平陽郡夫人,諸子給奉終 孤 軍絕援, 至州 濟刺指血染奏, 二年,謀緝 濟在諸 使中甚有聲 八鎭 水救甚 興 屯

至右 補闕、麗正至金部員外郎。 子德谷虞部郎中,德基至如京使,德豐殿中丞。 麗正子德輿,爲殿中丞 濟兄麗澤,弟麗正,並進士及第。 麗澤

州巡檢、都監。繼宣本名繼隆,與明德皇后兄同姓名。 虎,殺二十餘,生致二虎、一豹以獻。太平興國初,掌南作坊使,改供奉官,出爲邠、寧、慶 李繼宣,開封浚儀人。 乾德中,補右班殿直,令與御帶更直,裁十七歲。嘗命往陝州捕 至是,太宗爲改焉

河接戰,自午至申,大敗之。 獲老幼千餘,牛畜數百。 五. 年,召還,承受定州路奏事。 又率兵扞契丹于乾寧泥姑海口 奉詔修長城口、平塞威虜靜戎軍、保州,又領兵入敵境, 契丹寇靜戎軍,從崔彥進過拒 馬

又爲貝州監

軍

且 新 쬭 壁 城 勁 行 涿 騎 州 雍 奪 疾 追 東, 熙三年, 涿 戦 至 河 至 又 新城 與 幕,繼宣 數日, へ敵 曹彬 北 Ħ, 乃至涿州 大敗之, 北 中 乘勝 征 十創 攻 繼 北 宣 劍及 門,克之。 從 及棄州保岐溝關,又戰拒馬上, 先鋒 免兜鍪 李繼 o 相公,繼宣 明日 日 隆 領 至方城, 復戦 輕騎 度 亦中流矢。 繼 涿 力戰 隆 河, 爲敵所邀 三日 覘 敵勢, 大軍 追 大 奔至 , 軍 還雄州 繼宣 又將 繼 孤山 以所 至 五. 千騎援米信, 取 遂 部拔之,且戰 契丹乃引去。 克固 , 遇 州 契丹 因 進

州 兵 奪 五. 千戍北平 進命 唐 入,以功超授崇儀使,代王 河 將五 橋 , ٠, 重進召繼宣消 千騎 押大陣東偏 躡 其後,抵 • 田 受田 紹 拒 馬 斌 繼恩爲易州 重進節度, 赴援,紹斌 河。 及敵 駐泊都監 據 屯長 爲敵所敗,繼宣獨按部 楊 疃 城口 繼宣 , 賜錢 敵至 徑掩 五 大溝, 一十萬, 擊之,遂焚廬 繼宣 轉鬥 白 金 進 入 五 定州 滿 含而 百 城 兩。 遁 敵 又領 敵 兵北 至 定 騎

留

屯

滿

城

俄

\還 具 州

勝務 領 靜 大 戎 騎 陣 二千, 順 西 雍 焚聚落 安軍至 熈 偏 敗 年 賏 獲 契丹於保州 -,爲高 李 高 繼 陽, 生 隆 口 陽關 爲 部 , 契丹 望櫓 網糧 西 行營都 l 射城 ניול 七 抵 所 引 威 監 還 虏, 追 舉 0 薄 端 還 烽 西山 時 以 度 拱 易 候 初, 徐 州 有詔 河, 警急。二年 候 契丹 騎 爲敵 褒美 不 騎 至 追 至 瀛 爲 繼 鎭 宣 鎮, 繼宣 定、高 於易州 繼宣 駐 軍 率步 陽 平塞軍 與鬥, 關三路 騎 萬 殺獲 排 長 人 入敵 城 陣 甚衆。 都監 口 境,抵 威 , 押 庫:

軍 入雞 中 ·勁弩, 距 泉以運 年 爲入陣之備。 徙 糧 知 保州, 人咸便之。 五 义 年, 轉莊宅 領高 數月, 使。 州 徙定 築關 刺 史。 州 城, 行 會契丹泛海劫千乘縣, 營都監, 浚外豪, 戍深州 **葺營舍** 子五 改 高陽關 日 繼宣請於海 行營 造船 都 二百 監。

砦以

)禦之。

橋, 無 餘 地 契丹聞之,大懼,拔砦遁 里 分 至道 馬。 契丹焚鎭州中渡、 年,遷北作坊使,俄召還,加 敵 至 懷德 橋,繼宣領兵三千掩襲之。 走 常山 三橋, 繼宣 南作坊使, 領兵趣之,契丹保豐隆 至,則契丹已壞橋,繼宣 出為 鎭州行營鈴轄。 山砦, 横木 契丹寇定州 繼宣伐木治常 而 度,追 奔 命 五

出 主軍 兵 設伏,斬獲 事 繼宣銳於追襲,傅潛爲部署, 了逐敵越 甚衆。 拒馬 河,復爲鎭州鈴轄。 俄還鎭州 繼宣詣潛 受詔按視緣邊城砦,權知威虜軍, 請行,頗爲 所抑。 及召潛 屬 吏, 詔繼宣 敵騎至城下, 與高瓊 同

往 師合勢大戰,敵走上洋山 威 虜 繼宣留 减 平 敵 至, [[ 屋 年,拜西上 赤虜,止以二騎繼進。 會師于威虜,延昭、嗣輕騎先赴洋山, **閤門使**,領 繼宣逐之,環山麓至其陰。 康州刺史、為前 至, 則延昭、嗣 陣鈴轄, 繼宣 適 爲敵所乘。 繼宣馬連中矢斃,凡三易騎,進至牢 與翰分左右隊各整所部,翰全軍亦 與秦翰、楊延昭、楊嗣分屯靜戎 繼宣 即召赤虜之師,與翰

山谷,大克捷。 延昭、嗣、翰之師,初頓赤虜,旣而退保威虜,繼宣以所部獨與敵角,薄暮,始

至威虜。 詔書稱獎,特加檢校官及食邑。

戰,走之,久而繼宣始至。 內殿崇班王汀代之。 明年,徙定州鈴轄,扞契丹于唐河。 望都之敗,敵騎剽郡縣,繼宣壁徐河,契丹數十隊薄威廣,威虜魏能 又寇靜戎,汀請分兵自將襲契丹,繼宣拒之,雖日出遊騎偵敵勢, 會緣邊都巡檢使楊延昭、楊嗣禦敵師敗,詔繼宣與 與

屢徙砦而未嘗出戰。爲能、汀所發,召還,令樞密院問狀,降爲如京副使。

景德初,加如京使、鎭州鈴轄。

契丹乘秋來攻,時桑贊病足,鄭誠赴定州,繼宣獨主鎮

州全師、歷屯邢、趙。 三年,兼 知瀛州。 繼宣罕識字,上以河間郡事繁,慮獄訟有枉,命高繼勳代之,止爲鈴轄 及與契丹和,命爲高陽關鈴轄。 是冬,復爲 一西上閻門使,領康州刺史。

以 疾甚,求至京師尋醫,卒,年六十四。 疾,授西京水南都巡檢使,每夕罕巡警,爲留司所舉,特詔增巡檢一員,專主夜巡。 大中祥符初,徙鎮、定兩路鈴轄,進秩 子守忠,左侍禁、閤門祗侯。 東上閻門使。 召還, 改鄆州部署, 加 四方館使。 六年,

張旦, 趙州 勇敢 善射,以經學中第,至國子博士。 淳化中, 知陵州 時李順構亂,

守 數 郎 進 陵 之重 戰 **|** 月 城邑。 州 酉 不 以 敗 Ж 芝, 招 欲 孤 賊 安使 換 軍 黨 抗 他 一数萬 Эī. 職, **羣**寇,保全 上官正言:「 千餘 乃授 攻 陵 人,獲 州 刑 部 壁 雅 器 州 一壘,至 員 兵不滿 州 槭 外 密 萬 郞 今劍 邇 , 三百 蠻 賜 金紫。 蜑 外 詔 伏 舊 書褒之, 在於鎮 其威名。 不設 乘 傳之任 特 撫 城 遷 塹 須 望 r, 寇不 得 水 一改授 部 旦修完 其 員 敢 諸 外 犯 伏 司 郎, 戰 使, 見 具, 水部 賜 令 置 緋 知 鹿 員 魚 州 外 角 事 砦, 郎 由 \_ \_E 張 是 驅 日 知 以 市 一<del>,</del>前 省

其 子 |利| 儿 子 涉 眞 崇 官。 쬭 衆 刨 位 時 奮 有 擊 遷 上 並 兵 劃 部 戦 事 沒。 員 者 外 言朝 郎 上 聞 改尙 之 廷 驚悼, 宜 食 優 使、 加 特 恩 知 鮰 典 德 左 淸 衞 以 軍 勸 大 將 忠 景德 臣 軍 深 中, 詔 州 以 契丹 團 恤 練 日 使, 入 事 渡, 告 利 渝 涉 陷 崇 軍 儀 壁 副 使 日 與 其 銯

厚 使 挺 葬 張 刃 殺 睿 又 劉 數 虎 ---翼 贈 福 福 都 都 洺 虞 頭 候 州 副 輔 胡 指 專 能 練 揮 福 等 使, 使 戍 几 尙 軍 祚 人 城 祚 濱 並 ′',率兵 能 州 死 運 刺 之。 大 力 史, 檛 戰 眞 睿 , 宗 所 演 金 斬 嘉 州 創 歎 首 刺 徧 其 拉 史, 體 忠 脅 劉 猶 者 勇, 福 奮 遣 臨 亦 劍 州 使 轉 百 鬥, 訪 餘 刺 史, 遺 人, 矢 骸 能 無 衆 , 等 虚 寡 唯 發 並 得 不 爲 福 敵 麾 諸 尸 下 衞 爹 , 已 桽 命 與 蠢 指 府 其 獨 副 揮

沒 鯉 又 晦 邯 辭 鄲 Ι. 令 部 李 員 晦 辭 外郎,承皓崇儀使。 赴 任 値 道 梗 留 德清 同 拒敵 侍禁夏承皓部兵至大名界遇 敵, 戰

率。

刼 度等三人爲內殿崇班,仍各錄其子,及 盽 又 贈 受 H 河朔 IIII 沒者, 殿直 劉 超 供 賜其家金帛。 備 庫 使, 內 高 班 內品李知順爲六宅副使, 奉職

舉 姚 殿 前 , 有詔 路 與煦鞫之,卽 承旨 張 都 煦字輔陽, 嘉獎。 巡檢使。 ,遷殿直、歙州監軍。 化 開封 還,拜供備庫副 日 契丹騎兵剽境上,煦以 ·決遣。 還擢供 開寶 兇人黃行達 (末,補府中牙職 使,權知環州 奉官、閤門祗 所部斬首數十,走之。 弟坐法抵 候。 數月,改岢嵐軍使,又 雍熙二 占謝 死 行達 年,自陳太宗尹京嘗 日 ,又改內殿崇班、鎭定 誣州將故 葛霸、 知保安軍 周瑩 入其罪, 李繼宣 事 詔宣 ·左右, 邢 趙 稱 州 命爲 Ш 通 西 纠

諸 焚 其 軍 、郛及樓堞,均 事 咸 平 中,王 有 戰 艦卒 均 突圍 -將謀 而 擾動,煦 遁。 賊平,以 刨 日 ! 斬之。 功就 遷 正使,徙益州都監,與知 巡檢使。 又 與雷 有終進 州 宋太初 攻成都, 同提總本路 煦主 東砦,

中 靈 武 掩 夏 陷 人寇邊, 息 l',復還· 衆, 1 本 改 詔 任 涇原儀 嘉獎。 與張凝 渭 會遣 都 入西夏 鈐 王 轄 超、 境, 張凝、 又爲 出 洲 白豹 秦翰 寧環 鎭, 援 慶路鈴 靈武, 至柔遠川 命煦 轄銀 爲 , 巡 夏 西 檢、 人七 路 安撫 行 百 誉 都監, 餘 都 邀戦 監 累躡寇入贼 至鎭 煦與慶州 戎, 聞

列

僔

第

六

-|-

七

張

腴

張

佶

監 以待之,果然。 車 - 張綸擊殺 送去衆。 凝按部歸環州,道爲敵所邀。 清遠故城有酋長, 請以甲騎三萬來降。 **煦聞之,領所部銳兵自慶州赴之,** 煦語凝曰:「此詐也。」 昔與凝 귮 嚴 兵

射殺其大將,與凝同還

會利用 反, 在 後 命副曹利 M 景德元年,加領賀州刺史,復爲涇原儀渭鎭戎軍鈴轄,再知環州。 所給 斬之。 過半,眞宗謂其太過。 用為廣東西路安撫使。 初與利用同署紙,人持百枚,備給立 賊平,改如 賊 衆擁判官宜州盧均, (京使, 功將士。 知懷州 及破 僭號 南平王, 賊,利用在前 四年,宜州戍卒陳進 圍象州 軍 無所給 煦以 煦 兵

以老疾求近郡, 九 南 年 西 1路安撫 東 加 封 颌 一歲,權 昭州 都監。 得 團 河陽鈴轄,遷文思使、 知磁州。 練使、 俄還濟陰,加北作坊使,又徙滄州 知 鄜州 四年,卒,年七十三。 未幾,復知滄州。 知 博州。 會江、准災歉,分命大藩長吏綏撫 煦明術數,善相宅,時稱其妙。 天禧 ,就轉宮苑使,領康州 三年,拜西 上閣 門使,徙幷代鈴轄 刺 史。 ,以煦爲 大中 祥符 江

節, 始用蔭補殿前承旨,以習儒業,獻文求試,換國子監丞。 張佶 字仲雅 ,本燕人,後徙 華州 渭 南 初名志言 後改焉。 遷著作佐郎、監三白渠、知涇陽 父 昉, 殿 中少監。 佔 少有志

端 拱 初 ,爲太子右贊善大夫。 曹州 民 (有被誣殺人者, 詔往按之, 發擿姦伏, 寃

尋通判忻州,遷殿中丞, 兼御河督運。

燙, 賜 帥, 文思使 餉之勞, 緋 俘 授 魚 至 獲 如 渞 甚 京使、 遷虞部員 佶 1/1 至 衆, 延安, 御 通 軍撫民, 甚有威 餘黨遁 涇原鈴轄 判 遇夏 陝州 外郎。 去。 ,再 人入寇, 兼 賊平, 詔 部送 知鎭 書褒之,賜錦袍、 惠, **獨糧** 親督兵擊敗之。 分川 ( ) | | | | 蜀 赴 人久猶懷之。 0 峽爲四路, 三靈武, 徙麟府路 就改國子博 金帶 三年,徙 以信 · 鈴轄, 景德中, 為利州 夏 西川 士。 人來寇, 路 轉 咸平初 徙益州鈴轄,加 轉 運 運使。 副 |信 使。 擢爲 兵與戰, 有 時 薦 詔 陜 宜 其 西 討 州 武 轉運 王 親 幹者,召 刺 均 射殺 史, 副 遷 酋 飽

知州州 朝 惜 陷 稱 朋 深 潤 佶 官 延 始 入 置 告 可 大中 務 使。 拖擊, 收 任,上然之,遂改左騏驥使,就命 采木場,戎人不之爭,移帳 遷宮苑 ·祥符 寧邊,以信輕 叉 爲 几 走之。 使。 一年,車 鄜 延 未逾 公轄。 信易 議者 駕祀 月, 又欲 汾陰, 事 擢 會秦州 ,徙邠 拜西上閤門使,復爲涇原鈴轄。 加恩宗哥、立遵等族,以扼 以爲 īmī 寧路鈴 去。 李濬暴卒, 西京舊城巡檢、 知秦州 信 轄。 不甚 上語近 o 天禧 存撫,亦不 至州 初, 一置四 鈴轄。 臣 .日:「天水邊 召 平夏,估請 奏 爲 門砦,開 禮 契丹國 加 四年,卒,年六十九 齊賜,邊人追 成, 加授北: 拓 要,宜速得 信 拒絕之,事 **疆境**,邊 副 使, 作坊 悔 再 部頗 。 引 人。 使, 仁 其 (吐蕃 州寧, 兼 眔 充|趙 馬 怨。 劫 知 傳。 掠 德

万]

傳

第

六

+

ti

張

佶

校

勘

記

郎、直史館

度支判官。

一〇一五二

佔 涉獵書史,好吟詠,勇敢善射,有方略,其總戎護塞,以威名自任。 子宗象,兵部員外

可取。 兵」,漢祖亦云「安得猛士」,蓋爲此也。 契丹入寇,審玉、繼宣,拔陷將於重圍之中,固有餘勇,信、煦宣力西南,勤幹威惠,亦皆 諭 濟、旦以孤城扞強寇,援絕戰死,一代死事之表表者,其可泯諸。 曰:自古盛德之世,未嘗無邊圉之患,要在得果毅之臣以扞禦之。昔人有言「誰能去 李順叛蜀,攻陷郡邑,正扞劍門,斌守梓潼,其績最

校勘記

領成州刺史 「成州」原作「誠州」,誤。參考本書卷三○七校記〔三〕改。

# 宋史卷三百九

## 列傳第六十八

秦羲 延德 謝德權 常延信 閻 程德玄 日新 靳懷德 王延德 魏震 張 質 楊 允恭

温 置左右。 率 鄉豪捍蔽境內,里人德之。 王延德,開封 太宗尹京,署爲親校,專主庖膳,尤被倚信。 東明 人。 曾祖芝,濮陽令。 宣祖掌畿旬 兵 祖璋,相州錄 與温厚善, 事參軍。 延德方總角,宣祖愛其謹 父温 晉末契丹內寇, 重,召

宅一 拱初,領本州 對懇讓,遂罷左藏、御廚。 品。 太平 俄領薊州 興國初,授御廚 團 一練使。 刺史, 淳化中,當進秩,延德與王繼恩、杜彥鈞使額已極,特置昭宣使,以延 兼掌武德司, 改皇城使, 副使,數月,遷正使。 八年,兼充親王諸宮使。 從征太原,未幾,加尚食使,賜浚儀縣壽昌 掌御輦院、左藏庫。 延德素謹慎, 以舊恩,每延訪 延德所領凡五印 外 事。 端 因 IJj

列

傳

第

六

+

八

王

延

徳

常延信

一〇一五三

德等爲之。 至道二年,加領平州防禦使。

昭宣使、從之。 真宗嗣位,改領 實以禦侮正秩,奉給優厚 懐州 永熙復土,提 故也。 點緣路供頓。 上幸大名,為東京舊城都巡檢使。 成不 初,出知華州 占謝 日 明年,以 面渍 稲

風 , 痺請告, 遺還本郡, 是多卒, 年六十四。 贈邕州觀察使。

南 治 行 宮使則 宮 那 則 事 延 爲 德所至, 三卷。 下車奏報錄 爲南郊錄, 子應昌, 好撰集近事。 奉韶修內則為版築 先是, 莊宅使、端州 掌御廚則爲司膳錄, 韶史官修太祖 團練使。 記,從靈駕則爲永熙皇堂錄、山陵提轄諸司記,及 太宗賞錄 掌皇城司則爲皇城紀事錄, 多以國初事訪延德, 又上太宗 從郊祀為

刺 史 常 思卒, 延信, 入爲 | 井||州 平晉人。 六宅使,領 祖 邶 思,仕周歷昭義、歸德、平盧三鎭節度,延信皆補牙職,領 如 故 和 州

萬 京新 城 又監 |建 隆 外 1/1 通許鎭兵, 初, 河 改領平州 南 巡檢, 改样、 出為潼關 坐 與 逐十二州都巡檢使, 〈妻族 監 相訟, 軍 O 左授右監門衛 延 信 以 關路嚴 賜袍帶、錢百萬。 險, 副 率, 奏易道 領護滑州 路及填 太平 ·興國<sub>'</sub> 黃河隄。 禁院 初, 役 秩滿 開 工四 寶 中, 留再 -餘

賜錢四十萬。 時亡命卒多以 山林爲寇, 延信嘗領徒捕殺三百餘人。 又爲唐、鄧都巡檢

使,代還,繼改右淸道、右司禦二副率。

充羊狀六砦都鈴轄,遷右衞副率。 雅熙三年,命督鎭州以北至軍前芻糧。 會誠州蠻歸款,命延信馳入溪洞,索其要領。 是多,爲全、邵六州都巡檢使, 令疾置之任。 又逐蠻直 就

趣古鎮,過西延、大木諸洞,蠻人慴伏。

平中,歷太康、鞏縣二監軍。景德二年,卒,年六十四 左 屯衞二將軍,充西京水南都巡檢使。 淳化中,歷襄、鄧、宋、曹等州都巡檢使,改左監門衞將軍,屢部徒修護河防,改左領 有盜掠彭婆鎭及甲馬營,延信馳以往,悉擒之。 |咸

門尚 太祖 關。方三鼓,德玄不自悟,盤桓久之。俄頃,見內侍王繼恩馳至,稱遺詔迎太宗卽位。 大漸之夕,德玄宿信陵坊,夜有扣關疾呼趣赴宮邸者。 程德玄字禹錫,鄭州滎澤人。善醫術。 太宗尹京邑,召置左右,署押衙,頗親信用事。 德玄遽起,不暇盥櫛, 詣府, 府

太平 興 國 二年,陳洪進來朝,命德玄迎勞之。 船艦度准、暴風起, 衆恐,皆請勿進。 德玄

列

僔

第六

-|-

八

程德玄

因從以入,拜翰林使。

是 秋,領 「吾將 代州 君 刺 命 史。 豈 從征 避 險? 太原,爲行宮使, 以 酒 祝 而 行 師還, 風 浪 。遽止。 以功改判四方館 三年, 遷 東 事 Ŀ 閣 俄 門 遷領: .使, 木 兼 翰 州 專 林 練 司 使,

又

加

領

本州防禦使

能 作 授 東 判 丞 Ŀ 五 官、 閣 年 右 門使, 是冬, 善大夫 車駕幸 秦、隴 領 本州 诗 竹木聯筏 魏府 載, 刺 史。 坐 命 縱 陝府 入京 總 德玄等於部 御 西 誉 師,所過矯制冤算,又高 南 [][ 轉 面 運 巡 使、 下 檢, 私 掌 左 販 一拾遺 給 鬻, 諸 務昇 章務昇, 軍 資 其估以入官,爲王 洎 糧 能 京 並 西轉 責 授 運使、 右 贊善大夫,載 仁贍所發, 起居舍人程

景 咸 未 付 度 德 德 平 华 行 歲 中, 玄, 德 初 軍 玄 司 卒, 入 復 得 攀 馬 朝 典 便 年 附 環 六十 宜 踰 至 眞宗 州 補 近 年 授 五 列, 命 李 復 順 坐 頃之, 拜 大中 一撫勞, 之寇 慈州 頗 信其言, 祥 以 西蜀 刺 符 訪 疾 史, 中, 以 求 移 邊 移 其子 致 繇 事 知 仕 知 是 鳳 環 繼宗 , 俄 趜 州 優 州 出 附 , 詔 上 知 兼 者 章, 不 時 井 颌 甚 許 西 州 衆 鳳 懇 鄙 兼 成、階、 祈 淳 **酋豪!** 井 或言其 贈 化 代 典, 二 相 副 文等 年 繼 (交游 F 都 ٠, 內 憫 部 改本 州 附 之, 署, 太 駐 盛 特 移 泊 州 詔 遂 贈 鎭 惠 兵 以 鄭 州 华 出 馬 練 使 名 爲 州 事 受代 崇信 防禦使 告敕 徙 知 慶州 歸 邠 百 軍 闕 州 道 節

德元 子賁, 兄 德元 大中祥符五 同 仕 Ŧ. 府 年舉進士, 至 內 酒 坊 副 累遷太常博上 使 繼宗 東 頭 供 奉 官 **閣門** . 祗候, 次子繼忠, 內殿崇班

使,出知慶州 州,望北庭萬五千里。雍熙二年,使還,撰西州程記以獻,授崇儀副使,掌御廚。 國遣使朝貢, 太宗以遠人輸誠, 造延德與殿前承旨白勳使焉。 落籍,遣家人代詣登聞鼓院求休致,上以其久事先帝,復授左千牛衞上將軍致仕。 恥自辨,因頓首稱罪。 希進用。齊賢爲言之,上怒曰:「延德願掌倉以自效,未踰月,又禱宰相求免,何也?」因召 年,卒,年六十八。 步複。咸平初,出爲舒州團練使、知鄆州,徙青州,坐市物有剩利,降授左武衞將軍。 司。 延德詰責,自言未嘗遺貽業詣相府有所求請。上疑齊賢不實,召貽業至,貽業又諱之,齊賢 真宗卽位,轉左千牛衞上將軍,充使如故。 延德前使西域,冒寒不汗,得風痺疾, 未幾,拜左屯衞大將軍、樞密都承旨,俄授度支使。 淳化三年,代還,監折博倉。延德與張齊賢善,因國子博士朱貽業通言齊賢,求免掌庾, 上怒,即以延德領懿州刺史以寵之。五年,提點三司衙司、磨勘憑由 自夏州渡河, 經沙磧, 明年,拜正 景德三 歷伊 艱於

列 傳 第

六十八

王 延 德

魏 震

張 質

〇一五七

久病

王延德,大名人。少給事晉郎。

太平興國初,補殿前承旨,再遷供奉官。

六年,會高昌

延德以攀附得官,傾險好進,時人惡之。兄延之,乾德六年進士,至屯田郎中致仕。

鈴轄。 秦州 州 會諸將: 初,温州進瑞木成文,震作詩賦以獻,拜崇儀副使,賜白金二千兩,掌內弓箭庫。 因 自 了, 坐 以 召寘邸中。 鈐 智詞業,不屑就。 魏震,不知何許人。祖浩,瞻國軍權鹽制置使。父鐵,蒲臺令。 事免。 轄。 北 咸平元年,卒。子致恭,殿中丞 伐,爲幽州西北路鈴蔣。 端拱中, 至道 即位,補殿直、廬壽八州巡檢。 初,起爲洛苑使、 召拜西上閤門使, 姚恕嘗與鐵蒲臺交代,及爲皇子教授,太宗在藩邸, 、知洪州 下飛狐、蔚州, 俄 知 廬州 二年,復爲東上閤門使,知定、代二州並兼 從征河東,掌行在左藏庫,改供 ,徙澶州。 以功就遷崇儀使、 淳化 二年, 震初用祖蔭,當補廷職, 知蔚 進東上閤門使、 州 恕嘗 復知 奉官。 稱震 出 保州,移 知保州, 之材, 行營 知息 雍 煕

趙普 張質 曹彬所知。 字守朴, 太宗征河東,還駐鎭陽,彬方典樞務。一 博州高唐人。 少孤 養 于兄贊。 **贊**為 [樞密院] 夕,議調發屯兵,時,軍載簿領,阻 典謁, 質因得 隸兵房, 頗

留在道。 質潛計兵數,部分軍馬,及得兵籍較之,悉無差謬。 淳化中,累遷本房副都承旨。

以質為左 其職者。 書院考第。 咸平初,授左監門衞將軍、樞密副都承旨。 屯衞大將軍,加給月奉,歷右神武軍、右衞二大將軍。 景德三年夏,內出公事三條,令主事以下詳決之,命質與禮房副承旨尹德潤宿御 翌日,上親臨閱視,凡選補四十餘人,不中式除崇班、供奉官、奉職者十餘人。 先是,樞密吏皆以年勞次補,有至主事而懵

制,且命條具利害,質纂爲三篇,目日兵要以進,上覽而稱善。 本院吏罕有遷至都承旨者,上素知質廉謹,故以授之。嘗召問五代以降洎國初軍籍更易之 大中祥符七年, 轉都承旨。 在樞要僅五十年,練習事程、精敏端慤,未嘗有過。 舊,

四。 宮使, 錄其子大理評事純爲衞尉寺丞,孫思道爲三班奉職 好養生之術,老而不衰,以是多接隱人方士,然語不及公家事。 或領巡檢提點供頓之務。天禧元年九月,方候對承明殿,暴中風眩,輿歸卒,年七十 每大祀巡幸,質多爲行

恭裁弱冠,率鄉里子弟砦于清泉鄉,為賊所獲,將殺之。 楊允恭,漢州綿竹人。 家世豪富,允恭少倜儻任俠。 允恭曰:「苟活我,當助爾。」 賊素聞 乾德中,王師平蜀,羣盜竊發,允

列傳

第

六十八

楊尤

3,5

10一六0

**告**, 因遁 乃釋之。 內客省使丁德裕討賊至州, 陰結 賊帥子, 日與飲博, 允恭以策干之,署綿、 陽不勝, 償以 )貲,使伺賊。 漢招收巡檢,賊平,補殿前 賊 將害允恭, 其子以

焉 賊 海 建 所 上 大 庾 賊 11-太 處 寇 允 恭 平 興國 因 每 恭 爲 盡 部 遇 集水軍,造 軍,官輦鹽市之。詔建爲南安軍,自是冒禁者少。 奪先所劫男女六十餘 風 運入奏其事,太宗卽命爲廣、連都巡檢使。 中,以殿直掌廣州市舶。 濤 則遯 輕 1F 舠 ,掩襲其首,斬之。 洲 島間。 口 允恭 還其家。 自南漢之後,海賊子孫相襲,大者及數百人,州縣苦 領衆涉海,捕之殆盡,贼皆望 餘黨棄船走,伏匿山谷,允恭 詔書嘉獎,賜錢 又以海鹽盜入嶺北,民犯者衆,請 賊有葉氏者, 十萬,轉供奉官。 風奔 衆五 潰。 伐木開道,悉殲 一百餘, 詔歸, 又抵漳、泉 往 改內

患 者 勁 發 殿 答、 以 軍 城 以 繩 班 時 短 緣 功轉洛苑副使,江、淮、兩浙都大發運、 連 三鼓, 礟 鐵 江多賊,命督江南水運,因捕 鈎 允恭兵刃 散 遇 擲之, 賊 百餘, 所 壞 其幕,士卒爭進, 向 拒 多多 敵 久之,悉梟其首 為幕 所縈, 磁中允恭 寇黨。 賊赴 行及 擘畫茶鹽捕賊事 水 叉 死 臨 趣 者 左肩, 通 江軍,擇聽卒拏輕舟伺下江賊所 太半,擒 州 境上 流 血 躡 數 及 海賊,財 百 袖, 賜紫袍、金帶、 人。 容色 自是 係衆舟 彌 壯 江 路 錢五 徐遣 張 無剽掠之 幕 一十萬。 JE 善 泅

先是,三路轉運使各領其職,或廩庾多積,而軍士舟楫不給,雖以官錢雇丁男挽舟,而土人

集,允恭乃辨數授之。江、浙所運,止于滩、泗,由淮、泗輸京師,行之一歲,上供者六百萬

劉式 鹽鐵使陳恕等以允恭議爲是,詔從之。 各有所宜,非雜以數品,即商人少利。 権務。商人弗肯售,久卽焚之。 建議請廢緣工権務,許商人過江,聽私貨鬻。 淳化五年,轉西京作坊使。 允恭曰:「竭民利而取之,積腐而棄之,非善計也。」至道初, 初,產茶之地,民輸賦者悉計其直,官售之,精麤不校,咸輸 請依舊江北置務,均色號,以年次給之。 即命允恭爲發運使,始改「擘畫」爲「制置」,以西京 允恭以爲諸州新陳相糅,兩河諸州 事下三司, 風土,

作坊 副使李廷遂〔〕、著作佐郎王子輿並爲同發運使。

額。 往來爲盜者。 准南十八州軍,其九禁鹽地(三)則上下其直,民利商鹽之賤,故販者益衆,至有持兵器 巢、廬江二縣舊隸廬州,道遠多寇,民輸勞費。 允恭以爲行法宜一,卽奏請悉禁,而官遣吏主之。 允恭請以二縣建軍, 詔許之, 以無爲爲 事下三司,三司言其不可,

制,遂變新法。 **允恭再三爲請,太宗始從之。是歲,收利巨萬。** 允恭與王子輿、秦義同主茶鹽之任,多作條

眞宗卽位,改西京左藏庫使。 傳 第 六 + 八 楊 允 恭 又言川峽鐵錢之弊,曰:「凡民田之稅,昔輸銅錢之一,今

輸鐵錢亦一; 且民入田稅,以一爲十,官失其九矣;吏卒奉給,增一爲五,官又失其四矣;吏卒得五 而吏卒奉舊給銅錢之一,今給鐵錢五;及行用交易, 則鐵錢之十,爲銅錢之

達于閩,閩素多銅,俾虁、盆、遂各置監鼓鑄,歲用均給,不十年,悉用銅錢矣。」議雖未用,然 用十,復失其半矣。臣在先朝,嘗陳其事,願變法以革其弊, 止。今陛下繼成先烈,可遂建其法,使民不失所。且饒、信之銅,積數千萬, 先帝方議行之,會賊順叛擾而 若遣運于荆,

自是東卒奉給,始改用十鐵錢易銅錢之一。

中,合士卒之力,禦寇于外。」尋爲議者所沮而止。復遣之任,又議,江、准鹽鐵使陳恕力爭, 牛之制,以小車發卒分鋪運之。每一車四人挽之,旁設兵衞,加戈刃于其上,寇至則聚車於 靈武七日程,芻粟之運,其策有三。然以人以驢,其費頗煩,而所載數尠。莫若用諸葛亮木 寶、閤門祗候李允則馳往經度,圖上郡縣山川之形勝。 韶從允恭之議。 俄知通利軍,兼黃、御河發運使。會議減西鄙屯兵,以息轉餉,召允恭與崇儀副使竇神 允恭因建議日:「自環州入積石、抵

之亂,上慮南方有聚寇,命允恭爲荆湖、江、浙都巡檢使,內殿崇班楊守遵副之,賜與甚厚。 二年夏、以疾聞,遣其子大理評事可乘傳侍疾。七月,卒于昇州,年五十六。賜其次子告 咸平初,以北邊賣馬,未有定直,命允恭主平其估,乃置估馬司,鑄印以爲常制。

加領康州刺史。

同學究出身,賻錢二十萬、絹百匹。 又以錢五萬、帛五十匹給其家。命揚州官造第一區賜

允恭有膽幹, 能以方略捕賊。 王小波之亂也,李順之兄自榮據綿竹,上人多被脅從。

表其事,詔賜允升學究出身,授本縣令,允元什邡令。明年,召赴闕,授允升右贊善大夫,允 允恭兄允升、弟允元,率鄕里子弟倂力破之,又爲王師鄕導,執自榮詣劍門以獻。王繼恩

元大理評事。

可,咸平元年進士,喜屬文,有吏幹,累召試,歷戶部、鹽鐵判官,知洪、宣、潤、壽、潭州,

至都官員外郎。告,虞部員外郎。

詔,縛光璉以獻,太宗壯之。 謹,補殿直,令督廣濟漕船。 承裕,建州監軍使、知州事 秦義字致堯,江寧人。世仕江左。 o 積勞改西頭供奉官,決獄于淮南諸州 李煜之歸朝也,承裕遣義詣闕上符印, 太平興國中,有南唐軍校馬光璉等亡命荆楚,結徒爲盜。 曾祖本,岳州刺史。 祖進遠, 寧國軍節度副使。 太祖召見,悅其 義受

淳化中, 又督洛南採銅。 雷有終稱其有心計,遣監興國軍茶務。 會楊允恭改茶鹽法,

列傳第

六 十

八

紊

羲

謝德

樾

薦 義 掌真州 権務,尋提點淮南 西路茶鹽,得羨餘十餘萬, **遂與允恭同爲江、淮制置 権授**閣

〇一六四

門祗候,兼制置礬稅。

使, 知江 班, 獻 陵 咸 議 兼 府 平初, 增 制 榷 置 坐舉官不 酤歲十八萬緡,所增 荆湖 入奏, 路 如狀, 眞宗 江 南 面加慰勞。 削秩 | 奉 盗, 既多, 久爲民患, 准 尤爲 南権鹽, 義討 刻下。 清 指皆盡 二歲增錢八十三萬餘貫, 會歲旱,詔罷 几 年, 之。 領發運使 景德 初, 事 以勞改 遷供 改供 備 備 內殿崇 庫 庫 使 副

蘇州 言數 宜 賊 大中祥符 頗 改 / 崇儀 希恩桀驁, 皆 不 ·稱旨。 使、 切, 提 起授供備 軍 舉在 上 中 日:「秦羲 亦 京 能制, 諸 庫副 司 庫 部 使、宿州監 印 務。 當此 送 闕 因 下。 任。 對 軍,稍遷東染院副使。 上以遠· 復授 求 典藩 供 方 備 郡, 大鎭 庫 遷內園: 使, ′,宜得 充廣州 使 材幹之臣 明年,廣 知泉州 鈐 轄 . 鎭 州 歷東染: 言澄海 撫 天禧 之。 四 院使 兵 宰 年, 嘗 相 代 捕 知 胚

還。道病卒,年六十四。

|義 知 書, 好爲詩, 喜賓客,頗有士風 歷財貨之任,凡十餘年,精勤練習, 號爲稱職

謝德權 字士衡 福州人。 父文節,初仕王氏, 爲候官令。 後入南唐, 爲忠烈都虞候、

州 團 練使,以曉勇聞 周 世宗南征,文節獨擐甲度大江,潛覘敵壘,吳人號爲「鐵龍」。

鄂州, 拒宋師, 戰沒。

西巡 檢, 徳權 以勞就改右侍禁。 初以父死事,李煜署莊宅副使。 咸陽浮橋壞,轉運使宋太初命德權規畫,乃築土實岸,聚石爲 歸宋、詣登聞檢院自薦, 補殿前 承旨, 遷殿直、陜

倉,用河中鐵牛之制, 纜以竹索, 繇是無患。

先是, 咸 聽 命 咸平二年,宜州溪蠻叛,命陳堯叟往經度之,德權預其行,以單騎入蠻境,論以朝旨, 廥積多患地下濕,德權累甓爲臺以藉之,遂無敗腐 堯叟以聞, 加閤門祗侯、廣韶英雄連賀六州都巡檢使。 提點京城倉草場。 衆

請 條上衢巷廣袤 ::「臣已受命,不可中止。 京 城衢 巷狹隘,命德權廣之。 及禁鼓昏曉之制 今沮 既受詔,則先撤貴要邸舍,羣議紛然。 事者皆權豪輩,各屋室僦資耳,非有他也。」上從之。 有詔 止之,德權

因

面

監之。 泌 欲 會有兇 陷 旣 大 而 臣 人 按 耶 驗 劉曄、僧澄雅 無狀,翌 若使 大臣 日 無罪受辱, , 訟執 對 便殿, 政 與許州民陰構西夏爲叛者,詔温仲舒、謝泌鞫問,令德權 則人君何以使臣,臣下何以事君? 具奏其妄。 巡獨 曰:「追攝大臣,獄 | 狀乃具。」 德權曰: 仲舒日 「徳權所

列 傳 第 六 十 八 )谢 德

櫖

奏甚善。」上乃可之。

度 寇 城 田 且 以爲 壓闊 言 河,及至澶州,德權單馬 必暴至。」上慰遣之,旣 :「邊民 年, 遠,請急韶蹙之,仍葺 今歲契丹必寇內地,令邊兵聚屯一 命 多撃族 城新樂縣, 入城 居 遷 而 間 止。 供奉官。 超赴行 契丹果圍 澶州 前歲 城, 契丹入塞, 在 又命後北平砦震, 蒲 北治德清 陰。 處, 及聞 尤非 傅潛 軍 城壍, 有韶修河北 便利 閉 壘自因,康保裔 , 以爲發備。 願速分戍鎮、定、 行 宮, 德權 臣 被擒,王 日 實 遽 又驛奏,請車駕毋 慮清陰 高陽 乘 傳詣 師 三路。 工作 未 有 闕 :未訖, 勝捷。 求 天雄 剉

役。 先時,每營造患工少,至終歲不成。 以固岸。 領 侍 泖 流 爲 護汴河兼督辇運。 未幾,二 汎濫,即中流復塡淤矣。 奏留,規冤煩重之役。 又爲大錐以試築隄之虛實,或引錐可入者 建議廢京師鑄錢監,徙西窰務于河陰,大省勞費。 遷內殿崇班、提 前是,歲役浚河夫三十萬,而主者 轄三司衙 徳權攜 德權須以沙盡至 奏白 德權按其役、皆尅日而 司 上,極 德權 言僥倖,上稱其有守。 爲設條制, 上為 业外 垠, 因循, 轄官 棄沙隄外, 遣三班使者分地以主 均其差使。 就。 改崇儀副使,兼領東西八作司 吏, 隄防 多被譴 不 有 固, 又命提總京 大將隸內 免者。 但 挑沙擁岸 植 侍 城 樹 主 几 數十萬 ßil; 排 藏, 內 其 或

累徙民舍以廣宮地。 一样符元年,議東封,命與劉承珪、威綸同計 劉承 生議掘地及丈,加築以壯基址 度發運,遷 供備庫使、 德權 患其勞役過甚, 預修玉清 日與忿

泗州,占謝 爭,不能奪,遂求罷,復領京城倉草場。導金水河,自皇城西環太廟,凡十餘里。三年,出知 日,自陳三臣久領京務,頗慮中外觀聽,謂臣負譴外遷,願稍進其秩。」詔改西染

院使遣之。 至任,踰月卒,年五十八。以其子下爲定遠主簿,給奉終喪。

德權清苦幹事,好興功利,多所經畫。 見官吏徇私者,必面斥之,所至整肅。 然喜采察

纖微,以聞于上,朝論惡之。

庫使、知環州銀洲寧環慶路鈴轄、綠邊都巡檢使、安撫都監。 「野溪、三門等族恃嶮隘,桀黠難制,請開古川道,東至樂業鎭,西出府城。」從之。 簿。 兵馬。時,部署張凝屢入邊界焚族帳,日新皆提兵應援。 都監,徙劍門關棄知劍門縣,就加供備庫副使、慶州都監。景德初,命管勾邠、寧、環州駐泊 真宗卽位,擢爲供奉官,提點雄、霸、靜戎軍権場。<br />
咸平元年,遷內殿崇班、永興軍駐泊 閻日新,宿州臨渙人。少爲本州牙職,補三司使役吏。淳化中,選隸壽王府,主邸中記 俄知涇州,未幾,移慶州。 俄換涇原儀渭路。 二年,遷如 就轉供備 上言:

大中祥符初,改文思使。日新起胥史,好云爲以進取,嘗上言:「羣臣子弟以蔭得官、往

京使,領萬州刺史。上朝陵、東封,皆命爲行宮使。

列

傳第六十八

閻日新

断 饟 徳

刺郡,守邊城以効用

往 上,導從呵 未 童 戲以 受奉, ,止太盛 , 難於趨避, 望令裁減。」又屢請對, 多所建白。 望自今年二十以上,乃給廩。 又京城百官早朝, 且自陳筋力尙壯, 而學士、丞、郞、 願 舍人以 īF.

鎭 練使、知單州。 日新所部, ,又設綵樓樂伎以 俄 眞 拜坊 車駕至, 州 疾益甚,許還京師。 刺 史、知渭州兼涇原路駐泊鈴轄。 迎駕。 迎 謁 獻方物。 明年, 徙知徐州 勞問. 天禧初,卒,年六十八。 久之, 代 遂從祀胜上(日), 還,以足疾,改右領軍衞大將軍(語)、 將祀汾陰,故改知同州事,嚴信三頭即 賜以襲衣、金帶。 還 昭州 過新 TI

安 州,遷國子博士、通判滄州 軍 判官。 靳 懷德, 秩満 博州高 ,授鴻臚寺丞,歷著作佐郎、太子左贊善大夫、通判相州 唐 人。 祖昌範,殿中丞。 歷虞部、比部員外郎,又通判莫州,知德州 父隱,禹城令。 懷德太平與 改殿 國 H 中派、 ·明法, 通 解褐廣

湘, 會留後孔守正之鎭,代還。 素遊寇準之門, 咸平中,契丹入寇,懷德固守城壁, 準父名湘, 景德山, 鹽鐵使凍恕、判官王濟薦其武幹,換如京使、知邛州 又轉運使劉通言其善政,連有詔褒之。 **準方爲相,懷德乃改名焉。** 俄知滄州 徒知密州 大中祥符 懷德本名

初,召還,復遣之任,吏民詣轉運使李士衡借留懷德,士衡以聞。 未幾,遷文思使。

以江左旱歉,命爲洪、虔十州安撫都監。 未至任,改知曹州。

改領昭州刺史、知澶州。 成勗。 又知陝州,踰年,歸闕而卒,時天禧元年,年七十三。 明年春,選爲益州鈴轄,加領長州刺史。 眞宗又面諭之,就遷北作坊使。 是州居水陸之要,懷德悉心撫治,頗著政績,使車往復,多稱譽焉。 '在劍外,軍民甚畏愛之。復以善職入拜西上閤門使, 懷德歷官以強幹稱,然酗酒多失,將行,

摘 共體 山资海,方舟之漕,規制未備,故因其建白而從之,利甚博焉。 藉。 延德而下,遘會進陟,迭居事任,其指使治迹,各有可取者焉。 德權淸廉強忮,矯名好威,然其斥謝泌以大臣非可受辱,識堂陛之分,長者之言 | 羲亦精心敏職, 士大夫許

校勘記

李廷遂 原作「李延遂」,據宋會要食貨三〇之二、職官分紀卷四七改。

列傳

〇一七〇

 $\subseteq$ 其九禁鹽地 鹽,官倍數而 取之,至禁鹽地」,長編卷四〇略同。本傳缺去商人由海上販鹽一節, 此句當有脫文。 宋會要食貨二三之二三作:「其九禁鹽, 餘不禁。 商人由海上販 則下文云云

便無所據。

2 儼信 貨四二之一二有嚴信渡務,所收課利見錢可赴「地里近便」的同州送納。 疑爲「嚴信」之訛。 按長編卷七五記眞宗配汾陰,「出潼關,渡渭河,次嚴信倉。」宋會要食 當即其地。

(E) 脽 上 原作「睢上」, 按史記卷一二孝武本紀說:"始立后土洞汾陰雕上。」 本書卷一〇四禮志正

作「脽上」,據改。

(至) 右領軍 宋朝事實卷八有「左右領軍衛大將軍」。據改。 衞上將軍,左右驍衞 衞大將軍 左左 、屯衞、領軍衞 原作「叉」。 、監門衞、千牛衞上將軍,諸衞大將軍、諸衞將軍, 按通考卷五八職官考,「宋承前代之制,有左右金吾、 無定員。」 左右

## 宋史卷三百一十

## 列傳第六十九

李迪 子柬之 [] 肅之 承之 及之 孫孝基 孝壽 孝稱 王曾 弟子融

### 張知白 杜衍

李迪字復古,其先趙郡人,後徙幽州。 曾祖在欽, 避五代亂,又徙家濮。 迪深厚有器

局,嘗攜其所爲文見柳開,開奇之曰:「公輔材也。」

官。 糾察在京刑獄,遷起居舍人,安撫江、淮,以尚書吏部員外郎爲三司 東封泰山,復通判兗州,坐嘗解開封府進士失當,謫監海州稅。改右司諫,起知鄆州,召 舉進士第一,授將作監丞,歷通判徐、兗州。 改秘書省著作郎、直史館,爲三司鹽鐵 鹽鐵副使,擢 知 制誥。 判

發兵,陰聽察知賊區處,部勒聽銳士,擒賊,斬以徇。 眞宗幸廛,爲留守判官,遂知亳州。 亡卒羣剽城邑,發兵捕之,久不得。 代歸,會唃廝囉叛, 帝憂關中, 迪至, 召對長 悉罷所

列

送關下。

徙陝西都轉運使,入爲翰林學士。

進右諫議大夫、集賢院學士、知永興軍。 城中多無賴子弟,喜犯法,迪奏取其甚者,部

Ė 借。 至, 何以濟 當出金帛數百萬借三司。」迪曰:「天子於財無內外,願下詔賜三司,以示恩德,何必 一帝悅。 及幸汾、亳,土木之役,過往時幾百倍。 嘗 歸沐,忽傳詔對內東門,出三司使馬元方所上歲出入材用數以示迪。時頻歲蝗旱,問 迪請發內藏庫以佐國用,則賦斂寬,民不勞矣。 又言:「陛下東封時,敕所過毋伐木除道,即驛舍或州治爲行宮,裁令加塗 今蝗旱之災,殆天意所以儆陛下也。」帝深然 帝曰:「朕欲用李士衡代元方,俟其 一壁而

邪 ? 也。 糧數備 事 且踔行 第怯耳。 今關右兵多,可分兵赴瑋。」帝因問關右兵幾何, 他 日, [調發,今猶置佩囊中。」帝令自探取,目黃門取紙筆,具疏某處當留兵若干,餘悉赴塞 ·謀略,諸將皆非其比,何可代? 又召對龍圖 誰可代暐者?」迪對曰:「瑋知唃廝囉欲入寇,且窺關中, 閣, 命迪草韶,徐謂迪曰:「曹瑋在秦州,屢請益兵, 陛下重發兵, 對日:「臣向在陝西, 豈非將上玉皇聖號, 故請益 以方寸 未及遣, 惡兵出宜 兵為備 小册書兵 遽辭州 一秋門 非 怯

未久,唃厮囉果犯邊。 秦州方出兵,復召迪問曰:「瑋此舉勝乎?」對曰:「必勝。」居數 下。

帝顧曰:「眞所謂頗、牧在禁中矣。」

諜者聲言以某日下秦州會食,以激怒肆。 日,奏至,瑋與敵戰三都谷,果大勝。 帝曰:「卿何以知瑋必勝?」迪曰:「唃厮囉兵遠來,使 臣用此

知其勝。」帝益 重之,自是欲大用矣。

帝顧 欲相迪, 以太宗時未嘗立保傅,止兼太子賓客, 大學士。 ·陛下有幾子,乃欲爲此計。」上大寤,由是獨誅懷政等。 拜給 謂迪曰:「尙可辭邪! 初, 迪固辭。 上將立章獻后,迪屢上疏諫,以章獻起於寒微,不可母天下。 事中、參知政事。 一日,對滋福殿, ,」拜吏部侍郎兼太子少傅、同中書門下平章事、景靈宮使、集賢殿 周懷政之誅,帝怒甚,欲責及太子,羣臣莫敢言。 有頃,皇太子出拜曰:「陛下用賓客爲宰相,敢以謝。」 詔皇太子禮賓客 如師傅。 仁宗爲皇太子,除太子太傅,迪辭 加禮部侍郎。 章獻深銜之。 迪從容奏曰: 寇準罷,帝

以報 爲不可。 皆聽旨。 廷 「何以處此?」迪曰:「太子監國,非古制邪? 國,死猶不恨,安能附權倖爲自安計邪! 初,眞宗不豫,寇準議皇太子總軍國事,迪贊其策,丁謂以爲不便,曰:「卽日上體平,朝 謂又欲引林特爲樞密副使, 準旣貶,謂寖擅權用事,至除吏不以聞。 而遷迪中書侍郎兼尙書左丞。 !」自此不協。 ·」力爭不已。 迪憤然語同列曰:「迪起布衣至宰相,有 時議二府皆進秩兼東宮官,迪以 於是皇太子於資善堂聽常事,他 故事, 宰相無爲左丞

列

人,事 者。 史臺劾正。」帝怒, 宮官屬 旣 寢不治, 不當增 而 帝 御 準無 置 長 春殿,內出制書置楊前,謂輔臣曰:「此卿等兼東宮官制書也。 留制不下, 臣不敢受此 罪罷 后,惟演! 左遷迪戶部侍 命。 烟 家 宰相 使預 丁 政, ,謂罔 郎 曹 上弄權, 利用、 謂 再 馮拯 對, 私 傳 相爲 林特、銭惟 口詔入中 別黨。 演而 書復視 臣 願 嫉寇準。 與謂俱罷, 。」迪進 事, 出 迪 特 日:「東 付 子 知 鄆 御

河陽, 語迪 洲 事、集賢殿大學士。 受先帝厚恩,今日見天子明聖,臣不知皇太后盛德,乃至于此。」太后 爲秘書監、知舒州,歷江 調 曰:「迪若貶死,公如士論 日:「卿向不欲吾預國事, 殆過矣。 仁宗卽位,太后預政,貶準雷州, 遷工部尙書。 太后崩,召爲資政殿學士、判尚書都省。 寧府、兗州、 何?」謂 青州,復兵部 曰:「異日諸 以迪朋黨傅會, 。今日吾保養天子至此, 生記事,不過日『天下惜之』而 侍 鄓、 貶衡州團練副 知河南 府。 未幾, 卿 以爲 來朝京師, 使。 亦喜 復拜同中 何 如? 間使人迫之,或 以尙書 、時太后 已。」謂 迪 書門下平章 對日 左 垂簾, 敗 丞 力起 知 諷

闙 翰 鑒 林 侍 景 讀 祐 中,范諷得罪,迪坐姻黨,罷爲刑部尚書,知亳州 學士,留京師。 夷簡請辨,詔訊之,乃迪在中書所行事,夷簡以齋祠不預。 迪素惡呂夷簡,因奏夷簡私交荆王 、改相 元嚴, 州 嘗爲 降太常卿、知密州。 旣 而 補門下 爲資 政 僧 殿 惠清爲守 〈學士、

刑部尙書、知徐州。 「大臣當爲百姓訪疾苦,祈禱非迪所宜,其毋令往。」久之,改戶部尚書、知兗州,復拜資政殿 迪奏所部鄰兗州, 欲行縣因祠岳爲上祈年、禱皇子。 仁宗語輔臣日:

承之、及之,孫孝壽、孝基、孝稱。 司空、侍中,諡文定。 柬之爲侍御史知雜事, 信軍節度使、知天雄軍,徙青州。 元昊攻延州,武事久弛,守將或爲他名以避兵。 迪願守邊,詔不許,然甚壯其意。 帝篆其墓碑曰遺直之碑,又改所葬鄧侯鄉曰遺直鄉。 奉迪來京師。 踰年,之本鎭。 帝數遣使問勞,欲召見,以疾辭。 請老,以太子太傅致仕,歸濮州。 薨,年七十七。 子柬之、肅之、 後其子 除彰

鐵判官,歷知邢漢廬州、鳳翔府,京東、陝西轉運使,擢侍御史知雜事 廢河故道,官收行者稅,謂之「乾渡錢」,奏除之。 東之字公明,曉國朝典故。獻文,召試,賜進士出身,爲館閣校勘、宣化軍使。 進直集賢院、判吏部南曹、開封府推官、鹽 境上有

滅入仕者二千人。 知荆南、河陽、澶州,改集賢院學士,判西京留司御史臺。 制、河北都轉運使,加龍圖閣直學士。建言補蔭之門太廣,遂詔裁定,自二府而下,通三歲 |東之自少受知於||寇準,至是論準保護之功。||仁宗惻然,卽賜其碑日旌忠。 拜天章閣待

贵 讀。 置宴資善堂,遣使諭之曰:「以先帝梓宮在殯,朕不得爲詩。」令講讀官皆賦 詩及序,如柬之禮。 敕王珪敍其事。 幾, 東之請老, 自工部尚書拜太子少保致仕(三)。 覆。」賜潁王生日禮物,故事,王拜賜竟,卽退。 十,不敢竊祿以自安。 今又加數年,筋力憊矣,惟陛下哀之。」於是拜刑部侍郎致仕,賜宴賦 止 |經術| 英宗 屢以老乞骸骨,不聽。 有李受者,字益之,長沙之瀏陽人也。仕於治平中,至右諫議大夫、天章閣待制兼侍 即位,富弼薦其學行,復舊職,兼侍讀。帝勞之曰:「卿通議者儒,方咨訪以輔不逮, 而已。」帝頗欲肅正宮省,柬之諫曰:「陛下,長君也,立自宗藩,衆方觀望,願曲爲容 柬之出都門,卽幅巾白衣以見客。再遷少師。熙寧六年,卒,年七十 相去數月,故時稱「二李」。卒年八十,贈工部尚書。 神宗立,進給事中、龍圖閣直學士。復言:「臣在先帝時,年已 帝諭王令留柬之食,冀其從容也。 舊無閤門謝辭式,特賜對延和,命之坐,仍 詩,勸勞甚渥,又 王卽位

擾,民悅之,請爲宰。 肅之字公儀,迪弟子也。 爲 御河催綱。 邑多盜,時出害人。」肅之令比戶置鼓,有盜,輒擊鼓,遠近皆應,盜爲 横隴之決,使者檄護金隄,滿歲無河患。 以迪蔭,監大名府軍資庫。大河溢,府檄修冠氏隄,功就弗

通判澶州。 契丹泛使將過郡,而樓堞壞圮,肅之謂郡守曰:「吾州爲景德破敵之地,當

示雄噩,今保鄣若是,且奈何? 驚賞嗟異,聞之朝。 辰陽彭仕義叛,討平之,猶以過左遷,知齊州。 親扞諸境,會蔣偕失利,亟率兵往躡于臨賀, 擢知德州, 提點開封府界內縣鎮, 變路、湖南刑獄。 」遂鳩工構城屋,凡千區。 賊引去。 改江東、兩浙、河北轉運使,進度支副使、江 狄青、孫沔交薦之,徙湖北轉運使。 已而中貴人銜命來視,規置一新, **農蠻暴嶺外**,肅之

准發運使

知慶州 復知開封,爲樞密都承旨,加龍圖閣直學士、知鄆州。四年,提舉太極觀。 遷天章閣待制、知開封府,出知定州。 暴露者,為茇舍以居民,啓廩振給,嚴儆盜竊,一以軍法從事。天子聞而嘉之,遣使勞賜。 神宗初卽位,諒祚寇大順城。 肅之內行修飭,母喪,廬墓三年,不入城郭。 數日,徙瀛州。 大雨地震,官舍民廬推陷。 肅之入奏,帝訪以西夏事,奏對稱旨。 還,權三司使,又出爲永興軍、青齊二州。元豐二年, 季弟承之, 生而孤, 鞠育誨道, 至於成人, 肅之出入泥潦中,結草囷以儲庾粟之 以爲右諫議大夫、 卒,年八十二。

参軍 承之字奉世,性嚴重,有忠節。 郡守任情骫法,人莫敢忤,承之獨毅然力爭之。守怒曰:「曹掾敢如是邪?」承之曰: 從兄柬之將仕以官,辭不受,而中進士第,調明州司法

列

傳第六十

九

李

迪

遂

相繼爲侍從。

帝稱其一門忠孝云。

〇一七八

「事始至,公自爲之則已,旣下有司,則當循三尺之法矣。」守憚其言。

日:「承之言制置司事甚詳,非他人所及也。」改京官。 嘗建免役議,王安石見而稱之。 熙寧初,以爲條例司檢詳文字,得召見。 他日,謂之曰:「朕卽位以來,不輕與 神宗語執政

人改秩,今以命汝,異恩也。」

訪陝西,時郡縣昧於奉法,斂羨餘過制。承之曰:「是豈朝廷意邪?」悉裁正其數。遷集賢殿 修撰,擢寶文閣待制,爲同羣牧使,糾察在京刑獄兼樞密都承旨,出知延州,入權三司使。 遷龍圖閣直學士,懇辭,乞授兄肅之,曰:「臣少鞠於兄,且兄爲待制十年矣。」帝曰:「卿 察確治相州獄,多引朝士,皆望風自折服。承之爲帝言其險詖之狀,帝意始悟,趣使詰 檢正中書刑房,祭訪准浙常平、農田水利、差役事,還奏役書二十篇,加集賢校理。又祭

兄弟孝友,足厲風俗。肅之亦當遷也。」卽並命焉。

陝西都轉運使,召拜給事中、吏部侍郎、戶部尙書,復以樞密直學士知靑州。 帝聞之曰:「有司當如此矣。」進樞密直學士。坐補吏不當,降待制、知汝州。未幾,爲 商 人犯禁貨北珠,乃爲公主售,三司久不敢決。|承之曰:「朝廷法令,畏王姬乎。」亟索 歷應天府、河

陽、陳軍揚州而卒。

塞, 疆侯戒嚴。 及之言:「契丹以與夏人甥舅之故, 特此慰其心, 且姑張虛勢以疑我, 必不失 及之字公達,亦迪弟之子。由蔭登第,通判安肅軍。康定中,夏人犯邊,契丹復發兵並

誓好,願毋過虞。」已而果然。

(君)[臣 |之治其姦,流數十人,乃自劾。 朝廷嘉之,釋不問。入判刑部。 掌撰次||唐史有益治體者,爲 當奏貸其死。 封府判官、知涇晉陝三州。 .龜鑑八十卷。王堯臣上其書,幷表其學行,韓琦亦以館職薦之。召試,除直秘閣,歷開 徙通判河南府。亡卒張海倚山嘯聚,白晝掠城市。 海感動弛備,奏方上,而衆兵集,悉獲之。知信州,靈鷲山浮屠,犯法者衆,及 及之督捕,單騎與海語,諭使歸命,

及之東事精明,所居官皆稱職。 以太中大夫致仕,再轉正議大夫。卒,年八十五。

東之子孝基,及之子孝壽、孝稱。

也。」晏殊、富弼薦其材任館閣、欲一見之。孝基曰:「名器可私謁邪?」竟不往。 孝基字伯始。進士高第,唱名至墀下,仁宗顧侍臣曰:「此李迪孫邪?能世其家,可尚

中,庭已空矣。 知汝陰、雍丘縣,通判閬州、舒州,知隨州。所治雖劇,然事來亟斷,不爲證左回枉,甫 或問其術, 曰:「無他, 省事耳。」 閬中江水齧城幾沒, 郡吏多引避, 孝基率其

列傳第六

十九

李迪

下 決水歸旁谷, 以親須養,求監崇福宮,判西京國子監。凡就開十年,累官光祿卿,與父柬之同謝 城賴以全。 舒吏受賂鬻獄,以殺人罪加平民,孝基劾治三日,得其情, 迺抵

事,纔年五十,士大夫美之,以比二疏

孝基爲人沖澹,善養生,平居輕安。 弟孝稱進對,帝問起居狀,數曰:「度越常人遠矣。」

後十一年,無疾卒。

人,命孝壽攝司錄事,成其獄。 孝壽字景山,爲開封府戶曹參軍。 徽宗即位,嘉問先已得罪,孝壽亦削秩。 元符中,呂嘉問知府事,受章惇、蔡卞指,鍛鍊上書 蔡京爲政, 以爲府

推官,遷大理、太僕卿,擢顯謨閣待制,爲開封尹

州,窮治鑄錢,逮繫踰千數,方冬慘掠囚,墮指脫足不 切治理。 前此,閭里亡賴子,自斷截臂腕,託廢疾淩良民,無所憚畏。 加直學士,出知興仁、開德府。 京起蘇州章綖獄,還孝壽開封,使往 可計,死則投于垣外。 孝壽悉搜出之,部付旁郡, 日夜鍛鍊、款未 卽 訊。 至蘇

就,京猶嫌其緩,召使還。 其後,綖兄弟竟用此黥竄。 又知號、克二州。 坐守興仁日與巡檢

戲射狂人張立死,除名。 居無何,起知蘇州

政和初,拜刑部侍郎,復改開封尹。 奉宸庫吏呂壽盜金,繫獄而逃。 孝壽盡執守兵,論

爲故縱,非任事之更與不上直者,亦以不卽追掩繩之。凡配隸四十人,陰賂杖者使加重,六 七人纔出關而死。 帝聞之,命悉還餘人。於是諫議大夫毛注論其殘忍苛虐,乞加譴,不聽。

孝壽獨以獄空上表賀。

壽即追 戲取牒效孝壽花書判云:「不勘案,決杖二十。」僕明日持詣府,告其主做尹書判私用刑。 人,無一僕敢肆者,時以此稱之。 孝壽 至,備言本末,孝壽幡然曰:「所判正合我意。」如數與僕杖,而謝舉子。 雖亡狀,亦時有可觀。有舉子爲僕所凌,忿甚,具牒欲送府,同舍生勸解,久乃釋。 明年,以疾, **罷爲龍圖閣學士、提舉醴泉觀**。 時都下數千 卒,贈正奉

非朝 延所以推恩優老之意,詔特許之,遂爲著令。 孝稱字意聞,以蔭登朝。 **值郊恩得封父,及之已官通議大夫,有司限以格,孝稱言,恐** 

大夫。

囚逸 「捕得之。 崇寧中,提舉湖北、京西常平,提點京西南路刑獄。 孝稱上其功,喬年受賞,而孝稱用是得工部員外郎。 蔡京之姻宋喬年爲京畿轉運使,有 不閱月, 遷大理少卿。

連奏獄空,進爲卿,且數增秩,擢工部、戶部二侍郎,爲開封 尹

陳瓘之子正彙在杭州上書,告京不利社稷。 郡守蔡嶷執送京師,併逮 瓘詣獄。 孝稱脅

列

第六

+

九

李迪

王曾

宋

使證其子, 孝稱請班兄下,不許。 瓘不可。 暨獄上, 竟竄正彙海島。 避親嫌,徙工部。 卒,贈光祿大夫。 京愈德之,進刑部尙書, 而以其兄孝壽代爲

中,由鄉貢試禮部、廷對皆第一。楊億見其賦,歎曰:「王佐器也。」以將作監丞通判濟州。 代還,當召試學士院,宰相寇準奇之,特試政事堂,授秘書省著作郞、直史館、三司戶部判 王曾字孝先,青州益都人。少孤, 鞠於仲父宗元,從學於里人張震,善爲文辭。 咸平

清昭 已遣 官。 日:「獄,重典也,今以屈卿。」曾頓首謝。 曰:「此誠國家承平所致,然願推而弗居,異日或有災沴,則冤輿議。」及帝旣受符命,大建 帝嘗晚 應宮,下莫敢言者,曾陳五害以諫。 使,弗果易。 景德初,始通和契丹,歲遣使致書稱南朝,以契丹爲北朝。曾曰:「從其國號足矣。」業 坐承明殿,召對 遷右正言、知制誥兼史館修撰。 · 久之,旣退,使內侍諭曰:「嚮思卿甚,故不及朝服見卿,卿勿以 舊用郎中官判大理寺,帝欲重之,特命曾。 仍賜錢三十萬,因請自辟僚屬,著爲令。 時瑞應沓至,曾嘗入對,帝語及之。曾奏 遷翰林學 且謂 玉 曾

我爲慢也。」其見尊禮如此。

復有 論 失者。」帝悟,卒從會議。 帝 知 曰:「如卿言,是無復有違制者。」會曰:「天下至廣,豈人人盡曉制書,如陛下言,亦無 審刑院。 舊違制無故失,率坐徒二年,曾請須親被旨乃坐。 再遷尙書主客郞中,知審官院、通進銀臺司,勾當三班院(三), 旣而有犯者, 曾乃以失

遂以右諫議

大夫參知政事

以 **禧中,民間訛言有妖起若飛帽,夜搏人,自京師以南,** 門外,賀氏 捕之,卒無妖。 推欽若,帝始疑曾自異。 時宮觀皆以輔臣爲使。 訴禁中。 徙天雄軍,復參知政事,遷吏部侍郎兼太子賓客。 明日, 帝以語欽若,乃罷曾爲尚書禮部侍郎、判都省,出知應天府。 及欽若相,會會市賀皇后家舊第,其家未徙去,而曾令人舁土置 王欽若方挾符瑞,傅會帝意,又陰欲排異己者,曾當使會靈,因 人皆恐。 曾令夜開里門,敢倡言者即

聽斷 猶足示 氏也。」惟演以爲然,因以白后。 后 戚也,曾密語惟演曰:「太子幼,非宮中不能立。 議 軍 眞宗不豫,皇后居中預政,太子雖聽事資善堂,然事皆決於后,中外以爲憂。 太后 ·國大事。」丁謂入,去「權」字。曾曰:「皇帝沖年,太后臨朝,斯已國家否運。 臨 且增減制書有法,表則之地,先欲亂之邪?」遂不敢去。 朝儀,曾 請如東漢故事,太后坐帝右,垂簾奏事。 帝崩,曾奉命入殿廬草遺詔:「以明肅皇后輔立皇太子,權 加恩太子,則太子安;太子安,所以安劉 丁謂獨欲帝朔望見羣臣,大 仁宗立,遷禮部尙書。 稱『權』 錢惟演,

列傳

異處,而柄歸宦官, 事 則 太后 對 (輔臣決之,非大事令入內押班(B)雷允恭傳奏禁中, 禍端兆矣。」謂不聽。 既而允恭坐誅,謂亦得罪。 畫可以下。 自是兩宮 垂簾,輔臣奏 曾日: 「兩宮

事

如

曾

詩罷 第民 天 大 中 尙 聖 學 書門下平章事、集賢殿大學士、會靈 何 之。 主 間 四 議 謂 一、監修 妖言 年夏, 邪 初 敗, 爾,不足慮也。」已而果然。 時 任中正 大雨。 國史、玉清昭應宮使。 眞宗初崩,內外洶洶, 。傳言汴 ·言:「謂被先帝顧託,雖有罪,請如律議功。」曾曰:「謂以不忠得罪宗 口 決,水且大至,都人恐,欲 曾以帝初 曾 觀使。王欽若卒,曾以門下侍 陝 正色獨立, 西 轉運使置醋務,以 即位,宜 朝 東 近 廷倚以爲 奔。 師儒,卽召 帝問會 権其利,且請推其法天下,曾 重。 孫 鄓 拜 爽 ||曾日:「河 兼戶部尚書爲昭文館 中書侍 馮元 勸講崇政 郎 決奏 棄本官、 未 殿。 廟, 至, 同

利用 曾 僚 班 請 曾方 強 對 横 上 /嚴持 求 嘗怏怏不 今 進 何 重,每 者。」曾對 解 也 悅 進 ? 污語. 見, 曾日 日:「惟陛下 在 言利害事 利用傳。 利用 , 素恃恩, 抑奔競而 及利用 審而 中 坐事 ·理 ; 臣故嘗以理折之。 崇恬 多所 一静,庶 太 后 薦拔, 大怒, 幾有 曾 難 尤惡僥倖。 爲 進 今加以大惡, 之解。 易退之人矣。」 太后 帝 問 則非臣所知 日 曾 曹利 日:「比 卿 嘗 用 惡 臣

也。

太后意少釋,卒從輕議

使復 家稍 平 軍 節度使、同中書門下平章事、判河南府。 通請謁, 知天雄軍,契丹使者往還,斂車徒而後過,無敢譁者。人樂其政,爲畫像而生祠之。改天 始 一太后 曾多所裁抑,太后滋不悅。 受册,將御大安殿,曾執以爲不可, 會玉清昭應宮災,乃出知青州。 景祐元年,爲樞密使。 及長 寧節上壽, 止共張便殿。 明年,拜右僕射兼門下 。以彰德軍至節度 太后左右姻

侍郎、平章事、集賢殿大學士,封沂國公。

謹甚 州 仁宗疑以問曾曰:「卿亦有所不足邪?」時外傳知秦州王繼明納路 贈侍中,諡文正 此 耳。」曾曰:「夫執政者,恩欲歸己,怨使誰歸?」仲淹服其言。 寶元 曾 曾力薦爲相。及夷簡位曾上,任事久,多所專決,曾不能堪,論議間有異同,遂求罷。 曾與夷簡交論帝前。 進退士人,莫有知者。 元年多,大星晨墜其寢,左右驚告。 曾言亦有過者, 范仲淹嘗問曾曰:「明揚士類,宰相之任也。公之盛德,獨少 **遂**與 曾曰:「後一月當知之。」如期而薨,年六十一。 夷簡 俱罷,以左僕射、資政殿大學士判鄲 初, 夷簡,曾因及之。 呂夷簡參知政事, 帝以問 事曾

億 儉,有故人子孫京來告別,曾留之具饌,食後,合中送數軸簡紙,啓視之,皆它人書簡後裁取 同 在 曾資 一侍從,億喜 、質端厚, 眉 1談謔, 目如 凡僚 書。 友無不 在朝 延,進止皆有常處,平居寡言笑,人莫敢干以私。 狎 侮。 至 與會言, 則 曰:「余不敢以戲 也。」平 生 少與楊 自 奉甚

列

熚

第

六 十

九

Ŧ.

一〇一八六

者 也。 旣 耐 皇祐 廟 中, 詔 譯將相 仁宗爲篆其碑曰旌賢之碑, 配享,以曾爲第 曾 無子,養子日縡。 後又改其鄉日旌賢 又以弟子融之子繹爲後,尚 鄉。 大臣 賜碑 篆 自 ||會始。

書兵

部

郞

中、秘閣校理致仕,卒。

所 爲文,召試,直集賢院。 子 融字熙仲。 初以曾奏, 嘗 論次國朝以來典禮因革,爲禮閣新編上之。 爲將作監主簿。 祥符進士及第,累遷太常丞、 。以其書藏太常 同 知禮院 獻

唐餘錄六十卷以獻。 軍營半在城外,獨行 權 三司度支、鹽鐵判官。 大錢城中, 進直龍圖閣,累遷太常少卿、權判大理寺。 任布請鑄大錢,行之京城。 可乎? 」事遂寢。 權同糾祭刑獄、知河陽。 三司使程琳集官議,子融日:「今 迺取讞獄輕重可爲準者, 又集五代事,爲

類次以爲斷例

部侍郎、集賢院學士知兗州。 擊之,賊引去。 拜天章閣待制、尙書吏部郎中、知荆南。 遷右 諫議大夫、知陝州,徙河中府。 不赴,改刑部侍郎致仕。 盜張海縱掠襄、鄧,至荆門,子融閱州兵,將迎 既而勾當三班院,遷給事 英宗卽位,進兵部,卒。 中, 以尚書

自 1 詣開 本 封府訴之。 名皥,字子融。 然教飭子孫,嚴厲有家法。 元昊反,請以字爲名。 性儉嗇,街道卒除道,侵子融邸店尺寸地,至 晚學佛氏,從僧懷璉遊

今要務,眞宗異之,召試舍人院,權右正言。獻鳳扆箴,出知劍州。逾年,召試中書,加直史 張知白字用晦,滄州淸池人。幼篤學,中進士第,累遷河陽節度判官。 。咸平奏疏,言當

館,面賜五品服,判三司開拆司。

伏閤稱賀。 祥瑞。今天下無事,靈貺並至,望以泰山諸瑞圖寘玉清昭應宮,其副藏秘閣。」 「知白可謂乃心朝廷矣。」東封,進右司諫。又言:「咸平中,河湟未平,臣嘗請罷郡國所上 江南旱,與李防分路安撫。及還,權管勾京東轉運使事。 知白以爲人君當修德應天, 而星之見伏無所繫, 因陳治道之要。帝謂宰臣曰: 周伯星見,司天以瑞奏,羣臣

求領 唐李 擢 龍圖閣待制、知審官院,再遷尙書工部郞中,使契丹。 國子監。 嶠 陝西饑,命按巡之。尋知鄧州。會關右流傭至境,知白旣發倉廩,又募民出粟以濟。 議遷臺閣典藩郡,乃自請補外,不許,遂命糾察在京刑獄,固請,知靑州。還京師, 帝曰:「知白豈倦於處劇邪?」宰臣言:「知白更踐中外,未嘗爲身謀。」乃遷右 知白以朝廷制官,重內輕外,爲引

郊禮成,遷尙書工部侍郞。 列 僔 第 六 + 九 張 知 白 時同列王曾遷給事中,循班知白上,知白心不能平,累表辭 一〇一八七

諫議

大夫、權

御史中丞,拜給事中、參知政事。

書門下平章事 進讀,至修身治家之道,必反復陳之。 時王 謂怒,復徙知白亳州,遷兵部。仁宗卽位,進尙書右丞,爲樞密副使,以工部尙書同 曾 及欽若分司南京,宰相丁謂素惡欽若,徙知白南京留守,意其報怨。 亦 一欽若爲 固 請 、會靈觀使、集賢殿大學士。 列 相,知白論議多相失,因稱疾辭位,罷爲刑部侍郎、 知白下, 乃加知白金紫光祿大夫,復爲給事中、 時進士唱第,賜中庸篇,中書上其本,乃命知自 判禮儀院。 翰林侍讀學上、 旣至, 待欽若 曾 知大名 還所辭 加

令。 憂畏日侵,在中書忽感風眩,興歸第。 禮官謝絳議諡文節,御史王嘉言 知白在相位,愼名器,無毫髮私。 言於一知白守道徇公,當官不撓,可謂正矣,諡文正。」 常以盛滿爲戒,雖顯貴,其淸約如寒土。然體素羸 帝親問疾,不能語,薨。 為罷 上巳宴,贈太傅、中書

王曾曰:「文節,美諡矣。」遂不改。

舉者,以上初政,試觀朝廷耳,豈可自生釁邪 朝 第,徒行訪之,得佛寺殿基,恍然識其處。 通 廷患之。 判 孫 知白九歲,其父終邢州,殯於佛寺。 何遇,讀道旁古碑凡數千言,及還,知白 帝以問二府,衆曰:「備粟練師,以備不虞。」知白 及契丹寇河北,寺宇多頹廢,殯不可辨。 既發,其衣衾皆可驗,衆歎其誠孝。 略無所遺。 若終以爲疑, 莫如因今河決, 發兵以防河爲 天聖中,契丹大閱,聲言獵 日:「不然,契丹修好 嘗 未遠,今其 過 知白旣 陝州 幽州,

擢進士甲科,補揚州觀察推官,改秘書省著作佐郎、知平遙縣。 使者薦之,通判晉州。 杜衍字世昌,越州山陰人。父遂良,仕至尚書度支員外郎。 | 術總髮苦志厲操,尤篤于

宴,仍徙衍權知鳳翔府。及罷歸,二州民邀留境上,曰:「何奪我賢太守也?」以太常博士提

陳堯容安撫陝西,有詔藩府乃賜宴,堯咨至乾州,以衍賢,特賜

韶舉良吏,擢知乾州。

司奏衍辨獄法當賞,遷刑部。章獻太后遣使安撫淮南,使還,未及他語,問杜衍安否,使者 罪,不以實,衍覆正之。守將不伏,訴之,詔爲置獄,果不當死。徙京西路,又徙知揚州。 石州,人告繼昇連蕃族謀變,逮捕繫治,久不決,衍辯其誣,抵告者罪。寧化軍守將鞫人死 點河東路刑獄,遷尙書祠部員外郎。按行潞州,折寃獄,知州王曙爲作辨獄記。高繼昇知

外,以右諫議大夫知天雄軍。 會河北乏軍費,選爲都轉運使,遷工部郎中,不增賦于民而用足。還,爲樞密直學士。求補 徙河東轉運副使、陝西轉運使。召爲三司戶部副使,擢天章閣待制、知江陵府。未行,

以治狀對。太后數曰:「吾知之久矣。」

列

踴,以 有宜。 貴賤,官以法平之,則農有餘利矣。 母錢,願出官帑助之。 召見,賜坐便殿,以極獻替可否,其他,不必親煩陛下也。」又議常平法曰:「歲有豐凶,穀有 「中書、樞密,古之三事大臣,所謂坐而論道者也。 始, 圖 公糴未充,則禁爭糴以規利者;糴畢而儲之,則祭其以供軍爲名而假借者。 厚利,而困吾民也。 **衍爲治謹密,不以威刑督吏,** 否則勸課之官,家至日見,亦奚益於事哉。」 請量州郡遠近,戶口衆寡,嚴賞罰,課責官吏, 今豪商大賈, 然吏民亦憚其淸整。 乘時賤收,水旱,則稽伏而不出,冀其翔 止隻日對前殿,何以盡天下之事?宜迭 仁宗特召爲御史中丞。 出納 無壅, 州郡闕 奏言: 增損

所瘞屍,丼得賊殺他婦人屍二,瑧人大驚。 制 各坐曹聽行文書,銓事悉自予奪,由是東不能爲姦利。 敕 吏函 如 知,到经時。 兼 銓法,問日:「盡乎? 判吏部流內銓。 遷尙書工部侍郎、知永興軍。 選補科格繁長,主判不能悉閱,更多受財,出縮爲姦。 」曰:「盡矣。」力閱視,具得本末曲折。 徙幷州。 民有畫亡其婦者,爲設方略捕,立得殺 元昊反,以太原要衝, 數月, 聲動京師。 明日 改 令諸吏無得升堂, 加龍 知審官院 術旣視事, 即 圖 閣 人財,發 學士。 了其裁

畫、量道里 近聞衍名,莫敢干以私。 寶元二年, 」遠近,寬其期會,使民得次第輸官,比他州費, 遷刑部侍郎、 拜同知樞密院事,改樞密副使。 復知永興軍。 時方用兵,民苦調發,東因緣爲姦。 省錢過半。 夏竦上攻守策, 召還,權知開 宰相欲用出師。 衍 封 品 府,權 虚計

郎、樞 衍 曰:「僥倖成功,非萬全計。」爭議久之,求罷不許,賜手詔敦勉。 語使。每內降恩,率寢格不行,積詔旨至十數,輒納 帝前。 諫官歐陽脩入對,帝曰:「外 爲河東宣撫使,拜吏部侍

知杜衍封還內降邪?凡有求於朕,每以衙不可告之而止者,多於所封還也。

勢必 歸,其謀身若此,尙足與謀國乎 契丹壻劉三嘏避罪來歸,輔臣議厚館之,以詰契丹陰事。 一兼樞 衍日:「中國主忠信,若自違誓約,納叛亡,則不直在我。 不來,我兵不可妄出。」仲淹爭議帝前, 詆衙, 契丹與元昊戰黃河外, 密使 參知政事范仲淹宣撫 ! 納之何益,不如還之。」乃還三嘏。 河東, 語甚切。 欲以兵自從。 諫官歐陽脩亦請留三嘏, 仲淹嘗父行事衙,衙不以爲恨。 且三嘏爲契丹近親,而逋逃 拜同平章事、集賢殿大 術日:「二國方交門, 帝以問 來

監進 淹、弼政事,衍獨左右之,然衍平日議論,實非朋比也。 | **酬欲更理天下事,與用事者不合,仲淹、關旣出宣撫,** 史皆劾奏之, 一奏院,循前例,祠神以伎樂娛賓。 衍 好 術以浦方奉使契丹,寢浦奏,度深銜之。 .薦引賢士,而沮止僥倖,小人多不悅。 欲因以危衍。 諫官孫甫言:「丁度因對求大用,請屬吏。」度知甫所奏誤,力求 集賢校理王益柔爲衍所知,或言益柔嘗戲作傲歌, 及衍罷,度草制指衍爲朋比。 其壻蘇舜欽, 少年能文章, 言者附會,益攻二人之短。 以尚書左丞出知兗州。 論議稍侵權贵, 時范仲淹、富 慶曆七年, 帝欲罷仲 御

列

傳

第

六 十

九

杜 衍

(所甫七十,上表請還印綬,乃以太子少師致仕。

府,有詔撫問,封祁國公。 之,稱疾固辭。 也。 衍 爲宰相,賈昌朝不喜,議者謂故相一上章得請,以三少致仕,皆非故事,蓋昌朝抑之 元年, 進太子太傅, 賜其子同進士出身, 又進太子太師。 特遷太子太保,召陪祀明堂,仍詔應天府敦遣就道,都亭驛設帳具几杖待 知制誥王洙謁告歸應天

中,諡 詩、正 十 許 安而 忽邊防,無以旣富而輕財用,宜早建儲副,以安人心。」語不及私。 人,烏帽、皂綈袍、革帶。 衍清介不 書、行、草皆有法。病革,帝遣中使賜藥,挾太醫往視,不及。卒,年八十。 E 獻。 戒其子努力忠孝,斂以一枕一席,小壙庳冢以葬。 殖私產,既退,寓南都凡十年,第室卑陋,才數十楹,居之裕如也。 或勸衍爲居士服,衍曰:「老而謝事,尚可竊高士名邪! 自作遺疏,其略曰:「無以久 贈司徒兼侍 出入從者 一善爲

臨朝 日就,章獻亦全令名,古人所謂社稷臣,於斯見之。 論 頗 挾 其才,將有 李迪、王曾、張知白、杜衍,皆賢相也。 專制之患。迪、曾正色危言, 四 能使宦官近習, 知白、衍勁正清約,皆能斬惜名器,裁抑 人風烈, 往往相似。 不敢窺覦; 方仁宗初立,章獻 而仁宗 君德

哉!

#### 校勘記

(二 柬之 原作「東之」,據東都事略卷五一本傳、王安石王文公文集卷一〇刑部侍郎充集賢院學士

李柬之改兵部侍郎加食邑食質封制、王珪華陽集卷三四送太子少保致仕李柬之歸西京詩序改。

下文同。

3 拜太子少保致仕 「少保」原作「太保」, 據同上東都事略、華陽集同卷同篇改。

勾當三班院 「勾當」原作「勾院」。 按宋官制三班院的主管稱勾當官,據長編卷八〇、宋祁景文

集卷八五王曾墓誌銘改。

至 彰德軍 入內押班 原作「彰信軍」,據琬琰集中編卷四四王曾行狀、東都事略卷五一本傳改。 「押班」原作「押排」,據本書卷六八雷允恭傅、長編卷八七改。

御史王嘉言 「言」字原脫、與長編卷一〇六所載不合。 按本書卷二九三王禹偁傳,王嘉言爲禹

**仰子**,官殿中侍御史。據補。

列傳第

火

+

た

校

勘

記

# 宋史卷三百一十一

### 列傳第七十

晏殊 龐籍 孫恭孫 王隨 章得象 呂夷簡 子公綽 公死 公孺

#### 張士遜

殊與進士千餘人並試廷中, 殊神氣不懾, 其所與遊處者,每稱許之。 此賦,請試他題。」帝愛其不欺,旣成,數稱善。擢秘書省正字,祕閣讀書。命直史館陳彭年祭 日:「殊江外人。」帝顧曰:「張九齡非江外人邪?」後二日,復試詩、賦、論,殊奏:「臣嘗私 晏殊字同叔,撫州臨川人。 七歲能屬文、景德初、張知白安撫江南,以神童薦之。 援筆立成。 帝嘉賞,賜同進士出身。 宰相寇準 帝召 習

奪服起之,從祀太淸宮。 明年,召試中書,遷太常寺奉禮郎。 韶修寶訓,同判太常禮院。 東封恩,遷光祿寺丞,爲集賢校理。 喪母, 求終服, 不許。 再遷太常寺丞, 喪父,歸臨川

列

傳第

七 十

晏

殊

擢 判集賢院。 左. Œ 一言、直史館,爲昇王府記室參軍。 久之,爲翰林學士,**遷**左庶子。 歲中,遷尙書戶部員外郎,爲太子舍人,尋 帝每訪殊以事,率用方寸小紙細書,已答奏,輒 知制

幷稿

封上,帝重其愼密

使。 侍 敢 讀 決其議者。 學士, 上 一疏論 即位,章獻明肅太后奉遺詔權聽政。 太后謂東宮舊臣,恩不 張耆不可爲樞密使,忤太后旨。 殊建言:「羣臣奏事太后者,垂 稱, 加給 事 簾 坐從幸玉清昭應宮從者持笏後至 中。 聽之,皆毋得見。」議遂定。 宰相丁謂、樞密使曹利用,各欲獨見奏事 預修眞宗實錄。 進禮部侍郎 遷右諫 , 殊怒,以笏 拜 議 大夫 樞 密 丁,無 兼 副

太后崩,以禮部尚書罷知亳州,徙陳州,遷刑部尚書,以本官兼御史中丞,復爲三司 史中丞,改資 拜,改參知政 數月,改應天府,延范仲淹以教生徒。 政殿學士、兼翰林侍讀學士,兵部侍郎、 (事,加尙書左丞。 太后謁太廟,有請服衮冕者,太后以問,殊以周官 自五代以來,天下學校廢,興學自殊始。 兼祕書監,爲三司使, 復爲. 樞 后服對。 密 召拜御 副 使,

撞之折齒,御

史彈奏,罷知宣州

以 知 備 樞密院事,遂爲樞密使。進同中書門下平章事。 戦鬥。 陝西方用兵,殊請罷內臣監兵,不以陣圖授諸將,使得應敵爲攻守; 又請出宮中長物助邊費,凡他司之領財利者,悉罷還度支。悉爲施行。 慶曆中,拜集賢殿學士、同平章事,兼樞 及募弓箭 手 康定初, 教之,

密使。

謂非殊 尚書、 知願 權倖皆不便。殊出歐陽脩爲河北都轉運,諫官奏留,不許。 天下主,而殊嘗被詔誌宸妃墓, 淹 與韓琦、富弼皆進用,至於臺閣,多一時之賢。 殊平居好賢,當世知名之士,如范仲淹、孔道輔皆出其門。 罪 州 然殊以章獻太后方臨朝,故誌不敢斥言;而所役兵,乃輔臣例宣借者,時以 沒而不言。」又奏論殊役官兵治僦舍以規利。坐是,降工部 帝亦奮然有意,欲因羣材以更治,而小人 孫甫、蔡襄上言:「宸妃生聖躬爲 及爲相, 益務進賢材,而仲

首日「舊學之碑」。 下憂也。」已而薨。 居,儀從如宰相。 徙 河南府, 徙陳州,又徙許州,稍復禮部、刑部尚書。 遷兵部。 踰年,病寖劇,乘輿將往視之。 殊卽馳奏曰:「臣老疾,行愈矣,不足爲陛 帝雖臨奠,以不視疾爲恨,特罷朝二日,贈司空兼侍中,諡元獻,篆其碑 以疾,請歸京師訪醫藥。 旣平,復求出守,特留侍經筵,詔五 祀明堂,遷戶部,以觀文殿大學士知永興軍, 日一與起

爲 開雅有情思, 柏 殊性 兼 樞密使,而弼爲副使,辭所兼, 剛簡, 奉養清儉。 晚 歲 篤學不倦。 累典州,吏民頗畏其悁急。 文集二百四十卷,及删次梁、 韶不許,其信遇如此。 善知人,富勋、 文章贍麗,應 陳以後名臣述作, 楊察,皆其壻也。 用 不窮,尤工 為集選

列

第

七

+

晏

殊

龐

一〇一九八

一百卷。

子知止,爲朝請大夫。

魔籍字醇之, 單州成武 [1]人。及進士第, 為黃州司理參軍, 知州夏竦以爲有宰相器。

調開封府兵曹參軍,知府薛奎薦爲法曹。 遷大理寺丞、知襄邑縣。

備也。 降,寖多於舊,無以防偏請、杜倖門矣。往者,王世融以公主子毆府吏,法當贖金,特停任。 昔,臣竊惑焉。 近作坊物料庫行立主更盜官物,輒自逃避。以宮掖之親,三司遽罷追究。今日聖斷乃異於 樞密掌機命,反覆乃如此。平時,百官奏事上前,不自批章,止送中書、樞密院。近歲璽書內 預修天聖編敕,爲刑部詳覆官。 樞密院以帶甲馬借內侍楊懷敏,羣牧覆奏,乃賜一馬,三日,迺復借之,數日而復罷。 祥符令檢下稍嚴,胥吏相率空縣而去,令坐罷免。若是,則淸彊者沮矣。」 擢羣牧判官,因轉對言:「舊制不以國馬假臣下,重武

毋令出於執政。」孔道輔謂人曰:「言事官多觀望宰相意,獨龐醇之,天子御史也。」爲開封府 取垂簾儀制盡燔之。 又奏:「陛下躬親萬幾,用人宜辨邪正、防朋黨, 擢進近列, 願採公論, 久之,出知秀州。召爲殿中侍御史,章獻太后遺誥:章惠太后議軍國事;籍請下閤門,

內侍。」 西體 判官, 川,土沃衍。 鄙,將士力戰,弗獲功賞;而內官、醫官、樂官,無功勞,享豐賜,天下指目,謂之『三官』。願 實。 係。」又建言:「頻歲災異,天久不雨。 降太常博士、知臨 殆盡,籍至,稍葺治之。 戍兵十萬無壁壘,皆散處城中,畏籍,莫敢犯法。 察使,力辭,換左諫議大夫。自元昊陷金明、承平、塞門、安遠、栲栳砦,破五龍川,邊民焚掠 |彥博鞫||黃德和獄,未上,詔籍同案。 禁事不得實,以祠部員外郞罷爲廣南東路轉運使。 少裁損,無厚賚予,專勵戰功,寇不足平也。」 量安撫使。 臣竊謂凡乘輿所費,宮中所用,宜務加裁抑,取則先帝,修德弭災之道也。 景祐三年,爲侍御史,改刑部員外郎、知雜事,判大理寺,進天章閣待制。 進龍圖閣直學士、知延州,俄銀廊延都總管、 詔有 尚美人遣內侍稱教旨冤工人市租。 司:「自今宮中傳命,毋得輒受。」數劾范諷罪, 川尾曰橋子谷,寇出入之隘道。 坐令開封府吏馮士元市女口,降知汝州。徙同州,就除陝西都 江軍。 尋復官,徙福建轉運使。 宮中費用奢靡,出納不嚴,須索煩多,有司 籍言曰:「德和退怯當誅。 籍言:「祖宗以來,未有美人稱教旨下府者,當杖 使部將狄青將萬餘人,築招安砦于谷旁,數募 經略安撫緣邊招討使。 又言范諷事有不盡如奏,諷坐貶,籍亦 劉平力戰而沒,宜加恤其子 金明西北有渾州 明年, 元昊反,爲陝 無從鈎校虛 轉運使。 改延州觀 今宿兵西

列傳第

ti

名也,於義無嫌。」朝廷從之。 公,非陪臣所得稱,使旺榮當之,則元昊不得臣矣。 來送款,籍曰:「此詐也。」乃屯兵青澗城。 名、平戎道,通永和、烏仁關,更東西陣法爲方陣,頗損益兵械。元昊遣李文貴齎野利旺榮書 民 而元昊又以旺榮書來,會帝厭兵,因招懷之,遣籍報書,使呼旺榮爲太尉。籍曰:「太尉三 入耕種, 收粟以瞻軍。 周美襲取承平砦, 王信築龍安砦, 悉復所亡地, 築十一城。 後數月,果大寇定川,籍召文貴開諭之,遣去。 今其書自稱『寧令』或『謨寧令』,皆其官 及開 旣

臣。 使者申諭之。」朝廷采用其策。 者 闕 籍 會敵新 下,因陳便宜,言:「羌久不通 不敢 (聞,從勖曰:「子事父,猶 破涇原城砦,方議修復。使者往返,踰年,又遣賀從勖來,改名日曩霄,稱男不稱 和 市,國 臣事 君 人愁怨。 也。 若得至京師,天子不許,更歸議之。」籍送 今辭理寖順,必有改事中國之心,請遣 使

書門下 兵就 食內地。」從之, 元昊 平 (既臣 章事、昭文館大學士、監修國史。 召籍 於是頗省邊費。 爲樞密副 使。 籍言:「自陝西用兵,公私俱困,請倂省官屬, 改參 知 籍初入相, 政事 , 拜 且獨員,而遽爲昭文館大學士,出 工 一部侍 郎、 樞密使, 遷戶 部, 退近 拜 塞之 同

儂 [智高反,師數不利,遣狄青爲宣撫使。 諫官韓絳謂武人不宜專任,帝以問籍。 籍日: 拜也。

室,帝喜曰:「青破賊,卿之力也。」遂欲以青爲樞密使、同平章事,籍力爭之,不聽。 《青起行伍,若以文臣副之,則號令不專,不如不遣。」詔嶺南諸軍,皆受青節度。 旣而捷書 嶺南平,

二廣舉人推恩者六百九十一人,論者以爲過。

陰諷 |德軍節度使、知永興軍,改拝州。 爲淵白籍,迺與堂吏共受淵賂。 府杖殺淸貺以滅口,覆之無狀。 頃之,齊州學究皇甫淵以捕賊功,法當賞錢,數上書求用。 小吏訴之,下開封府,捕清貺,刺配遠州,道死。 言不已,乃罷知鄆州。 居數月,加觀文殿大學士。拜昭 道士趙清貺與籍姊家親,紿 韓絳言籍

州,召還京師,上章告老,尋以太子太保致仕,封潁國公。 朝、臨奠皆不果,第遣使弔賻其家。 州將武戡等爲夏人所敗,復爲觀文殿大學士、戶部侍郎、知靑州。 仁宗不豫,籍嘗密疏,請擇宗室之賢者爲皇子,其言甚切。 贈司空,加侍中,諡莊敏。 薨,年七十六。 時仁宗不豫,廢 坐擅聽麟州築堡白草平,而 遷尙書左丞,不拜。 徙定

治民頗有惠愛,及爲相,聲望減於治郡時。 籍曉律令,長於吏事。 持法深峭,軍中有犯,或斷斬刳磔,或累笞至死,以故士卒畏服。 子元英,朝散大夫。孫恭孫。

恭孫字德孺,以蔭,補通判施州。 列 傳 第 占 十 龐 籍 王 隨 崇寧中, 部蠻向文彊叛, 詔轉運使王蘧領州事致討, 10101

恭孫 軍 駱 使,賜第京師 恭孫直學 思、費等州 年,所得州縣,多張名簿,實瘠鹵 節 世 菲 度 說降文彊 一副使。 納 士 相 一,費 ,更名保州 知成都府,委以招納。 繼 才踰 而 降。 不貲。 斬之。 月,起 每開 轉運判官朱師古刻恭孫 遽 、減州、霸州 知 上其功,進三秩,知涪州,遂以開邊爲已任。 城, 陳州,復待制 輒褒遷,五 不 毛地,繕治轉餉,爲蜀 亨州,使恭孫進築之。 未幾,其質董舜咨、 ',帥瀘州。 年間 生事 ,至徽猷閣待制 7;韶 又以樂思州,進 董彦博來 黜 人病,無 言者論 詗 古而以恭孫代,於是溱、播、溪、 幾時皆廢。 納土,詔追赴闕,皆拜承 威州守乞追保、霸二州、進 其貪縱, 究治 學 上。 誘珍州駱文貴、 前 宣. 後 如章,謫 和中,卒。 在 西 南二十 承州 保

三司磨勘 王 隨字子正,河南人。 司 登進士甲科, 爲將作監丞、 通判 同州 遷祕書省著作郎、直

兼 部 眞 侍御史知雜事。 宗 出 庫錢,貸民市種糧 因賜詩寵行,以羊酒東帛令過家爲壽。 爲京 西 轉運 副使,陛辭,且言曰:「臣父母家洛中,乃在所部, 擢知制誥,以不善制辭, 一,歲中約輸絹以償, 流庸多復業。 出知應天府。 遷淮南 轉 運 使, 徙 父 河 日, 憂, 東 帝謂宰相曰:「隨治南京太 轉 得奉湯藥, 起復。 運 使, 時 蒇 遷 聖主之澤 比饑,隨 刑 部 員 也。 外 敕 屬 郞

寬。」王旦曰:「南京,都會之地,隨臨事汗漫,無以彈壓。」改知揚州。 再加右諫議大夫、權知

開封府。

州人憙,遣子弟就學。 誥,改給事中、知杭州。 **倉米,計口日給一升,隨置不聽,曰:「民所以饑者,由棄幷閉糴,以邀高價也。」乃大出官粟,** 仁宗爲太子,拜右庶子,仍領府事。 母喪,起復光祿卿、知潤州,徙江寧府。 乾興初,復降祕書少監,徙通州。 周懷政誅,隨自陳嘗假懷政白金五十兩,奪知制 以州少學者,徙孔子廟,起學舍, 歲大饑,轉運使移府發常平

尙書禮部侍郎、翰林侍讀學士。 請增蕃落卒,給廢陷馬地,募民耕種。 意,復執出求賞,前此坐法多死。 復給事中,爲龍圖閣直學士、知秦州。 隨下教能自歸者冤死,聽復隸軍籍,由是多來歸者。 坐事, 徙河南府。 入爲御史中丞, 同知禮部貢舉, 遷 秦卒有負罪逃入蕃部者,戎人輒奴畜之,小不如 又建

議者謂非輔弼之職,其事遂寢。 下侍郞者,學士丁度之失也。 下侍郎、同中書門下平章事、昭文館大學士、監修國史。 <u>明道中,爲江淮安撫使,還拜戶部侍郎、參知政事,請與同列日獻前代名臣規諫</u> 加吏部侍郎、知樞密院事,爲莊惠皇太后園陵監護使,拜門 自薛居正後,故事,初相無越遷門

中立同執政、數爭事。 頃之,以疾在告,詔五日一朝,入中書視事。爲相一年,無所建明。與陳薨佐、韓億、石 會災異屢發,諫官韓琦言之,四人俱罷。 隨以彰信軍節度使、同中書

隨 外若方嚴,而治失於寬。 晚 更 卞 急, 輒 嫚 駡 人。 性喜佛,慕裴休之爲人,然風跡弗

薨,贈中書令,諡章惠,後改文惠。

逮也。

門下平章事判河陽。

Щ, 士及第,爲大理評事、知玉山縣,遷本寺丞。 遇神人授以玉象(三),及生,父奐復夢家庭積笏如山。 章得象字希言,世居泉州。 高祖仔鈞,事閩爲建州刺史,遂家浦城。 長而好學,美姿表,爲人莊重。進 得象母方娠,夢登

博李宗諤家,一夕負錢三十萬,而酣寢自如。 爲有公輔器,薦之。或問之,億日:「閩士輕狹,而章公深厚有容,此其貴也。」得象嘗與億戲 <u>阗宗將東封泰山,以殿中丞簽書兗州觀察判官事,知台州,歷南雄州,徙洪州。</u> 他日博勝,得宗諤金一奩; 數日博又負,卽反 楊億以

未幾,召試,爲直史館、安撫京東,權三司度支判官,累遷尙書刑部與中,使契丹,遂以

賢殿 圖 兵 閣 部 大學士。 學 郎中知制誥。 士,進承旨兼侍講學士,擢 帝謂得象曰:「向者太后臨朝、羣臣邪正,朕皆默識之。 踰年,爲翰林學士,遷右諫議大夫,以給事中爲羣牧使,遷禮部侍郎兼龍 同知樞密院事,遷戶 部侍郎, **遂拜同中書門下平章事** 卿清忠無所附, 月未 集

嘗有所干請,今日用卿,職此也。」

故事,致仕官乘輿不臨奠,帝特往焉。 大學士。 陝西 得象在翰林十二年,章獻太后臨朝,宦官方熾,太后每遣內侍至學士院,得象必正 [用兵,加中書侍郞兼工部尙書兼樞密使,辭所加官。 慶曆五年,拜鎭安軍節度使、 贈太尉兼侍中,諡文憲。 同平章事 ,,封郇國公,徙判河南府,守司空致仕,薨。 明年,以工部尚書爲昭文館 皇祐中,改諡 文簡

既而章十上請罷,帝不得已,許之。 范仲淹、富弼,使同得象經畫當世急務,得象無所建明,御史孫抗數言之,得象居位自若。 之,或不交一言。 。在中書凡八年,宗黨親戚,一切抑而不進。 初,閩人謠曰:「南臺江合出宰相。」至得象相時,沙湧可 仁宗銳意天下 事, 進用韓琦

涉云。

論曰:殊、籍、隨、得象皆起孤生,致位宰相。 列 傳 第 -6 + 章 得 象 ب 1 展 簡 籍通曉法令,隨練習民事,皆能用其所長。 一〇二〇五

方之諸人,殊其最優乎

然籍終至絀免,隨數遭譴斥,何其才之難得也。 得象渾厚有容, 殊喜薦拔人物,樂善不倦,

禪告成,何闕政之求,罷之。 州 軍事推官,稍遷大理寺丞。祥符中,試材證兼茂明於體用科,或言六科所以求闕政,今封 呂夷簡字坦夫,先世萊州人。祖龜祥知壽州,子孫遂爲壽州人。 通判通州,徙濠州,再遷太常博士。 夷簡進士及第, 補絳

提點 通,以卒番送。」」眞宗曰:「觀卿奏,有爲國愛民之心矣。」擢刑部員外郎兼侍御史知雜事 至有死者,誣以亡命,收繫妻子。 兩浙刑獄,遷尙書祠部員外郎。時京師大建宮觀,伐材木于南方。有司責期台, 河北水,選知濱州。 代還奏:「農器有算,非所以勸力本也。」遂詔天下農器皆勿算。 夷簡請緩其役,從之。又言:「盛多挽運艱苦,須河流漸 工徒

日:「準治下急,是欲中傷準爾,宜勿問,益徙之遠方。」從之。趙安仁爲御史中丞,夷簡以親 天意;及奏彈李溥專利罔上。寇準判永興,黥有罪者徙湖南,道由京師,上準變事。夷簡 「是可欺朝廷邪?」卒以實奏,忤大臣意。 歲蝗旱,夷簡請責躬修政,嚴飭輔相,思所以共順 蜀賊李順叛,執送闕下,左右稱賀。 旣而屬御史臺按之,非是,賀者趣具順獄,夷簡日:

嫌,改起居舍人、同勾當通進司兼銀臺封駮事。 使契丹,還,知制誥。兩川饑,爲安撫使,進

龍 圖 閣直學士,再遷刑部郞中、權知開封府。 治嚴辦有聲,帝證姓名于屛風,將大用之。

神主。 宮災,太后泣謂大臣曰:「先帝尊道奉天而爲此,今何以稱遺旨哉。」夷簡意其將復營構也, 書禮部侍郎、修國史,進戶部,拜同中書門下平章事、集賢殿大學士、景靈宮使。 所以報先帝者,宜莫若此也。」故事,郊祠畢,輔臣遷官,夷簡與同列皆辭之,後爲例。 中參知政事,因請以祥符天書內之方中。眞宗祔廟,太后欲具平生服玩如宮中,以銀罩覆 史,史成,辭進官。 乃推洪範災異以諫,太后默然。 仁宗卽位,進右諫議大夫。 夷簡言:「此未足以報先帝。今天下之政在兩宮,惟太后遠姦邪,獎忠直,輔成聖德, 雷允恭擅徙永定陵地,夷簡與魯宗道驗治,允恭誅,以給事 因奏罷二府兼宮觀使。 進吏部,拜昭文館大學士、監修國 玉清昭應 遷尙

也? 宮嬪亡者。」 」夷簡 天聖末,加中書侍郎。 曰:「太后他日不欲 |太后矍然曰:「宰相亦預宮中事邪?」引帝偕起。 ,備儀仗葬之。 章懿太后爲順容,薨,宮中未治喪,夷簡朝奏事,因曰:「聞有 ·全劉氏乎?」太后意稍解。 有司希太后旨,言歲月葬未利。 有頃獨出,曰:「卿何間我母子

大內火,百官晨朝,而宮門不開。 列 傳 第 七 + 呂 夷 簡 輔臣請對,帝御拱辰門,百官拜樓下,夷簡獨不拜。帝 〇二〇七

夷簡請發哀

成服

成,進尙書有

僕

射

兼門下侍

鄓

乃兼

吏部:

尙

書。

1010八

使人問其故, 曰:「宮庭有變,羣臣願一望淸光。」帝舉簾見之, 乃拜。 韶以爲修大內使。 內

正朝 親 非 綱,塞邪徑,禁貨賂,辨佞壬,絕女謁,疎近習,罷力役,節冗費。 儒學之臣、恐無 荆王子養禁中,旣長, 益 聖德。」 一卽日 夷簡請出 命還邸中。 艺。 太后 太后崩,帝始親 一欲留使從帝誦讀, 政事 , 夷簡 其勸帝語甚 夷簡曰:「上富春秋,所 手疏 陳 切 八 事

不 知閻文應,因使爲 下平章事、判陳州。 附太后邪?但多機巧、善應變耳。」由是夷簡亦罷爲武勝軍節度使、 帝 始與夷簡謀,以張耆、夏竦皆太后所任用者也,悉罷之,退告郭皇后。 中酮,久之,乃知事由皇后也。 及宣制,夷簡方押班,聞唱名,大駭,不知其故。 歲中而夷簡復相 而夷簡素厚內侍副都 檢校太傅、 后日:「夷簡 同 中書 獨 門

疏外故敢言,大臣或及此,則太后必疑風旨自陛下,使子母不相安矣。」帝以夷簡爲忠。 疏 自言,帝擢渙右正言,顧謂夷簡:「向者樞密院亟欲投渙,賴卿以免。」夷簡謝,因曰:「渙由 初 劉渙上疏請太后還政,太后怒,使投嶺外,屬太后疾革,夷簡請留之。 至是, 渙以前

將 后 郭 后 仁宗 先敕有司,無得受臺諫章奏。 以怒尚美人,批其頰,誤傷帝頸。 ·
疑之,夷簡曰:「光武,漢之明主也,郭后 於是御史中丞孔道輔、右司諫范仲淹率臺諫詣閣門 帝以爪痕示執政大臣,夷簡以前 止以怨懟坐廢,況傷陛下頸乎?」夷簡 罷相故, 遂主廢

請對,有旨令臺諫詣中書,夷簡乃貶出道輔等,后遂廢。 宗室子益衆,爲置大宗正糾率,增

教授員。加右僕射,封申國公。

年,進位司空,辭不拜,徙許國公。 人皆智。 王曾與夷簡數爭事,不平,曾斥夷簡納路市恩。 **夷簡以鎭安軍節度使、同平章事判許州,徙天雄軍。** 時方飭兵備,以判樞密院事,而諫官田況言總判名太重, 夷簡乞置對,帝問曾,曾語屈,於是二 未幾,以右僕射復入相,逾

改兼樞密使。

示威,景德之役,非乘輿濟河,則契丹未易服也。 「此虛聲爾,不若修洛陽。」夷簡曰:「此子囊城郢計也。 契丹聚兵幽薊,聲言將入寇,議者請城洛陽。 夷簡謂:「契丹畏壯侮怯,遽城洛陽,亡以 宜建都大名,示將親征以伐其謀。」或曰:: 使契丹得渡河,雖高城深池,何可恃

耶?」乃建北京。

中書、樞密同議。 門,命內侍取兀子興以前。夷簡引避久之,詔給扶毋拜。乃授司徒、監修國史,軍國 力辭,復降手詔曰:「古謂髭可療疾,今翦以賜卿。」三年春,帝御延和殿召見,敕乘馬 如 夷簡者!」贈太師、中書令,諡文靖。 未幾,感風眩,詔拜司空、平章軍國重事。 固請老,以太尉致仕,朝朔望。 疾稍間,命數日一至中書,裁決可否。 既薨,帝見羣臣,涕下,曰:「安得憂國忘身 大事與 至殿 夷簡

爲狂肆,斥于外。時論以此少之。 諫,而夷簡謂伏閤非太平事,且逐道輔。其後范仲淹屢言事,獻百官圖論遷除之敝,夷簡指 夏,二邊以寧。然建募萬勝軍,雜市井小人,浮脆不任戰鬥。用宗室補環衞官,驟增奉賜, 又加遺契丹歲繒金二十萬,當時不深計之,其後費大而不可止。郭后廢,孔道輔等伏閤進 兵,師出數敗,契丹乘之,遣使求關南地。頗賴夷簡計畫, 自仁宗初立,太后臨朝十餘年,天下晏然,夷簡之力爲多。其後元昊反,四方久不用 選一時名臣報使契丹、經略西

賜之。有集二十卷。 於天下事,屈伸舒卷,動有操術。後配食仁宗廟,爲世名相。始,王旦奇夷簡,謂王曾曰: 「君其善交之。」卒與曾並相。後曾家請御篆墓碑,帝因慘然思夷簡,書「懷忠之碑」四字以 夷簡當國柄最久,雖數爲言者所詆,帝眷倚不衰。然所斥士,旋復收用,亦不終廢。其

子公綽、公弼、公著、公孺。公著自有傳。

校理,遷太子中允。夷簡罷相,復爲直集賢院、同管勾國子監,出知鄭州。 老曰:「官籍民產,第賦役重輕,至不敢多畜牛,田疇久蕪穢。」公綽爲奏之,自是牛不入籍。 公綽字仲裕,蔭補將作監丞、知陳留縣。 天聖中,爲館閣對讀。召試,直集賢院,辭,改 嘗問民疾苦,父

還判吏部南曹,累遷太常博士、同判太常寺。請復太醫局,及請設令、丞、府史如天官醫

師。 鈞容值假太常旌纛、羽籥,爲優人戲,公綽執不可,遂罷之。

時夷簡雖謝事,猶領國史,公綽辭修撰。 言:「京師衞兵百萬,不痛懲之,則衆心搖。」遂斬慶以徇。 糾察在京刑獄。虎翼卒劉慶告變,下吏案驗,乃慶始謀,衆不從,慶反誣衆以邀賞。 夷簡薨,還兵部員外郎,復爲修撰。 遷尙書工部員外郎,爲史館修撰。 服除,復同判

太常寺兼提舉修祭器。

月,因天地之潔氣。」又言:「祖宗配郊,當正位,今側鄉之,非所以示尊嚴也。」初,謚諸后,皆 陽之氣。今有司徒設尊罍,而酌用一尊,非禮神之意。宜按潤禮實齊酒,取火於日,取水於 也,願更爲『章』。」多施行之。 繫祖宗諡,而眞宗五后獨曰「莊」。公綽曰:「婦人從夫之諡,眞宗諡章聖,而后曰『莊』,非禮 時陳敗。公綽採仍令諸書,以四時新物及所常薦者,配合爲圖。又以歲大、中、小祠凡六十 天地、宗廟、日月、五方、百神之祀,咸有尊罍,五齊三酒,分實其中,加明水、明酒,以逹陰 一,禘祫二,裸獻興俯,玉帛尊彝,善茆醯醢,鍾石歌奏,集爲郊祀總儀上之。又言:「古者, 公綽以郊廟祭器未完,制度多違禮,請悉更造。故事,薦新諸物,禮官議定迺薦,或後

歷知制誥、龍圖閣直學士、集賢殿修撰、知永興軍,改樞密直學士、知秦州。 安遠砦、古

列傳第七

呂夷簡

渭州諸羌來獻地, 祀明堂,遷刑部郎中,召爲龍圖閣學士、權知開封府。 馬多闕,公綽諭諸砦戶爲三等,凡十丁爲社,至秋成,募出金帛市馬, 公綽顧其屬曰:「天下之大,豈利區落尺寸地以爲廣邪?」卻之。 歲餘,願罷府事,進翰林侍讀學上、知 馬少, 則先後給之。 弓箭手

審刑院銀判太常寺。

決,卽有寃者,故多旱。」帝親慮囚,已而大雨。 **|綽亦自辨,復侍讀學士,徙河陽,留侍經筵。** 籍旨,杖殺淸貺以滅 初,公綽在開封府,宰相龐籍外屬道士趙淸貺受賂,杖脊道死。 口,左遷龍圖閣學士、知徐州。方杖淸貺時,實非公綽所臨。頃之,公 時久不雨,帝顧問:「何以致雨?」曰:「獄久不 遷右司郎中,未拜,卒。 至是,御史以爲公綽受 贈左諫議大夫。

公綽通敏有才,父執政時,多涉干請,喜名好進者趨之。 嘗漏洩除拜以市恩,時人比之

公弼名,識于殿柱。至是,益材其爲。 旣 邊屯兵就食京東; 西北撤警,而將屯如故,民疲餽餉。 公弼字寶臣。 增城卒,給板築;蠲冗賦及民逋數百萬。 賜進士出身,積遷直史館、河北轉運使。 擢都轉運使,加龍圖閣直學士、知瀛州,入權開封府。 公弼始通御河,漕栗實塞下; 自寶元、慶曆以來,宿師備邊。 夷簡之亡也,仁宗思之, 冶鐵以助經費; 問知

將何以處之?」公弼頓首謝,對日:「寢勤於事,未嘗有曠失,恐言之者妄耳。」帝以爲長者。 謂曰:「卿曩歲不與朕馬,是時固已知卿矣。」蔡襄主計,訴訟不時決,故多留事。 宗罷三司使察襄,召公弼代之。初,公弼在羣牧時,帝居藩,得賜馬頗劣,欲易不可。至是,帝 當杖,扞不受,曰:「寧以劍死。」公弼曰:「杖者國法,劍汝自請。」杖而後斬之,軍府肅然。 改同羣牧使,以樞密直學士知渭、延二州,徙成都府。其治尙寬,人疑少威斷。營卒犯法 卿繼其後,

營室,帝憂之,同列請飭邊備。公弼曰:「彗非小變,陛下宜側身修德,以應天戒,臣恐患不 股肱。股肱耳目,必相爲用,然後身安而元首尊。宜考言觀事,視其所以而進退之。」彗出 在邊也。 拜樞密副使。時言事者數與大臣異議去,公弼諫曰:「諫官、御史,爲陛下耳目,執政爲

光當無爭。」從之。 不處決,而諉邊吏,可乎?」乃止。 間相去千里,若合爲一路,猝有緩急,將何以應?」又欲下邊臣使議之,公弼曰:「廟堂之上 而 光中執法,願陛下擇其重者。」帝曰:「然則當奈何?」公弼曰:「遷居簡一官,而解其近職, 神宗立,司馬光劾內侍高居簡,帝未決。公弼曰:「光與居簡,勢不兩立。居簡,內臣耳, 進樞密使。 議者欲倂環慶、鄜延爲一路,公弼曰:「自自草西抵定遠,中

列

諛 爲 章避位,不許。 陳不可,帝皆爲之止。 國 非 耳 人情,帝曰:「是當退爲剩員者,今故爲優假,何所害?」對曰:「臣不敢生事邀名,正 旣使去本土,又削其廩,儻二十萬衆皆反側,爲之奈何?」韓絳議復肉刑,公弼力 知政事 陳升之建議,衛兵年四十以上,稍不中程者,減其牢廩,徙之淮南。 ,、赚公弼不附己, 白用其弟公著為御史中丞以偪之。 公弼 自安, 公弼 立上 恐 以

皆憂渴死。 援兵果遇覆,詔褒之。鱗州無井,唯沙泉在城外,欲拓城包之,而土善陷,夏人每至圍城,人 帝不樂,遂罷爲觀文殿學士、知太原府。 包泉於中。 神堂新路。公弼曰:「虜必設覆以待我。永和關雖回遠,可安行無患。」乃由永和。旣而新路 安石立新法,公弼數言宜務安靜,又將疏論之。從孫嘉問竊其稿示安石,安石先白之, |公開用其僚||鄧子喬計,做古拔軸法,去其沙,實以末炭,墐土於其上,板築立,途 自是城堅不陷,而州得以守。 韓絳宣撫秦、晉,將取囉兀城,令河東發兵二萬,趣

**熊**懼,自是不復敢。纔旬月,復以疾求解,爲西太一宮使。薨,年六十七。贈太尉,諡曰惠穆。 召之入對,慰勞而遣之。旣赴鎮,羌董氈輒治書稱敕,公弼卻之,曰:「藩臣安得妄稱敕?」董 有 綏御之能,宜使往。」乃拜宣徽南院使、判秦州。 俄 以疾,請知鄭州。 王韶取熙河,朝廷謀秦鳳帥,帝曰:「公弼在河東,方出師倉卒時, 帝疑其不肯行,公弼聞命卽治裝,帝喜,

澤、願、廬、常四州,提點福建、河北路刑獄,入爲開封府推官。民鬻薪爲盜所奪,逐之遭傷, 尹包拯命笞盜。公孺日:「盜而傷主,法不止笞。」執不從,拯善其守。及使三司,而公孺爲判 公孺字稚卿。 任爲奉禮郎,賜進士出身,判吏部南曹。占對詳敏,仁宗以爲可用。知

官,事皆容決之。 神宗得綏州,遣使議守棄之便,久未決。命公孺往,與郭逵議合,遂存綏州。 判都水監,未幾,改陝西轉運使。 常平法

行,公儒請以青苗、免役歸提刑司。徙知渭州,再徙鄆州。坐失入死刑,責知察州

皆亡命,急之,變且生。」卽乘馬東去,遣牙兵數人迎諭之曰:「汝輩誠勞苦,然豈得擅還? 餘復送役所。語其校曰:「若復偃蹇者,斬而後報。」衆帖息。乃自劾專命,詔釋之。 人,以久役思歸,奮斧锸排關,不得入,西走河橋,觀聽洶洶。 一度橋,則罪不赦矣!太守在此,願自首者止道左。」皆佇立以俟。」公孺索倡首者,黥一人, 元豐初,帝召公孺,慰之曰:「長安謀帥,無以易卿。」命知永興軍。 徙河陽,洛口兵千 諸將請出兵掩擊,公孺曰:「此

侍郎、知開封府,爲政明恕。幕人遷黼坐設,毁其角,法當徒,公孺請罪,數十人皆以杖免。原 州 ,更陳、杭、鄭、瀛四州。元祐初,加龍圖閣直學士,復以爲秦州,固辭,改祕書監。 知審官東院,出知秦州。一一憲以詔出兵,欲盡駐原、渭,公孺不可,與憲相論奏,坐徙相 遷刑部

列

第七十

呂夷簡

張士遜

一〇二 二 六

何顓指 廟 亡珠,繫治 公孺廉儉,與人寡合。 吏卒乎?」請之,得釋。擢戶部尚書,以病,提舉醴泉觀 典吏久,公孺曰:「主者番代不一,曷嘗以珠數相授受,歲 嘗護曹佾喪,得厚餉,辭不受,談者淸其節焉 卒,年 時諱 七十。贈右光祿大夫。 日,宮嬪 狎至,奈

去。 梓州 中倉,歷御史臺推直官。 縣,以寬厚得民。前治射洪,以旱,禱雨白崖山陸使君祠(10),尋大雨,土遜立廷中,須雨足乃縣,以寬厚得民。前治射洪,以旱,禱雨白崖山陸使君祠(10),尋大雨,土遜立廷中,須雨足乃 調 鄖 鄉 至是,邵武旱,禱歐陽太守廟,廟去城過一舍,士遜徹蓋,雨霑足始歸。 張 問 主 士遜字順之。 屬 簿,遷射洪令。 更能 否,知州張雍曰:「射洪令,第一也。」改襄陽令,爲祕書省著作佐郎、知邵武 祖裕,嘗主陰城鹽院,因家陰城。 轉運使檄移土遜治鄭,民遮馬首不得去,因聽還射洪。 士遜生百日 I始啼。 改祕書丞、監折 淳化中,舉進士, 安撫使至

糧多,不可遷。 擬 輒 遜請避去,眞宗記名于御屏,自是有親嫝者皆移試,著爲令。中書擬人充江 見卻,帝獨 翰林學士楊億薦爲監察御史。貢舉初用糊名法,士遜爲諸科巡鋪官,以進士有姻 用土遜。 上 遜 視 瀕 河 數 州 方 艱 食 , 即 計 餘 以 貸 貧 者 , 期 來 歲 輸 陽 信 , 公 私 利 之 。 再遷侍御史,徙廣東,又徙河北。 河侵棣州, 詔徙州 陽信,議者患 南轉 運使,再

樞密直學士判集賢院。 子坐受之。」帝不許。 爲友,令王答拜。」於是以戶部郞中直 大夫兼太子右庶子,改左庶子。 仁宗出閣,帝選僚佐,謂宰臣曰:「翊善、記室,府屬也,王皆受拜。 詔士遜等遇太子侍駕出入許陪從。 旣而二府大臣皆領東宮官,遂換太子詹事,擢樞密副使,遷給事中 士遜言:「詣資善堂,升階列拜,而皇太子獨跪受,宜詔皇太 1昭文館,爲壽春郡王友,改昇王府諮議參軍,遷右諫議 判史館, 知審刑院,以太子賓客、 今王尚少,宜以上遜

上遜徐日:「此獨不肖子爲之,利用大臣,宜不知狀。」太后怒,將罷士遜。 曹汭獄事起,宦者羅崇勳、江德明方用事,因譖利用。 帝疑之,問執政, 衆顧望未有對 帝以其東宮

兼詹事,累遷尙書左丞,遂拜禮部尙書、同中書門下平章事、集賢殿大學士。

舊臣,加刑部尚書、知江寧府,解通犀帶賜之。後領定國軍節度使、知許州。

鰄 帝慰勉之。羣臣上章懿諡册,退而入慰,士遜與同列過楊崇勳園飲,日中不 史。是歲旱蝗,士遜請如漢故事册免,不許。及帝自損尊號,上遜又請降官一等,以答天變, 劾 <u>士遜,以尚書左僕射判河南府,崇勳亦以使相判許州。翌日入謝,班崇勳下。帝問其故,</u> 明道初,復入相,進中書侍郎兼兵部尚書。 明年,進門下侍郎、昭文館大學士、監修國 ·至。御史中丞范

州,以崇勳知陳州。時土遜罷已累日,制猶用宰相銜,有司但奉行制書,不復追改。徙河南府

列傳第七十

張

士

遜

遜曰:「崇勳爲使相,臣官僕射,位當下。」遂爲山南東道節度使、同中書門下平章事、判許

戒懼 放宮人,不獨閔幽閉,亦省浮費也。 邪。」帝曰:「君子小人各有黨乎?」||出遜曰:「有之,第公私不同爾。」帝曰:「法令必行, ·矣。」馮士元獄旣具,帝以決獄問<u>士遜。</u> <u>士</u>遜 寶元初,復以門下侍郎、兵部尚書入相,封郢國公。 近復有獻孿女者, 日:「臺獄阿徇,非出自宸斷, 股卻而弗受。」 士遜曰:「此盛 土遜與輔臣奏事,帝從容曰:「朕昨 何以愜中外 徳事

邪正

有

別,則

朝綱舉矣。」

歲堂。 密院, 差等, 班,與一子五 士遜不自安, 遜方朝, 帝臨 康定初,士遜言禁兵久戍邊,其家在京師,有不能自存者。 自今邊事,並 出內藏緡錢十萬賜之。 「遜生七日,喪母,其姑育養之。 嘗請買 馬驚墮地。 奠,贈太師、中書令,諡文懿,御篆其墓碑曰「舊德之碑」。 累上 一品服。 城南官園 一章請老, 與士遜等參議。 時朝廷多事 士遜辭朝朔望。 帝以賜士遜。 迺拜太傅, 土遜 , 士遜亡所建明, 又請遣使安撫陝西,帝命遣 及簡輦官爲禁軍,輦官攜妻子遮宰相、樞密院 間遣 旣長,事姑孝謹,姑亡,爲行服, 封鄧國公致仕。 宰相得謝, 中 使勞問,御書飛白「千歲」字賜之, 諫官韓琦論曰:「政事府豈養病之地邪。」 蓋 自 韶朔望朝見及大朝 士遜始。 知制誥韓琦以行。 帝命內侍條指揮使以下爲 就第凡十年, 徒跣扶柩以葬, 會, 土遜 綴 卒,年八十 於是詔 中書門下 喧訴, 因建千 追封

|遜曰:「憸人構陷善良,以搖朝廷,姦僞 南陽縣太君。 初, 陳堯佐罷參知政事,人有挾怨告堯佐謀反, 一開,亦不能自保矣。」帝悟, 復有誣諫官陰附宗室者。 抵告者以罪,誣 諫官事

亦不下。 然曹利用在樞府,藉籠肆威,士遜居其間,無所可否,時人以「和鼓」目之。

納

女口宮中,爲御史楊偕所劾。

子友直字益之。

初補將作監主簿,再遷爲丞。 士遜為請館閣校勘,仁宗日:「館閣所以

進 待英俊,不可。」乃令館閣讀書,詔校勘毋得增員。後編三館書籍,遷祕閣校理、同知禮院,賜 上出出 身, 知襄州。 坐軍賊張海剽扨不能制、罷歸。 後除史館修撰,御史何郯言:「史館修

帝東宮舊事,而史官未之見,友直纂爲資善錄上之。 大集僧道士女,謂之「祭天」,友直下令禁絕,取所斂財,建學以延諸生。 故事,皆試知制誥,友直不當得。」改集賢殿修撰。 侍宴集英殿,猶衣緋衣,仁宗顧見之,迺賜金紫。 累遷工部郎中、知越州。 以天章閣待制知陝州, 卒官。 州民每春斂 同勾常三班 七遜嘗

財,

記

院。

幼子友正字義祖,杜門不治家事,居小閣學書,積三十年不輟,遂以書名。 神宗評其草

書,爲本朝第

以固權利,郭后之廢,遂成其君之過舉,咎莫大焉。雖然,呂氏更執國政,三世四人,世家之 父蒙正以宰相才期之。 寬厚,相臣預有力焉。 一,則未之有也。 論曰: 呂夷簡、張上遜皆以儒學起家,列位輔弼。 上遜練習民事,風蹟可紀,而依違曹利用以取譏。方夷簡 及其爲相,深謀遠慮,有古大臣之度焉。 仁宗之世,天下承平,因時制官,濟以 在位日久,頗務收恩避怨, 在下僚,諸

## 校勘記

盛.

- 二 成武 二字原倒。 本書卷八五地理志單州有成武縣,無「武成」地名,據司馬光溫國文正 司馬公
- 文集卷七六廳籍墓誌銘、王珪華陽集卷三五廳籍神道碑 乙正
- (=) 3 玉象 作坊物料 原作「玉像」,據隆平集卷五、東都事略卷五六本傳改。 庫 「物料」二字原倒,據本書卷一六五職官志、宋會要食貨五二之四乙正。
- 稱, 陸 使 此 君 處 间 的 陸 使」 使君指唐陸两, 原作 「史」, 長編卷八一:「唐瀘州刺史陸阿, 胡宿文恭集卷四○張士遜行狀作「使」。「使君」爲州郡長官的尊 有廟在射洪縣之白崖山。」卽此。

行狀是,據改。

## 宋史卷三百一十二

## 列傳第七十

韓琦 子忠彦 曾公亮 子孝寬 孝廣 孝蘊 陳升之 吳充

王珪 從父罕 從兄琪

涖,始得受,往往數日不至,暴露廡下。 直批旨取之,無印可 時方貴高科,多徑去爲顯職,琦獨滯筦庫,衆以爲非宜,琦處之自若。禁中需金帛,皆內臣 唱名,太史奏日下五色雲見,左右皆賀。 韓琦字稚圭,相州安陽人。父國華,自有傳。 驗,琦請復舊制,置傳宣合同司,以相防察。 衙校以爲病,琦奏罷之。 授將作監丞、通判淄州, **琦風骨秀異,弱冠舉進士,名在第二。**方 又每綱運至,必俟內臣監 入直集賢院、監左藏庫。

立,在中書罕所建明,琦連疏其過,四人同日罷。 歷開封府推官、三司度支判官,拜右司諫。 列 傳 第 七 + 韓 琦 又請停內降,抑僥倖。 101111 凡事有不便,

時宰相王隨、陳堯佐,

參知政事韓億、石中

者不激,則多畏顧,何補 不言,每以明得失、正紀綱、親忠直、遠邪佞爲急,前後七十餘疏。 上德?如君言,可謂切而不迂矣。」會聞望方崇,罕所獎與,琦聞其 王曾爲相,謂之日:「今言

語,益自信。

權

知

制誥。

寃。 蠲 勢甚悉, 給之,逐貪殘不 盆 利歲饑,爲體量安撫使。 即命爲陝西安撫使。 職吏,汰冗役數百,活飢民百九十萬。 劉平與賊戰,敗,爲所執,時宰入他誣,收繫平子弟,琦辨直其 異時郡縣督賦調繁急,市上供綺繡諸物不予直,琦爲緩調 趙元昊反,琦適自蜀歸,論 西 師 形

|**昊** 雖 合 道,鼓行 亦上章自刻, 功,亦斬。 無約 府 傾國 固 進 而 樞 爭,元昊遂寇鎭戎。 請 而 :密直學士,副夏竦爲經略安撫、 入寇,衆不過四五萬人,吾逐路 如未 和者,謀也。」命諸將戒嚴,賊果犯山 前,乘賊驕惰,破之必矣。」乃詔 福竟爲賊誘,沒于好水川 猶奪一官,知秦州,尋復之。 ·可戰,卽據險置 琦畫攻守二策馳入奏, 伏,要其歸。 陳使人收散兵,得<u>琦</u>檄於福衣帶間,言罪不在琦。 重兵 招討使。 鄜延、涇原同出征。 及行,戒之至再。 外。 自爲守, 仁宗欲用 琦悉兵付大將任福 詔遣使督出兵,琦亦欲先發以制賊,而 勢分力弱, 攻策, 又移檄申約, 荷違節度, 既還營,元昊 執政 遇敵. ,令自懷遠城趨 文朝不 者難之。 人來求 支。 盟。 琦言:「元 併出一 琦日: 雖有 徳勝

琦與范仲淹在兵間久,名重一時,人心歸之,朝廷倚以爲重,故天下稱爲「韓范」。東兵從宿 淹、龐籍、汪沿不肯拜,琦獨受不辭。 會四路置帥,以琦兼秦鳳經略安撫、招討使〔〕。慶曆二年,與三帥皆換觀察使,范仲 未幾,還舊職,爲陝西四路經略安撫、招討使,屯涇州。

衞來,不習勞苦,琦奏增土兵以代戍,建德順軍以蔽蕭關、鳴沙之道。方謀取橫山,規河南,

元昊稱臣,召爲樞密副使。

許和。 定討伐之計。」 討平羣盜張海、郭邈山;禁卒羸老不任用者,悉汰之;盡修鄜延城障,須敵悉歸所侵地,乃 官,去冗食。謂:「數者之舉,謗必隨之,願委計輔臣,聽其注措。」帝悉嘉納。 行者七事:一日清政本,二日念邊計,三日擢材賢,四日備河北,五日固河東,六日收民心, 七日營洛邑。 元昊介契丹爲援,強邀索無厭,宰相晏殊等厭兵,將一切從之。時陳其不便,條所宜先 歸陳西北四策,以爲:「今當以和好爲權宜,戰守爲實務。 請繕甲厲兵,營修都城,密 繼又陳救弊八事,欲選將帥,明按察,豐財利,遏僥倖,進能吏,退不才,謹入 遂宣撫陜西,

下爲己任,羣小不便之,毀言日聞。仲淹、彌繼罷,琦爲辨析,不報。 韓琦性直。」琦與范仲淹、富弼皆以海內人望,同時登用,中外跂想其勛業。 時二府合班奏事,琦必盡言,雖事屬中書,亦指陳其實。同列或不悅,帝獨識之,曰: 尹洙與劉滬爭城水洛 仲淹等亦以天

列傳第

進大學士,

又加觀文殿學士。

事,琦右洙,朝論不謂然。乃請外,以資政殿學士知揚州,徙剛州、成德軍、定州。兼安撫使,

法, 留不遣,易素教者使之北,又振活飢民數百萬。 勒習,誅其尤無良者。士死攻戰,則賞賻其家,籍其孤嫠繼廩之,威恩並行。又做古三陣 日月訓齊之,由是中山兵精勁冠河朔。 初 。 完州兵狃平 具州功, 需賞費, 出怨語, 至欲譟城下。 琦聞之, 以爲不治且亂, 用軍制 京師發龍猛卒戍保州,在道爲人害,至定,琦悉 **璽書褒激,鄰道視以爲準。** 

不耕,適足以資敵,將皆爲所有矣。 令民悉內徙,而空塞下不耕,於是忻、代、寧化、火山之北多廢壤。 法,琦奏還之,帝命鞭諸本省。 九千六百頃。久之,求知相州 無以對,遂歸我斥地。 拜武康軍節度使、知丼州。 既又侵耕陽武砦地,琦鑿塹立石以限之。 契丹冒占天池廟地,琦召其酋豪,示以曩日彼所求修廟傲, 承受廖浩然,怙中貴勢貪恣,旣誣逐前帥李昭亮,所爲益不 **遂請距北界十里爲禁地,其南則募弓箭手居之,墾田至** 始, 琦以爲此皆良田 潘美鎭河東,患寇鈔, 今棄

得疾,不能御殿。 大學士。 嘉祐元年,召爲三司使,未至,迎拜樞密使。 六年閏八月,遷昭文館大學士、監修國 中外惴恐,臣下爭以立嗣固根本爲言,包拯、范鎭尤激切。 史, 三年六月,拜同中書門下平章事、集賢殿 封儀國公。 帝旣連失三王,自 積五六歲,依 至和中

由策不早定。陛下春秋高,未有建立,何不擇宗室之賢者,以爲宗廟社稷計?」帝曰:「後宮 遠未之行,言者亦稍怠。 至是,琦乘間進曰:「皇嗣者,天下安危之所係。 自昔禍亂之起,皆

將有就館者,姑待之。」已又生女。

名,帝以宗實告。宗實,英宗舊名也。琦等遂力贊之,議乃定。 臣輩所可議,當出自聖擇。」帝曰:「宮中嘗養二子,小者甚純,近不慧,大者可也。」琦請其 脚皆有請,<br />
琦進讀二疏,未及有所啓,帝遽曰:「朕有意久矣,誰可者?」<br />
琦皇恐對曰:「此非 下乎。願以太祖之心爲心,則無不可者。」又與曾公亮、張昪、歐陽脩極言之。會司馬光、呂 一日,琦懷漢書孔光傳以進,曰:「成帝無嗣,立弟之子。彼中材之主,猶能如是,况陛

嗣位,以琦爲仁宗山陵使,加門下侍郎,進封衞國公。 賢而選之,今不敢遽當,蓋器識遠大,所以爲賢也。願固起之。」英宗旣終喪,猶堅臥不起。 帝意不欲宮人知,曰:「只中書行足矣。」命下,英宗固辭。帝復問琦,琦對曰:「陛下旣知其 英宗居濮王喪,議起知宗正。 琦曰:「事若行,不可中止。 陛下斷自不疑,乞內中批出。」

計,皇太后內助之力,臣子何與焉。」英宗暴得疾,太后垂簾聽政。帝疾甚,舉措或改常度,

畸旣輔立英宗,門人親客,或從容語及定策事,琦必正色曰:「此仁宗聖德神斷,爲天下

咽流 官尤少 涕 具 (道所 恩 以。 左右 琦曰:「此 多不悅者,乃共爲讒間, 病 固 爾,病已, 必不然。 兩宮途成隙。 子疾,母 琦與歐陽脩 可不容之乎? 奏事 、簾前, 脩 亦 太后 委 曲 鳴 進

明王 一,不爲 意 少矣。 稍 和 久之而 然獨 稱舜爲大孝, 靇。 後數日,琦獨見上,上曰:「太后待我無恩。」琦對曰:「 豈其餘盡不 孝耶? 父母慈愛而 子孝, 此常 事 自 不 足 占 道 聖

悟。 惟父母不慈,而 及疾愈,琦請 子 不 乘 失孝,乃爲可稱。 興因禱雨 具素服以出,人情乃安。 但恐陛下 事 之未至爾,父母豈有不慈者 太后還政,拜琦 右僕射, 哉 封 魏 帝 或 大感

謝, 琦曰:「諒祚, 帝顧琦曰:「一如所 夏 人寇大順,琦議 狂童 世, ·料。」帝寢疾,琦入問起居,言曰:「陛下久不視朝, 非有元昊智計, 停歲賜,絕和市 ,遣使 而 邊備過當 以問罪。 一時遠甚。 樞 密使文彥博難之,或舉寶元 亟詰之, 必服。 願早建儲, 旣而諒祚 、康定事 以 上表

稷。」帝領之,即召學士草制,立[潁王。

不赴 安武 文德殿 勝 神宗 軍節 立, 度使、 押班 拜司空兼侍 爲跋扈。 司 徒兼 侍中、判相州 中,爲英宗 琦請去,帝爲 山 一陵使。 黜陶 入對, 帝泣 琦執政三世,或病其專。 永厚陵 日:「侍中 復土, 琦不 必欲去,今日已降制矣。」賜興 復入中書, 御 史 堅辭 中 丞 王陶 付. 除 劾 鎭 琦

會种諤擅取綏州, 西邊俶擾, 改判永興軍, 經略陝西。 琦言:「邊臣肆意妄作, 棄約基

道坊

宅

區,擢其子忠彦

秘閣校

理

|琦|

兩鎮,乃但領淮南

亂, 而夏 授臣,復有劾臣如陶者,則臣赤族矣。」帝曰:「侍中猶未知朕意邪?」時初言綏州不當取,已 政府,所當共議。 願召二府亟決之。」 畸入辭,曾公亮等方奏事,乞與琦同議。 人誘殺楊定,琦復言:「賊旣如此,綏今不可棄。」樞密院以初議詰之,琦具論其故,卒存 今日,藩臣也,不敢預聞。」又言:「王陶指臣爲跋扈,今陛下乃舉陝西兵柄 帝召之,琦曰:「臣前日備員

議益 是請 勃然進曰:「荷從其欲,雖坊郭何害。」明日,稱疾不出。 外,不忘王室。 一安石 堅。 解四路安撫使,止領一路,安石欲沮琦,即從之。 熙寧元年七月,復請相州以歸。 用事,出常平使者散青苗錢,琦亟言之。 琦又懇奏,安石下之條例司,令其屬疏駮,刊石頒 朕始謂可以利民,今乃害民如此。 河北地震、河決,徙判大名府,充安撫使,得便宜從事。 帝夷其疏以示宰臣,曰:「琦眞忠臣, 且坊郭安得青苗,而亦強與之乎? 六年,還判相州。 當是時,新法幾罷,安石復出,持前 泛天下。 琦申辨愈切,不克從。 」安石 雖在

契丹來求代北地,帝手詔訪琦,琦奏言:

商 故 舶 引先發制 一誘之使來,契丹知之,必謂將以圖我。 臣 . 觀 近年以來,朝廷舉事,似不以大敵爲恤。 人之說,造爲釁端。 所以致疑,其事有七:高麗臣屬北方,久絕朝貢,乃因 也。 強取吐蕃之地以建熙河,契丹聞之, 彼見形生疑,必謂我有圖復燕南意

列

傳

七也。

契丹素爲敵國,因事起疑,不得不然。

一〇二二八

也。 必 謂 行 將 州築城鑿池。 及我。 二世。 五 也。 遍植榆柳於西山, 置都作院,頒弓刀新式,大作戰車。 冀其成長以制蕃騎。 六也。 三也。 創 置河北三十七 團保甲。 11

下始謀者大誤也。 職,陛下不盡 官吏茫然,不能詳記,監司督責,以刻爲明。 爲冤役之法,次第取錢;迨置市易務,而小商細民,無所措手。 必日治國之本,當先聚財積穀,募兵於民,則可以鞭笞四夷。 不敢復言。今親被詔問,事係安危,言及而隱,死有餘罪。 臣昔年論青苗錢事,言者輒肆厚誣,非陛下之明,幾及大戮。 知也。 夫欲攘斥四夷,以興太平,而先使邦本困搖,衆心離怨,此則爲陛 今農怨於甽畝, 臣嘗竊計, 商歎於道路,長吏不安其 故散青苗錢,使民出利; 新制日下,更改無常, 自此, 聞新法日下, 始爲陛下謀者,

定,悉如舊境,不可持此造端,以隳累世之好。以可疑之形,如將官之類,因而罷去。 則可一振威武,恢復故疆,攄累朝之宿憤矣。 益養民愛力,選賢任能,疏遠奸諛,進用忠鯁,使天下悅服,邊備日充。若其果自敗盟, 臣今爲陛下計,謂宜遣使報聘,具言向來興作,乃修備之常,豈有他意;疆土素

尚書令爲尤重,赠者必兼他官。 令, 諡曰忠獻, 配享英宗廟庭。 朝三日,賜銀三千兩,絹三千匹,發兩河卒爲治冢,瑑其碑曰「兩 再任,未拜而薨,年六十八。前一夕,大星隕于治所,櫪馬皆驚。 常令其子若孫一人官于相,以護丘墓。 至琦,乃單贈。 後又韶,雖當追策,不復更加師保,蓋貴之 朝顧命定策元勳」。 帝發哀苑中, 故事,三省長官,惟 哭之慟。 贈尙

也

遼, 遼主問知其貌類父, 即命工圖之, 其見重於外國也如此。 所。」琦歎曰:「是何言也。 故,琦處危疑之際,知無不爲。 輟不爲哉。」聞者愧服。 一臨邊,年甫三十,天下已稱爲韓公。 **琦**蚤有盛名, 識量英偉, 臨事喜愠不見于色, 論者以重厚比周勃, 政事比姚崇。 在魏都久,遼使每過,移牒必書名,曰:「以韓公在此故也。」忠彦使 人臣盡力事君,死生以之。至於成敗,天也,豈可豫憂其不濟,遂 或諫曰:「公所爲誠善,萬一蹉跌,豈惟身不自保,恐家無 嘉祐、治平間,再決大策,以安社稷。 當是時,朝廷多 其爲 處 學

可屬 不悅,亦收用之,故得人爲多。 國者, 王安石何如。」 琦曰:「安石爲翰林學士則有餘, 處輔弼之地則不可。」 上不答。 在相位時,王安石有盛名,或以爲可用,琦獨不然之。及守相,陛辭,神宗曰:「卿去,誰 琦天資朴忠,折節下士,無貴賤,禮之如一。尤以獎拔人才爲急,儻公論所與,雖意所 選飭羣司,皆使奉法循理。 其所建請, 第顧義所在, 無適莫

列傳第七十

韓

琦

圖閣學士。 彦、純彦、粹彦、嘉彦。 富弼 其鎭大名也,魏人爲立生祠。 相人愛之如父母,有鬥訟,傳相勸止,曰:「勿撓吾侍中也。」與 齊名,號稱賢相,人謂之「富韓」云。 嘉彦尚神宗女齊國公主三,拜駙馬都尉,終瀛海軍承宣使。 端彦右贊善大夫。 徽宗追論琦定策勳,贈魏郡王。 純彦官至徽猷閣直學士。 粹彥爲吏部侍郎,終龍 子五人:忠彦、端

校理、同知太常禮院,爲開封府判官、三司鹽鐵判官。 其臣王言敷燕于館,言敷問:「夏國胡罪,而中國兵不解?無失兩朝之懽,則善矣。」忠彥曰: 忠彦,遂以給事中奉使。遼遣趙資睦迓之,語及西事,忠彦曰:「此小役也,何問爲?」遼主使 西方,旣下|米脂等城砦數十,夏人求救于遼,遼人移書繼至。 琦薨,服除,爲直龍圖閣,擢天章閣〔三待制、知瀛州。 忠彥字師朴,少以父任,爲將作監簿,復舉進士。 出通判永寧軍,召還,爲戶部判官。 琦罷政,忠彦以祕書丞召試館職,除 朝廷以夏人囚廢其主秉常,用兵 會遺使賀遼主生辰,神宗以命

奏:「朝廷之事,執政之所行也。 左僕射王珪爲南郊大禮使,事之當下者,自從其所畫旨。忠彥以官制駁之曰:「今事于南郊 使還。 時官制行,章惇爲門下侍郎,奏:「給事中東省屬官,封駁宜先稟而後上。」忠彥 事當封駮,則與執政固已異矣,尙何稟議之有。」詔從其請。

"問罪西夏,於二國之好何預乎?」

者,大禮使旣不從中畫旨,處分出一時者,又不從中書奏審。 自渝之, 後將若之何?」乃詔事無鉅細,必經三省而後行。 拜禮部尚書,以樞密直學士 官制之行,曾未期月,而廟堂 知

定州

廣仁恩,二曰開言路,三曰去疑似,四曰戒用兵。 移定州。 事,仁宗惡其持情近薄,下詔戒飭。 親政,更用大臣,言者觀望, 忠彥言,數下詔蠲天下逋責,盡還流人而甄敍之,忠直敢言若知名之士,稍見 言,降資政殿學士,改知大名府。 進左僕射棄門下侍郎,封儀國公。 元祐中,召爲戶部尙書,擢尙書左丞。 忠彦在西府,以用兵西方非是,願以所取之地棄還之,以息民力。 爭言垂簾 徽宗即位,以吏部尚書召拜門下侍郎。 陛下能法仁祖用心,則善矣。」以觀文殿學士知眞定府, 心時事。 而曾布爲右相,多不協,言事者助布排忠彦,以觀文 弟嘉彥尙主,改同知樞密院事,遷知院事。 忠彦言:「昔仁宗始政, 踰月,拜尚書右僕射兼 當時亦多譏斥章獻時 忠彦陳四 中書侍郎。 至是,言者以爲 收 用 事 哲宗

在相 殿大學士知大名府。 太中大夫,遂以宣奉大夫致仕。 疾丐祠,命其子肖胄代之,別有傳。 位,不應棄湟州, 又以欽聖欲復廢后,爲忠彥罪,再降太中大夫,懷州居住。 謫崇信軍節度副使,濟州居住。 卒,年七十二。子治,徽宗時,爲太僕少卿, 逮復湟、劑、又謫磁州團練副使。 出知相州。 又論忠彦 復

安社 安,可謂社稷之臣」。豈不信哉!忠彥世濟其美,繼登相位,宜矣。 一稷、人服其量。 曰: 埼相三朝, 立二帝, 厥功大矣。 歐陽脩稱其「臨大事,決大議,垂紳正笏,不動聲色,惜天下於泰山之 當治平危疑之際,兩宮幾成嫌隙,琦處之裕如,卒

弟,多倚勢請謁。 部侍郎、除樞密使。 從者之麼耳。」索之,果然。復入爲翰林學士、知開封府。 臣也。」遂知制誥兼史館修撰,爲翰林學士、判三班院。 擢天章閣待制,賜金紫。 先是,待制不 諸王府侍講。 能聲,盜悉竄他境,至夜戶不閉。 立斗門,泄水入曹娥江,民受其利。坐父買田境中,謫監湖州酒。 曾公亮字明仲,泉州晉江人。舉進士甲科,知會稽縣。 歲滿, 公亮撥前後章程,視以從事, 吏不能舉手。 當用故事試館職,獨獻所爲文,授集賢校理、天章閣侍講、修起居注。 嘉祐六年,拜吏部侍郎、同中書門下平章事、集賢殿大學士。 嘗有使客亡豪中物,移書詰盜,公亮報:「吾境不藏盜,始 改服。 仁宗面錫之,曰:「朕自講席賜卿,所以尊寵儒 三班吏叢猥, 非賕謝不行, 貴游 未幾,擢給事中、參知政事。 以端明殿學上知鄭州 民田鏡湖旁,每患湖溢。 久之, 爲國子監直講, ,爲政有 公亮 加禮

儲, 雖彊,與盜物民家有間矣。」固爭之,遂下有司議,比劫禁物法,盜得不死。初,東州人多用 與公亮等共定大議。密州民口產銀,或盜取之,大理當以彊。 公亮明練文法,更踐久,習知朝廷臺閣典憲,首相韓琦每咨訪焉。 公亮日:「此禁物也,取之 仁宗末年,琦請建

此抵法,自是無死者。

之曰:「錫宴不赴,是不虔君命也。 後將 即位,加門下侍郎兼吏部尚書 奈何?雄州趙滋勇而有謀,可任也。」使諭以指意,邊害訖息。 契丹縱人漁界河,又數通鹽舟,吏不敢禁,皆謂:與之校,且生事。 帝不豫,遼使至不能見,命公亮宴于館,使者不肯赴。 人主有疾,而必使親臨,處之安乎?」使者卽就席。 英宗卽位,加中書侍郎 公亮言:「萌芽不禁, 公亮質 神宗

冗費 游,公亮不爲動, 元年卒,年八十。 西皆警備。閱義勇,益邊兵,移內地租賦,人情騷然。 三城節度使、集禧觀使。 熙寧二年, 長安豪喜造飛語,聲言營卒怨減削,謀以上元夜結外兵爲亂,邦人大恐。 進昭文館大學士, 累封魯國公。 張燈縱觀,與賓佐竟夕乃歸。 帝臨 哭,輟朝三日,贈太師、中書令,諡曰宣靖,配享英宗廟庭。 明年,起判永興軍。 先是,慶卒叛,旣伏誅, 居一歲,還京師。 以老避位,三年九月,拜司空兼侍中、河陽 公亮一 鎭以靜,次第奏罷之,專務裁抑 旋以太傅(四)致仕。 而餘黨越供, 或勸毋出 及葬,御 自陝以 元豐

列傳第七

篆其碑首曰「兩朝顧命定策亞勳之碑」。

安世。 擢孝寬至樞密以報之。 與之者。 也。」世譏其持祿固寵云。 公亮方厚莊重,沈深周密,平居謹繩墨,蹈規矩,然性吝嗇,殖貨至鉅萬,帝嘗以方張 初薦王安石,及同輔政,知上方向之,陰爲子孫計,凡更張庶事,一 嘗遭子孝寬參其謀,至上前略無所異,於是帝益信任安石。 蘇軾嘗從容責公亮不能救正, 子孝寬,從子孝廣、孝藴 公亮曰:「上與介甫如一人, 安石德其助己,故引 切聽順,而外若不 此乃天

田,辨其實,得蠲賦。 孝寬字令綽,以蔭知桐城縣。 除祕閣修撰、提點開封府界鎮縣 選知咸平縣,民詣府訴雨傷麥,府以妄杖之。 孝寬躬行

告捕扇惑者,民兵不敢訴,維之言不得行。 保甲法行, 民相驚言且籍爲兵。 知府韓維上言,乞侯農隙行之。 入知審官東院、判刑部。 孝寬牓十七縣, 揭賞

父憂,除喪,以端明殿學士知河陽,徙鄆。 熙寧五年,遷樞密都承旨,承旨用文臣,自孝寬始。 **鄆有孟子廟**, 擢 孝寬請於朝, 拜樞密直學士、簽書樞密院。 得封鄒國公,配享孔

連徙鎭,以東部尙書召,道卒,年六十六。贈右光祿大夫。

送銓,監吏領賦謝,不時遣。 可,出通判保州。 孝廣字仲錫。 久之,復爲都水丞。 元豐末,爲北外都水丞。 孝廣治籍疏姓名,謹其去留,一歲中,歸選者百輩 前此,班行使臣部木栰至者,須校驗無所失亡,乃得 元祐中, 大臣議復河故道, 召孝廣問之, 言不

待制、知杭州。 遺迹,曰:「此昔人所以殺水勢也。」卽日濬決之,累石爲防,自是無水患。 獄,陝西、京西 北 流,舒澶、滑、深、瀛之害。 除京西轉運判官,入爲水部員外郎。 轉運副使,還爲左司 又以前聘契丹失奉使體,奪職。 遷都 水使者。洛水頻歲溢涌,浸齧北岸,孝廣按河隄,得廢達 郞中,擢戶部侍郎,進尙書。 河決內黃, 尋復之,移知潭州,加顯謨閣直 詔孝廣行視,遂疏蘇村,鑿鉅野,導河 坐錢帛不給費,罷爲天章閣 出提點永興路 學士、 知 刑

成德軍、太原府,得故職以卒,年六十,贈正議大夫。 孝廣與胡安國、鄒浩善,皆大觀中忤時相,御史論之,復奪職知饒州。 孝廣涖官以嚴稱,獲盜,輒碎其手焉。 踰年,徙廣州 歷

州。

爲牐 ,以便漕運、商賈。 孝蘊字處善。 紹聖中,管幹發運司糶糴事,建言揚之瓜洲,潤之京口,常之犇牛,易堰 旣成,公私便之。 提舉兩浙常平,改轉運判官,知臨江軍,召爲左司

員

、外郎,遷起居舍人。

曹儲 節 成。 從其言,得盜。崇寧建殿中省,擢爲監。 襄州,徙江浙荆淮發運。 度副使。 物幾何,疾作不能對。 旣而工役大集,竟成之,策勳第賞,辭不受。 時京邑有盜,徽宗怒,期三日不獲,坐尹罪。 泗州議開直河,以避漲溢沙石之害, 徙工部,以顯謨閣待制知杭州。其後坐累,連削黜,至貶安遠 居數月,言者論其與張商英善,以集賢殿修撰 未幾,河果塞。 孝蘊奏:「求盜急則遁益遠,小緩當自出。」 孝蘊以淮、汴不相接, 召爲戶部侍郎, 帝嘗問右 出知 不可

破杭 阨蹇 不敢驚。 一,有避 ,孝藴單車至城下。 宣和二年, 論功,進顯謨閣直學士,又加龍圖閣學士。 賊來歸者,獲罪,使出境,人稍恃以安。會移青州,旣行而獻陷,道改杭州,時賊已 始復天章閣待制、知歙州。 城既克復,軍士多殺人,孝蘊下令,脅從者得自首,無輒殺, 方臘起青溪, 孝蘊約敕郡內,無得奔擾,分兵守 卒,年六十五,贈通議大夫。 皆東手

計之習也,請禁止之。」又言:「三館爲搢紳華途,近者用人益輕,遂爲貴游進取之階,請嚴其 居舍人、知諫院。 陳升之字暘叔,建州建陽人。 時俗好藏去交親尺牘,有訟,則轉相告言,有司據以推詰。升之謂:「此告 舉進士,歷知封州、漢陽軍,入爲監察御史、右司諫,改起

選。」詔自今臣僚乞子孫恩者,毋得除館閣。

南:升之皆極諫。 留後,求升正班; 馬,因劾承临驕恣,解其任。 著作佐郎王瓘遇殿帥郭承祐於道,訶怒不下馬,執送府。升之言,京官不宜爲節度使下 御史張昪補郡,久不召,彭思永論事,令窮問所從來;唐介擊宰相,斥嶺 遷侍御史知雜事。 張堯佐緣後宮親,爲三司使,尋爲宣徽使,內侍王守忠領兩鎮 凡任言責五年,所上數十百事,然持論不堅,以故不盡

御史中丞張昪,與升之同領磨勘轉運使及提點刑獄功務。 肆刻薄,所以疾苦愁歎,壅於上聞。 「天下州縣治否,朝廷不能周知,悉付之轉運使。今選用不精,又無考課,非闍滯罷懦,則凌 擢天章閣待制、河北都轉運使,知瀛州、眞定府,加龍圖閣直學士,復知諫院。上言: 。必欲垂意元元,宜從此始。」乃詔翰林學士承旨孫抃、權

施用。

遷樞密直學士、知開封府。歲餘,拜樞密副使。於是諫官御史唐介、范師道、呂誨、趙抃、王 陶交章論升之陰結宦者,故得大用。仁宗以示升之,升之丐去。帝謂輔臣曰:「朕選用執 其罪,仍揭於朝堂至。文彥博乞罷相,升之慮樞密使賈昌朝復用,疏論其邪,昌朝卒罷去。 政,豈容內臣預議邪。」乃兩罷之。以升之爲資政殿學士、知定州,徙太原府。 升之初為諫官時,嘗請抑絕內降,詔許有司執奏勿下。至是,申言之。詔委三省劾正

列

共事。 朝,七年,多祀,又不能相禮。 安石,稱疾歸臥逾十旬,帝數敦諭,乃出。會母喪,去位;終制,召爲樞密使。 名一職,何害於理?」升之曰:「若制置百司條例則可,但今制置三司一官,則不可。」由是忤 無所不統,所領職事,豈可稱司。 既爲使〔云〕,帝以升之三輔政,欲稍異其禮,故特命之。明年,同制置三司條例司,與王安石 徙許,中道改大名府,過闕,留知樞密院。 贈太保、中書令, 諡曰成肅 治平二年,復拜樞密副使。 數月,拜中書門下平章事、集賢殿大學士。升之旣相,遂請免條例司,其說以爲宰相 拜鎭江軍節度使、同平章事、判揚州,封秀國公。卒,年六十 神宗立,以母老請郡,爲觀文殿學士、知越州。 安石曰:「古之六卿,即今之執政,有司馬、司徒、司空,各 故事,樞密使與知院事不並置。時文彥博、呂公弼 足疾不能立 熙寧元年,

若不與之同者。世以是譏之,謂之「筌相」。升之初名旭,避神宗嫌名,改焉。 其不可,而竭力爲之用,安石德之,故使先已爲相。 升之深狡多數,善傅會以取富貴。王安石用事,患正論盈庭,引升之自助。升之心知 甫得志,即求解條例司,又時爲小異,陽

吳充字沖卿,建州浦城人。未冠,舉進士,與兄育、京、方皆高第。調穀熟主簿,入爲國

箴以 子監直講、吳王宮教授。 緣,日視,日聽,日好,日學,日進德,日崇儉。 等輩多與宗室狎,充齒最少,獨以嚴見憚,相率設席受經。 仁宗命繕寫賜皇族,英宗在藩邸,書之坐 |充作||六

若以爲 牧判官、開封府推官、歷知陝州、京西、淮南、河東轉運使。 銓 決 歐 陽脩爲之請,仇家譖脩以爲黨宿,詔出脩同州。 命吏以印紙行文書,不令同僚知。 除集賢校理、判吏部南曹。 私 ,則臣願與脩同貶。」於是脩復留,而充改知太常禮院。 選人胡宗堯者,翰林學士宿之子,坐小累,不得改京官。 充言:「脩以忠直擢侍從,不宜用讒逐。 張貴妃薨,治喪越式,判寺 圳

藁殯數 無 樞 石 元年,知制誥。 參 庸 副 列 知 英宗立,數問充所在,會入覲,語其爲吳王宮教授時事,嘉勞之。 置 使。 政 十年,傷敗 「郡縣,彈財屈力。 事,充子安持,其壻也,引嫌解諫職, 王韶取洮州,蕃酋木征 神宗諭以任用意,曰:「先帝知卿久矣。」遂同 (風化,宜限期使葬。) 詔著爲令。 時方以開拓付韶,充言 .遁去,充請招還故地,縻以爵秩,使自領所部,永爲外臣, 知審刑院, 不用 河北 水災、地震, 權三司使, 知諫院。 爲安撫使。 爲翰林學士。 尋權鹽鐵副使。 言:「士大夫親沒,或 使還,王安 三年,拜 熙寧

八 年,進檢校太傅、樞密使。 數爲帝言政事不便。

列

帝察其· 之心。 息征伐之謀,而欲求成效,猶惡湯之沸,而益薪鼓橐也。欲去此五者,必先別利害,以悟人主 領,冀朝廷覺悟,一變敝法,幾年于茲矣。 之書曰:「自新法之行,中外洶洶。 不能用。 乞召還 欲悟人主之心,必先開言路。 (中立 司馬光、呂公著、韓維、蘇頭,乃薦孫覺、李常、程顥等數十人。 無 與,欲相之,安石去,遂代爲同中書門下平章事、監修國史。充欲有所變革, 民困於煩苛,迫於誅斂,愁怨流離,轉死溝壑。 今病雖已深,猶未至膏肓,失今不治,遂爲痼疾矣。」充 今日救天下之急,苟不罷青苗、免役、保甲、市易, 光亦以充可告語,與 日夜引

益侵。 治,欲鉤致充語,帝獨明其亡他。及確預政,充與議變法於前,數爲所詘。 知諫院張躁又謂充與郭逵書,止其進兵,復置獄。 王珪與充並相、忌充、陰掣其肘。 元豐三年三月,輿歸第,罷爲觀文殿大學士、西太一宮使。 而充素惡察確,確治相州獄,捕安持及親戚、官屬考 充旣數遭同列困毀,素病瘤, 踰月,卒,年六十。 安南 積憂畏,疾 師 出 [無功, 贈司

而 莫 弗能勇退也。 入知者。 允 內行修飭,事兄甚謹。 將終,戒妻子勿以私事干朝廷,帝益悲之。 子安詩、安持。安詩在元祐時爲諫官、 爲相務安靜。 性沉密,對家人語,未嘗及國家事,所言於上, 起居郎。安持爲都水使者,遷工部 世謂充心正而力不足,譏其知不可

空兼侍中, 諡曰正憲。

侍郎,終天章閣待制。 安詩子儲、安持子侔、官皆員外郎、坐與妖人張懷素通謀、誅死。

赋,至則悉除無名之算,民皆感泣。使還,或言其多弛賦租。帝詰之,對曰:「使新附之邦, 王珪字禹玉,成都華陽人,後徙舒。曾祖永,事太宗爲右補闕。吳越納土,受命往均

蒙天子仁恩,臣雖得罪,死不恨。」帝大悅。

皆盛服入。至是,欲便服,妄云衣冠在後乘。眭命取授之,使者愧謝。遂爲賀正旦使。進知 就耳。」舉進士甲科,通判揚州。吏民皆少珪,有大校嫚不謹,捽置之法。王倫犯淮南,珪 制誥、知審官院,爲翰林學士、知開封府。遭母憂,除喪,復爲學士,兼侍讀學士。 議出郊掩擊之,賊遁去。召直集賢院,爲鹽鐵判官、修起居注。 接伴契丹使,北使過魏,舊

|祐立皇子,中書召||佳作韶,珪曰:「此大事也,非面受旨不可。」 | 明日請對,曰:「海內望此舉久 矣,果出自聖意乎。」仁宗曰:「朕意決矣。」珪再拜賀,始退而草詔。歐陽脩聞而歎曰:「眞 後宮有廟,所以廣恩也,而僭乎饗親。」於是專以太祖侑于郊,而改温成廟爲祠殿。 先是,三聖並侑南郊,而温成廟享獻同太室。珪言:「三后並配,所以致孝也,而瀆乎饗

列傳第

七十一

王珪

筆、墨、牋、硯賜之。

學士也。」帝宴寶文閣,作飛白書分侍臣,命珪識歲月姓名。 再宴羣玉,又使爲序,以所御

之。 位,遷學士承旨。 珠殿,傳詔令兼端明殿學士,錫之盤龍金盆,諭之曰:「祕殿之職,非直器卿于翰墨間 若云受之於天者。 熙寧三年,拜參知政事。 員缺,卽出命矣。 三夫人之稱,卒如初議。 濮王追崇典禮,珪與侍從、禮官合議宜稱皇伯,三夫人改封大國,執政不以爲然。 英宗立,當撰先帝諡,珪言:「古者賤不誄貴,幼不誄長,故天子稱天以誄之,制諡於郊, **珪典內外制十八年,最爲久次,嘗因展事齋宮,賦詩有所感,帝見而憐之。** 近制,唯詞臣撰議,庶僚不得參聞,頗違稱天之義。請令兩制共議。」從 囊有讒口,朕今釋然無疑。」珪謝曰:「非陛下至明,臣死無日矣。」神宗即 始,珪之請對而作詔也,有密譖之者。 九年,進同中書門下平章事、集賢殿大學士。 英宗在位之四年,忽召 凹,二府 其後 至藥

能 意以爲既用兵深入,必不召光,雖召,將不至。 史大夫,非司馬光不可。」珪、確相顧失色。 珪憂甚,不知所出。 下侍郎,以蔡確爲右僕射。 任責,則相位可保也。」珪喜,謝確。 元豐官制行,由禮部侍郎超授銀靑光祿大夫。五年,正三省官名,拜尚書左僕射兼門 先是,神宗謂執政曰:「官制將行,欲新舊人兩用之。」又曰:「御 帝嘗欲召司馬光,珪薦俞充帥慶,使上平西夏策。 已而光果不召。永樂之敗,死者十餘萬人, 確曰:「陛下久欲收靈武,公

實哇啓之。

大夫, 封岐國公。五月, 卒於位, 年六十七。特輟朝五日, 賻金帛五千, 贈太師, 諡曰文恭。 八年,帝有疾,珪白皇太后,請立延安郡王爲太子。太子立,是爲哲宗。進珪金紫光祿

賜壽昌甲第。

位,還其官封。 恕謗起,黃履、葉祖洽、劉拯交論珪元豐末命事,以爲當時兩府大臣,嘗議奏請建儲,珪輒 殿進呈,云「取聖旨」;上可否訖,云「領聖旨」;退諭稟事者,云「已得聖旨」也。 稱之。然自執政至宰相,凡十六年,無所建明,率道諛將順。當時目爲「三旨相公」,以其上 士 京 故 兄 士 充 , 傳 道 言 語 於 禁 中 。 語李淸臣云:「他自家事,外庭不當管。」恕又誘敎高瓊裕(も)子士京上奏,言珪欲立雍王,遣 **珪以文學進,流輩咸共推許。其文閎侈瓌麗,自成一家,朝廷大典策,多出其手,詞林** 蔡京秉政,復奪贈謚。 政和中,又復之。」珪季父罕,從兄供。 紹聖中,那 徽宗即

明年訴牒至,按圖示之,某戶可免,某戶不可免,衆皆服。 西方用兵,仍年科箭羽于東南,價踊貴,富室至豫貯以待鬻。 罕自郡守,倍其直市之,而令 罕字師言,以蔭知宜興縣。縣多湖田,歲訴水,輕重失其平。罕躬至田處,列高下爲圖, 范仲淹在潤,奏下其式于諸道。

列

第七十一

王珪

民輸錢。 罕白是特歲久丹漆黯闇,但當致飾耳,榱櫨皆如故,唯易一楹,省緡錢十萬。 旁州聞之,皆願如常州法。 累遷戶部判官。 修太宗別廟,中貴人大慮材,將一新

八輩, 許以官秩、金帛,使爲甲首。久之,無至者。 盜, 告屬城,做 六,穿于革,以木爲鼻,使持之自蔽。 六百人,尉所部亦至。 發里民,補 「吾屬皆有 家亦受困,非不欲歸,顧獨歸無益,當求所以相濟者。」遂還惠州。 州之惡少年正相率爲 里落驚擾,惠人要罕出城,及郊, 出 皆梟首 爲廣 而行之。 壯丁,每長二百人;又令邑尉增弓手二千。 田客,欲給以兵,使相保聚。」罕曰:「有田客者如是,得矣,無者奈何?」乃呼耆長 東轉運使。 |決口置道左,傳曰:「此耆長發爲壯 於是染庫帛為旗,授之。 **慢智高入寇,罕行部在潮,廣州守仲簡自圍中遣書邀罕,** 斷苦竹數千,銛其末,使操爲兵。 遮道求救護者數千計。 有婦 丁不肯行者也。」觀者始有 割牛革爲盾形, 人訴爲僕奪釵珥,捕得之, 巳時下令,約 罕擇父老可語者問以策,日: 柔之湯中, 申而 悉出公私戎器。 集。 怖 每盾 **丼執奪攘者十** 色。 募有方略者, 削 至期,得 竹籤 檄

三十步,見已嚴備,不敢犯。 順 流 而 數 ቮ 日<sub>,</sub> 衆大振, 向之惡少年, 皆隸行 將至廣,悉衆登岸,斬木爲鹿角, 罕徐開門而入,智高遂解去。 伍, 積高數似,營于南門。 無敢動。 乃簡卒三千,方舟 時南道郵驛斷絕,罕上事,不得 智高戴黃蓋 建旗,伐鼓作樂, 臨觀, 相去

罕實 通; 有 而 罕呼宗旦子日新謂之曰:「汝父內爲交阯所仇,外爲邊將希賞之餌,非計也。 功, 提點刑獄鮑軻遁處南雄,數具奏。及賊平,軻受賞,罕謫監信州酒。 復以爲 西路轉運使。 或傳智高不死,走火峒,儂宗旦據險聚衆,邕守蕭注謀擊 安撫使孫沔言 汝歸報

擇利

而爲之。」於是父子俱降。

兄之子珪少孤,罕教養有恩,後珪貴,每予書,必以盛滿爲戒云 愈,郡 子,夫死, 出 言無章,却之則勃駡,前守每叱逐之。 徙 人傳爲神明。 知 潭州。 妾有子, 擢戶部、度支副使,復爲潭州。 逡逐婦而據家資,屢訴不得直, 監司上治狀, 敕書褒論, 罕獨引至前,委曲徐問, 賜絹 爲政務適人情,不加威罰。 三百。 因憤 志發狂。 徙 知明州 、久稍可曉,乃本爲 罕爲治妾而反其資,婦良 以光祿卿卒,年八十。 有狂婦數訴事, 人妻,無

田,減度僧,罷鬻爵,禁錦綺、珠貝,行鄉飲、籍田,復制科,興學校。 琪 字君玉,兒童時已能爲歌詩。 起進士,調江都 主簿。 上時務十二事,請建義倉,置營 仁宗嘉之,除館閣校勘、

集賢校理

列

僔

第

七十

王珪

報,先振以公租,守以下皆不聽,與挺身任之。 帝宴太清樓,命館閣臣作山水石歌,琪獨蒙褒賞。 知復州,民毆佃客死,吏論如 詔 通判舒州。 歲饑,奏發廩救民,未 律。 琪疑之,留

注、鹽 未決, 一鐵判官、判戶部勾院、知制誥。 已而新 制下,凡如是者聽減死。 嘗入對便殿,帝從容謂曰:「卿雅有心計,若三司缺使, 歷開封府推官、直集賢院、兩浙淮南轉運使、修起居

當無以易卿。」

鄧州, 河反 轉運使欲浚常、潤漕河, 召令廂邏,具爲作賞捕之法,未幾,得姦人,誅之,火患遂息。 (狹,舟不得方行,公私交病。 會奉使契丹,因感疾還,上介誣其詐,責信州團練副使。 徙揚州, 入判太常寺,又出知杭州,復爲揚州、潤州。 琪陳其不便, 詔寢役。 徙知江寧。 先是,府多火災,或託以鬼神, 而後議者卒請廢古城埭,破古函管而浚之, 以禮部侍郎致仕。 復知制誥, 久之,以龍圖閣待制 加 樞 人不敢救。 .密直學士、知 卒,年七十 知潤州。

客頗闊略。 | 琪 性孤介,不與時合。 問造飛語起謗,終不自恤。 數臨 東南名鎭,政尚簡靜。 葬于眞州。 詔眞、揚二州發卒護其窆,蓋異數也 每疾俗吏飾廚傳以沽名譽,故待賓

然皆挾術任數,公亮疾琦專任,薦王安石以間之,升之陰助安石,陽爲異同,以避淸議,二人 諭 日:公亮靜重鎭浮,練達典憲,與韓琦並相,號稱老成。 升之自爲言官,卽著直聲。

措慮如此,豈誠心謀國者乎?新法之行,何望其能正救也。及安石去位,充、哇實代之,天 **莲容身固位,於勢何所重輕,而陰忌正人,以濟其患失之謀,鄙夫可與事君也與哉!** 

#### 校勘記

- (1) 以琦兼秦鳳經略安撫招討使 「招討」原在「安撫」上,據上下文及長編卷一三四、一三八乙正。
- 左衞將軍韓嘉彦,公主歷封溫、曹、冀、雍、越、燕六國。封齊國未見記載。 按本書卷二四八公主傳、宋會要帝系八之三〇,神宗女唐國長公主降

(三) 嘉彦尙神宗女齊國公主

- (三)天章閣 畢仲游西臺集卷一五丞相儀國韓公行狀、長編卷三〇六都作「寶文閣」。
- 太傅 原作「太保」,據長編卷二三四、琬琰集中編卷五二會肇會公亮行狀改。
- 至 降恩賞、委二府劾奏正其罪、仍榜御史臺、閣門」。 韶委三省劾正其罪仍揭於朝堂 按琬琰集下編卷一五陳成肅公升之傳,作「乃下詔,凡僥求內
- **公** 時文彥博呂公弼既爲使 著」誤,據改。 公阿,卷二一一宰輔表同。 「呂公朔」原作「呂公著」。按本書卷一六二職官志記此事爲文彥博、呂 呂公著此時尚未入樞府,其除同知樞密院事在元豐元年。作「呂公

(七) 高選裕

Ì

## 列傳第七十二

# 富弼 子紹庭 文彦博

其禁。 聞契丹果罷宴,帝深悔之。時禁臣僚越職言事,弼因論日食,極言應天變莫若通下情,遂除 食正旦,弼請罷宴徹樂,就館賜北使酒食。執政不可,弼曰:「萬一契丹行之,爲朝廷羞。」後 直集賢院。趙元昊反,弼疏陳八事,乞斬其使者。召爲開封府推官、知諫院。 淹坐爭廢后事貶,弼上言:「是一舉而二失也,縱未能復后,宜還仲淹。」不聽。通判絳州,遷 學,有大度,范仲淹見而奇之,曰:「王佐才也。」以其文示王曾、晏殊,殊妻以女。 仁宗復制科,仲淹謂弼:「子當以是進。」舉茂材異等,授將作監丞、簽書河陽判官。 富弼字彥國,河南人。初,母韓有娠,夢旌旗鶴鴈降其庭,云有天赦,已而 康定元年,日 仲

降賊。 蹈乎 堂吏有僞爲僧牒者,開封 之,於是從弼言。 轄。 厚賞以勸來者。 丽 元 言:「用守贇既爲天下笑,今益以守忠,殆與唐監軍無異。 弼 請按竟其獄,德和坐要斬。 寇鄜延,破金明,鈴轄盧守懃不救,內侍黃德和引兵走, 罷守忠。 事下中書, 除鹽 又請令宰相兼領樞密院。 鐵判官、史館修撰,奉使契丹。 不 · 敢治。 宰 一相初不 弼白執政,請 知 夏守贇江為陝西都部署, 也。 弼歎曰:「此豈 時西夏首領二人來降,但補借奉職。 以吏付獄,呂夷簡不悅 慶曆二年,爲知制誥,糾察在京刑獄。 小事,而宰相不 又以入內都知王守忠爲 守熟、德和覆車之轍,可復 大將劉平戰死, 知邪 徳和 弼言當 更極論 誣

矣。」

別

具

以 語,英感悅, 憂臣 敢行,夷簡 「昔使北,病臥車 辱,臣 會 契丹屯兵境上,遣其臣 因 不敢愛其死。」帝爲動色,先以爲接伴。 聞。 亦不 [是薦 帝唯 復隱其情, 丽 許 中, 歐陽脩引顏眞卿使李希烈 增歲幣,仍以宗室女嫁其子 聞 命 遂密以其主所欲得者告曰:「可從,從之,不然,以一 蕭英、劉六符來求關南 輒 起。 今中使至而 事 君不 英等入境, ٠, 請留之,不報。 地。 拜, 朝 何也? 廷擇報 中使迎勞之,英託 」英矍然起 、聘者, 骊 卽 皆以其情叵 入 對 拜 叩 疾 事塞之足 不 頭 開 開 拜。 |測,莫 懷 與 | 弼

六符來館客。 進 骊 樞密直 學士,辭曰:「國家有急,義不憚勞,奈何逆 以官爵路之。」 遂爲使報 旣

列傳第七十二 富弼

欲用 專其 章聖 歲幣盡歸人主,羣臣何利焉?」契丹主大悟,首肯者久之。關又曰:「塞鴈門者,以備元昊也。 以 代 吾不知其詳。 塘水始於何承矩,事在通好前。 何爲? ·兵,能保其必勝乎?就使其勝,所亡士馬,羣臣當之歟,抑人主當之歟?若通好不絕**,** 皇帝之大德乎? 獨克,然壯士健馬物故太半。 、利,而臣下無獲;若用兵, 若各求地,豈北朝之利哉?」 羣臣請舉兵而南,吾以謂不若遣使求地,求而不獲, 然所欲得者,祖宗故地耳。」弼曰:「晉以盧龍路契丹,周世宗復取關南,皆異 澶淵之役,苟從諸將言,北兵無得脫者。 則利歸臣下, 而人主任其禍。 城隍皆修舊,民兵亦補闕,非違約也。」契丹主曰:「微卿言, 今中國提封萬里,精兵百萬,法令修明,上下一心, 欺天叛君,末帝昏亂,土宇狹小,上下離叛,故契丹 舉兵未晚也。」弼曰:「北朝忘 且北朝與中國通 故勸用兵者,皆爲 好, 身謀耳。」 則 北朝 人主

不在 若 豈敢妄以 必 我。 丽 欲得地,是志在敗盟,假此爲詞耳。 既退,六符曰:「吾主恥受金帛,堅欲十縣,何如?」」腑曰:「本朝皇帝言,朕爲祖宗守國, 反 覆陳 天地 土地與人。北朝所欲,不過租賦爾。朕不忍多殺兩朝赤子,故屈己增幣以代之。 必不 鬼神,其可欺乎!」明日, 可狀,且言:「北朝旣以得地爲榮,南朝必以失地爲辱。兄弟之國,豈可使 契丹主召弼同獵,引弼馬自近,又言得地則歡好 澶淵之盟,天地鬼神實臨之。 今北朝首發兵端,過 町

使歸,曰:「俟卿再至,當擇一受之,卿其遂以誓書來。」 榮一辱哉?」獵罷,六符曰:「吾主聞公榮辱之言,意甚感悟。 易生嫌隙。 本朝長公主出降,齎送不過十萬緡,豈若歲幣無窮之利哉?」契丹主論弼 今惟有結昏可議耳。」弼曰:

之。」復 後頡利 注日 故不 丹主 者而 行。及至,契丹不復求婚,專欲增幣,曰:「南朝遺我之辭當曰『獻』,否則曰 「增歲幣非臣本志,特以方討元昊,未暇與角,故 **憚更成,何名爲懼?** 始受命,聞一 不見國書,脫書詞與口 哪 使 卿 爲太宗所擒, :「南朝旣懼我矣,於二字何有? 歸 勿固執,古亦有之。」弼曰:「自古唯唐高祖借兵於突厥,當時贈遺, 復命,復持二議及受口傳之詞于政府以往。行次樂壽,謂副使張茂實曰:「吾爲使 劉六符 **女**卒; 豈復有此禮哉 再命,聞一子生,皆不顧。 或不得已至於用兵, 傳異,吾事敗矣。」啓視果不同,卽 若我擁兵而 則當以曲 不敢以死爭,其敢受乎 又除 三南、得無悔乎!」弼曰:「本朝兼愛南北, 直爲勝負, 樞密直學士,遷翰林學士,皆懇辭, 可勿許也。」 馳還都,以晡時入見, 非使臣之所知 乃曰: 朝廷竟以「納」字與 『納』。」弼爭之,契 「吾當 或稱 自遣 獻納。 也。」契丹 易書而 人議 其

言:「契丹旣結好,議者便謂無事,萬一敗盟,臣死且有罪。 三年,拜樞密副使,辭之愈力,改授資政殿學士 兼侍讀學士。 願陛下思其輕侮之恥,坐薪嘗 七月,復拜樞密副 使。 骊

第七十二 富弼

列傳

遼故 書其所欲爲者;且命仲淹主西事,弼主北事。 進賢退不肖、止僥倖、去宿弊爲本,欲漸易監司之不才者,使澄汰所部吏,於是小人始不悅 膽,不忘修政。」以誥納上前而罷。 也。」弼 乃受。 帝銳以太平責成宰輔,數下詔督弼與范仲淹等,又開天章閣,給筆札,使 踰月,復申前命,使宰相諭之曰:「此朝廷特用,非以使 

得志,中弼以飛語。 阴懼,求宣撫河北,還,以資政殿學士出知鄆州。 寇我哉?」或請調發爲備,弼曰:「如此正墮其計,臣請任之。」帝乃止,契丹卒不動。 夏竦不 幣,元昊有怨言,故城威塞以備之。呆兒屢寇威塞,契丹疑元昊使之,故爲是役,安能合而 中,移青州,兼京東路安撫使。 帝疑二邊同謀。 不可許。」乃却其使,卒臣之。四年, 元昊遣使以書來,稱男不稱臣。 弼曰:「兵出無名, 契丹不爲也。元昊本與契丹約相左右,今契丹獨獲重 契丹受禮雲中, 且發兵會元昊伐呆兒族, 於河東爲近, 弼言:「契丹臣元昊而我不臣,則契丹爲無敵於天下, 歲餘,讒不驗,加給事

勞,約他日爲奏請受賞。 以 便薪水。 河 官吏自前資、待缺、寄居者,皆賦以祿,使卽民所聚,選老弱病瘠者廩之,仍書其 率五日,輒遣人持酒肉飯糗慰藉,出於至誠,人人爲盡力。 山林陂

守臣職 近受粮 澤之利 日 不得粥而仆,名爲救之,而實殺之。自聞立法簡便周盡,天下傳以爲式。 歸 也。」辭不受。前此,救災者皆聚民城郭中,爲粥食之,蒸爲疾疫,及相蹈藉, 可資以 凡活五十餘萬人,募爲兵者萬計。 生者,聽流民擅取。 死者爲大冢葬之,目曰「叢冢」。 。帝聞之,遣使褒勞, 拜禮部侍郎。 明年,麥大熟,民各以遠 弼曰:「此 或待哺

史。 使、 至青, 之,復以爲禮部侍郎,又辭不受。遷大學士,徙知鄭、蔡、河陽, 日,士大夫相 止 宿 情 判并 連 如 | 丽度其可用,密付以事,使馳至齊,發吏卒取之,無得脫者。 夕, 則 此 州 哉? 叛,齊州禁兵欲應之,或詣弼告。 每 慶於朝。 事皆關白乃行, 至和二年, 帝微覘知之,以語學士歐陽脩曰:「古之命相,或得諸夢 召拜同中書門下平章事、集賢殿大學士,與文彥博並命。 帝弗豫,大臣不得見,中外憂慄。 宮內肅然,語在意博傳。 齊非弼所部,恐事泄變生,適中貴人張從訓銜命 嘉祐三年,進昭文館大學士、監修國 弼、 
彦博入問疾,因託禳 加觀文殿學士,改宣 即自劾顓擅之罪,帝 卜,豈若 宣 徽 制之 禬 今日 南 益 事 院

變禮,不可施於平世,卒不從命。 六年三月,以母 丽 爲 相,守典故,行故事,而傅以公議,無容心於其間。 憂去位,詔 爲 罷春宴。 英宗立,召爲樞密使。 故事,執政遭喪皆起復。 居二年,以足疾求解,拜鎮海軍節 當是時, 帝虚位五起之,弼謂 百官 任 職,天下無事 此 金革

度使、同中書門下平章事、判揚州,封祁國公,進封鄭。

欲以集禧觀使留之,力辭赴郡。 問邊事,對曰:「陛下臨御未久,當布德行惠,願二十年口不言兵。」帝默然。 命毋拜,坐語,從容訪以治道。弼知帝果於有爲,對曰:「人主好惡,不可令人窺測;可測,則 下侍郞同平章事。 姦人得以傅會。 熙寧元年,徙判汝州。 當如天之監人,善惡皆所自取,然後誅賞隨之,則功罪無不得其實矣。」又 韶入覲,許肩輿至殿門。神宗御內東門小殿,令其子掖以進,且 明年二月,召拜司空兼侍中,賜甲第,悉辭之,以左僕射、門 至日昃乃退。

張,大抵小人惟喜生事,願深燭其然,無使有悔。」是時久旱,羣臣請上尊號及用樂,帝不許, 願深加辨察,勿以同異爲喜怒、喜怒爲用捨。陛下好使人伺察外事,故姦險得志。又多出 亂之機,不可以不速救。」卽上書數千言,力論之。又言:「君子小人之進退,繫王道之消長, 從之,即日 親批,若事事皆中,亦非爲君之道;脫十中七八,積日累月,所失亦多。今中外之務漸有更 天,何事不可爲者!此必姦人欲進邪說,以搖上心,使輔拂諫爭之臣,無所施其力。是治 而以同天節契丹使當上壽,故未斷其請。」
弼言此盛德事,正當以此示之,乞幷罷上壽。 時有爲帝言災異皆天數,非關人事得失所致者。 弼又上疏,願益畏天戒,遠姦佞,近忠良。 弼聞而數曰:「人君所畏惟天,若不畏 帝手詔褒答之。

用事

,雅不與弼合。

弼度不能爭,多稱疾求退,章數十上。

神宗將許之,問日:

安石 以 進 寧節度使、同中書門下平章事、判河南,改亳州。 無所告訴 拜 由 卿 退,以 沮 解倒縣之急。 即去, 空, .姦?」帝不答。 日:「弼雖責,猶不失富貴。 持不行。 全王 進封 ,但仰 可代卿者?」阴薦文意博,神宗默然,良久曰:「王安石何如?」阴亦默然。 師 韓國公致仕。 屋竊歎』 提舉官趙濟劾弼格詔旨,侍御史鄧綰又乞付有司鞫治, 帝雖不 契丹爭河東地界,言其不可許 盡用, 者,卽當至矣。」其敬之如 | 踊雖家居,朝廷有大利害,知無不言。 而眷 昔縣以方命殛,共工以象恭流, 弼兼此二罪, 禮不 衰, 嘗因安石 此 青苗法出,弼以謂如是 星 有所建明,卻之日:「富弼手疏稱 文有變,乞開 願歸洛養疾。」許之。 廣言 郭逵討安南, 路; 則財聚於上, 乃以僕射 又請 止奪 乞韶逵擇利 遂 速改新法, **您請老,** 使 判 以相, 何 『老臣 汝 加

言,以爲 立 儲 嗣 元 豐 司徒。 會翌 三年, 日 六年八月,薨,年八 1有瘳, 王堯臣之子 其事遂寢。」帝以問彥博, 同老上言:「故父參知政 + 手封遺奏,使其子紹庭上之。 對與同老合, 事 時,當仁宗服藥, 帝始 知至 其大略云 和 嘗與弼及文意博議 時 事 嘉州

臣,下及多士,畏禍圖利,習成敝風,忠詞讜論,無復上達。 即位 之初, 邪臣納說圖 任之際, 聽受失宜,上誤聰明, 臣老病將死,尚何顧求?特 浸成禍 息。 今上自

以不忍上負聖明,輒傾肝膽,冀哀憐愚忠,曲垂采納。

若寢罷以綏懷之。 稍遂生理。 禍之時乎?天地至仁,寧與|羌夷校曲直勝負?願歸其侵地,休兵息民,使關、陝之間 小人之辨耳。 去年永樂之役,兵民死亡者數十萬。 棄陝西再團保甲,又葺教場,州縣奉行,勢侔星火,人情惶駭,難以復用,不 陛下審觀天下之勢,豈以爲無足慮邪? 臣之所陳,急於濟事。 若夫要道,則在聖人所存,與所用之人君子、 今久戍未解, 百姓困窮, 豈諱過恥敗不思救

帝覽奏震悼,輟朝三日,內出祭文致奠,贈太尉,諡曰文忠。

喜愠 初,詔復舊典焉。 良,求天下不亂,不可得也。」其終身皆出於此云。元祐初,配享神宗廟庭。 曰「顯忠尙德」,命學士蘇軾撰文刻之。紹聖中,章惇執政,謂弼得罪先帝,罷配享。 而退,樂道無悶。小人不勝,則交結搆扇,千岐萬轍,必勝而後已。迨其得志,遂肆毒於善 弼性至孝,恭儉好修,與人言必盡敬,雖微官及布衣謁見,皆與之亢禮,氣色穆然,不見 其好善嫉惡,出於天資。常言:「君子與小人並處,其勢必不勝。君子不勝,則奉身 哲宗篆其碑首 至靖康

紹庭字德先,性靖重,能守家法。 列 七 -|-富 骊 文 彦 博 弼薨, 兩女與婿及甥皆同居, 紹庭待之與父時不殊, 一〇二五七

宗嘉之,擢 別有傳。 初,除提舉河北西路常平,辭曰:「熙寧變法之初,先臣以不行青苗被罪,臣不敢爲此官。」 瀔 家之事毫髮不敢變, 祠 部員外郎。 族里稱焉。 未幾,出知宿州。 歷宗正丞、提舉三門白波輦運、 卒,年六十八。 子直柔,紹興中,同知樞密院事, 通判絳州。 建中靖國

高若訥從類昌史炤學, 炤母異之, 曰:「貴人也。」待之甚厚。 文彥博字寬夫,汾州介休人。 其先本敬氏,以避晉高祖及宋翼祖諱改焉。 及進士第, 知翼城縣, 少與張昇、 通判絳

州口,爲監察御史,轉殿中侍御史。

居無事 誣劉 副使。 鞫治得實。 今案具矣,宜亟還,事或弗成,彥博執其咎。」德和幷奴卒就誅。 |平降虜也,以金帶賂||平奴,使附己說以證。||平家二百口皆械繫。 西 時爾。 方用兵,偏校有臨陳先退、望敵不進者,大將守著令皆申覆。 鱗州 (三) 餉道回遠,銀城河外有唐時故道,廢弗治,彥博父洎爲轉運使日,將復之,未 德和黨援盛,謀翻其獄,至遣他御史來。 今擁兵數十萬,而將權不專,兵法不峻,將何以濟?」仁宗嘉納之。 **彦博拒不納,日**:「朝廷慮獄不就,故遣 彦博言:「此可施之平 以直史館為河東轉運 詔彥博置獄于河中 黃德和之

景論 故事 時邪? 」知開封府王素夜叩宮門上變,不使入,明旦言,

列

傳

第 七

+

文 彦 博 杖 轉 及 而卒。 運 一卒,不伏。 使, 連進龍 **彥博嗣成父志,益儲粟。** 呼入問狀,令引出與杖,又不受,復呼入斬之,竟毬乃歸。 圖 閣、 、樞密直 |學士、知秦州 元昊來寇,園城 改益 十日, 州 知有備, **嘗擊毬針轄**廨, 解去。 聞 遷天章閣待制、都 召拜樞密副使、參 外 喧甚,乃卒長

知

政

學士。 博曰:「今公私困竭,正坐兵冗。 與樞密使靡籍議省兵,凡汰爲民及給半廩者合八萬,論者紛然,謂必聚爲盜,帝亦疑焉。 士、知許州, 文館大學士,與富弼同拜,士大夫皆以得人爲慶,語見弼傳。 同中書門下平章事、集賢殿大學士。 貝州 御史唐介劾其在蜀日以奇錦結宮掖,因之登用。 王則反,明鎬討之,久不克。 改忠武軍節度使、知永興軍。 脫有難,臣請死之。」其策訖行,歸兵亦無事。 薦張瓌、韓維、王安石等恬退守道,乞褒勸以厲風 **彦博請行,命爲宣撫使,** 至和二年,復以吏部尚書同中書門下平章事、昭 介旣貶,彥博亦罷爲觀文殿大學 旬日賊潰, 檻則送京師。 進昭文館大 拜

告,不 言。」 彥博 叱之曰:「爾曹出入禁闥,不令宰相 彦博曰:「此 爾、當 行軍法。」又 與同列劉沆、富弼 謀啓醮 知天子起居,欲何爲邪?自今疾勢增損 大慶殿,因留宿殿廬 志聰曰:「無故 有禁卒告都 事。」 必以

三年正月,帝方受朝,疾暴作,扶入禁中。

**彦博呼內侍史志聰問狀,對曰:「禁密不敢漏** 

虞候 日:「然則卒有怨,誣之耳。 人欲爲 流欲捕治,意博召都指揮使許懷德,問都虞候何如人,懷德稱其愿可保。意博 當亟誅之以靖衆。」乃請沈判狀尾,斬於軍門。

吳中復乞召還唐介。 責之太深,請如中復奏。 時以彥博爲厚德。 久之,以河陽三城節度使同平章事、判河南府, |潔 灼, 事 ? 繼隆 之,彥博曰:「彼本不敢妄言,有敎之者耳。」繼隆默不敢對。 致上 之曰:「汝今日 素惡弼,陰約 在 退,乃出 於中 東 所教 沆 汝罪當族 先 密白 北, 不安。 是,
丽用朝士李仲昌策,自澶州商胡河穿六漯渠,入横壠故道(至)。 宮不安。」 也。 非正 狀示 帝曰:「陛下違豫時,彥博擅斬告反者。」彥博聞之,以沉 內侍武繼隆, :有所言乎?」曰:「然。」彥博曰:「天文變異,汝職所當言也。 !」二人懼,色變。 **彦博知其意有所在,然未有以制之。** 史志聰以其狀白執政。 北也。 同列。 衆皆曰: 彥博因言,介頃爲御史,言臣 帝疾愈,彥博等始歸第。 同 .列皆憤怒曰:「奴敢爾僭言, 令司天官二人俟執政聚時, 「善。」旣而 **彦博曰:「觀汝直狂愚耳,未忍治汝罪,自 彥博視而懷之,不以示同列,而有** :議遣司天官定六漯方位,復使二人往。 當是時,京師業業,賴彥博、弼持重, 事多中臣病,其間雖有風聞之誤,然當時 後數日,二人又上言,請皇后同聽政,亦 何不斬之?」 彥博曰:「斬之, 於殿庭抗言國家不當穿河于北方, 二人至六漯,恐治前罪, 判呈,帝意乃解。 喜色,徐召二人詰 今無得復然。」二 何得輒 北京留守賈昌朝 繼隆 頂 國家大 衆心 更言六 則 白 請 御 事 史 彰 溜

緩。 封潞國公,改鎭保平、判大名府。 已而彥博去位,其後弼亦以憂去。彥博旣服闋,復以故官判河南,有詔入覲。英宗曰: 初,仁宗之不豫也,彥博與富弼等乞立儲嗣。仁宗許焉,而後宮將有就館者,故其事 丁母憂,英宗卽位,起復成德軍節度使,三上表乞終喪,許之。 又改鎭成德,遷尙書左僕射、判太原府。俄復鎭保平、判河

聞始議,卿於朕有恩。」彥博遜避不敢當。帝曰:「暫煩西行,卽召還矣。」尋除侍中,徙鎭淮 南、判永興軍,入爲樞密使、劍南西川節度使。 力之有?兼陛下登儲纂極之時,臣方在外,皆韓琦等承聖志受顧命,臣無與焉。」帝曰:「備 「朕之立,卿之力也。」彥博竦然對曰:「陛下入繼大統,乃先帝聖意,皇太后恊贊之力,臣何

於帝 戰。 所爲,以紊朝著。」固辭乃止。夏人犯大順,慶帥李復圭以陳圖方略授鈴轄李信等, 更張之過也。 曰:「國朝樞密使,無位宰相上者,獨曹利用嘗在王曾、張知白上。臣忝知禮義,不敢效利用 「求去民害,何爲不可? 曰:「朝廷行事,務合人心,宜兼采衆論,以靜重爲先。 熙寧二年,相陳升之,詔三彥博朝廷宗臣,其令升之位彥博下,以稱遇賢之意。」彥博 祖宗法未必皆不可行, 若萬事隳脞,乃西晉之風,何益於治?」御史張商英欲附安石,撫樞 但有偏而不 舉之敝爾。」安石 陛下厲精求治,而人心未安,蓋 知爲已發,奮然排之曰: 慶州兵亂,彥博言 趣使出

列傳第七

+

文

彦博

密使他事以搖彥博,坐不實貶。 爲安石所惡,力引去。 拜司空、河東節度使、判河陽,徙大名府。 **彥博在樞府九年,又以極論市易司監賣果實,損國體斂民** 身雖在外, 而帝眷有

舊德,故煩臥護北門,細務不必勞心。輔之小臣,敢爾無禮,將別有處置。」未幾,罷去。初,選 御 核實,彥博言:「河非杷可濬,雖甚愚之人,皆知無益,臣不敢雷 信之,遣都水丞范子淵行其法。 知制誥熊本等行視,如彥博言。 人有李公義者,請以鐵龍爪治河,宦者黃懷信沿其制爲濬川杷,天下指笑以爲兒戲,安石 史蔡確亦論本奉使無狀。 時監司多新進少年,轉運判官汪輔之輒奏彥博不事事,帝批其奏以付彥博曰:「以侍中 本等皆得罪,獨彥博勿問。 子淵乃請覲,言本等見安石罷,意彥博復相,故傅會其說。 子淵奏用杷之功,水悉歸故道,退出民田數萬頃。 尋加 司 同罔上。」疏至,帝不 徒。 悦,復遣 詔 大名

之, 彥博以前對英宗者復于帝曰:「先帝天命所在, 神器有歸, 實仁祖知子之明, 慈聖 弗果行。 也。」彥博曰:「如周勃、霍光,是爲定策。 力,臣等何功?」帝曰:「雖云天命,亦繫人謀。 元豐三年,拜太尉,復判河南。 其後韓琦等訖就大事,蓋琦功也。」帝曰:「發端爲難,是時仁祖意已定,嘉祐之末, 於是王同老言至和中議儲嗣事, 自至和以來,中外之臣獻言甚衆,臣等雖嘗有請, 卿深厚不伐善,陰德如丙吉,眞定策社 **彦博適入朝**, 神宗問 主擁佑之

施,兩遣中謁者遺詩祖道,當世榮之。 止 詔爾。 正如丙吉、霍光,不相揜也。」遂加彥博兩鎮節度使,辭不拜。 將行,賜宴瓊林

筵,思禮甚渥。 宣仁后將用爲三省長官,而言事者以爲不可,乃命平章軍國 太師,諡曰忠烈 司馬光,詆毀先烈,降太子少保。卒,年九十二。 而 去。 久之,請老,以太師致仕,居洛陽。 中正經制邊事,所過稱受密旨募禁兵,將之而西。 然彥博無歲不求退,居五年,復致仕。 元祐初,司馬光薦彥博宿德元老,宜起以自輔。 崇寧中,預元祐黨籍。 紹聖初,章惇秉政, 彥博以無詔拒之,中正亦不敢募 重事,六日一朝,一月兩赴經 後特命出籍, 言者論意博朋附 追復

館客,與使入覲,望見彥博於殿門外,却立改容曰:「此潞公也邪?」問其年,曰:「何壯也!」 飽彥博,詔許之。 家有不逮。」使者拱手曰:「天下異人也。」旣歸洛,西羌首領温溪心有名馬,請於邊吏,願以 彦博逮事四 一朝,任將相五十年,名聞四夷。 其爲外國所敬如此。 其綜理庶務,雖精練少年有不如,其貫穿古今,雖專門名 元祐間,契丹使耶律永昌、劉霄來聘,蘇軾

兄弟皆以道自重,賓接之如布衣交。 彥博雖窮貴極富,而平居接物謙下,**尊德樂善,如恐不及**。 與富彌、司馬光等十三人,用白居易九老會故事 其在洛也,洛人邵雍 一置酒 元、程顥

列傳第

七十

文彦博

以聞。 汴,而主者遏絕洛水,不使入城中,洛人頗患苦之。<br/>
彥博因中使劉惟簡至洛,語其故,惟簡 賦 詩相樂,序齒不序官,爲堂,繪像其中,謂之「洛陽耆英會」,好事者莫不慕之。神宗導洛通 詔令通行如初,遂爲洛城無窮之利

邢恕持及甫私書造梁燾、劉擊之謗,逮詣詔獄,及甫有憾於元祐,從而實之,亦坐奪職。 **| 彦博再致仕,及甫知河陽,召爲太僕卿,權工部侍郎,罷爲集賢殿修撰、提舉明道宮。** 部員外郎,以直龍圖閣知同州。彥博平章軍國,及甫由右司員外郎引嫌改衞尉、光祿少卿。 彥博八子,皆歷要官。 第六子及甫,初以大理評事直史館,與邢恕相善。 元祐初,爲吏 蔡渭、

幾,復之,卒。

弼、彥博相繼以老,儉人無忌,善類淪胥,而宋業衰矣!書曰:「番番良士,膂力旣愆,我尚有 臣之風,又皆享高壽於承平之秋。 來朝,仰望風采,其德望固足以折衝禦侮於千里之表矣。至於公忠直亮,臨事 能 使南北之民數十年不見兵革。仁人之言,其利博哉! 論 曰:國家當隆盛之時,其大臣必有耆艾之福,推其有餘,足芘當世。 至和以來,共定大計,功成退居,朝野倚重。 文彥博立朝端重,顧盼有威,遠人 富弼再盟契丹, 果斷,皆有大 熙、豐而

#### 校勘記

- (1) 夏守贇 「贇」原作「斌」,據本書卷二九〇本傳、長編卷一二七改。
- (三) 通判絳州 按東都事略卷六七本傳、琬琰集下編卷一三文腦公彥博傳都說他「改太常博士、通
- 判兗州」。疑此有誤。

(三) 鱗州

(B) 秦州 原作「泰州」,據同上二書同卷同傳改。

原作「鄜州」,據同上二書同卷同傳改。

(<del>E</del>) 自澶州商胡河穿六漯渠入横壠故道 一改。「六漯渠」,當作「六塔渠」。編年綱目卷一五三至和二年「十二月,修六塔渠」。注云「道河 「商胡」原作「商湖」,據本書卷九一河渠志、長編卷一八

入橫隴故道」。「渠」,本書卷九一河渠志、長編卷一八一作「河」;「漯」,各書都作「塔」。下文同。

列傳第七十二 校勘記

# 宋史卷三百一十四

### 列傳第七十三

范仲淹 子純祐 (二) 純禮 純粹 范純仁 子正平

姓,更其名。 堪,仲淹不苦也。 淹二歲而孤,母更適長山朱氏,從其姓,名說。少有志操,旣長,知其世家,迺感泣辭母,去 之應天府,依戚同文學。 范仲淹字希文,唐宰相履冰之後。 舉進士第,爲廣德軍司理參軍,迎其母歸養。 晝夜不息,冬月憊甚,以水沃面;食不給,至以糜粥繼之,人不能 其先、邠州人也,後徙家江南,遂爲蘇州吳縣人。 改集慶軍節度推官,始還

以殊薦,爲祕閣校理。 名,召寘府學。 監泰州西溪鹽稅,遷大理寺丞,徙監楚州糧料院,母喪去官。 上書請擇郡守,舉縣令,斥游惰,去冗僭,愼選舉,撫將帥,凡萬餘言。 仲淹汎通六經,長於易,學者多從質問,爲執經講解,亡所倦。 晏殊知應天府, 聞仲淹 服除, 嘗推

列

傳第七

十 三

范

仲淹

其奉以食四方遊士,諸子至易衣而出,仲淹晏如也。 每感激論天下事,奮不顧身,一時士大

夫矯厲尚風節,自仲淹倡之。

除積負。」又言:「恩倖多以內降除官,非太平之政。」事雖不行,仁宗以爲忠。 遠。 判河中府, 徙陳州。 自 有家人禮,顧與百官同列,南面而朝之,不可爲後世法。」且上疏請太后還政,不報。 今又侈土木,破民產,非所以順人心、合天意也。 天聖七年,章獻太后將以多至受朝,天子率百官上壽。仲淹極言之,且曰:「奉親于內, 時方建太一宮及洪福院, 市材木陝西。 宜罷修寺觀,減常歲市木之數,以蠲 仲淹言:「昭應、壽寧, 天戒不 尋通

立 皇太后,參決軍國事。仲淹曰:「太后,母號也,自古無因保育而代立者。今一太后崩,又 餘年,宜掩其小故,以全后德。」帝爲詔中外,毋輒論太后時事。初,太后遺誥以太妃楊氏爲 一太后,天下且疑陛下不可一日無母后之助矣。」 太后崩,召爲右司諫。言事者多暴太后時事,仲淹曰:「太后受遺先帝,調護陛下者十

何 如 ? 歲大蝗旱, 江、淮、京東滋甚。 仲淹請遣使循行, 未報。乃請問曰:「宮掖中半日不食, 」帝恻然,迺命仲淹安撫江、淮,所至開倉振之,且禁民淫祀,奏蠲廬舒折役茶、江

東丁口鹽錢,且條上救敞十事。

會郭皇后廢,率諫官、御史伏閣爭之,不能得。 明日,將留百官揖宰相廷爭,方至待漏

院, 人興作,未就,尋徙明州,轉運使奏留仲淹以畢其役,許之。 有詔出知睦州。 歲餘、徙蘇州。州大水、民田不得耕,仲淹疏五河,導太湖注之海,募 拜尙書禮部員外郎、天章閣待

制,召還,判國子監,遷吏部員外郎、權知開封府。

政。 儲蓄,繕宮室。」帝問夷簡,夷簡曰:「此仲淹迂闊之論也。」仲淹迺爲四論以獻,大抵譏切時 諭 不次,如此則公,如此則私。 夷簡怒訴曰:「仲淹離間陛下君臣,所引用,皆朋黨也。」仲淹對益切,由是罷知饒州 建都之事,仲淹曰:「洛陽險固,而汴爲四戰之地,太平宜居汴,卽有事必居洛陽。 且曰:「漢成帝信張禹,不疑舅家,故有新莽之禍。 時呂夷簡執政,進用者多出其門。 况進退近臣,凡超格者,不宜全委之宰相。」夷簡不悅。 仲淹上百官圖,指其次第日「如此爲序遷, 臣恐今日亦有張禹,壞陛下家法。」 如此爲 當漸廣 他日,

以一言忤宰相,遽加貶竄,況前所言者在陛下母子夫婦之間乎?陛下旣優容之矣,臣請追 在諫官,坐視而不言,移書責之。由是,三人者偕坐貶。 改前命。」太子中允尹洙自訟與仲淹師友,且嘗薦己,願從降黜。 太弟故也。 仲淹旣去,士大夫爲論薦者不已。 殿中侍御史韓瀆希宰相旨,請書仲淹朋黨,揭之朝堂。 今朋黨稱薦如此,奈何?」再下詔戒敕。 仁宗謂宰相張土遜曰:「向貶仲淹,爲其密請建立皇 明年,夷簡亦罷,自是朋黨之論 於是祕書丞余靖上言曰:「仲淹 館閣校勘歐陽修以高若訥 興

列傳

轉運使。 仲淹 在 會夏竦爲陝西經略安撫、 饒州 **歲餘,徙潤州,** 又徙越州。 招討使, 進仲淹龍圖閣直學士以副之。 元昊反,召爲天章閣待制 知永 與軍 夷簡 了,改 陝西 都

諭 仲淹使釋前憾。 仲淹頓首謝曰:「臣鄉論蓋國家事,於夷簡無憾也。」

以 轄 出 取敗之道也。」於是大閱州兵,得萬八千人,分爲六,各將三千人,分部敎之,量賊衆寡,使更 [禦賊。 通有 領 五千人,都監領三千人。 延 州 無。 諸砦多失守,仲淹自請行,遷戶部郎中兼知延州。先是,詔分邊兵:總管領萬人,鈴 時塞門、承平諸砦旣廢,用种世衡策,城青澗以據賊衝,大興營田,且聽民得互市, 又以民遠輸勞苦,請建鄽城爲軍,以河中、同、華中下戶稅租就輸之。 寇至禦之,則官卑者先出。 仲淹曰:「將不擇人,以官爲先後, 春夏徙兵

就食, 可省糴十之三,他所減 不與。 韶以爲康定軍

期矣。 饑,勢易制也。 必 族 由之地 來 明 若 年正月,詔諸路入討,仲淹 歸 也。 矣。 臣策不效,當舉兵先取綏、宥,據要害, 第按兵不動, 拓 況邊備漸修,師出有紀,賊雖猖獗,固已懾其氣矣。 疆禦寇, 策之上也。」帝皆用其 以觀 其釁,許臣 百...「正 月塞外大寒,我師暴露,不如俟春深入,賊馬瘦人 一稍以 議。 恩信招來之。 屯兵營田 仲淹 又請修承平、永平等砦, ,爲持久計,則茶山、橫 不然,情意阻絕,臣恐偃 鄜、 延密邇靈 山之民,必 稍招還流 夏, 兵無 西羌

亡,定堡障,通斥候,城十二砦,於是羌漢之民,相踵歸業。

答書語不遜,仲淹對來使焚之。 久之, 元昊歸陷將高延德, 因與仲淹約和, 仲淹爲書戒喻之。 會任福敗於好水川, 元昊 大臣以爲不當輒通書,又不當輒焚之,宋庠請斬仲淹,帝不

聽。 降本曹員外郎、知耀州,徙慶州,遷左司郎中,爲環慶路經略安撫、綠邊招討使。

至部 罰羊百、馬二,已殺者斬。 入砦,本家罰羊二;全族不至,質其首領。」諸法皆受命,自是始爲漢用矣。 入界,追集不赴隨本族,每戶罰羊二,質其首領。 |元昊反,陰誘屬||羌爲助,而||環||慶酋長六百餘人, 約爲鄉道,事尋露。 卽 奏行邊,以詔書犒賞諸羌,閱其人馬,爲立條約:「若讎已和斷,輒私報之及傷人者, 負債爭訟,聽告官爲理,輒質縛平人者,罰羊五十、馬一。 賊大入,老幼入保本砦,官爲給食,卽不 仲淹以其反復不常也, 賊馬

來戰,佯北,仲淹戒勿追,已而果有伏。 不知所向,行至柔遠,始號令之,版築皆具,旬日而城成,卽大順城是也。 圖 口,在賊腹中。 [老子』,今退而與王興、朱觀爲伍,第恐爲賊輕矣。] 辭不拜。 改邠州觀察使, 仲淹表言:「觀察使班待制下, 臣守邊數年, 羌人頗親愛臣, 呼臣爲 『龍 仲淹欲城之,度賊必爭,密遣子純祐與蕃將趙明先據其地,引兵隨之。 大順旣城,而白豹、金湯皆不敢犯,環慶自此寇益 慶之西北馬鋪砦, 賊覺,以騎 當後橋川 諸將 三萬

明珠、滅臧勁兵數萬,仲淹聞涇原欲襲討之,上言曰:「二族道險,不可攻,前日高繼嵩

若 一喪師 北 取細腰、胡蘆衆泉爲堡障,以斷賊路,則二族安,而環州、鎭戎徑道通徹, 平時 且. 懷 反 側,今討之,必與賊表裏,南入原州,西擾鎮戎,東侵環州,邊患未艾也。 可無憂矣。」其

命,詔不聽。 帝大喜曰:「吾固知仲淹可用也。」進樞密直學士、右諫議大夫。 援之,聞賊已出塞,乃還。 後,塗築細腰、胡蘆諸砦。 葛懷敏敗於定川,賊 大掠至潘原, 始,定川事聞,帝按圖謂左右曰:「若仲淹出援,吾無憂矣。」奏至, 關中震恐,民多竄 山谷間。 仲淹以軍出無功,辭不敢受 仲淹率衆六千,由邠、 涇

州,而 當與琦練兵選將,漸復橫山,以斷賊臂,不數年間,可期平定矣。 用其言, 原 首 地 尾之勢。 臣與韓琦合秦鳳、環慶之兵,掎角而進,若秦鳳、環慶有警,亦可率涇原之師爲援。 重,第恐臣不足當此路。 時已命文意博經略涇原,帝以涇原傷夷,欲對徙仲淹,遣王懷德喻之。 徙彦博 復置 秦州委文彦博,慶州用滕宗諒總之。 帥秦,宗諒帥慶,張亢 陝 西 路安撫、經略、招討使日,以仲淹、韓琦、龐籍分領之。 與韓琦同經略涇原,並駐涇州,琦兼秦鳳,臣兼環慶。 帥 孫沔亦可辦集。 願詔龐籍棄領環慶,以 渭州,一武臣足矣。」帝采 仲淹與琦開府涇 仲淹謝日:「涇 涇原有 成 臣

仲淹爲將,號令明白,愛撫士卒,諸羌來者,推心接之不疑,故賊亦不敢輒犯其境。 元

淹, 陝西宣撫使,未行,復除參知政事。 昊請和、召拜樞密副使。 可革也。」帝再賜手詔,又爲之開天章閣,召二府條對,仲淹皇恐,退而上十事 淹日:「平時諱言武備,寇至而專責守臣死事,可乎?」守令皆得不誅 **遂**改 判; 澤;正郞以下若監司、邊任,須在職滿二年,始得蔭子;大臣不得薦子弟任館閣職,任 運使、提點刑獄、大藩知州;次委兩制、三司、御史臺、開封府官、諸路監司舉知州、通 第人守本科選。 進士先策論,後詩賦,諸科取兼通經義者。賜第以上,皆取詔裁。 子之法無冗濫矣。 授,須通滿五年,乃得磨勘,庶幾考績之法矣。二日抑僥倖。 帝方銳意太平,數問當世事,仲淹語人曰:「上用我至矣,事有先後,久安之弊,非朝夕 一參知 知州 五 日 日明黜陟。 政 均公田。 通 事。 判 舉知縣、令。 仲淹 進士之法,可以循名而責實矣。四日擇長官。 三日精貢舉。進士、諸科請罷糊名法,參考履行無闕者, 二府非有大功大善者不遷,內外須在職滿三年,在京百司非選舉而 外官廩給不均,何以求其爲善耶。請均其入,第給之,使有以自養, 王舉正懦默不任事,諫官歐陽修等言仲淹有相材,請罷舉正用仲 曰:「執政可由諫官而得乎?」固辭不拜,願與韓琦出行邊。 限其人數,以舉主多者從中書選除。 會王倫寇淮南,州縣官有不能守者,朝廷欲按誅之。 罷少卿、監以上乾元節恩 委中書、樞密院先選轉 刺史、縣令,可以得人 餘優等冤選注官,次 以名聞。 命爲 仲

列

僔

第

-6

-|-

Ξ

范

仲淹

然後可以責廉節,而不法者可誅廢矣。六曰厚農桑。每歲預下諸路,風吏民言農田利

删去煩冗,裁爲制敕行下,命令不至於數變更矣。十曰減徭役。戶口耗少而供億滋 有所施行,主司稽違者,重置於法;別遣使按視其所當行者,所在無廢格上恩者矣。 務農,一時敎戰,省給贍之費。畿輔有成法,則諸道皆可舉行矣。八曰推恩信。 河塘,隳廢者可興矣。七曰修武備。約府兵法,募畿輔彊壯爲衞士,以助正兵。 害,堤堰渠塘,州縣選官治之。定勸課之法以興農利,減漕運。江南之圩田,浙西之 九日重命令。 法度所以示信也,行之未幾,旋即**釐**改。請政事之臣參議可以久行者, 赦令 三時

天子方信嚮仲淹,悉采用之,宜著令者,皆以詔書畫一頒下;獨府兵法,衆以爲不可而止。 又建言:「周制,三公分兼六官之職,漢以三公分部六卿,唐以宰相分判六曹。今中書,

多,省縣邑戶少者爲鎭,倂使、州兩院爲一,職官白直,給以州兵,其不應受役者悉歸之

農,民無重困之憂矣。

法也。 羣牧、殿前馬步軍司,各委輔臣兼判其事。凡官吏黜陟、刑法重輕、事有利害者,並從輔臣 擬(图)差除,循資級,議賞罰,檢用條例而已。上非三公論道之任,下無六卿佐王之職,非治 古天官冢宰也,樞密院,古夏官司馬也;四官散於羣有司,無三公兼領之重。而二府惟進 臣請倣前代,以三司、司農、審官、流內銓、三班院、國子監、太常、刑部、審刑、大理、

予奪;其體大者,二府僉議奏裁。 日不可。 久之,乃命參知政事賈昌朝領農田,仲淹領刑法,然卒不果行。 臣請自領兵賦之職,如其無補,請先黜降。」章得象等皆

毀稍行,而朋黨之論浸聞上矣。 爲已任,裁削倖濫,考覆官吏,日夜謀慮興致太平。 子以仲淹士望所屬,拔用之。及夷簡罷,召還,倚以爲治,中外想望其功業。 及按察使出,多所舉劾,人心不悅。 初,仲淹以忤,呂夷簡,放逐者數年,士大夫持二人曲直, 交指爲朋黨。 自任子之恩薄,磨勘之法密,僥倖者不便,於是謗 然更張無漸,規摹闊大,論者以爲不可 及陝西用兵,天 而仲淹以天下

爲資政殿學士、陝西四路安撫使(m)、知邠州。 稅,罷権酤予民。 兩,悉分遺邊將。 會邊睡有警,因與樞密副使富弼請行邊。於是,以仲淹爲河東、陝西宣撫使,賜黃金百 又奏冤府州商稅,河外遂安。 麟州新罹大寇,言者多請棄之,仲淹爲修故砦,招還流亡三千餘戶,蠲其 其在中書所施爲,亦稍稍沮罷。 比去,攻者益急,仲淹亦自請罷政事,迺以

仲沲病,帝常遣使賜藥存問,旣卒,嗟悼久之。又遣使就問其家,旣葬,帝親書其碑曰「褒賢 再遷戶部侍郎,徙青州。 以疾請鄧州,進給事中。徙荆南,鄧人遮使者請留,仲淹亦願留鄧,許之。 會病甚,請潁州,未至而卒,年六十四。 贈兵部尙書,諡文正。 尋徙杭州,

充。 像立生祠事之。 仲淹內剛外和,性至孝,以母在時方貧,其後雖貴,非賓客不重肉。妻子衣食, 而 好 死之日,四方聞者,皆爲歎息。 僅能自

未冠, 純粹。 來公耶私耶,弼曰「公」。純祐曰「公則可」。凡病十九年卒,年四十九。子正臣,守太常寺 右,不應科第。 率兵馳據其地,夏衆大至,且戰且役,數日而 守蘇州,首建郡學,聘胡瑗爲師。 卽 任人無失,而屢有功。 元 解去。 中,西夏叛,仲淹連官關陝,皆將兵。 純祐字天成,性英悟自得,尚節行。 輒白入學, 齒諸生之末, 盡行其規, 諸生隨之, 遂不敢犯。 從仲淹之鄧,得疾昏廢,臥許昌。 ,施予,置義莊里中,以贍族人。 汎愛樂善,士多出其門下,雖里巷之人,皆能道其 及仲淹以讒罷,純祐不得已,蔭守將作監(心主簿,又爲司竹監,以非所好, 及其卒也,羌酋數百人,哭之如父,齋三日而去。四子:純祐、純仁、純禮、 仲淹帥環慶,議城馬鋪砦,砦偪厦境,厦懼扼其衝,侵撓其役。 暖立學規良密, 爲政尙忠厚,所至有恩,邪、慶二州之民與屬羌,皆畫 純祐與將卒錯處,鈎深擿隱,得其才否。 方十歲,能讀諸書;爲文章,籍籍有稱。 富弼守准西,過省之,猶能感慨道忠義,問弼之 成,一路恃之以安。 生徒數百,多不率教,仲淹患之。 純祐事父母孝,未嘗違左 自是蘇學爲諸郡倡。 由是仲淹 父仲淹 純祐 純祐 寶

比部員外郎出知遂州。 今乃與百縣均賦,曷若置此,使之奉常時用乎。」琦是其對。 還朝,用爲三司鹽鐵判官,以 > 腹建,京西轉運使配木石塼甓及工徒於一路,獨永安不受令。使者以白陵使韓琦, 「范純禮豈不知此?將必有說。」他日,衆質之,純禮曰:「陵寢皆在邑境,歲時繕治無虛日, 純禮字彝叟,以父仲淹蔭,爲祕書省正字,簽書河南府判官,知陵臺令兼永安縣。 |琦 日:

贖,命釋其株連者。 但使密償之。 如 神,名曰「范公庵」。草場火,民情疑怖,守吏惕息俟誅。」純禮曰:「草濕則生火,何足怪!」 瀘 南 有邊事,調度苛棘,純禮一以靜待之,辨其可具者,不取於民。民圖像于廬,而奉之 庫吏盜絲多罪至死,純禮曰:「以棼然之絲而殺之,吾不忍也。」聽其家趣買以 除戶部郎中、京西轉運副使。

豈不 部侍 未能 能見君? 朝 郎,進給事中。 元祐初,入爲吏部郎中,遷左司。 而令先供職。 壞禮亂法,所不當爲。」聞者皆悚動。 純禮凡所封駮,正名分紀綱,皆國體之大者。 純禮批敕曰:「臣僚未有以疾謁告, 又遷太常少卿、江淮荆浙發運使。 御史中丞擊執政,將遂代其位,先以諷 不赴朝參先視 張耒(も)除起居舍人,病 事者。 以光祿卿召、遷刑 耒能供職,

列

傳第

七

純禮。 郎,而後出命。 純禮日:「論人而奪之位, 轉吏部,改天章閣待制、樞密都承旨,去知亳州、提舉明道宮。 寧不避嫌邪?命果下, 吾必還之。」宰相即徙純禮刑部侍

欲外間. 無所知,若以叛逆蔽罪,恐辜好生之德,以不應爲杖之,足矣。」曰:「何以戒後人?」曰:「正 今處深文之後,若益以猛,是以火濟火也。方務去前之苛,猶慮未盡,豈有寬爲患也。」由是 而 戴於首曰:「與劉先主如何?」遂爲匠擒。 切以寬處之。中旨鞫享澤村民謀逆,純禮審其故,此民入戲場觀優,歸途見匠者作桶,取 徽宗立,以龍圖閣直學士知開封府。 .知陛下刑憲不濫,足以爲訓爾。」徽宗從之。 前尹以刻深爲治,純禮曰:「寬猛相濟,聖人之訓。 明日入對,徽宗問何以處之,對曰:「愚人村野

曾布力爭不能得,乞降黜次升。 拜禮 部尙書,擢尙書右丞。 侍御史陳次升乞除罷言官並自內批,不由三省進擬,右相 |純禮徐進日:「次升何罪?不過防柄臣各引所親,且去不附

己者爾。」徽宗曰:「然。」乃寢/市議。

國體 者朝廷命令,莫不是元豐而非元祐。 。」曾布奏:「議者多憂財用不足,此非所急也,願陛下勿以爲慮。」純禮曰:「古者無三年 呂 惠卿告老,徽宗問執政,執政欲許之。 國非其國。 今大農告匱, 帑庾枵空, 而曰不足慮, 以臣觀之、神宗立法之意固善,吏推行之,或有失當, 純禮曰:「惠卿嘗輔政,其人固不足重,然當存 非面 謾邪?」 因從容諫 日 邇

其心豈恤 有不得志, 以 致 〈病民。 國事 故挾此藉 宣仁聽斷,一時小有潤色、蓋大臣識見異同,非必盡懷邪爲私 · ? 直欲快私忿以售其姦,不可不深察也。」 口。 以元豐爲是, 則欲賢元豐之人;以元祐爲非, 1 則欲斥元祐之士。 今議論之臣,

宗出示其疏,純禮贊之曰:「願陛下以曉中外, 使知聖意所嚮, 亦足以革小人徇利之情。 解,真宗用張知白, 褒遷公望,以勸來者。」 用,則守正特立之士,將終身晦迹矣。」左司諫江公望論繼述事當執中道,不可拘一偏。 又曰:「自古天下汨亂, 皆從下列置諸要途。 繫於用人。 祖宗於此, 人君欲得英傑之心, 最得其要。 固當不次飭拔。 太祖用呂餘慶,太宗用王禹 必待薦而後

朝議大夫,提舉鴻慶宮。卒,年七十六〇、 中,啓黨禁,貶試少府監,分司南京。 會詵館遼使,純禮主宴,詵誣其輒斥御名,罷爲端明殿學士、知潁昌府,提舉崇福宮。 純禮沉毅剛正,曾布憚之,激駙馬都尉王詵曰:「上欲除君承旨,范右丞不可。」 又貶靜江軍節度副使,徐州安置,徙單州。 五年,復左 詵怒。 崇寧

諸路茶場。 純粹字德孺,以蔭遷至贊善大夫、檢正中書刑房,與同列有爭,出知滕縣,遷提舉 元豐中, 爲陝西轉運判官。 時五路出師伐西夏: 高遵裕出環慶, 劉昌祚出涇 成都

列

麘

第

七 十

無功 職 其麾下皆憤焉。 臣 李憲出熙河, 了,謀欲 .是咎,臣寧受盡言之罪于今日,不忍默默以貽後悔。」神宗納之,進爲副使。 、再舉。 純粹恐 种諤出鄜延,王中 純粹奏:「關陝事力單竭,公私大困,若復加騷動, 兩軍不協,致 正出 生他變, 河東。 勸遵裕往問昌祚疾, 遵裕怒昌祚後期,欲按誅之,昌祚憂恚病臥, 其難 根本可憂。 遂 解。 異時言者必 神宗責諸 將

弗受。 自 日 登 州 入爲 部 召 居厚爲京東轉運使, 還 雖 右司 ,純粹與軾 急,忍復取此膏 郞 中。 同建募役之議,軾謂純粹講此 哲宗立,居厚敗, 血之餘?」卽 數獻羨賦。 神宗將以徐州大錢二十萬緡助陝西, 奏:「本路得錢誠爲利,自徐至邊,勞費 命純粹以直龍圖閣往代之,盡革其苛政。 事尤爲精詳 《甚矣。」 純粹語其 時蘇軾 一懇辭 僚

道首 拔 路 地 時 里,破之於曲律,擣橫山,夏衆遁去。 者 策 利 可 建 除 幸 應 形 復 應援 代兄 。舊制 勢,略無所 爾 如 牽制 今宜 純仁 河東之葭蘆 也 之策, 知 修明戰守救援之法。」朝廷是之。 自徐禧 益 慶州。 而臟、會之地,耗蠹尤深,不可 臣子之義, 罷策應,若 吳堡,鄜延 時與夏議分疆 忘 夏兵 之米脂、義合「む、浮圖 元祐中,除寶文閣待制,再任,召爲戶部侍郎,又出知 軀 徇 大 界,純粹請棄所取 國, 八舉,一 無謂 路攻圍,力有 及夏侵涇原,純粹遣將 鄰路 不棄。」 被 寇 夏地, , 環慶 所言皆略 非我職也。 不勝,而 之安疆 日:「争 施 鄰 一,深 行。 地未棄, 珍 路 曲珍救之,日:「本 在夏 拱 純粹 卽 手 日疾 境, 坐觀,其不 則 又言:「 馳三 於漢 邊隙 白 諸 無

置,錮子弟不得擅入都。會赦,復領祠。久之,以右文殿修撰提舉太淸宮。 府、滑州,旋以元祐黨人奪職,知均州。徽宗立,起知信州,復故職, 明年,復以寶文閣待制知熙州。 士,再臨延州。 紹 聖初,哲宗親政,用事者欲開邊釁,御史郭知章遂論純粹元祐棄地事,降直龍圖閣。 改知永興軍。 尋以言者落職,知金州,提舉鴻慶宮。 章惇、蔡卞經略西夏,疑純粹不與共事,改知鄧州。 知太原,加龍圖閣直學 又責常州別駕,鄂州安 黨禁解,復徽猷 歷河南

選。 上,不聽。 大夫服勤至于垂死,不霑世恩,其富民猾商,捐錢千萬,則可任三子,切爲朝廷惜之。」疏 今西北三路, 許納三千二百緡買齋郎, 四千六百緡買供奉職, 並冤試注官。 夫天下士 純粹沉毅有幹略,才應時須,嘗論賣官之濫,以爲:「國法固許進納取官,然未嘗聽其理 凡論事剴切類此。

閣待制,致仕。卒,年七十餘。

歲, 能講所授書。以父任爲太常寺太祝。 純仁字堯夫,其始生之夕,母李氏夢兒墮月中,承以衣裾,得之,遂生純仁。 中皇祐元年進士第,調知武進縣,以遠親不赴三 資警悟,八 易

列傳

輕去 長葛,又不往。 父母 邪 ? 雖近,亦不能遂養焉。」仲淹門下多賢 仲淹 曰:「汝昔日以遠爲言,今近矣,復何辭。」純仁曰:「豈可重於祿食,而 士,如胡瑗、孫復、石介、李觀之徒,純仁

皆與從游。

晝夜肆業,至夜分不寢,置燈帳中,帳頂

如墨色。

而情 洛尹,使助其葬,旣葬,尹訝不 時節之。 也。」富弼責之曰:「臺閣之任豈易得?何庸如是。」卒不就。 輕者,視所植 仲淹沒,始出仕,以著作佐郎知襄城縣。 賈昌朝守北都,請參幕府,以兄辭。 多寡除其罰,民益賴慕,後呼爲「著作林」。 純仁曰:「私室力足辦,豈宜慁公爲哉?」 宋庠薦試 兄純祐有心疾,奉之如父, 藥膳居服, 皆躬親 館職、謝曰:「虀轂之下,非兄養疾地 兄死, 葬洛陽。 襄城民不蠶織,勸使植桑,有罪 韓琦、富弼貽書

於稅畝 地初 吾爲糴之。」衆賈從命,所蓄十數萬斛。至春,諸縣皆饑,獨境內民不 時旱久不雨,純仁籍境內賈舟,諭之曰:「民將無食,爾所販 不隸縣,主者怒曰:「天子宿衞,令敢爾邪? 簽書許州觀察判官、知襄邑縣。 ,若使暴民田而不得問,稅安所出?」詔釋之,且聽牧地隸縣**。** 縣有牧地,衞士牧馬,以踐民稼,純仁捕一人杖之。 」白其事于上,劾治甚急。 五穀, · 知也 貯之佛寺, 凡牧地隸縣,自純 純仁言:「養兵出 候食闕時 牧

知 政事歐陽脩等議尊崇之。 治平中, 擢江東轉運判官,召爲殿中侍御史,遷侍御史。時方議濮王典禮, 翰林學士王珪等議,宜如先朝追贈期親尊屬故事。 宰相韓琦、

尊,起純仁就職。純仁請出不已,遂通判安州,改知蘄州。 奏,不聽。純仁還所授告敕,家居待罪。旣而皇太后手書尊王爲皇,夫人爲后。純仁復言: 「陛下受命仁宗而爲之子,與前代定策入繼之主異,宜如王珪等議。」繼與御史呂誨等更論 「陛下以長君臨御,奈何使命出房闈,異日或爲權臣矯託之地,非人主自安計。」尋詔罷追 歷京西提點刑獄、京西陝西轉運

副使。

)舜、禹、· 陽、· 文、武之事也。治天下無以易此,願深究而力行之。」加直集賢院、同修起居注。 納之,曰:「卿善論事,宜爲朕條古今治亂可爲監戒者。」乃作尚書解以進,曰:「其言,皆堯、 怨。」神宗曰:「何謂不見之怨?」對曰:「杜牧所謂『天下之人,不敢言而敢怒』是也。」神宗嘉 留意邊功,若邊臣觀望,將爲他日意外之患。」拜兵部員外郞,兼起居舍人、同知諫院。奏言: 愕然曰:「卿之才朕所倚信,何爲皆言粗?」對曰:「粗者未精之辭,如是足矣。願陛下且無 「王安石變祖宗法度,掊克財利,民心不寧。」書曰:『怨豈在明,不見是圖。』願陛下圖不見之 召還,神宗問陝西城郭、甲兵、糧儲如何,對曰:「城郭粗全,甲兵粗修,糧儲粗備。」神宗

倚,當自任天下之重,而恤已深於恤物,憂疾過於憂邦,致主處身,二者胥失。」關與先臣素 有累。蓋知小忘大,貪近昧遠,願加深察。」富弼在相位,稱疾家居。純仁言:「弼受三朝眷

神宗切於求治,多延見疏逖小臣,容訪闕失。純仁言:「小人之言,聽之若可采,行之必

列

厚,臣在諫省,不敢私謁以致忠告, 願示以此章, 使之自省。」又論呂誨不當罷御史中丞, 李

師中不可守邊。

積敝 心,欲求近功,忘其舊學。 附,陛下又從而驅之,其將何所不至。道遠者理當馴致,事大者不可速成,人材不可急求, 流俗,異己者爲不肖,合意者爲賢人。劉琦、錢顗等一言,便蒙降黜。 乃效桑羊均輸之法,而使小人爲之,掊克生靈,斂怨基禍。安石以富國強兵之術,啓迪上 遂求罷諫職,改判國子監,去意愈確。執政使諭之曰:「毋輕去,已議除知制誥矣。」純仁曰: 不可頓革。 及薛向任發運使,行均輸法於六路。純仁言:「臣嘗親奉德音,欲修先王補助之政。 儻欲事功亟就,必爲憸佞所乘,宜速還言者而退安石,答中外之望。」不聽。 尚法令則稱商鞅,言財利則背孟軻,鄙老成爲因循, 在廷之臣, 方大半趨 棄公論 爲

(言何爲至於我哉,言不用,萬鍾非所顧也。)

安石怒純仁沮格, 仁曰:「此一 曰:「彼無罪,姑與一善地。」命知河中府,徙成都路轉運使。 以新法不便,戒州縣未得遽行。 其所上章疏,語多激切。神宗悉不付外,純仁盡錄申中書,安石大怒,乞加重貶。 事足以塞其謗,請聞于朝。」純仁旣不奏使者之過,亦不折言者之非。 因讒者遣使欲捃摭 私事,不能得。使者以他事鞭傷傳言者,屬官喜謂純 後竟坐失

察僚佐燕游,左遷知和州,徙邢州。

未至,加直龍圖閣、知慶州

今日 熟。」純仁揣神宗有功名心,卽對曰:「臣儒家,未嘗學兵,先臣守邊時,臣尙幼,不復記憶,且 事勢宜有不同。陛下使臣繕治城壘,愛養百姓,不敢辭;若開拓侵攘,願別謀帥臣。」 過國入對,神宗曰:「卿父在慶著威名,今可謂世職。 卿隨父旣久, 兵法必精, 邊事 必

神宗曰:「卿之才何所不能,顧不肯爲朕悉心爾。」遂行。

之。 請間 斤。 加 治于寧州 純仁以他過,點知信陽軍 環州 不免有殍死者,已坐罪罷去。 詔本路監司窮治,迺前帥楚建中所封也。 使者至,已無所負。例、寧間有叢冢,使者曰:「全活不實之罪,於此得矣。」發冢籍骸 其所全活不實,詔遣使按視。 秦中方饑,擅發常平粟振貸。僚屬請奏而須報,純仁曰:「報至無及矣,吾當獨任其責。」 种古執熟羌爲盜,流南方,過慶呼冤,純仁以屬吏,非盜也。」古避罪襽訟,詔御史 純仁就逮,民萬數遮馬涕泗,不得行,至有自投于河者。獄成,古以誣告謫。亦 會秋大稔,民讙曰:「公實活我,忍累公邪?」晝夜爭輸還 今緣按臣而及建中, 朝廷治建中罪,純仁上疏言:「建中守法,申 是一罪再刑也。」建中獨贖銅三十 上

理院, 純仁曰:「寬出 移 齊州。 繫囚常滿, 齊俗凶悍,人輕爲盜刼。 於性,若強以猛,則 皆屠 販盜竊而督償者。 不能持久; 或謂:「此嚴治之猶不能戢,公一以寬,恐不勝其治 純仁曰:「此何不保外使輸納邪?」通判曰:「此 猛而不久,以治凶民,取玩之道也。」有西

列

傳

第七

+ *≐*:

范

純仁

豈 理也邪? .」盡呼至庭下,訓使自新, 官司往往待其以疾斃於獄中,是與民除害爾。」純仁曰:「法不至死,以情殺之, 即釋去。 期歲、盜減 比年大半。

軍宋儋年暴死,純仁使子弟視喪,小殮, 率會,脫粟一飯,酒數行,洛中以爲勝事 儋年素不食鼈,其曰毒鼈肉者,蓋妾與吏欲爲變獄張本,以逃死爾。 寘毒鼈肉中。 **丐罷,提舉西京留司御史臺。** 純仁問食肉在第幾巡, 曰:「豈有旣中毒而尙能終席者乎?」再訊之, 則 時耆賢多在洛,純仁及司馬光,皆好客而家貧,相約爲眞 口 [鼻血 復知河中, 世。 純仁疑其非命, 諸路閱保甲妨農、論救甚力。 按得其妾與小 實儋年醉歸,毒於酒而 吏姦, 錄事參 因

給事 之意。」純仁素與光同志,及臨事規正,類如此。初,种古因誣純仁停任。至是,純仁薦爲永 也。 殺之。遂正其罪。 云:「熙寧按問自首之法,旣已改之,有司立文太深,四方死者視舊數倍,殆非先王寧失不經 自己出,則諂諛得乘間迎合矣。役議或難回,則可先行之一路,以觀其究竟。」光不從,持之 益堅。 差役一事,尤當熟講而緩行,不然,滋爲民病。願公虛心以延衆論,不必謀自己出; ,中。時宣仁后垂簾,司馬光爲政,將盡改熙寧、元豐法度。純仁謂光:「去其泰甚者可 哲宗立,復直龍圖閣、知慶州。 |純仁日:「是使人不得言爾。若欲媚公以爲容悅,何如少年合安石以速富貴哉。」又 召爲右諫議大夫,以親嫌辭,改天章閣待制兼侍講, 除

興軍 路鈴轄,又薦知隰州。 每自咎曰:「先人與种氏上世有契義,純仁不肖,爲其子孫所訟,

寧論曲直哉。」

純仁請誅之塞上,以謝邊人,不聽。 漢人,執政持之未決。 元祐初,進吏部尙書,數日,同知樞密院事。 至是,乃申前議,又請歸一漢人予十練。 議者欲致其子,收河南故地,故赦不殺。 初,純仁與議西夏,請罷兵棄地,使歸所掠 事皆施行。 邊俘鬼章以獻, 後又欲官之,

純仁復固爭,然鬼章子卒不至。

罪去,朝廷以其父老,欲畀便郡,旣而 者斥之不已。 仁后嘉納。 三年,拜尙書右僕射兼中書侍郎。 因下詔:「前日希合附會之人,一無所問。」 純仁言:「臣嘗爲縮誣奏坐黜,今日所陳爲綰也,左降不宜錄人之過太深。」宣 中止。 純仁在位,務以博大開上意,忠篤革士風。 純仁請置往咎而念其私情。 鄧綰帥 准 章惇得 東,

公相慶曰:『一 家,不可因譖黜官。 昔先臣與韓琦、富弼同慶曆柄任,各舉所知。 純仁曰:「朝臣本無黨,但善惡邪正,各以類分。 學士蘇軾以發策問爲言者所攻,韓維無名罷門下侍郎補外。 網打盡。」 及王覿言事忤旨,純仁慮朋黨將熾,與文彥博、呂公著辨於簾前,未解。 此事未遠,願陛下戒之。」因極言前世朋黨之禍,并錄歐陽脩朋黨論 當時飛語指爲朋黨,三人相繼補外。 彦博、 公著皆累朝舊人,豈容雷同罔上。 純仁奏軾無罪,維盡心國 造謗者

列傳第

七十三

范純

仁

以

誅竄 政右 過也,不能無損焉。」又與王存諫於哲宗,退而上疏,其略云:「蓋如父母之有逆子,雖天地鬼 確 相呂大防曰:「此路自乾興以來,荆棘近七十年,吾輩開之,恐自不免。」大防遂不敢言。 新州命下, 大臣。 其說,唯純仁與左丞王存以爲不可。爭之未定,聞太師文彥博欲貶於嶺嶠,純仁謂左 知漢陽軍吳處厚傅致蔡確安州車蓋亭詩,以爲謗宣仁后,上之。 今舉動宜與將來爲法,此事甚不可開端也。 純仁於宣仁后簾前言:「聖朝宜務寬厚,不可以語言文字之間曖昧不明之過, 若處之必死之地,則恐傷恩。」確卒貶新州 且以重刑除惡,如以猛藥治病,其 諫官欲寘於典憲,執 及

蔡確不必推治黨人,旁及枝葉。 石,止因喜同惡異,遂至黑白不分,至今風俗,猶以觀望爲能,後來柄臣,固合永爲商鑑。 喜其同我,則迎合之佞日親。 起,蓋因趣向異同,同我者謂之正人,異我者疑爲邪黨。 神不能容貸,父子至親,主於恕而已。 正言劉安世交章擊純仁黨確,純仁亦力求罷。 而 可以化枉邪爲善人,不仁者自當屛迹矣。 大防奏確黨人甚盛,不可不問。 以至眞僞莫知,賢愚倒置,國家之患, 臣聞孔子曰:『舉直錯諸枉, 純仁面諫朋黨難辨,恐誤及善人。 何煩分辨黨人,或恐有傷仁化。」司諫吳安詩 既惡其異我,則逆耳之言難至; 旣 能使枉 古者直。」 率由 途上疏曰:「朋黨之 此 則是舉用正 也。 至如王安

純仁遣僚屬收無主燼骨,別男女異穴,葬者三千餘。又推之一路,葬以萬數計。 明 (年,以觀文殿學士知潁昌府。踰年,加大學士、知|太原府。 其境土狹民衆, 惜地不

犯境,朝廷欲罪將吏。純仁自引咎求貶。秋,有詔貶官一等,徙河南府,再徙潁昌。

者,無所不至。宣仁后寢疾,召純仁曰:「卿父仲淹,可謂忠臣。 楊畏不悅,嘗有言,純仁不知。至是,大防約畏爲助,欲引爲諫議大夫。純仁曰:「諫官當用 呂大防一心。」對曰:「此二人實有士望,臣終不敢保位蔽賢,望陛下加察。」純仁將再入也, 正人,畏不可用。」大防曰:「豈以畏嘗言公邪?」純仁始知之。 召還,復拜右僕射。因入謝,宣仁后簾中諭曰:「或謂卿必先引用王覿、彭汝礪,卿宜與 後畏叛大防,凡有以害大防 在明肅皇后垂簾時,唯勸明

卿當似之。」純仁泣曰:「敢不盡忠。」

激以賞罰,故官吏急切,以致害民。」退而上疏,其要以爲「青苗非所當行,行之終不免擾民 之。」且趣入見,問:「先朝行青苗法如何?」對曰:「先帝愛民之意本深,但王安石立法過甚, 宣仁后崩,哲宗親政,純仁乞避位。 哲宗語呂大防曰:「純仁有時望,不宜去,可爲朕留

方拭目以觀,天下治亂,實本於此。 舜舉』陶,陽舉伊尹,不仁者遠。縱未能如古人,亦須極 是時,用二三大臣,皆從中出,侍從、臺諫官,亦多不由進擬。 純仁言:「陛下初親政,四

列傳

第七十三

范純

天下之選。」又羣小力排宣仁后垂簾時事,純仁奏曰:「太皇保佑聖躬,功烈誠心, 議者不 恤 國 事 一何薄哉。」遂以仁宗禁言明肅垂簾事詔書上之。曰:「望陛下稽倣而 幽明共

行,以戒薄俗。」

與時也, 待罪,衆不敢仰視。 人也。」轍竟落職知汝州 盡。」純仁曰:「不然,法本無弊,弊則當改。」哲宗曰:「人謂秦皇、漢武。」純仁曰:「轍所論,事 親事之始,進退大臣,不當如訶叱奴僕。」右丞鄧潤甫越次曰:「先帝法度,爲司馬光、蘇轍壞 蘇轍論殿試策問,引漢昭變武帝法度事。哲宗震怒曰:「安得以漢武比先帝。」、闡下殿 非人也。」哲宗爲之少霽。 轍平日與純仁多異,至是乃服謝純仁曰:「公佛地位中 純仁從容言:「武帝雄才大略,史無貶辭。職以比先帝,非謗也。 陛下

轍 成都鈴轄日不法事,及蘇轍所謫太近。純仁言:「之邵爲成都監司, 言者多當時御史,何故畏避不卽納忠,今乃有是奏,豈非觀望邪?」御史來之邵言高士敦任 會王安石建議,不副先帝愛民求治之意。至垂簾之際,始用言者,特行貶竄,今已八年矣。 與政累年,之邵已作御史,亦無糾正,今乃繼有二奏,其情可知。一 純仁凡薦引人材,必以天下公議,其人不知自純仁所出。 全臺言蘇軾行呂惠卿告詞,訕謗先帝,黜知英州。 純仁上疏曰:「熙寧法度,皆惠卿附 或曰:「爲宰相,豈可不牢籠 士敦有犯,自當按發。

深蒙陛下開納,陛下以一蔡確之故,常軫聖念。今趙彥若已死貶所,將不止一蔡確矣。 所親見。臣之激切,止是仰報聖德。向來章惇、呂惠卿雖爲貶謫,不出里居。臣向曾有言, 習水土,炎荒非久處之地,又憂虞不測,何以自存。 此,無一人敢言,若上心遂回,所繫大矣。不然,死亦何憾。」乃疏曰:「大防等年老疾病,不 爲朕留,雖在外,於時政有見,宜悉以聞,毋事形迹。」徙河南府,又徙陳州。 舟覆,扶純仁出,衣盡濕。顧諸子曰:「此豈章惇爲之哉?」旣至永,韓維責均州,其子訴維 則無爲善之路矣。」每戒子弟毋得小有不平,聞諸子怨章惇,純仁必怒止之。 江行赴貶所, 曰:「七十之年,兩目俱喪,萬里之行,豈其欲哉?但區區之愛君,有懷不盡,若避好名之嫌, 陛下斷自淵衷,將大防等引赦原放。」疏奏,忤惇意,詆爲同罪,落職知隨州。 憂憤,欲齋戒上疏申理之。 所親勸以勿爲觸怒,萬一遠斥,非高年所宜。純仁曰:「事至於 **惇爲相,純仁堅請去,遂以觀文殿大學士加右正議大夫知潁昌府。** 天下士,使知出於門下?」純仁曰:「但朝廷進用不失正人,何必知出於我邪?」哲宗旣召章 「貶謫之人,殆似永廢。」純仁前賀曰:「陛下念及此,僥、舜用心也。」 明年,又貶武安軍節度副使,永州安置。時疾失明,聞命怡然就道。或謂近名,純仁 旣而呂大防等竄嶺表,會明堂肆赦,章惇先期言:「此數十人,當終身勿徙。」純仁聞而 臣曾與大防等共事,多被排斥,陛下之 入辭,哲宗曰:「卿不肯 初,哲宗嘗言

列傳第七

十 三

范純仁

實薦,以至宰相。 執政日與司馬光不合,得免行。純仁之子欲以純仁與光議役法不同爲請,純仁曰:「吾用君 昔同朝論事不合則可,汝輩以爲今日之言,則不可也。 有愧心而生者,不

若無愧心而死。」其子乃止。

待,不知目疾如何,用何人醫之。」純仁頓首謝。道除右正議大夫、提舉崇福宮。 中使至永賜茶藥,諭曰:「皇帝在藩邸,太皇太后在宮中,知公先朝言事忠直, 忠告。」純仁以疾,捧詔而泣曰:「上果用我矣,死有餘責。」徽宗又遣中使賜茶藥,促入覲,仍 觀文殿大學士、中太一宮使詔之。有曰:「豈唯尊德尚齒,昭示寵優,庶幾鯁論嘉謀,日聞 居三年,徽宗卽位,欽聖顯肅后同聽政,卽日授純仁光祿卿,分司南京,鄧州居住。 今虚相位以 不數月,以

明,致保佑之憂勤不顯。」又云:「未解疆埸之嚴,幾空帑藏之積。 疾革,以宣仁后 矣。」遂遣上醫視疾。疾小愈,丐以所得冠帔改服色酬醫。 天下而 宣渴見之意 純仁乞歸許養疾,徽宗不得已許之。每見輔臣問安否,乃曰:「范純仁,得一識面足 建中靖國改元之旦,受家人賀。 憂,期不負聖人之學,此先臣所以敎子,而微臣資以事君。」又云:「惟宣仁之誣謗未 誣謗未明爲恨。 呼諸子口占遺表,命門生李之儀次第之。其略云:「蓋嘗先 明日, 熟寐而卒, 年七十五。 詔賜醫章服,令以冠帔與族姪。 有城必守,得地難耕。」凡 韶賻白金三十兩, 敕

洛官給其葬、贈開府儀同三司,諡曰忠宣,御書碑額曰「世濟忠直之碑」。

平生所學, 得之忠恕二字, 一生用不盡。以至立朝事君, 接待僚友, 親睦宗族, 要須『造次顚沛必於是』,則所謂『有爲者亦若是』爾。豈不在人邪?」 己,恕己之心恕人,不患不至聖賢地位也。」又戒曰:「六經,聖人之事也。 離此也。」每戒子弟曰:「人雖至愚,責人則明;雖有聰明,恕己則昏。苟能以責人之心責 一,所得奉賜,皆以廣義莊,前後任子恩,多先疏族。沒之日,幼子、五孫猶未官。 純仁性夷易寬簡,不以聲色加人,誼之所在,則挺然不少屈。 自爲布衣至宰相,廉儉如 知一字則行一字。 曾曰:「吾 未嘗須臾

非也。」親族有請教者,純仁曰:「惟儉可以助廉,惟恕可以成德。」其人書於坐隅。 相觸,君子與小人鬥力,中國與外邦校勝負,非唯不可勝,兼亦不足勝,不唯不足勝,雖勝亦 十卷,行于世。子正平、正思。 弟純粹在關陝,純仁盧其於西夏有立功意。 與之書曰:「大輅與柴車爭逐,明珠與瓦礫 有文集五

平推與幼弟。 欲自結,奏拓四鄰田廬。 正 平字子夷,學行甚高,雖庸言必援孝經、論語。父純仁卒,詔特增遺澤,官其子孫,正 紹聖中,爲開封尉,有向氏於其墳造慈雲寺。戶部尚書蔡京以向氏后戚,規 民有訴者,正平按視,以爲所拓皆民業,不可奪;民又撾鼓上訴,

列

第

七十三

范

純仁

原坐罰金二十斤,用是蓄恨正平。

至,亦實。 同。 俱將不免,不若身任之。」遂就獄,捶楚甚苦,皆欲誣服。 穸之事 佇之意,遂以正平逮之儀、克明同詣御史府。 於御前 其遺表八事,諸子以朝廷大事,防後患,不敢上之,繳申潁昌府印寄軍 及當國,乃言正平矯撰父遺表。 ·,參預筆削者,正思也,兄何爲哉?」正平曰:「時相意屬我,且我居長,我不往,兄弟 ,請寶印出, 獄遂解。 注籍於內東門。」使從其家得永州傳宣聖語本有御寶, 正平羈管象州,之儀羈管太平州。 又謂李之儀所述純仁行狀,妄載中使蔡克明傳二聖虛 正平將行,其弟正思曰:「議行狀時,兄方營電 正平家屬死者十餘 獨克明曰:「舊制,凡傳聖語,受本 資庫。 又驗內東門籍皆 人。 自 潁 取

之觀, 名,人所 之曰:「此朝廷所賜,施於金石,揭於墓隧,假寵於范氏子孫則可; 會赦,得歸潁昌。唐君益爲守,表其所居爲忠直坊,取所賜「世濟忠直」碑額 以聳 知 也。 動庸俗, 十室之邑,必有忠信,異時不獨吾家詒笑,君亦受其責矣。」竟撤去之。 不可也。」君益曰:「此有司之事, 君家何預焉?」正平曰:「 若於通途廣陌中爲往來 先祖 也。 先君 正平告 正平 功

退閑久,益工詩,尤長五言,著荀里退居編,以壽終。

業備見於是。 制中,遺宰相書,極論天下事,他日爲政,盡行其言。 論曰:自古一代帝王之興,必有一代名世之臣。 豪傑自知之審,類如是乎! **攷其當朝**, 雖不能久,然先憂後樂之志,海內固已 宋有仲淹諸賢, 諸葛孔明草廬始見昭烈數語,生平事 無愧乎此。 仲淹初在

信其有弘毅之器,足任斯責,使究其所欲爲,豈讓古人哉!

遠,當世若從其言,元祐黨錮之禍,不至若是烈也。 純仁位過其父,而幾有父風。 元祐建議 攻熙、 仲淹謂諸子,純仁得其忠,純禮得其靜 豐太急,純仁救蔡確一 事,所謂謀國甚

純粹得其略。知子孰與父哉

## 校勤記

一純祐 據隆平集卷八、東都事略卷五九上范仲淹傳,和范文正公集尺牘卷上與中舍二子三監簿

四太祝、范純仁范忠宣公集補編范純佑家傳、呂祖謙宋文鑑卷一三九富殉范純佑墓誌銘 常當作

「純佑」,下文同。

- $\exists$ 復置陝西路安撫經略招討使 長編卷一三八作「陝西四路經略安撫招討使」。 當是。
- 守令皆得不誅 髙 郵 軍 晁仲約。 富酮時在樞府,議欲誅之。 「得不」二字原倒。 按東都事略卷五九上本傳, 仲淹以爲「高郵無兵無械,仲約之義當勉力戰守,然 上文所謂 「不能守者」, 係指知

列

傳

第

七

† ==

校勘記

一〇二九六

事有可恕,戮之恐非法意」。仁宗從之,仲約由此冤死。 據此,從本卷殿本考證乙正。

進擬 原作「進擢」,據范仲淹范文正公集奏議上奏乞兩府無判

改。

「安撫」原作「宣撫」,據本書卷二一一宰輔表、歐陽修歐陽文忠公文集卷二〇

范仲 淹神道碑銘改。 . .

陝西

四路安撫使

**€** 張耒 將作監 原作「張來」, 原作「將作院」,據同上范純佑家傳、范純佑墓誌銘改。 據東都事略卷五九下范純禮傳改;本書卷四四四有張朱傳, 曾任起居舍

人。下文同。

**元** (九) 義合 年七十六「七」、「六」二字原倒,據東都事略卷五九下本傳、范忠宣公集補編范純禮家傳乙正。 原作「羲合」,據范忠宣公集補編范純粹家傳,參考本書卷八七地理志改。

## 列傳第七十四

韓億子綜 韓絳 子宗師 韓維 韓績 子宗武

出為 州 獄按之,事雖辨,獨降通判大名府。尋爲殿中侍御史,遷侍御史,安撫淮、浙,除開封府判官, 牘未嘗引乳醫爲證, 召甲出乳醫示之, 甲亡以爲辭, 寃遂辨。 嫁,因誣其子爲他姓,以專其貲。嫂訴於官,甲輒賂吏掠服之,積十餘年,訴不已。 營築之。眞宗嘗欲召試,而與王旦有親嫌,特召見,改一官知洋州。州豪李甲,兄死迫嫂使 河北轉運使。 河北旱,轉運使不以實聞,憶獨言歲饑,願貸民租。 他邑訟不決者,郡守皇甫選輒屬億治之。通判陳州,會河決,治隄費萬計,億不賦民而 韓億字宗魏,其先眞定靈壽人,徙開封之雍丘。 舉進士,爲大理評事、知永城縣,有治 有誣其子綱請求受金者,億請自置 累遷尙書屯田員外郞、 憶視 知 相

臺治 軍 相 而 事 而 使人納金 己露 污而 仁宗初 下皆坐失當之罰,其不撓如 植 也。 自 於 言未嘗納 進 植乃除 公宰相 王 直 史 館 名。 一 欽 若, 、知青州,以司封員外郎兼侍御史知雜事,判 金,反 并按欽若,严釋不問。 因 誣吏誤以問所親語達欽若。 牙吏至京師, 此。 自薛奎後,億獨掌臺務者踰 審之, 三司更茶法,歲課不 語頗 洩, 欽若 億窮治之,蓋植 知不 年 大理寺 可掩 登,億承 以病 丞。 執 吏以聞 詔 懼 吳植 劾之,由 廢,金未 知臨 詔 付 達 江

歡 福 曰:「本朝每遣使,皇太后必以此戒之, 也。」人謂 好 為傳示 除 龍 子 圖 閣待制, 孫之意, 副使既失辭,而憶更以爲恩意,甚推美之。 憶初不知 奉使契丹。 也。 時副使者,章獻外姻 契丹主 非欲達於北朝也。」契丹主大喜,曰:「此兩朝生靈之 問億日:「皇太后卽有旨, 也, 妄傳皇太 后旨於契丹, 大使何獨不言? 諭以 億 南 對 北

其覘 不 益 州 邓 知 亳州 故事 川,奏徙場黎州境上。 又疏九升江口,下溉民 ,益州歲出官粟六萬石,振糶 ,召知審刑院,再遷兵部郎中、同判吏部流 田數千頃。 拜御史中丞,請如唐制,置御史裏行 貧民。 維、茂州地接羌夷,蕃部歲至永康官場鬻馬,億 是歲大旱,億倍數出 內銓, 以右諫議大夫、樞密直 粟,先期予民, 民 學 坐 土 是 慮 知

仼 將 帥者數十人,稍試用之。 景 站 二年,以尙書工部侍 郎 又言武臣宜知兵,而書禁不傳,請纂其要授之。 同知 樞 密院事 時 承平久,武備不 戒, 乃請二 府各列 於是帝親集 上才

神武秘略,以賜邊臣。

令解仇, 唃 廝囉與趙元昊相攻,來獻捷。 乃因而 加賞, 非所以綏御四方也。」議遂寢。元昊歲遣人至京師,出入民間無他 朝廷議加唃廝囉節制。 億日:「彼皆蕃臣也,今不能諭

禁,憶請下詔爲除館舍禮之,官主貿易,外雖若煩擾,實羈防之。 知開封府范仲淹獻百官圖,指宰相呂夷簡差除不平,而陰薦億可用。 仲淹旣貶,帝以

渝億。 人。」遂除戶部、參知政事。 億曰:「仲淹舉臣以公,臣之愚陛下所知;舉臣以私,則臣委質以來,未嘗交託於 會忻州地大震,諫官韓琦言宰相王隨、陳堯佐非輔弼才,又言億

德軍 子綜 爲羣牧判官,不當自請以兄綱代之,遂與宰相皆罷,知應天府,尋加資政殿學士、知成 改澶州,復知亳州,官至尚書左丞,以太子少傅致仕。 卒,贈太子太保,諡忠憲〔〕。

得所。 諸路 有奏攟拾官吏小過者,輒顏色不懌,曰:「天下太平,聖主之心,雖昆蟲草木,皆欲使之 億性方重,治家嚴飭,雖燕居,未嘗有惰容。 今仕者大則望爲公卿,次亦望爲侍從、職司 見親舊之孤貧者,常給其昏葬。 一千石,其下亦望京朝、幕職,奈何錮之 每見天下

於盛世?」八子:綱、綜、絳、繹、維、縝、緯、緬。

境上,綱帥禁兵乘城,給餅餌多不時,民具酒食犒軍,輒收其羊豕,市錢製兵器, 綱,尚書水部員外郎〔三〕。慶曆中,知光化軍,性苛急,不能撫循 士卒。 會盜 張海 士皆憤怒。 剽扨至

列

傳第

七十

四

韓億

又嘗 命軍 ,衆趨蜀道,爲官兵所敗,遂斬之,餘黨悉誅。 ·校作陣圖,不成,將斬之,衆益駭。一日,士方食,軍校邵興叱衆起勿食。綱怒, 興 懼, 帥衆劫庫兵爲亂, 欲殺綱。 綱攜妻子縋城,由 綱坐棄城除名,編管英州。 漢江而下。 興等遂縱火掠城 執數

呂夷簡· 同修 金堤,民依丘塚者數百家。 起 綜字仲文。 居 自北京入相,薦爲集賢校理、同知太常院。 注 蔭補將作監主簿, l綜令曰:「能濟一人,予千錢。」民爭操舟栰以救,已而丘塚多潰。 遷大理評事。 舉進士中第,通判鄧州、天雄軍。 歷開封府推官, 數月, 遷三司戶部判官、 會河溢

俱使 我,宜酌 使契丹,契丹主 我酒。」綜率同使者五人起爲壽,契丹主亦離席酧之,歡甚。 |問其家世,綜言憶在先朝嘗持禮來,契丹主喜曰:「與中國通好久,父子 既還,陳執中以爲

因楊儀爲書屬綜, 殿前 指揮使許懷德從妹亡,有別產在陽翟,以無子, 書至 而 轉運使已徙獄他州 矣。 綜坐得書不 籍于官, 以聞, 懷德欲私 奪集賢 有之, 校 理, 訟未決。 知袁州。

生事,出

知滑州,徙許州。

未幾,復爲江東轉運使。 還,再修起居注,累遷刑 部 員 外 郎、 知 制 誥 卒。

綜嘗爲契丹館伴使,使者欲爲書稱北朝而去契丹號。綜曰:「自古未有建國而無號者。」

使慙,遂不復言。 其後朝廷擇館伴契丹使者,帝曰:「孰有如韓綜者乎?」子宗道,爲戶部侍

郎、寶文閣待制。

且曰:「人君務蕃毓其民,則天亦昌衍其子孫矣。」以尚書兵部員外郎判三司鹽鐵勾院,卒。 歲,著爲令。臣考尋世次,帝八子,長則和帝,而質、安以下諸帝皆其係胄,請修胎養之令。」 仁宗春秋高,未有嗣。 正之。獄吏當坐法,而尹劉沆縱弗治;宗彥往按舉,沆復沮止之。宗彥疏沆于朝,抵吏罪。 試,爲集賢校理。 綱子宗彦, 綜子宗道,歷官至戶部侍郎、寶文閣待制。 字欽聖。 歷提點京西、京東刑獄。 宗彥上書曰:「漢章帝詔諸懷妊者賜胎養穀,人三斗,復其夫勿算一 蔭補將作監主簿。 應天府失入平民死罪,獄成未决,通判孫世寧辨 舉進士甲科,累遷太常博士。以大臣薦,

治,蓋其母嘗執役宮禁,嫁民冷緒,生一女,乃生靑,遂論棄市。 其母頃在掖庭得幸,有娠而出生己,府以爲狂,奏流汝州。 韓絳字子華。 舉進士甲科,通判陳州。 直集賢院,爲開封府推官。 絳言、留之在外將惑衆。 有男子冷青, 妄稱 追責窮

列傳

寘 諸 理 歷 一,民 戶 部 大悅。 判 使還, 江 南 饑, 同修起居注 爲體量安撫 一,擢. 右 使, IE 行便民 言。 仁宗謂絳曰:「用卿出自 事數十條; 宣州 守廖 詢 朕, 卿凡論事, 不 貪 暴不 法,下 · 吏

宜.

||沽激,當

存朝廷大體,要令可行,毋使股爲不

·聽諫者

異。 銓。 之,籍與尹俱謫去。 詔 同 自今勿復除。 列 言:「絳宜 絳劾其蠹 河决商胡,用李仲昌議,開大塔河而患茲甚, 入內都都知王守忠兼判內侍省〔三〕,絳言:「判名太 在 國害民,罪不可貸,仲昌遂竄嶺表。 ,朝廷,瀛非所處也。」留知諫院,糾察在京刑獄。 道士趙清貺出入宰相龐籍家,以略敗,開封杖流之,道死。 未幾復進,絳力爭不得,遂解言職。 命絳安撫河北日。 遷龍 圖閣直學士至、知瀛州。 、重,且國朝以來,未有兼判兩省者。」 明年,知制誥,乞守河陽,召 爲翰林學士、御史中 時宰主仲昌,人莫敢 |絳言籍 歐陽脩率 判流內 諷府殺

報 劾諸 掖 定定 庭 闔 守呂 數月, 請 劉 帝 門待 禱 氏 茅 通 凑犯法,從官通章請貰之, 絳曰:「法行當自貴者始, 更相 秦遂絀。 罪, 以翰林侍讀學士知慶州 請 山 自言 一求嗣,絳草祝辭,因 謁爲姦, 絳以告帝。 不 富弼用張 敢 復 稱御 茂實掌禁兵,絳言:「人謂茂實爲 . 史中丞。詔召之,及出,不秉笏穿朝堂, 一勸帝汰出宮人,及限 帝曰:「非卿言朕無由知。」不數日, 出劉氏及他 熟羌據堡爲亂, 即日討平之。 內臣養子,以重絕人之世,皆從之。 先帝子, 豈宜用 請援,則公道廢矣。」丼 加端明殿學士、知成都 諫官論之,罷 典宿衞?」不 不謹者。 蔡州。

平倉, 使酒 司 吏數干恩澤,絳 張詠 m 隨其事 貿易,因 鎭蜀日,春糶米,秋糶鹽,官給券以惠貧弱, 一任道 附益以取悅,絳悉奏罷之。召知開封府,爲三司使。 輒執不可。 里差次給直。 爲帝言:「身犯衆怒, 帝歎 日:「衆方姑息, 懼有飛語。」帝曰:「朕在藩邸 歷歲久, 卿獨不能徇時邪 權歸豪右;中人奉使至蜀 請以川、陜職 卽 行之。 日, 田 頗 穀 內諸 輸常 聞 有

之同 姦。 安石恃以爲 制 神宗嘗問天下遺利,絳請盡地 神宗立, 置 三司 助 韓琦薦絳有 條例,王安石每奏事,必曰:「臣見安石所陳非一,皆至當 公輔器, 贞。 拜樞 因言差役之弊,願更定其法,役議 密副使。 始請建審官西院, 掌武臣升朝者, 可用,陛下宜省察。」 自此始 矣。 代陳升 以息吏

司

以

國事

為

人情。

卿所守固善,何憚於讒

兵, 事 除 行。」乃以爲陝西宣 衆皆怨望; 注措乖方, 已而二城陷,趣諸道兵出援,慶卒遂作亂。 熙寧三年, 十二月,卽軍 選蕃兵爲七軍,用知青澗城种諤策, 參知 又奪騎兵馬以與之,有抱馬首以泣者。 撫使。旣,又兼 、政事。 中拜同中書門下平章事、昭文館大學士,開幕府於延安。 夏人犯塞,絳請行邊,安石 河東,幾事 不可待報者,聽便宜施行,授以空名告敕 議者罪絳,罷知鄧州。 欲取橫山, 亦請往 旣城囉兀,又冒雪築撫寧堡,調發騷 令諸將聽命於諤, 厚賞犒 |絳曰:「朝廷方賴安石 明年,以觀文殿學士 絳素不習兵 心,得自 ·, 臣

列

徙許州,進大學士,徙大名府。

安石。 再拜 幾,絳亦出知許 水去。 七年,復代王安石 安石至,頗與絳異。 帝鷲曰:「此小事,何必爾?」對曰: 州 相。 既顓處中書,事多稽留不決,且數與呂惠卿爭論,乃密請帝再用 有劉佐者,坐法兔, 安石欲抆拭用佐, 「小事尚不伸,况大事乎」 絳不 印。 ! 」帝爲逐佐。 議帝前未決,卽

(伊、洛間民被溺者十五六。 )絳發廩振恤,環城築隄,數月,水復至,民賴以免。 隄,役甚棘。 江軍節度使、開府儀同三司,封康國公,爲北京留守。 二年,請老,以司空、檢校太尉致仕。 元豐元年,拜建雄軍節度使、知定州。 終言:「功必不成,徒耗費國力,而使<br />
魏人流徙,非計也。」三奏,<br />
訖罷之。 明年,卒,年七十七。贈太傅,諡曰獻肅 入爲西太一宮使。 河決小吳,都水議傍魏城鑿渠東趨金 六年, 知河南府。 哲宗立,更鎭 夏,大雨

絳臨事果敢,不爲後慮。好延接士大夫,數薦司馬光可用,終以黨王安石復得政,

淸議少之。

官至集賢殿修撰、知河中府,卒。 子宗師,字傳道,以父任歷州縣職。 初,宗師在神宗朝,數賜對,常弗忍去親側,屢辭官不拜, 既登第,王安石薦爲度支判官、提舉河北常平。

陽脩薦爲檢討、知太常禮院。 宰相薦其好古嗜學, 韓維字持國。 以進士奏名禮部,方億輔政,不肯試大廷,受蔭入官。父沒後,閉門不 安於靜退,召試學士院,辭不就。 禮官議給享東向位,維請虛室以待太祖。 富弼辟河東幕府,史館修撰歐 温成后立廟用樂,

建,宜日榮靈。 維以爲不如禮,請一切裁去。 詔諡曰恭,維曰:「責難於君謂之恭,執中何以得此?」議訖不行,乞罷禮院。 議陳執中諡,以爲張貴妃治喪皇儀殿、追册位號,皆執中所

以祕閣校理通判涇州

納采、問名之義,以禮成之,不宜苟取華色而已。」 孝友聰明,動履法度,方嚮經學,以觀成德。 拱 容,皆陳其節。 手稱善。 神宗 對准陽郡王、潁王,維皆爲記室參軍。 聞維引疾請郡,上章留之。 **嘗與論天下事,語及功名。** 時禁中遣使泛至諸臣家,爲王擇妃。 維曰:「聖人功名,因事始見,不可有功名心。」王 今卜族授室,宜歷選勳望之家,蓮擇淑媛,考古 王每事咨訪,維悉心以對,至拜起進趨之 維上疏曰:「王

左、右史闕,英宗訪除授例,執政曰:「用館閣久次及進士高第者。」帝曰:「第擇人,不必 列 餯 第 七 + 刀口 韓 維 〇三〇五

閣者 也。 之義,窮仁義之道,究成敗之原。今禮制終畢〔代〕,臣下傾耳以聽玉音,陛下之言,此其時 專 取 臣請執筆以俟。」進知制誥、知通進銀臺司 高科。」執 陛下燕閒之所也。 政以維對,遂同修起居注、侍邇英講。 侍於側者, 皆獻納論思之臣。 帝初免喪,簡默不言。維上疏 陳於前 者, 非經 則 史。 可 以博容訪 曰:「邇英

門待罪。 退二近臣,而衆莫知其所謂,自此誰敢盡忠者?」 批答不合旨,出補郡。維言:「鎭所失只在文字,當涵容之。前黜錢公輔,中外以爲太重,連 請追還前詔,令百官詳議,以盡人情;復誨等職任,以全政體。」旣而責命不由門下,維 一罷黜御史,事關政體,而不使有司與聞,紀綱之失,無甚於此。乞解銀臺司。」不從,遂闔 御 一史呂海等以濮議得罪,維諫日:「海等審議守職, 有韶舉臺官二人,維言:「呂誨、范純仁有已試之效,願復其職。」翰林學士范鎭作 不過欲陛下盡如先王之法而 止爾。 又

事 ,最爲失體。天下大事不可猝爲,人君設施,自有先後。」因釋滕文公問孟子居喪之禮,推 潁 |王爲皇太子,兼右庶子。神宗卽位,維進言:「百執事各有職位,當責任,若代之行

後世禮文之變,以伸規諷,帝皆嘉納。 除龍圖閣直學士。

若其非是,安得止罷臺職。今爲學士,是遷也。」參知政事吳奎論陷事,出知青州。 御 史中丞王陶彈宰相韓琦爲跋扈,罷爲翰林學士。 維言:「中丞之言是, 宰相安得無

言進退大臣,不當如是。 一者理難 並行,此與王陶罷中丞而加學士何以異?」章上,奎還就職。 韶遷奎官。 維又言:「執政罷免,則爲降黜;今復遷官,則爲褒進。 維援前言求去,知汝

州。數月,召兼侍講、判太常寺。

定大亂,子孫遵業,爲宋太祖,無可議者。僖祖雖爲高祖,然仰迹功業,非有所因,若以所 事稷、契事之,懼有所未安,宜如故便。」王安石方主初議,持不行。 初,僖祖主已遷,及英宗祔廟,中書以爲僖祖與稷、契等,不應毀其廟。 維言:「太祖戡

人,孔文仲對策入等,以切直罷歸。維言:「陛下毋謂文仲爲一賤士,黜之何損。 亦惡其言保甲事,復使爲開封。 解體,忠良結舌,阿諛苟合者將窺隙而進,爲禍不細。」安石益惡之。 「維、充以文學進,及任煩劇,而皆稱職,可謂得人矣。」兼侍讀學士,充羣牧使。 熙寧二年,遷翰林學士、知開封府。 始分置八廂決輕刑,轂下淸肅。時吳充爲三司使,帝曰: 明年, 爲御史中丞, 以兄|絳在樞府, 力辭之。 考試制舉 臣恐賢俊

進,非臣之願也。」遂出知襄州,改許州 請郡。帝曰:「卿東宮舊人,當留以輔政。」對曰:「使臣言得行,賢於富貴;若緣攀附舊恩以 樞密使文彥博求去,帝曰:「密院事劇,當除韓維佐卿。」明日,維奏事殿中,以言不用,

七年二月,召爲學士承旨。 入對,帝曰:「天久不雨, 朕日夜焦勞,奈何?」維曰:「陛下

傳

七十四

維

於殺人也。」上感悟,卽命惟草詔求直言。其略曰:「意者聽納不得於理與?獄訟非其 臛 旨體量市易、免行利病,權罷方田、保甲,是日乃雨。 賦斂失其節與?忠言讜論鬱於上聞,而阿諛壅蔽以成其私者衆與?」詔出,人情大悅。 稅,寬裕逋負,以救愁苦之民,則遲遲而不肯發。 疏曰:「近畿內諸縣,督索青苗錢甚急,往往鞭撻取足,至伐桑爲薪以易錢貨,旱災之際,重 憂閔旱災,損膳避殿,此乃舉行故事,恐不足以應天變。 此苦。 若夫動甲兵,危士民,匱財用於荒夷之地,朝廷處之不疑,行之甚銳。 望陛下奮自英斷行之,過於養人, 當痛自責己,廣求直言。」退,又上 至於蠲除租 公情與? 猶 **添過** 有

會鞏當制,稱其純明亮直,帝令改命詞。維知帝意,請提舉嵩山崇福宮。 |安石罷,會降入相,加端明殿學士、知河陽,復知許州。 帝幸舊邸,進資政殿學士。

勞困息; 則 思通。誠能常以利民爲本,則民富;常以憂民爲心,則民樂;賦役非人力所堪者去之,則 帝崩,赴臨闕庭。宣仁后手詔勞問,維對曰:「人情貧則思富,苦則思樂,因則思息, 法禁非人情所便者蠲之,則鬱塞通。 推此而廣之,盡誠而行之,則子孫觀陛下之

之師。 未幾,起知陳州,未行,召兼侍讀,加大學士。嘗言:「先帝以夏國主秉常廢,故興問罪 今旣復位,有蕃臣禮,宜還其故地。」因陳兵不可不息者三,地不可不棄者五。又言:

德,不待教而成矣。」

以

迎

列

傳 第

立; 罷抃,寢向與永年之命,而正志聰罪。遷侍御史、度支判官,出爲兩浙、淮南轉運使,移 輒 上 不執親喪。 畫旨除爲眞; 一聽持服。 無以繫天下心,此 韓縝 夏諒祚死, 字玉 爲殿中侍御史。 紅建言:「三年之服,古今通制; 汝。 子秉常嗣, 遣使求封册。 劉永年以外戚除防禦使, 登 陰盛陽微之應。」詞極 進 土 第, 參知政事孫抃持祿充位; 簽書南京判官。 朝廷方責夏人不修職貢,欲擇人詰其使。 剴切。 內侍史志聰私役皇城親從: 晉襄衰墨從戎, 仁宗以水災求直言, 劉沆薦其才,命編 權陝西轉運副使薛向 事出 一時。」遂著令, 修 緘 三班 上 **縝皆極論之。** 疏 敕。 赴 闕, 前 「今國本未 自崇 此 |縝適 樞 河北 班 武 帝爲 密院 以 臣

辭, 以訴,坐落職,分司南京。 舍人院。以兄終執政,改集賢殿修撰、鹽鐵副使,以天章閣待制知秦州 傳勍被酒,誤隨入州宅,與侍妾遇,愼怒,令軍校以鐵裹杖箠殺之。 知 瀛 神宗命之往。 州 紅至驛問罪,使者引服,迨夜,奏上。帝喜,改使陝西 秦人語曰:「寧逢乳虎,莫逢玉汝。」其暴酷如此。 久之,還待制、 勍妻持血衣, 撾登聞鼓 入知審官 嘗宴客夜歸,指使 西院、直

金帶 知 開 寧七年, ,爲樞密都承旨,還龍圖閣直學士。元豐五年,官制行,易太中大夫、同知樞密,進知 封 府 禧 遼使蕭禧來議代北地界。 再至,復館之。 韶乘驛詣河東,與禧分畫, 召縝館客,遂報聘,令持圖牒致遼主,不克見而 以分水嶺爲界。 復命, 賜襲

院事。

以訪輝,縝曰:「遵惠爲太后從父,避者,中書郞璪之弟; 君臣各私其親,何以示天下?」乃止。 其姦狀,由是東朝及外廷悉知之。 哲宗立,拜尚書右僕射兼中書侍郎。 確使還,欲以其屬高瓊惠、張璡、韓宗文爲美官。 首相蔡確與章惇謀誣東朝, 宗文,臣姪也。 及確爲 今擢用非次,則是 山陵使, 宣仁后 |編暴

昌府。 子太保致仕。 六百里(+)以遺契丹,邊人怨之切骨,不可使居相位。 元祐元年, 移永興、河南,拜安武軍節度使、知太原府,易節奉寧軍。 紹聖四年卒,年七十九。 御史中丞劉擊、諫官孫覺蘇轍王覿, 贈司空,諡曰莊敏 論與才鄙望輕,在先朝爲奉使, 章數十上,罷爲觀文殿大學士 請老,爲西太一宮使,以太 知頻 割地

|縝 外事莊重,所至以嚴稱。 雖出入將相而寂無功烈,厚自奉養,世以比晉何曾云。

宗武。

雖墓木亦不免,父老遮道泣,宗武入府白罷之。 事 ,有微漸而不可不察者五:大臣不畏公論,小臣趨利附下,一也。 宗武,第進士,韓宗彥鎭瀛州,辟爲河間令。值 徽宗卽位,爲秘書丞,因日食上疏言:「近世 河溢,增隄護城,吏率兵五百伐材近郊, 人主怠於政事,威柄下

列傳

以弊民力, 移,怨讟歸上,二也。 還威柄,敷言奏功,考察名實,不以侍御之好、鍾鼓之娛爲樂。 執政大臣,人懷異意,排去舊怨,以立新黨,徒爲紛紛,無憂國忘家之慮。 正 士: 黜廢, 神宗厲精不息,以舉天下之事:皆所宜法。」不報。 四也。 耆老殲亡, 旋起大獄, 害及善類。文章號令, 衰於前世。 歲穀不登,倉庾空竭,民人流亡,盜賊數起,五 左右無輔拂之士,守邊無禦侮之臣,三也。 仁祖惻怛至誠,以收天下之 也。 開境土以速邊患,耗賦財 根治朋黨, 大河決溢,饑饉荐臻。 誠願躬攬權綱,收 追復私怨,

救,乃已。 貶秩,罷歸。 正古人所戒也。」疏入,皇太后見之,怒曰:「是皆內侍數輩所爲爾。」欲盡加罰, 取索不已,播之于外,懼損聖德。 **丐外,爲淮南轉運判官。** 哲宗將祔廟,中旨索省中書畫甚急。 明日,太后對宰相獎歎,令俟諫官員關卽用之。 久之,蔡京欲以知潁州。 前使者貸上供錢,禁庭遣使來索。 陛下踐祚,如日初升,當講劘典訓,開廣聖學, 帝語祕書事,原不敢復言,遂致仕。 宗武言:「先帝祔廟,陛下哀慕方深,而丹青之玩, **蕁除都官員外郎,改開封府** 宗武奏具狀,詞極 官累太中大夫, 好玩易志, 帝委曲 鯁切,坐 推 申

年八十二卒。

攟人小過,而君子知其後必大,皆盛德事也。 論曰:王稱(云)曰:「昔袁安未嘗以贓罪鞫人,史氏以其仁心,足以覃乎後昆。 憶有子位公府,而行各有適。 解適於同,維適 韓億 不悅

於正,縝適於嚴。嗚呼,維其賢哉!」

## 校勘記

忠憲 原作「忠獻」,據隆平集卷七本傳、張方平樂全集卷三七韓億神道碑銘改。

=綱尚書水部員外郎 據本段文字,疑卷目「韓億子綜」之「子」下當有「綱」字。

= 入內都都知王守忠無判內侍省 皇祐 諫官韓絳言 五年九月「壬辰、入內都都知、延福宮使、武信軍留後王守忠爲入內內侍省、內侍省都都知、 ··『宦者銀判二省,國朝所未有也。』」宋會要職官三六之一〇,記王守忠除官事略同。 「知」上一「都」字原脫,「侍」原作「行」。 按長編卷一七五說,

據補改。

命絳安撫 會要職官 河北 四一之九一。 「安撫」原作「宣撫」,按嘉祐元年六月,韓絳以知制誥爲河北體量安撫使,見宋 東都事略卷五八本傳亦作「以絳安撫河北」,據改。

(宝) 龍 圖 閣 直 學 士 「直」字原脫, 據東都事略卷五八本傳、 范純仁范忠宣公集卷一五韓終墓誌**銘** 

補。

列傳第七十四 校勘記

(き) 六百里 **今禮制終畢** 按琬琰集下編卷二〇韓太保縝傳作「七百里」、東都事略卷五八本傳、徐自明字輔編年 「禮制」原作「體制」,據東都事略卷五八、琬琰集下編卷一七韓侍郎維傳改。

(元) 王稱 錄卷 九引孫覺等奏疏都作「七百餘里」。 原作「王偁」,據宋會要崇儒五之四〇、東都事略卷五八韓億傳論改。

一〇三一四

